



UNIVERSITY OF TORONTO



3 1761 00004232 5

at an







**T. LIVII PATAVINI
HISTORIARUM**

TOMUS II.



LIB. IX.—XXVI.

THE UNIVERSITY OF CHICAGO

HISTORICAL MUSEUM

CHICAGO, ILL.

1922-23

17008 DE 2 LIVY
(T. LIVII PATAVINI)

HISTORIARUM

QUÆ SUPERSUNT,

EX RECENSIONE

ARN. DRAKENBORCHII.

CUM INDICE RERUM.

ACCEDUNT

GENTES ET FAMILIÆ ROMANORUM,

AUCTORE R. STREINNIO.

NECNON

ERNESTI GLOSSARIUM LIVIANUM,

AUCTIUS NONNIHIL, ET IN LOCIS QUAMPLURIMIS
EMENDATUM.

TOMUS II.

OXONII,

E TYPOGRAPHEO CLARENDONIANO.

MDCCCXIII.

1888 Dec

HISTORIAM
T. CIVIL PATRIAM
AN. DRAGONORUM
CUM IMPERIO

594

PA

8

6452

A2

1800

t. 2

T. LIVII PATAVINI HISTORIARUM

AB URBE CONDITA

LIBRI.

EPITOME LIBRI IX

T. VETURIUS et Sp. Postumius apud Caudinas Furcas, deducto in locum artum exercitu, quum nulla spes evadendi esset, fœdere cum Samnitibus facto, et sexcentis equitibus Romanis obsidibus datis, ita exercitum abduxerunt, ut omnes sub jugum mitterentur. Idemque, auctore Sp. Postumio consule, (qui in senatu suaserat, ut eorum deditione, quorum culpa tam deforme fœdus ictum erat, publica fides liberaretur) cum duobus tribunis plebis et omnibus, qui fœdus spoponderant, dediti Samnitibus, non sunt recepti: nec multo post, fuis a Papirio Cursore Samnitibus et sub jugum missis, receptisque sexcentis equitibus Romanis, qui obsides dati erant, pudor prioris flagitii abolitus est. Tribus duæ adjectæ sunt, Ufentina et Falerina. Suessa et Pontia coloniae deductæ sunt. Ap. Claudius censor aquam perduxit: viam stravit, quæ Appia vocata est: libertinorum filios in senatum legit. Ideoque, quoniam is ordo videbatur inquinatus indignis, sequen-

VOL. II.

B

tis anni consules in senatu legendo observaverunt, quemadmodum ante per proximos censores observatum fuerat. Res præterea contra Apulos, Etruscos, Umbros, Marsos, Pelignos, Æquos et Samnites, quibus fœdus erat restitutum, prospere gestas continet. Flavius scriba, libertino patre natus, ædilis curulis fuit per forensem factionem creatus: quæ quum comitia et campum turbaret, et in iis propter nimias vires dominaretur, a Q. Fabio censore in quatuor tribus redacta est, quas urbanas adpellavit. Eaque res Fabio Maximo nomen dedit. In hoc libro mentio Alexandri Magni, qui temporibus his fuit; et, æstimatis populi Romani viribus, quæ tunc erant, conligitur, si Alexander in Italiam trajecisset, non tam facilem ei victoriam de populo Romano fore, quam de iis gentibus, quas ad Orientem imperio suo subjecerat.

T. LIVII PATAVINI

LIBER IX.

SEQUITUR hunc annum nobilis clade Romana U. C. 433.
Caudina pax, T. Veturio Calvino, Sp. Postumio A. C. 319.
consulibus. Samnites eo anno imperatorem C. Pontium, Herennii filium, habuerunt, patre longe prudentissimo natum, primum ipsum bellatorem ducemque. Is, ubi legati, qui ad dedendas res missi erant, pace infecta redierunt, *Ne nihil actum, inquit, hac legatione censeatis, expiatum est, quidquid ex fœdere rupto irarum in nos cœlestium fuit. Satis scio, quibuscumque Diis cordi fuit, subigi nos ad necessitatem dedendi res, quæ a nobis ex fœdere repetitæ fuerant, iis non fuisse cordi tam superbe ab Romanis fœderis expiationem spretam. Quid enim ultra fieri ad placandos Deos mitigandosque homines potuit, quam quod nos fecimus? Res hostium in præda captas, quæ belli jure nostræ videbantur, remisimus: auctores belli, quia vivos non potuimus, perfunctos jam fato dedidimus: bona eorum, ne quid ex contagione noxæ remaneret penes nos, Romam portavimus. Quid ultra tibi, Romane, quid fœderi, quid Diis arbitris fœderis debeo? quem tibi tuarum irarum, quem meorum suppliciorum judicem feram, neminem, neque populum, neque privatum, fugio. Quod si nihil cum potentiore juris humani re-*

Pontii Samnitis oratio.

U. C. 439. *linquitur mopi, at ego ad Deos vindices intolerandæ*
 A. C. 319. *superbiæ confugiam; et precabor, ut iras suas vertant*
in eos, quibus non suæ redditæ res, non alienæ adcu-
mulatæ satis sint; quorum sævitiam non mors noxio-
rum, non deditio exanimatorum corporum, non bona
sequentia domini deditionem exsatient. Placari ne-
queunt, nisi hauriendum sanguinem laniandaque vis-
cera nostra præbuerimus. Justum est bellum, Samni-
tes, quibus necessarium; et pia arma, quibus nulla nisi
in armis relinquitur spes. Proinde, quum rerum hu-
manarum maximum momentum sit, quam propitiis
rem, quam adversis agant Diis, pro certo habete,
priora bella adversus Deos magis, quam homines, ges-
sisse; hoc, quod instat, ducibus ipsis Diis gesturos.

Samnites
ad Cau-
dium ca-
stra lo-
cant.

II. Hæc, non læta magis, quam vera, vaticinatus,
 exercitu educto, circa Caudium castra, quam potest
 occultissime, locat: inde ad Calatiam, ubi jam con-
 sules Romanos castraque esse audiebat, milites de-
 cem pastorum habitu mittit: pecoraque diversos,
 alium alibi, haud procul Romanis pascere jubet
 præsidiis: ubi inciderint in prædatores, ut idem
 omnibus sermo constet, *legiones Samnitium in Apu-*
lia esse, Luceriam omnibus copiis circumsedere: nec
procul abesse, quin vi capiant. Jam is etiam rumor
 ante, de industria vulgatus, venerat ad Romanos;
 sed fidem auxere captivi, eo maxime, quod sermo
 inter omnes congruebat. Haud erat dubium, quin
 Lucerinis opem Romanus ferret, bonis ac fidelibus
 sociis; simul ne Apulia omnis ad præsentem ter-
 rorem deficeret: ea modo, qua irent, consultatio
 fuit. Duæ ad Luceriam ferebant viæ; altera præter
 oram superi maris patens apertaque, sed, quanto
 tutior, tanto fere longior; altera per Furculas Cau-

dinas brevior. Sed ita natus locus est: saltus duo U. C. 433.
A. C. 319. alti angusti silvosique sunt, montibus circa perpetuis inter se juncti: jacet inter eos satis patens clausus in medio campus, herbidus aquosusque, per quem medium iter est. Sed ante, quam venias ad eum, intrandæ primæ angustiae sunt: et aut eadem, qua te insinuaveris, retro via repetenda; aut, si ire porro pergas, per alium saltum artio-remque evadendum. In eum campum via alia per cavam rupem, Romani, demisso agmine, quum ad alias angustias protinus pergerent, septas dejectu arborum, saxorumque ingentium objacentem molem invenere: quum fraus hostilis adparuisset, præsi- Capti
fraude loci
Romani. dium etiam in summo saltu conspicitur. Citati inde retro, qua venerant, pergunt repetere viam: eam quoque clausam sua obice armisque inveniunt: sistunt inde gradum sine ullius imperio: stuporque omnium animos, ac velut torpor quidam insolitus membra tenet: intuentesque alii alios (quum alterum quisque compotem magis mentis ac consilii ducerent) diu immobiles silent. Deinde ubi prætoriam consulum erigi videre, et expedire quosdam utilia operi, quamquam ludibrio fore munientes, perditis rebus ac spe omni adempta, cernebant; tamen, ne culpam malis adderent, pro se quisque, nec hortante ullo nec imperante, ad muniendum versi, castra propter aquam vallo circumdant; sua ipsi opera laboremque irritum (præterquam quod hostes superbe increpabant) cum miserabili confessione eludentes. Ad consules mæstos, ne advocantes quidem in consilium, (quando nec consilio nec auxilio locus esset) sua sponte legati ac tribuni conveniunt: militesque ad prætorium versi, open, quam vix

U. C. 439. Dii immortales ferre poterant, ab ducibus expos-
A. C. 319. cunt.

Consilium
expedire
non pos-
sunt.

III. Querentes magis, quam consultantes, nox obpressit: quum pro ingenio quisque fremerent; alius, *per obices viarum*; alius, *per adversa montium, per silvas, qua ferri arma poterunt, eamus. Modo ad hostem pervenire liceat, quem per annos jam prope triginta vincimus; omnia æqua et plana erunt Romano, in perfidum Samnitum pugnanti*: alius, Quo, aut qua eamus? Num montes moliri sede sua paramus? Dum hæc imminebunt juga, qua tu ad hostem venies? *Armati, inermes, fortes, ignavi, pariter omnes capti atque victi sumus. Ne ferrum quidem ad bene moriendum oblaturus est hostis: sedens bellum conficiet.* His in vicem sermonibus, qua cibi, qua quietis inmemor, nox traducta est. Ne Samnitibus quidem consilium in tam lætis subpetebat rebus: itaque universi Herennium Pontium, patrem imperatoris, per literas consulendum censent. Jam is gravis annis non militaribus solum, sed civilibus quoque, abscesserat muneribus: in corpore tamen adfecto vige-
bat vis animi consiliique. Is, ubi accepit, ad Furculas Caudinas inter duos saltus clausos esse exercitus Romanos, consultus ab nuncio filii, censuit, omnes inde quam primum inviolatos dimittendos: quæ ubi spreta sententia est, iterumque, eodem re-
meante nuncio, consulebatur, censuit, ad unum omnes interficiendos. Quæ ubi tam discordia inter se, velut ex ancipiti oraculo, responsa data sunt; quamquam filius ipse in primis jam animum quoque patris consenuisse in adfecto corpore rebatur; tamen consensu omnium victus est, ut ipsum in consilium ad-
ciret. Nec gravatus senex plaustro in castra dicitur

Herennii
discordia
responsa.

advectus, vocatusque in consilium ita ferme locutus U. C. 433.
A. C. 319.
 esse, ut nihil sententiæ suæ mutaret; causas tantum adjiceret: *Priore se consilio, quod optimum duceret, cum potentissimo populo per ingens beneficium perpetuam firmare pacem amicitiamque: altero consilio in multas ætates, quibus, amissis duobus exercitiis, haud facile receptura vires Romana res esset, bellum differre: tertium nullum consilium esse. Quum filius alique principes percunctando exsequerentur, Quid si media via consilii caperetur; ut et dimitterentur incolumes, et leges iis jure belli victis inponerentur? ista quidem sententia, inquit, ea est, quæ neque amicos parat, neque inimicos tollit. Servate modo, quos ignominia irritaveritis: ea est Romana gens, quæ victa quiescere nesciat. Vivet semper in pectoribus illorum, quidquid istuc præsens necessitas inusserit; neque eos ante multiplices pœnas expetitas a vobis quiescere sinet.*

IV. Neutra sententia accepta. Herennius domum e castris est avectus. Et in castris Romanis quum frustra multi conatus ad erumpendum capti essent, et jam omnium rerum inopia esset; victi necessitate legatos mittunt, qui primum pacem æquam peterent: si pacem non inpetrarent, uti provocarent ad pugnam. Tum Pontius, *debellatum esse*, Leges a Pontio dictæ Romanis. respondit: *et, quoniam ne victi quidem ac capti fortunam fateri scirent, inermes cum singulis vestimentis sub jugum missurum: alias conditiones pacis æquas victis ac victoribus fore; si agro Samnitium decederetur, coloniæ abducerentur, suis deinde legibus Romanum ac Samnitum æquo fœdere victurum. His conditionibus peratum se esse fœdus cum consulibus ferire: si quid eorum displiceat, legatos redire ad se vetuit.*

U. C. 433. Hæc quum legatio renunciaretur, tantus gemitus
 A. C. 319. omnium subito exortus est, tantaque mœstitia incessit, ut non gravius accepturi viderentur, si renunciaretur, omnibus eo loco mortem obpetendam esse. Quum diu silentium fuisset, nec consules aut pro fœdere tam turpi, aut contra fœdus tam necessarium hiscere possent; tum L. Lentulus, qui tum princeps legatorum virtute atque honoribus erat, *Patrem meum, inquit, consules, sæpe audiui memorantem, se in Capitolio unum non fuisse auctorem senatui redimendæ auro a Gallis civitatis, quando nec fossa valloque ob ignavissimo ad opera ac muniendum hoste clausi essent; et erumpere si non sine periculo magno, tamen sine certa perniciæ possent. Quod si, ut illis decurrere ex Capitolio armatis in hostem licuit, (quo sæpe modo obsessi in obsidentes eruperunt) ita nobis a quo aut iniquo loco dimicandi tantummodo cum hoste copia esset, non mihi paterni animi indoles in consilio dando deesset. Equidem mortem pro patria præclaram esse fateor: et me vel devovere pro populo Romano legionibusque, vel in medios me inmittere hostes paratus sum. Sed hic patriam video, hic quidquid Romanarum legionum est: quæ, nisi pro se ipsis ad mortem ruere volunt, quid habent, quod morte sua servant? Tecta urbis, dicat aliquis, et mœnia, et eam turbam, a qua urbs incolitur: immo, hercule, produntur ea omnia, deleta hoc exercitu, non servantur. Quis enim ea tuebitur? Inbellis videlicet atque inermis multitudo? tam, hercule, quam a Gallorum impetu defendit. An a Veïis exercitum Camillumque ducem inplorabunt? Hic omnes spes opesque sunt, quas servando patriam servamus: dedendo ad necem patriam deserimus ac prodimus. At fœda atque ignominiosa deditio est. Sed ea*

Lentulo
 suadente,

caritas patriæ est, ut tam ignominia eam, quam morte nostra, si opus sit, servemus. Subeat ergo ista, quantumque est, indignitas; et pareatur necessitati, quam ne Dii quidem superant. Ite, consules, redimite armis civitatem, quam auro majores vestri redemerunt. U. C. 433. A. C. 319.

V. Consules profecti ad Pontium in conloquium, Accipium. quum de fœdere victor agigaret, negarunt, injussu^{tur.} populi fœdus fieri posse: nec sine fecialibus ceremoniæque alia sollemni. Itaque non, ut vulgo credunt, Claudiusque etiam scribit, fœdere pax Caudina, sed per sponsionem, facta est. Quid enim aut sponsoribus in fœdere opus esset aut obsidibus, ubi precatione res transigitur? *per quem populum fiat, quo minus legibus dictis stet, ut eum ita Jupiter feriat, quemadmodum a fecialibus porcus feriat.* Sponponderunt consules, legati, quæstores, tribuni militum; nominaque omnium, qui sponponderunt, exstant: ubi, si ex fœdere acta res esset, præterquam duorum fecialium, non exstarent; et propter necessariam fœderis dilationem obsides etiam sexcenti equites imperati, qui capite luerent, si pacto non staretur. Tempus inde statutum tradendis obsidibus exercituque inermi mittendo. Redintegavit luctum in castris consulum adventus, ut vix ab iis abstinerent manus, quorum temeritate in eum locum deducti essent; quorum ignavia fœdius inde, quam venissent, abituri: illis non ducem locorum, non exploratorem fuisse: belluarum modo cæcos in foveam missos. Alii alios intueri, contemplari arma mox tradenda, et inermes futuras dexteras, obnoxiaque corpora hosti: proponere sibimet ipsi ante oculos jugum hostile, et ludibria victoris, et vultus superbos, et per armatos inermium iter. Inde fœdi ag-

U. C. 433. minis miserabilem viam, per sociorum urbes reditum
 A. C. 319. in patriam ac parentes, quo sæpe ipsi majoresque
 eorum triumphantes venissent. Se solos sine vul-
 nere, sine ferro, sine acie victos : sibi non stringere
 licuisse gladios, non manum cum hoste conferre :
 sibi nequidquam arma, nequidquam vires, nequid-
 quam animos datos. Hæc frementibus hora fatalis
 ignominie advenit, omnia tristiora experiundo fac-
 tura, quam quæ præceperant animis. Jam primum
 cum singulis vestimentis inermes extra vallum exire
 jussi, et primi traditi obsides, atque in custodiam
 abducti. Tum a consulibus abire lictores jussi, pa-
 ludamenta que detracta ; tantam inter ipsos, qui,
 paullo ante eos exsecrantes, dedendos lacerandosque
 censuerant, miserationem fecit, ut, suæ quisque
 conditionis oblitus, ab illa deformatione tantæ ma-
 jestatis, velut ab nefando spectaculo, averteret
 oculos.

VI. Primi consules prope seminudi sub jugum
 missi : tum, ut quisque gradu proximus erat, ita ig-
 nominie objectus : tum deinceps singulæ legiones.
 Circumstabant armati hostes, exprobrantes eluden-
 tesque : gladii etiam plerisque intentati : et vulne-
 rati quidam necatique, si vultus eorum indignitate
 rerum acrior victorem obfendisset : ita traducti sub
 jugum, et, quod pene gravius erat, per hostium
 oculos. Quum e saltu evasisent, etsi, velut ab in-
 feris extracti, tum primam lucem adspicere visi sunt,
 tamen ipsa lux ita deforme intuentibus agmen omni
 morte tristior fuit. Itaque, quum ante noctem Ca-
 puam pervenire possent, incerti de fide sociorum, et
 quod pudor præpediebat, circa viam haud procul
 Capua omnium egeni corpora humi prostraverunt.

Sub ju-
 gum mit-
 tuntur Ro-
 mani.

Capuam
 veniunt.

Quod ubi est Capuam nunciatum, evicit miseratio U. C. 433.
 justa sociorum superbiam ingenitam Campanis: A. C. 319.
 confestim insignia sua consulibus, fasces, lictores,
 arma, equos, vestimenta, commeatus militibus be-
 nigne mittunt: et venientibus Capuam cunctus se-
 natus populusque, obviam egressi, justis omnibus
 hospitalibus, privatisque et publicis funguntur of-
 ficiis: neque illis sociorum comitas, vultusque be-
 nigni, et adloquia non modo sermonem elicere, sed
 ne, ut oculos quidem adtollerent, aut consolantes
 amicos contra intuerentur, efficere poterant. Adeo
 super mœrorem pudor quidam fugere conloquia et
 cœtus hominum cogebat. Postero die quum juvenes
 nobiles, missi a Capua, ut proficiscentes ad finem
 Campanum prosequerentur, revertissent; vocatique
 in curiam percunctantibus majoribus natu, *multo*
sibi mœstiores et abjectioris animi visos, referrent;
adeo silens, ac prope mutum agmen incessisse: tacere
indolem illam Romanam, ablatosque cum armis ani-
mos: non reddere salutem, non salutantibus dare re-
sponsum, non hiscere quemquam præ metu potuisse,
tamquam ferentibus adhuc cervicibus jugum, sub quo
emissi essent. Habere Samnites victoriam, non præcla-
ram solum, sed etiam perpetuam: cepisse enim eos non
Romam, sicut ante Gallos, sed, quod multo bellicosius
fuerit, Romanam virtutem ferociamque.

VII. Quum hæc dicerentur audirenturque, et de-
 ploratum pene Romanum nomen in concilio socio-
 rum fidelium esset; dicitur Ofilius Calavius, Ovii Ofilii de
 filius, clarus genere factisque, tum etiam ætate ve- Romano-
 rendus, longe aliter se habere rem dixisse: *Silentium* rum silen-
illud obstinatum, fixosque in terram oculos, et surdas tio judi-
ad omnia solatia aures, et pudorem intuendæ lucis, in- cium.

U. C. 433. *gentem molem irarum ex alto animo cientis indicia*
 A. C. 319. *esse: aut Romana se ignorare ingenia, aut silentium*
illud Samnitibus flebiles brevi clamores genitusque ex-
citaturum; Caudinæque pacis aliquanto Samnitibus,
quam Romanis, tristiorem memoriam fore. Quippe suos
quemque eorum animos habiturum, ubicumque congres-
suri sint: saltus Caudinos non ubique Samnitibus fore.
 Jam Romæ etiam sua infamis clades erat. Obsesso-

Luctus Ro-
mæ.

primum audierunt: tristior deinde ignominiosæ pa-
 cis magis, quam periculi, nuncius fuit. Ad famam
 obsidionis delectus haberi cœptus erat: dimissus
 deinde auxiliorum adparatus, postquam deditionem
 tam fœde factam acceperunt: extemploque sine ulla
 publica auctoritate consensum in omnem formam
 luctus est. Tabernæ circa forum clausæ, justitium-
 que in foro sua sponte cœptum prius, quam in-
 dictum: lati clavi, annuli aurei positi; pene mœ-
 stior exercitu ipso civitas esse: nec ducibus solum
 atque auctoribus sponsoribusque pacis irasci, sed
 innoxios etiam milites odisse, et negare urbe tectisque
 accipiendos. Quam concitationem animorum fre-
 git adventus exercitus, etiam iratis miserabilis: non
 enim tamquam in patriam revertentes ex insperato
 incolumes, sed captorum habitu vultuque ingressi
 sero in urbem, ita se in suis quisque tectis abdide-
 runt, ut postero atque insequentibus diebus nemo
 eorum forum aut publicum adspicere vellet. Con-
 sules, in privato abditi, nihil pro magistratu agere,
 nisi quod expressum senatusconsulto est, ut dicta-
 torem dicerent comitiorum caussa. Q. Fabium Am-
 bustum dixerunt, et P. Ælium Pætum magistrum
 equitum: quibus vitio creatis, subfecti M. Æmilius
 Papus dictator, L. Valerius Flaccus magister equi-

Q. Fabius
dictator.

M. Æmi-
lius dicta-
tor.

tum. Nec per eos comitia habita: et, quia tæde-
 bat populum omnium magistratum ejus anni, res
 ad interregnum rediit. Interreges Q. Fabius Maxi-
 mus, M. Valerius Corvus: is consules creavit Q.
 Publilium Philonem et L. Papirium Cursorem ite-
 rum, haud dubio consensu civitatis, quod nulli ea
 tempestate duces clariores essent.

U. C. 433.

A. C. 319.

Interreg-
num.

U. C. 434.

A. C. 318.

VIII. Quo creati sunt die, eo (sic enim placuerat
 Patribus) magistratum inierunt, sollemnibusque se-
 natusconsultis perfectis, de pace Caudina retule-
 runt: et Publilius, penes quem fascēs erant, *Dic*
Sp. Postumi, inquit. Qui ubi surrexit, eodem illo
 vultu, quo sub jugum missus erat, *Haud sum igna-*
rus, inquit, *consules, ignominiae, non honoris causa*
me primum excitatum jussuque dicere, non tamquam
senatorem, sed tamquam reum qua infelicis belli, qua
ignominiosae pacis. Ego tamen, quando neque de
noxa nostra neque de pœna retulistis, omīssa defensione,
quæ non difficillima esset apud haud ignaros fortuna-
rum humanarum necessitatumque, sententiam de eo, de
quo retulistis, paucis peragam: quæ sententia testis
erit, mihine, an legionibus vestris pepercerim, quum
me seu turpi seu necessaria sponsione obstrinxi. Qua
tamen, quando injussu populi facta est, non tenetur
populus Romanus: nec quidquam ex ea, præterquam
corpora nostra debentur Samnitibus. Dedamur per
feciales nudi vinctique: exsolvamur religione populum,
si qua obligavimus; ne quid divini humanive obstet,
quo minus justum piumque de integro ineatur bellum.
Interea consules exercitum scribere, armare, educere
placet; nec prius ingredi hostium fines, quam omnia
justa in deditiōem nostram perfecta erunt. Vos, Dii
immortales, precor quæsoque, si vobis non fuit cordi,

Postumii
magnani-
ma sen-
tentia.

U. C. 434. *Sp. Postumium, T. Veturium consules cum Samnitibus*
 A. C. 318. *prosperè bellum gerere; at vos satis habeatis, vidisse nos sub jugum missos, vidisse sponsione infami obligatos, videre nudos vinctosque hostibus deditos, omnem iram hostium nostris capitibus excipientes. Novos consules legionesque Romanas ita cum Samnite gerere bellum velitis, ut omnia ante nos consules bella gesta sunt. Quæ ubi dixit, tanta simul admiratio miserationeque viri incessit omnes, ut modo vix crederent, illum eundem esse Sp. Postumium, qui auctor tam fœdæ pacis fuisset: modo miserarentur, quod vir talis etiam præcipuum apud hostes supplicium passurus esset ob iram diremtæ pacis. Quum omnes, laudibus modo prosequentes virum, in sententiam ejus pedibus irent; tentata paullisper intercessio est ab L. Livio et Q. Mælio, tribunis plebis: qui, neque exsolvi religione populum, aiebant, deditioe sua, nisi omnia Samnitibus, qualia apud Caudium fuissent, restituerentur: neque se pro eo, quod, spondendo pacem, servassent exercitum populi Romani, penam ullam meritos esse; neque ad extremum, quum sacrosancti essent, dedi hostibus violari posse.*

Postumii
 adversus
 tribb.
 oratio.

IX. Tum Postumius, *Interea dedite, inquit, profanos nos, quos salva religione potestis: dedetis deinde et istos sacrosanctos, quum primum magistratu abierint; sed, si me audiat, prius, quam dedantur, hic in comitio virgis cæsos, hanc jam ut intercalatæ penæ usuram habeant. Nam quod deditioe nostra negant exsolvi religione populum, id istos magis, ne dedantur, quam quia ita se res habeat, dicere, quis adeo juris fecialium expers est, qui ignoret? Neque ego inficias eo, Patres conscripti, tam sponsiones quam fœdera sancta esse apud eos homines, apud quos juxta divinas reli-*

giones fides humana colitur: sed injussu populi nego U. C. 434.
A. C. 318.
quidquam sanciri posse, quod populum teneat. An, si
eadem superbia, qua sponsionem istam expresserunt
nobis Samnites, cœgissent nos verba legitima dedentium
urbes nuncupare, deditum populum Romanum vos tri-
buni diceretis, et hanc urbem, templa, delubra, fines,
aquas, Samnitium esse? Omitto deditionem, quoniam
de sponsione agitur: quid tandem, si spoponderissemus,
urbem hanc relicturum populum Romanum? si incen-
surum? si magistratus, si senatum, si leges non habi-
turum? si sub regibus futurum? Dii meliora, inquis!
atqui non indignitas rerum sponsionis vinculum levat.
Si quid est, in quo obligari populus possit, in omnia
potest: et ne illud quidem, quod quosdam forsitan
moveat, refert, consul, an dictator, an prætor spopon-
derit. Et hoc ipsi etiam Samnites judicaverunt, quibus
non fuit satis consules spondere, sed legatos, quæstores,
tribunos militum spondere cœgerunt. Nec a me nunc
quisquam quæsiverit, quid ita spoponderem? quum id
nec consulis jus esset; nec illis spondere pacem, quæ
mei non erat arbitrii, nec pro vobis, qui nihil manda-
veratis, possem. Nihil ad Caudium, Patres conscripti,
humanis consiliis gestum est. Dii immortales et vestris
et hostium imperatoribus mentem ademerunt: nec nos
in bello satis cavimus; et illi male partem victoriam
male perdiderunt, dum vix locis, quibus vicerant, cre-
dunt, dum quocumque conditione arma viris in arma
natis auferre festinant. An, si sana mens fuisset, dif-
ficile illis fuit, dum senes ab domo ad consultandum
arcessunt, mittere Roman legatos? cum senatu, cum
populo, de pace ac fœdere agere? Triduum iter expedi-
tis erat: interea in induciis res fuisset, donec ab Romæ
legati aut victoriam illis certam, aut pacem adfer-

U. C. 434.
A. C. 318. *rent: ea demum sponsio esset, quam populi jussu spon-*
pondissemus. Sed neque vos tulissetis, nec nos sponpon-
dissemus: nec fas fuit alium rerum exitum esse, quam
ut illi, velut somnio latiore, quam quod mentes eorum
capere possent, nequidquam eluderentur: et nostrum ex-
ercitum eadem, quæ impedierat, fortuna expediret: va-
nam victoriam vanior irritam faceret pax; sponsio
interponeretur, quæ neminem, præter sponsorem, obli-
garet. Quid enim vobiscum, Patres conscripti, quid
cum populo Romano actum est? quis vos adpellare
potest? quis se a vobis dicere deceptum? hostis? an
civis? Hosti nihil sponpondistis: civem neminem spon-
dere pro vobis jussistis. Nihil ergo vobis nec nobiscum
est, quibus nihil mandastis; nec cum Samnitibus, cum
quibus nihil egistis. Samnitibus sponsores nos sumus,
rei satis locupletes: in id, quod nostrum est; in id,
quod præstare possumus, corpora nostra et animos; in
hæc sæviant, in hæc ferrum, in hæc iras acuant. Quod
ad tribunos adtinet, consulite, utrum præsens deditio
eorum fieri possit, an in diem differatur: nos interim,
T. Veturi, vosque ceteri, vilia hæc capita luendæ spon-
sionis feramus, et nostro supplicio liberemus Romana
arma.

X. Movit Patres conscriptos tum caussa, tum auctor; nec ceteros solum, sed tribunos etiam plebei, ut se in senatus dicerent fore potestate. Magistratu inde se extemplo abdicaverunt, traditique fecialibus cum ceteris Caudium ducendi. Hoc facto senatusconsulto, lux quædam adfulsisse civitati visa est. Postumius in ore erat; cum laudibus ad cœlum ferebant: devotioni P. Decii consulis, aliis claris facinoribus æquabant. *Emersisse civitatem ex obnoxia pace illius consilio et opera: ipsum se cruci-*

Sponsore,
pacis de-
duntur.

atibus et hostium iræ obferre, piaculæque pro populo Romano dare. Arma cuncti spectant et bellum. En umquam futurum, ut congregi armatis cum Samnite liceat? In civitate, ira odioque ardente, delectus prope omnium voluntariorum fuit: rescriptæ ex eodem milite novæ legiones, ductusque ad Caudium exercitus. Prægressi feciales, ubi ad portam venere, vestem detrahi pacis sponsoribus jubent, manus post tergum vinciri. Quum adparitor verecundia majestatis Postumium laxè vinciret, Quin tu, inquit, adducis lorum, ut justa fiat deditio? Tum, ubi in cœtum Samnitium et ad tribunal ventum Pontii est, A. Cornelius Arvina fecialis ita verba fecit: Quandoque hîc homines injussu populi Romani Quiritium fœdus ictum iri sponponderunt, atque ob eam rem noxam nocuerunt; ob eam rem, quo populus Romanus scelere inpio sit solutus, hosce homines vobis dedo. Hæc dicenti feciali Postumius genu femur, quanta maxime poterat vi, perculit, et clara voce ait, se Samnitem civem esse, illum legatum; fecialem a se contra jus gentium violatum; eo justius bellum gesturos.

XI. Tum Pontius, *Nec ego istam deditionem accipiam, inquit, nec Samnites ratam habebunt. Quin tu, Sp. Postumi, si Deos esse censes, aut omnia irrita facis, aut pacto stas? Samniti populo omnes, quos in potestate habuit, aut pro eis pax debetur. Sed quid ego te adpello, qui te captum victori, cum qua potes fide, restituïs? Populum Romanum adpello; quem si sponsionis ad Furculas Caudinas factæ pœnitet, restituat legiones intra saltum, quo septæ fuerunt. Nemo quemquam deceperit: omnia pro infecto sint: reci-*

Pontii non accipientis deditionem oratio.

U. C. 434. *piant arma, quæ per pactionem tradiderunt: redeant*
 A. C. 318. *in castra sua: quidquid pridie habuerunt, quam in*
conloquium est ventum, habeant: tum bellum et fortia
consilia placeant, tunc sponsio et pax repudietur. Ea
fortunat, iis locis, quæ ante pacis mentionem habuimus,
geramus bellum: nec populus Romanus consulum spon-
sionem, nec nos fidem populi Romani accusemus. Num-
quamne caussa defiet, cur victi pacto non stetis? Ob-
sides Porsenæ dedistis; furto eos subduxistis: auro ci-
vilitatem a Gallis redemistis; inter accipiendum aurum
cæsi sunt: pacem nobiscum pepigistis, ut legiones vo-
bis captas restitueremus; eam pacem irritam facitis,
et semper aliquam fraudi speciem juris inponitis. Non
probat populus Romanus ignominiosa pace legiones
servatas? pacem sibi habeat, legiones captas victori
restituatur: hoc fide, hoc fœderibus, hoc fecialibus cere-
moniis dignum erat. Ut tu quidem, quod petisti, per
pactionem habeas, tot cives incolumes; ego pacem,
quam hosti tibi remittendo pactus sum, non habeam:
hoc tu, A. Corneli, hoc vos, feciales, juris gentibus
dicitis? Ego vero istos, quos dedi simulatis, nec acci-
pio, nec dedi arbitror; nec moror, quo minus in civi-
tatem obligatam sponsione commissa, iratis omnibus
Dîis, quorum eluditur numen, redeant. Gerite bellum,
quando Sp. Postumius modo legatum fecialem genu
perculit. Ita Dii credent, Samnitem civem Postumium,
non civem Romanum esse, et a Samnite legatum Ro-
manum violatum: eo vobis justum in nos factum esse
bellum. Hæc ludibria religionum non pudere in lucem
proferre? et vix pueris dignas ambages senes ac con-
sulares fallendæ fidei exquirere? I, lictor, deme vin-
cula Romanis: moratus sit nemo, quo minus, ubi vi-

sum fuerit, abeant. Et illi quidem, forsitan et publica, sua certe liberata fide, ab Caudio in castra Romana inviolati redierunt.

U. C. 434.
A. C. 318.

XII. Samnitibus, pro superba pace infestissimum cernentibus renatum bellum, omnia, quæ deinde venerunt, non in animis solum, sed prope in oculis esse: et sero ac nequidquam laudare senis Pontii utraque consilia; inter quæ se media lapsos victoriæ possessionem pace incerta mutasse, et, beneficii et maleficii occasione amissa, pugnatuos cum eis, quos potuerint in perpetuum vel inimicos tollere, vel amicos facere: adeoque, nullodum certamine inclinati viribus, post Caudinam pacem animi mutaverant, ut clariorem inter Romanos deditio Postumium, quam Pontium incruenta victoria inter Samnites faceret: et geri posse bellum Romani pro victoria certa haberent, Samnites simul rebellasse et vicisse crederent Romanum. Inter hæc Satricani ad Samnites defecerunt, et Fregellæ colonia necopinato adventu Samnitium (fuisse et Satricanos cum iis satis constat) nocte occupata est: timor inde mutuus utrosque usque ad lucem quietos tenuit: lux pugnae initium fuit; quam aliquamdiu æquam, et quia pro aris ac focis dimicabatur, et quia ex tectis adjuvabat inbellis multitudo, tamen Fregellani sustinuerunt. Fraus deinde rem inclinavit, quod vocem audiri præconis passi sunt; *Incolumem abiturum, qui arma posuisset*: ea spes remisit a certamine animos, et passim arma jactari cœpta. Pertinacior pars armata per aversam portam crupit; tutiorque eis audacia fuit, quam incautus ad credendum ceteris pavor: quos circumdatos igni, nequidquam Deos fidemque invocantes, Samnites concremave-

U. C. 434. runt. Consules, inter se partiti provincias, Papirius
 A. C. 318. in Apuliam ad Luceriam pergit, ubi equites Romani
 obsides ad Caudium dati custodiebantur: Publilius
 in Samnio substitit adversus Caudinas legiones.
 Distendit ea res Samnitium animos; quod nec ad
 Luceriam ire, ne ab tergo instaret hostis, nec ma-
 nere, ne Luceria interim amitteretur, satis aude-
 bant. Optimum visum est committere rem fortunæ,
 et transigere cum Publilio certamen. Itaque in
 aciem copias educunt.

Prælio
 vincuntur
 Samnites
 a Publilio.

XIII. Adversus quos Publilius consul quum di-
 micaturus esset, prius adloquendos milites ratus,
 concionem advocari jussit: ceterum sicut ingenti
 alacritate ad prætorium concursum est, ita præ cla-
 more poscentium pugnam nulla adhortatio impera-
 toris audita est. Suus cuique animus memor igno-
 minię adhortator aderat. Vadunt igitur in prælium
 urgentes signiferos: et, ne mora in concursu pilis
 emittendis stringendisque inde gladiis esset, pila,
 velut dato ad id signo, abjiciunt, strictisque gladiis
 cursu in hostem feruntur. Nihil illic imperatorię
 artis ordinibus aut subsidiis locandis fuit: omnia
 ira militaris prope vesano inpetu egit. Itaque non
 fusi modo hostes sunt; sed, ne castris quidem suis
 fugam impedire ausi, Apuliam dissipati petiere: Lu-
 ceriam tamen, coacto rursus in unum agmine, est
 perventum. Romanos ira eadem, quę per mediam
 aciem hostium tulerat, et in castra pertulit: ibi
 plus, quam in acie, sanguinis ac cædis factum, præ-
 dęque pars major ira corrupta. Exercitus alter cum
 Papirio consule locis maritimis pervenerat Arpos
 per omnia pacata, Samnitium magis injuriis et odio,
 quam beneficio ullo populi Romani. Nam Samnites,

ea tempestate in montibus vicatim habitantes, cam- U.C. 434.
 pestria et maritima loca, contempto cultorum mol- A.C. 318.
 liore atque, ut evenit fere, locis simili genere, ipsi
 montani atque agrestes depopulabantur: quæ regio
 si fida Samnitibus fuisset, aut pervenire Arpos ex-
 exercitus Romanus nequisset, aut interjecta inter Ro-
 mam et Arpos, penuria rerum omnium, exclusos a
 commeatibus absumsisset. Tam quoque profectos ^{Papirius}
 inde ad Luceriam, juxta obsidentes obsessosque, ^{obsidet Lu-}
 inopia vexavit: omnia ab Arpis Romanis subpedita- ^{ceriam.}
 bantur; ceterum adeo exigue, ut militi, occupato
 stationibus vigiliisque et opere, eques folliculis in
 castra ab Arpis frumentum veheret; interdum ob-
 cursu hostium cogeretur, abjecto ex equo frumento,
 pugnare: obsessis prius, quam alter consul victore
 exercitu advenit, et commeatus ex montibus Sam-
 nitium invecti erant, et auxilia intromissa. Artiora
 omnia adventus Publilii fecit; qui, obsidione dele-
 gata in curam collegæ, vacuus per agros cuncta in-
 festa commeatibus hostium fecerat. Itaque quum
 spes nulla esset, diutius obsessos inopiam laturos,
 coacti Samnites, qui ad Luceriam castra habebant,
 undique contractis viribus, signa cum Papirio con-
 ferre.

XIV. Per id tempus, parantibus utrisque se ad
 prælium, legati Tarentini interveniunt, denunciante
 Samnitibus Romanisque, ut bellum omitterent: per
 utros stetisset, quo minus discederetur ab armis, ad-
 versus eos se pro alteris pugnatuuros. Ea legatione
 Papirius audita, perinde ac motus dictis eorum, cum
 collega se communicaturum respondit: adcitoque
 eo, quum tempus omne in adparatu consumsisset,
 conlocutus de re haud dubia, signum pugnae pro-

U. C. 434. posuit. Agentibus divina humanaque, quæ adso-
 A. C. 318. lent, quum acie dimicandum est, consulibus, Tarentini legati obcurrere, responsum expectantes, quibus Papirius ait: *Auspicia secunda esse, Tarentini, pullarius nunciat: litatum præterea est egregie: auctoribus Diis, ut videtis, ad rem gerendam proficiscimur.* Signa inde ferri iussit, et copias eduxit, vanissimam increpans gentem, quæ, suarum inpotens rerum præ domesticis seditionibus discordiisque, aliis modum pacis ac belli facere æquum censeret. Samnites ex parte altera, quum omnem curam belli remisissent, quia aut pacem vere cupiebant, aut expediebat simulare, ut Tarentinos sibi conciliarent, quum instructos repente ad pugnam Romanos conspexissent, vociferari, *se in auctoritate Tarentinorum manere, nec descendere in aciem, nec extra vallum arma ferre. Deceptos potius, quodcumque casus ferat, passuros, quam ut sprevisse pacis auctores Tarentinos videantur.* Accipere se omen, consules aiunt, *et eam precari mentem hostibus, ut ne vallum quidem defendant.* Ipsi, inter se partitis copiis, succedunt hostium munimentis, et, simul undique adorti, quum pars fossas explerent, pars vellerent vallum, atque in fossas proruerent, nec virtus modo insita, sed ira etiam, exulceratos ignominia stimularet animos, castra invasere: et pro se quisque, *non hæc furculas, nec Caudium, nec saltus inrios esse, ubi errorem fraus superbe vicisset; sed Romanam virtutem, quam nec vallum, nec fossæ arcerent, memores, cædunt pariter resistentes fusosque, inermes atque armatos, servos, liberos, puberes, impuberes, homines, jumentaque: nec ullum superfuisset animal, ni consules receptui signum dedissent, avidosque*

Iterum
vincuntur
Samnites
a cons.

cædis milites e castris hostium imperio ac minis expulissent. Itaque apud infensos ob interpellatam dulcedinem iræ confestim oratio habita est, ut doceretur miles, *minime cuiquam militum consules odio in hostes cessisse, aut cessuros: quin duces, sicut belli, ita insatiabilis supplicii, futuros fuisse, ni respectus equitum sexcentorum, qui Luceriæ obsides tenerentur, præpedisset animos: ne desperata venia hostes cæcos in supplicia eorum ageret, perdere prius, quam perire, optantes.* Laudare ea milites, lætarique obviam itum iræ suæ esse, ac fateri, omnia patienda potius, quam proderetur salus tot principum Romanæ juventutis.

XV. Dimissa concione, consilium habitum, omnibusne copiis Luceriam premerent, an altero exercitu et duce Apuli circa, gens dubiæ ad id voluntatis, tentarentur. Publilius consul, ad peragrandam profectus Apuliam, aliquot expeditione una populos aut vi subegit, aut conditionibus in societatem accepit. Papirio quoque, qui obsessor Luceriæ restiterat, brevi ad spem eventus respondit: nam, in-^{Luceria capta.} sessis omnibus viis, per quas commeatus ex Samnio subvehebantur, fame domiti Samnites, qui Luceriæ in præsidio erant, legatos misere ad consulem Romanum, ut, receptis equitibus, qui caussa belli essent, absisteret obsidione. His Papirius ita respondit: *Debuisse eos Pontium, Herennii filium, quo auctore Romanos sub jugum misissent, consulere, quid victis patiendum censeret: ceterum, quoniam ab hostibus in se æqua statui, quam in se ipsi ferre, maluerint, nunciare Luceriam jussit, arma, sarcinas, jugumenta, multitudinem omnem inbellem intra mœnia relinquere: militem se cum singulis vestimentis sub*

Sub jugum
missi Sam-
nites.

U. C. 434. *jugum missurum, ulciscensem inlatam, non novam in-*
 A. C. 318. *ferentem ignominiam.* Nihil recusatum: septem mil-

lia militum sub jugum missa, prædaque ingens Luceriæ capta, receptis omnibus signis armisque, quæ ad Caudium amiserant; et, quod omnia superabat gaudia, equitibus recuperatis, quos pignora pacis custodiendos Luceriam Samnites dederant. Haud ferme alia mutatione subita rerum clarior victoria populi Romani est: siquidem etiam (quod quibusdam in annalibus invenio) Pontius, Herennii filius, Samnitium imperator, ut expiaret consulum ignominiam, sub jugum cum ceteris est missus. Ceterum id minus miror, obscurum esse de hostium duce dedito missoque sub jugum: id magis mirabile est, ambigi, Luciusne Cornelius dictator cum L. Papirio Cursore, magistro equitum, eas res ad Caudium, atque inde Luceriam gesserit, ultorque unicus Romanæ ignominiae, haud sciam an justissimo triumpho ad eam ætatem secundum Furium Camillum, triumphaverit, an consulum Papiriique præcipuum

U. C. 435. id decus sit. Sequitur hunc errorem alius error,
 A. C. 317. Cursorne Papirius proximis comitiis cum Q. Aulio Cerretano iterum, ob rem bene gestam Luceriæ continuato magistratu, consul tertium creatus sit; an L. Papirius Mugillanus, et in cognomine erratum sit.

XVI. Convenit, jam inde per consules reliqua belli perfecta. Aulius cum Ferentanis uno secundo prælio debellavit; urbemque ipsam, quo se fusa contulerat acies, obsidibus imperatis, in deditionem accepit. Pari fortuna consulum alter cum Satricanis, qui cives Romani post Caudinam cladem ad Samnites defecerant, præsidiumque eorum in urbem

acceperant, rem gessit : nam quum ad mœnia Sa-
 trici admotus esset exercitus, legatisque, missis ad
 pacem cum precibus petendam, triste responsum ab
 consule redditum esset, *nisi præsidio Samnitium in-*
terfecto aut tradito, ne ad se remearent ; plus ea voce,
 quam armis inlatis, terroris colonis injectum. Ita-
 que subinde exsequentes quærendo a consule legati,
 quonam se pacto paucos et infirmos crederet præsi-
 dio tam valido et armato vim adlaturos, ab iisdem
 consilium petere jussi, quibus auctoribus præsidium
 in urbem acceperant, discedunt : ægreque inpetrato,
 ut de ea re consuli senatum, responsaque ad se re-
 ferri sineret, ad suos redeunt. Duæ factiones sena-
 tum distinebant ; una, cujus principes erant de-
 fectionis a populo Romano auctores ; altera, fide-
 lium civium : certatum ab utrisque tamen est, ut ad
 reconciliandam pacem consuli opera navaretur. Pars
 altera (quum præsidium Samnitium, quia nihil satis
 præparati erat ad obsidionem tolerandam, excessu-
 rum proxima nocte esset) enunciare consuli satis
 habuit, qua noctis hora, quaque porta, et quam in
 viam egressurus hostis foret : altera, quibus invitis
 descitum ad Samnites erat, eadem nocte portam
 etiam consuli aperuerunt, armatosque clam hostes
 in urbem acceperunt. Ita duplici proditione et præ-
 sidium Samnitium, insessis circa viam silvestribus
 locis, necopinato obpressum est, et ab urbe plena
 hostium clamor sublatus ; momentoque unius horæ
 cæsus Samnis, Satricanus captus, et omnia in po-
 testate consulis erant. Qui, quæstione habita, quo-
 rum opera defectio esset facta, quos fontes com-
 perit, virgis cæsos securi percussit : præsidioque
 valido inposito, arma Satricanis ademit. Inde ad

U. C. 435. triumphum decessisse Romam Papirium Cursorem
 A. C. 317. scribunt, qui eo duce Luceriam receptam, Samni-
 Papirii tesque sub jugum missos auctores sunt. Et fuit vir
 Cursoris laudes. haud dubie dignus omni bellica laude, non animi
 solum vigore, sed etiam corporis viribus excellens.
 Præcipua pedum pernecitas inerat, quæ cognomen
 etiam dedit: victoremque cursu omnium ætatis suæ
 fuisse ferunt: et seu virium vi, seu exercitatione
 multa, cibi vinique eundem capacissimum: nec cum
 ullo asperiores (quia ipse invicti ad laborem cor-
 poris esset) fuisse militiam pediti pariter equitque.
 Equites etiam aliquando ausos ab eo petere, ut sibi
 pro re bene gesta laxaret aliquid laboris: quibus
 ille, *Ne nihil remissum dicatis, remitto*, inquit, *ne uti-
 que dorsum demulceatis, quum ex equis descendetis*: et
 vis erat in eo viro imperii ingens pariter in socios
 civesque. Prænестinus prætor per timorem segnius
 ex subsidiis suos duxerat in primam aciem: quem
 quum inambulans ante tabernaculum vocari jussis-
 set, lictorem expedire securim jussit: ad quam vo-
 cem exanimi stante Prænестino, *Agedum, lictor, ex-
 cide radicem hanc*, inquit, *incommodam ambulantes*:
 perfusumque ultimi supplicii metu, multa dicta, di-
 misit. Haud dubie illa ætate, qua nulla virtutum
 feracior fuit, nemo unus erat vir, quo magis innisa
 res Romana staret: quin eum parem destinant ani-
 mis Magno Alexandro ducem, si arma, Asia perdo-
 mita, in Europam vertisset.

Disputatio de Alexandro M. et Romanis. XVII. Nihil minus quæsitum a principio hujus
 operis videri potest, quam ut plus justo ab rerum or-
 dine declinarem; varietatibusque distinguendo opere,
 et legentibus velut deverticula amœna, et requiem
 animo meo quærerem: tamen tanti regis ac ducis

mentio, quibus sæpe tacitis cogitationibus volutavit
 animum, eas evocat in medium: ut quærere libeat,
 quinam eventus Romanis rebus, si cum Alexandro
 foret bellatum, futurus fuerit. Plurimum in bello
 pollere videntur militum copia et virtus, ingenia
 imperatorum, fortuna per omnia humana, maxime
 in res bellicas, potens. Ea, et singula intuenti et
 universa, sicut ab aliis regibus gentibusque, ita ab
 hoc quoque, facile præstant invictum Romanum im-
 perium. Jam primum, ut ordiar ab ducibus compa-
 randis, haud equidem abnuo, egregium ducem fuisse
 Alexandrum; sed clariorem tamen eum facit, quod
 unus fuit, quod adolescens in incremento rerum,
 nondum alteram fortunam expertus, decessit. Ut
 alios reges claros ducesque omittam, magna exem-
 pla casuum humanorum; Cyrus, quem maxime
 Græci laudibus celebrant, quid, nisi longa vita, sicut
 Magnum modo Pompeium, vertenti præbuit fortu-
 næ? Recenseam, duces Romanos, nec omnes om-
 nium ætatum, sed ipsos eos, cum quibus consuli-
 bus aut dictatoribus Alexandro fuit bellandum; M.
 Valerium Corvum, C. Marcium Rutilum, C. Sulpi-
 cium, T. Manlium Torquatum, Q. Publilium Phi-
 lonem, L. Papirium Cursorem, Q. Fabium Maxi-
 mum, duos Decios, L. Volumnium, M. Curium.
 Deinceps ingentes sequuntur viri, si Punicum Ro-
 mano prævertisset bellum, seniorque in Italiam tra-
 jecisset. Horum in quolibet tum indoles eadem,
 quæ in Alexandro erat, animi ingenique; tum dis-
 ciplina militaris, jam inde ab initiis urbis tradita per
 manus, in artis perpetuis præceptis ordinatæ modum
 venerat. Ita reges gesserant bella; ita deinde ex-
 actores regum Junii Valeriique; ita deinceps Fabii,

U. C. 435.
 A. C. 317.

Alexandri
 et ducum
 Rom. con-
 latio.

U. C. 435. Quinctii, Cornelii; ita Furius Camillus, quem juvenes ii, quibus cum Alexandro dimicandum erat, senem viderant. Militaria opera pugnando obeunti Alexandro (nam ea quoque haud minus clarum eum faciunt) cessisset videlicet in acie oblatus par Manlius Torquatus, aut Valerius Corvus, insignes ante milites, quam duces? cessissent Decii, devotis corporibus in hostem ruentes? cessisset Papirius Cursor, illo corporis robore, illo animi? victus esset consiliis juvenis unius, ne singulos nominem, senatus ille, quem qui *ex regibus constare* dixit, unus veram speciem Romani senatus cepit? Id vero erat periculum, ne solertius, quam quilibet unus ex iis, quos nominavi, castris locum caperet, commeatus expediret, ab insidiis præcaveret, tempus pugnae deligeret, aciem instrueret, subsidiis firmaret. Non cum Dario rem esse dixisset: quem, mulierum ac spadonum agmen trahentem, inter purpuram atque aurum, oneratum fortunæ adparatibus suæ, prædam verius, quam hostem, nihil aliud quam bene ausus vana contemnere, incruentus devicit. Longe alius Italiæ, quam Indiæ, per quam temulento agmine comissabundus incessit, visus illi habitus esset, saltus Apuliæ ac montes Lucanos cernenti et vestigia recentia domesticæ cladis, ubi avunculus ejus nuper Epiri rex Alexander absumtus erat.

XVIII. Et loquimur de Alexandro nondum merso secundis rebus, quarum nemo intolerantior fuit: qui, si ex habitu novæ fortunæ novique, ut ita dicam, ingenii, quod sibi victor induerat, spectetur, Dario magis similis, quam Alexandro, in Italiam venisset, et exercitum Macedoniæ oblitum degenerantemque jam in Persarum mores adduxisset. Re-

ferre in tanto rege piget superbam mutationem U. C. 435.
 vestis, et desideratas humi jacentium adulationes, A. C. 317.
 etiam victis Macedonibus graves, nedum victoribus;
 et fœda supplicia, et inter vinum et epulas cædes
 amicorum, et vanitatem ementiendæ stirpis. Quid,
 si vini amor in dies fieret acrior? quid, si trux ac
 præfervida ira? (nec quidquam dubium inter scrip-
 tores refero) nullane hæc damna imperatoriis virtu-
 tibus ducimus? Id vero periculum erat, quod levis-
 simi ex Græcis, qui Parthorum quoque contra no-
 men Romanum gloriæ favent, dictitare solent, ne
 majestatem nominis Alexandri (quem ne fama qui-
 dem illis notum arbitror fuisse) sustinere non po-
 tuerit populus Romanus, et, adversus quem Athenis,
 in civitate fracta Macedonum armis, cernente tum
 maxime prope fumantes Thebarum ruinas, concio-
 nari libere ausi sint homines, (id quod ex monu-
 mentis orationum patet) adversus eum nemo ex tot
 proceribus Romanis vocem liberam missurus fuerit.
 Quantalibet magnitudo hominis concipiatur animo,
 unius tamen ea magnitudo hominis erit, conlecta
 paullo plus decem annorum felicitate: quam qui eo
 extollunt, quod populus Romanus, etsi nullo bello,
 multis tamen præliis victus sit, Alexandro nullius
 pugnæ non secunda fortuna fuerit; non intelligunt,
 se hominis res gestas, et ejus juvenis, cum populi
 jam octingentesimum bellantis annum rebus con-
 ferre. Miremur, si, quum ex hac parte secula plu-
 ra numerentur, quam ex illa anni, plus in tam
 longo spatio, quam in ætate tredecim annorum,
 fortuna variaverit? Quin tu hominis cum homine,
 et ducis cum duce, fortunam cum fortuna confers?
 Quot Romanos duces nominem, quibus numquam

Fortunæ
 Alexandri
 conlatio
 cum fortu-
 na pop.
 Rom.

U. C. 435. adversa fortuna pugnae fuit? *Paginas in annalibus*
 A. C. 317. magistratuum fastisque percurrere licet, consulum, dictatorumque, quorum nec virtutis, nec fortunae ullo die populum Romanum poenituit. Et, quo sint mirabiliores, quam Alexander aut quisquam rex, denos videnosque dies quidam dictaturam, nemo plus quam annum consulatum gessit: ab tribunis plebis delectus impediti sunt: post tempus ad bella ierunt: ante tempus comitiorum causa revocati sunt: in ipso conatu rerum circumegit se annus: collegae nunc temeritas, nunc pravitas, impedimento aut damno fuit: male gestis rebus alterius successum est: tironem aut mala disciplina institutum exercitum acceperunt. At, Hercule, reges non liberi solum impedimentis omnibus, sed domini rerum temporumque, trahunt consiliis cuncta, non sequuntur. Invictus ergo Alexander cum invictis ducibus bella gessisset, et eadem fortunae pignora in discrimen detulisset: immo etiam eo plus periculi subisset, quod Macedones unum Alexandrum habuissent, multis casibus non solum obnoxium, sed etiam obferentem se: Romanis multi fuissent, Alexandro, vel gloria, vel rerum magnitudine, pares; quorum suo quisque fato, sine publico discrimine, viveret morereturque.

Conlatio
 copiarum. XIX. Restat, ut copiae copiis comparentur vel numero, vel militum genere, vel multitudine auxiliorum. Censebantur ejus aetatis lustris ducena quinquagena millia capitum. Itaque, in omni defectione sociorum Latini nominis, urbano prope delectu decem scribebantur legiones: quaterni quinque exercitus saepe per eos annos in Etruria, in Umbria, Gallis hostibus adjunctis, in Samnio, in Lu-

canis gerebant bellum. Latium deinde omne cum U. C. 435.
 Sabinis, et Volscis, et Æquis, et omni Campania, A. C. 317.
 et parte Umbriæ Etruriæque, et Picentibus, et
 Marsis, Pelignisque, ac Vestinis atque Apulis, ad-
 junctaque omni ora Græcorum inferi maris a Thuriis
 Neapolim et Cumas, et inde Antio atque Ostiis te-
 nus Samnites, aut socios validos Romanis, aut
 fractos bello invenisset hostes. Ipse trajecisset
 mare cum veteranis Macedonibus, non plus triginta
 millibus hominum et quatuor millibus equitum
 maxime Thessalorum : hoc enim roboris erat : Per-
 sas, Indos, aliasque si adjunxisset gentes, inpedi-
 mentum majus, quam auxilium, traheret. Adde,
 quod Romanis ad manum domi supplementum es-
 set : Alexandro, (quod postea Hannibali accidit)
 alieno in agro bellanti, exercitus consenuisset. Ar-
 ma, clipeus sarissæque illis ; Romano scutum, ma-
 jus corpori tegumentum, et pilum, haud paullo,
 quam hasta, vehementius ictu missuque telum.
 Statarius uterque miles, ordines servans : sed illa
 phalanx immobilis, et unius generis : Romana acies
 distinctior, ex pluribus partibus constans : facilis
 partienti, quacumque opus esset, facilis jungenti.
 Jam in opere quis par Romano miles ? quis ad tole-
 randam laborem melior ? Uno prælio victus Alex-
 ander, bello victus esset. Romanum, quem Caudium,
 quem Cannæ non fregerunt, quæ fregisset acies ?
 Næ ille sæpe, etiamsi prima prospere evenissent,
 Persas et Indos et inbellem Asiam quæsisset, et
 cum feminis sibi bellum fuisse dixisset : quod Epiri
 regem Alexandrum, mortifero vulnere ictum, dix-
 isse ferunt, sortem bellorum in Asia gestorum ab
 hoc ipso juvene cum sua conferentem. Equidem,

U. C. 435. quum per annos quatuor et viginti primo Punico
 A. C. 317. bello classibus certatum cum Pœnis recordor, vix
 ætatem Alexandri subfecturam fuisse reor ad unum
 bellum: et forsitan quum et fœderibus vetustis
 juncta Punica res Romanæ esset, et timor par ad-
 versus communem hostem duas potentissimas armis
 virisque urbes armaret, simul Punico Romanoque
 obrutus bello esset. Non quidem Alexandro duce,
 nec integris Macedonum rebus, sed experti tamen
 sunt Romani Macedonem hostem adversus Antio-
 chum, Philippum, Persen, non modo cum clade
 ulla, sed ne cum periculo quidem suo. Absit in-
 vidia verbo, et civilia bella sileant, numquam ab
 equite hoste, numquam a peditibus, numquam aperta
 acie, numquam æquis, utique numquam nostris locis
 laboravimus. Equitem, sagittas, saltus inpeditos, avia
 commeatibus loca gravis armis miles timere potest.
 Mille acies, graviores quam Macedonum atque Alex-
 andri, avertit, avertetque; modo sit perpetuus hujus,
 qua vivimus, pacis amor et civilis cura concordiae.

U. C. 436. XX. M. Foslius Flaccinator inde et L. Plautius
 A. C. 316. Venno consules facti. Eo anno ab frequentibus
 Samnitium populis de fœdere renovando legati,
 quum senatum humi strati movissent, rejecti ad
 populum haudquaquam tam efficaces habebant pre-
 ces. Itaque, fœdere negato, induciæ biennii, quum
 per aliquot dies fatigassent singulos precibus, inpe-
 tratæ. Et ex Apulia Teanenses Canusinique popu-
 lationibus fessi, obsidibus L. Plautio consuli datis,
 in deditionem venerunt. Eodem anno primum præ-
 fecti Capuæ creari cœpti, legibus ab L. Furio præ-
 tore datis: quum utrumque ipsi pro remedio ægris
 rebus discordia intestina petissent. Et duæ Romæ

additæ tribus, Ufentina ac Falerina. Inclinatorum se- Tribus no-
mel in Apulia rebus, Teates quoque Apuli ad no- væ.
vos consules, C. Junium Bubulcum, Q. Æmilium U. C. 437.
Barbulam, fœdus petiit venerunt, pacis per om- A. C. 315.
nem Apuliam præstandæ populo Romano auctores:
id audacter spondendo inpetravere, ut fœdus dare-
tur: neque ut æquo tamen fœdere, sed ut in ditio-
ne populi Romani essent. Apulia perdomita, (nam
Forento quoque valido oppido Junius potitus erat)
in Lucanos perrectum: inde repentino adventu Æ-
milii consulis Nerulum vi captum. Et postquam
res Capuæ stabilitas Romana disciplina fama per
socios vulgavit; Antiatibus quoque, qui se sine le-
gibus certis, sine magistratibus agere querebantur,
dati ab senatu ad jura statuenda ipsius coloniae pa-
troni: nec arma modo, sed jura etiam Romana late
pollebant.

XXI. C. Junius Bubulcus et Q. Æmilius Bar- U. C. 438.
bula consules exitu anni non consulibus ab se A. C. 314.
creatis, Sp. Nautio et M. Popillio, ceterum dictatori
L. Æmilio legiones tradiderunt. Is, cum L. Fulvio L. Æmi-
magistro equitum Saticulam obpugnare adortus, re- lius dicta-
bellandi caussam Samnitibus dedit. Duplex inde tor.
terror inlatus Romanis: hinc Samnis, magno ex-
ercitu coacto ad eximendos obsidione socios, haud
procul castris Romanorum castra posuit: hinc Sa-
ticulani magno cum tumultu, patefactis repente
portis, in stationes hostium incuſerunt. Inde pars
utraque, spe alieni magis auxilii, quam viribus freta
suis, justo mox prælio inito Romanos urgent: et,
quamquam anceps dimicatio erat, tamen utrimque
tutam aciem dictator habuit; quia et locum haud
facilem ad circumveniendum cepit, et diversa statuit.

U. C. 438. signa. Infestior tamen in erumpentes incessit : nec
 A. C. 314. magno certamine intra mœnia compulit. Tum totam aciem in Samnites obvertit : ibi plus certaminis fuit. Victoria sicut sera, ita nec dubia, nec varia fuit. Fusi in castra Samnites, extinctis nocte ignibus, tacito agmine abeunt : et, spe abjecta Saticulæ tuendæ, Plistiam ipsi, socios Romanorum, ut parem dolorem hosti redderent, circumsidunt.

U. C. 439. XXII. Anno circumacto, bellum deinceps ab
 A. C. 313. dictatore Q. Fabio gestum est. Consules novi, sicut superiores, Romæ manserunt : Fabius, ad accipiendum ab Æmilio exercitum, ad Saticulam cum supplemento venit : neque enim Samnites ad Plistiam manserant : sed, aditis ab domo novis militibus, multitudine freti, castra eodem, quo antea, loco posuerunt : lacessentesque prælio Romanos avertere ab obsidione conabantur. Eo intentius dictator in mœnia hostium versus, id bellum tantum ducere, quod urbem obpugnabat : securior ab Samnitibus agere, stationibus modo obpositis, ne qua in castra vis fieret. Eo ferocius adequitare Samnites vallo, neque otium pati : et quum jam prope in portis castrorum esset hostis, nihil consulto dictatore, magister equitum Q. Aulus Cerretanus, magno tumultu cum omnibus turmis equitum evector, submovit hostem : tum in minime pertinaci genere pugnæ sic fortuna exercuit opes, ut insignes utrimque clades et clara ipsorum ducum ederet funera. Prior Samnitium imperator, ægre patiens, quo tam ferociter adequitasset, inde se fundi fugarique, orando hortandoque equites prælium integravit : in quem, insignem inter suos cientem pugnam, magister equitum Romanus infesta cuspide ita permisit equum,

Q. Fabius
Dictator.

Prælium
equestre
cum Sam-
nitibus.

ut uno ictu exanimem equo præcipitaret: nec, ut U. C. 439.
 fit, ad ducis casum perculsa magis, quam irritata, A. C. 313,
 est multitudo. Omnes, qui circa erant, in Aulium,
 temere invectum per hostium turmas, tela conjece-
 runt. Fratri præcipuum decus ulti Samnitium im-
 peratoris dederunt: is victorem detractum ex equo
 magistrum equitum, plenus mœroris atque iræ, tru-
 cidavit: nec multum afuit, quin corpore etiam, quia
 inter hostiles ceciderat turmas, Samnites potirentur.
 Sed extemplo ad pedes descensum ab Romanis est,
 coactique idem Samnites facere: et repentina acies
 circa corpora ducum pedestre prælium iniit, quo
 haud dubie superat Romanus: recuperatumque Aulii
 corpus, mixta cum dolore lætitia, victores in castra
 referunt. Samnites, duce amisso, et per equestre
 certamen tentatis viribus, ommissa Saticula, quam
 nequidquam defendi rebantur, ad Plistiæ obsidionem
 redeunt; intraque paucos dies Saticula Romanus per
 deditionem, Plistia per vim Samnis potitur.

XXIII. Mutata inde belli sedes est: ad Soram ex
 Samnio Apuliaque traductæ legiones. Sora ad Sam- Soræ defec-
 nites defecerat, interfectis colonis Romanorum: tio ad Sam-
 quo quum prior Romanus exercitus, ad ulciscendam nites.
 civium necem recuperandamque coloniam, magnis
 itineribus prævenisset, et sparsi per vias speculato-
 res, sequi legiones Samnitium, nec jam procul ab-
 esse, alii super alios, nunciarent; obviam itum hosti,
 atque ad Lautulas ancipiti prælio dimicatum est:
 non cædes, non fuga alterius partis, sed nox incer-
 tos, victi victoresne essent, diremit. Invenio apud
 quosdam, adversam eam pugnam Romanis fuisse,
 atque in ea cecidisse Q. Aulium, magistrum equi-
 tum. Subfectus in locum Aulii C. Fabius magister

U. C. 439.
A. C. 313.

equitum cum exercitu novo ab Roma advenit; et, per præmissos nuncios consulto dictatore, ubi subsisteret, quoque tempore, et qua ex parte hostem adgrederetur, substitit occultus, ad omnia satis exploratis consiliis. Dictator, quum per aliquot dies post pugnam continuisset suos intra vallum, obsessi magis quam obsidentis modo, signum repente pugnae proposuit; et, efficacius ratus ad accendendos virorum fortium animos, nullam alibi, quam in semet ipso, cuiquam relictam spem, de magistro equitum novoque exercitu militem celavit: et, tamquam nulla, nisi in eruptione, spes esset, *Locis, inquit, angustis, milites, deprehensi, nisi quam victoria patefecerimus, viam nullam habemus. Stativa nostra munimento satis tuta sunt; sed inopia eadem infesta: nam et circa omnia defecerunt, unde subrehi commeatus poterant; et, si homines juvare velint, iniqua loca sunt. Itaque non frustrabor ego vos, castra hic relinquendo, in quæ, infecta victoria, sicut pristino die, vos recipiatis: armis munimenta, non munimentis arma tuta esse debent. Castra habeant repetantque, quibus operæ est trahere bellum: nos omnium rerum respectum, præterquam victoriæ, nobis abscindemus. Ferte signa in hostem: ubi extra vallum agmen excesserit, castra, quibus imperatum est, incendant: damna vestra, milites, omnium circa, qui defecerunt, populorum præda sarcientur. Et oratione dictatoris, quæ necessitatis ultimæ index erat, milites accensi vadunt in hostem, et respectus ipse ardentium castrorum, quamquam proximis tantum (ita enim jusserat dictator) ignis est subditus, haud parvum fuit irritamentum. Itaque, velut recordes inlati, signa primo inpetu hostium turbant; et in tempore, postquam*

Victoria de
Samnitibus.

ardentia procul vidit castra magister equitum, (id U. C. 439.
 convenerat signum) hostium terga invadit : ita cir- A. C. 313.
 cumventi Samnites, qua potest quisque, fugam per
 diversa petunt. Ingens multitudo, in unum metu
 conglobata, ac semet ipsam turba inpediens, in me-
 dio cæsa. Capta hostium castra direptaque; quo-
 rum præda onustum militem in Romana castra dic-
 tator reducit, haudquaquam tam victoria lætum,
 quam quod, præter exiguam deformatam incendio
 partem, cetera contra spem salva invenit.

XXIV. Ad Soram inde reditum; novique con- U. C. 440.
 sules M. Pœtelius, C. Sulpicius exercitum ab dicta- A. C. 312.
 tore Fabio accipiunt, magna parte veterum militum
 dimissa, novisque cohortibus in supplementum ad-
 ductis. Ceterum, quum propter difficilem urbis si-
 tum nec obpugnandi satis certa ratio iniretur, et
 aut tempore longinqua, aut præceps periculo victo-
 ria esset; Soranus transfuga, clam ex oppido pro- Sora obses:
 fectus, quum ad vigiles Romanos penetrasset, duci sa capitur.
 se extemplo ad consules jubet, deductusque tradi-
 turum urbem promittit. Visus inde (quum, quo-
 nam modo id præstaturus esset, percunctantes do-
 ceret) haud vana adferre, perpulit, prope adjuncta
 mœnibus Romana castra ut sex millia ab oppido
 removerentur: fore, ut minus intentæ in custodiam
 urbis diurnæ stationes ac nocturnæ vigiliæ essent.
 Ipse insequenti nocte, sub oppido silvestribus locis
 cohortibus insidere jussis, decem milites delectos se-
 cum per ardua ac prope invia in arcem ducit; plu-
 ribus, quam pro numero virorum, missilibus telis eo
 conlatis. Ad hæc saxa erant, et temere jacentia (ut
 fit) in aspretis, et de industria etiam, quo locus tu-
 tior esset, ab oppidanis congesta. Ubi quum con-

U. C. 440. stituisset Romanos, semitanique angustam et ar-
 A. C. 312. duam, erectam ex oppido in arcem, ostendisset;
Hoc quidem adscensu, inquit, vel tres armati quamli-
bet multitudinem arcuerint: vos et decem numero, et,
quod plus est, Romani, Romanorumque fortissimi viri
estis, et locus pro vobis, et nox erit, quæ omnia ex in-
certo majora territis ostentat. Ego jam terrore omnia
inplebo: vos arcem intenti tenete. Decurrit inde,
 quanto maxime poterat, cum tumultu, *ad arma, et*
pro vestram fidem, cives! clamitans, *arx ab hostibus*
capta est; ite, defendite. Hæc incidens principum
 foribus, hæc obviis, hæc excurrentibus in publicum
 pavidis increpat. Acceptum ab uno pavorem plu-
 res per urbem ferunt. Trepidi magistratus, missis
 ad arcem exploratoribus, quum tela et armatos te-
 nere arcem multiplicato numero audirent, avertunt
 animos a spe recuperandæ arcis. Fuga cuncta com-
 plentur, portæque ab semisomnis ac maxima parte
 inermibus refringuntur: quarum per unam præsi-
 dium Romanum clamore excitatum inrumpit, et
 concursantes per viam pavidos cædit. Jam Sora
 capta erat, quum consules prima luce advenere; et,
 quos reliquos fortuna ex nocturna cæde ac fuga fe-
 cerat, in deditionem accipiunt. Ex his ducentos
 viginti quinque, qui omnium consensu destinaban-
 tur et infandæ colonorum cædis et defectionis auc-
 tores, vinctos Romam deducunt: ceteram multitu-
 dinem incolumem, præsidio inposito, Soræ relin-
 quunt. Omnes, qui Romam deducti erant, virgis in
 foro cæsi, ac securi percussi summo gaudio plebis;
 cujus maxime intererat, tutam ubique, quæ passim
 in colonias mitteretur, multitudinem esse.

XXV. Consules, ab Sora profecti, in agros at-

que urbes Ausonum bellum intulerunt : mota nam- U. C. 440.
 que omnia adventu Samnitium, quum apud Lautu- A. C. 312.
 las dimicatum est, fuerant, conjurationesque circa Ausones
 Campaniam passim factæ : nec Capua ipsa crimine bello ad-
 caruit : quin Romam quoque et ad principum quos- petiti.
 dam inquirendos ventum est. Ceterum Ausonum
 gens proditione urbium, sicut Sora, in potestatem
 venit. Ausona, et Minturnæ, et Vescia, urbes erant :
 ex quibus principes juventutis duodecim numero, in
 proditionem urbium suarum conjurati, ad consules
 veniunt : docent, suos, jampridem exoptantes Samni-
 tium adventum, simul ad Lautulas pugnatum audie-
 runt, pro victis Romanos habuisse, juventute, armis
 Samnites juvisse : fugatis inde Samnitibus, incerta
 pace agere, nec claudentes portas Romanis, ne arces-
 sant bellum ; et obstinatos claudere, si exercitus admo-
 veatur. In ea fluctuatione animorum obprimi incau-
 tos posse. His auctoribus mota propius castra :
 missique eodem tempore circa tria oppida milites,
 partim armati, qui occulti propinqua mœnibus insi-
 derent loca ; partim togati, tectis veste gladiis, qui
 sub lucem apertis portis urbes ingrederentur. Ab
 his simul custodes trucidari cœpti, simul datum sig-
 num armatis, ut ex insidiis concurrerent : ita portæ
 occupatæ, triaque oppida eadem hora eodemque
 consilio capta. Sed, quia absentibus ducibus inpe-
 tus est factus, nullus modus cædibus fuit ; deletaque
 Ausonum gens, vix certo defectionis crimine, per- Ausones
 inde ac si internecivo bello certasset. deleti.

XXVI. Eodem anno, prodito hostibus Romano
 præsidio, Luceria Samnitium facta : nec diu prodi-
 toribus impunita res fuit. Haud procul inde exer-
 citus Romanus erat : cujus primo inpetu urbs, sita

U. C. 440. in plano, capitur. Lucerini ac Samnites ad inter-
 A. C. 312. necionem cæsi: eoque ira processit, ut Romæ quo-
 que, quum de colonis mittendis Luceriam consule-
 retur senatus, multi delendam urbem censerent.
 Præter odium, quod execrabile in bis captos erat,
 longinquitas quoque abhorrere a relegandis tam
 procul ab domo civibus inter tam infestas gentes
 cogebat. Vicit tamen sententia, ut mitterentur co-
 loni: duo millia et quingenti missi. Eodem anno,
 quum omnia infida Romanis essent, Capuæ quoque
 occultæ principum conjurationes factæ. De quibus
 quum ad senatum relatum esset, haudquaquam neg-
 lecta res est: quæstiones decretæ, dictatoremque
 C. Mænius quæstionibus exercendis dici placuit: C. Mænius
 dictator dictus: is M. Fostium magistrum equitum dixit.
 quæstioni- Ingens erat magistratus ejus terror: itaque sive ti-
 bus exer- more ejus, seu conscientia, Calavios, Ovium Novi-
 cendis. umque, (ea capita conjurationis fuerant) priusquam
 nominarentur apud dictatorem, mors haud dubie ab
 ipsis conscita judicio subtraxit. Deinde, ut quæ-
 stioni Campanæ materia decessit, versa Romam in-
 terpretando res: non nominatim, qui Capuæ, sed
 in universum, qui usquam coissent conjurassentve
 adversus rempublicam, quæri senatum jussisse: et
 coitiones, honorum adipiscendorum caussa factas,
 adversus rempublicam esse: latiorque et re et per-
 sonis quæstio fieri; haud abnuente dictatore, sine
 fine ulla quæstionis suæ jus esse. Postulabantur
 ergo nobiles homines: adpellantibusque tribunos
 nemo erat auxilio, quin nomina reciperentur. Inde
 nobilitas, nec hi modo, in quos crimen intendeba-
 tur, sed universi simul, negare, nobilium id crimen
 esse; quibus, si nulla obstetur fraude, pateat via

ad honorem, sed hominum novorum : ipsos adeo dictatorem magistrumque equitum reos magis, quam quæsitores idoneos ejus criminis esse : intellecturosque ita id esse, simul magistratu abissent. Tum enimvero Mænius, jam famæ magis, quam imperii, memor, progressus in concionem ita verba fecit : *Et omnes anteactæ vitæ vos conscios habeo, Quirites, et hic ipse honos, delatus ad me, testis est innocentiae meæ : neque enim, quod sæpe alias, quia ita tempora postulabant reipublicæ, qui bello clarissimus esset, sed qui maxime procul ab his coitionibus vitam egisset, dictator deligendus exercendis quæstionibus fuit. Sed quoniam quidam nobiles homines (qua de caussa, vos existimare, quam me pro magistratu quidquam incompertum dicere, melius est) primum ipsas expugnare quæstiones omni ope adnisi sunt : dein, postquam ad id parum potentes erant, ne caussam dicerent, in præsidia adversariorum, adpellationem et tribunicium auxilium, patricii confugerunt : postremo repulsi inde (adeo omnia tutiora, quam ut innocentiam suam purgarent, visa) in nos irruerunt, et privatis dictatorem poscere reum verecundiæ non fuit : ut omnes Dii hominesque sciant, ab illis, etiam quæ non possint, tentari, ne rationem vitæ reddant ; me obriam ire crimini, et obferre me inimicis reum, dictatura me abdicō. Vos quæso, consules, si vobis datum ab senatu negotium fuerit, in me primum et hunc M. Foslium quæstiones exerceatis ; ut adpareat, innocentia nostra nos, non majestate honoris, tutos a criminationibus istis esse. Abdicat inde se dictatura, et post eum confestim Foslius magisterio equitum : primique apud consules (iis enim ab senatu mandata res est) rei facti, adversus nobilium testimonia egregie absolvuntur.*

U. C. 440.
A. C. 812.

Abdicat se
dictatura.

Reus factus
absolvitur.

U. C. 440. Publilius etiam Philo, multiplicatis summis honoribus, post res tot domi belloque gestas, ceterum in-
 A. C. 312. visus nobilitati, caussam dixit, absolutusque est. Nec diutius, ut fit, quam dum recens erat, quæstio per clara nomina reorum vixit: inde labi cœpit ad viliora capita, donec coitionibus factionibusque, adversus quas comparata erat, obpressa est.

XXVII. Earum fama rerum, magis tamen spes Campanæ defectionis, in quam conjuratum erat, Samnites, in Apuliam versos, rursus ad Caudium revocavit: ut inde ex propinquo, si qui motus occasionem aperiret, Capuam Romanis eriperent. Eo consules cum valido exercitu venerunt: et primo circa saltus, quum utrimque ad hostem iniqua via esset, cunctati sunt: deinde Samnites per aperta loca brevi circuitu in loca plana, Campanos campos, agmen demittunt, ibique primum castra in conspectu hostibus data: deinde levibus præliis, equitum sæpius, quam peditum, utrimque periculum factum; nec aut eventus eorum Romanum, aut moræ, qua trahebant bellum, pœnitebat. Samnitium contra ducibus, et carpi parvis quotidie damnis, et senescere dilatione belli vires suæ videbantur: itaque in aciem procedunt, equitibus in cornua divisus: quibus præceptum erat, intentiores ad respectum castrorum, ne qua eo vis fieret, quam ad prælium, starent: aciem pediti tutam fore. Consul Sulpicius in dextro, Pœtelius in lævo cornu consistunt. Dextra pars, qua et Samnites raris ordinibus, aut ad circumeundos hostes, aut ne ipsi circumirentur, constiterant, latius patefacta stetit. Sinistris, præterquam quod confertiores steterant, repentino consilio Pœtelii consulis additæ vires:

Prælium
 cum Sam-
 nitibus.

qui subsidiarias cohortes, quæ integræ ad longioris pugnae casus reservabantur, in primam aciem ex-
 templo emisit; universisque hostem primo inpetu viribus inpulit. Commota pedestri acie Samnitium, eques in pugnam succedit: in hunc, transverso agmine inter duas acies se inferentem, Romanus equitatus concitat equos; signaque et ordines peditum atque equitum confundit, donec universam ab ea parte avertit aciem. In eo cornu non Pœtelius solus, sed Sulpicius etiam, hortator adfuerat, auctus ab suis nondum conserentibus manus ad clamorem, ab sinistra parte prius exortum: unde, haud dubiam victoriam cernens, quum ad suum cornu tenderet cum mille ducentis viris, dissimilem ibi fortunam invenit: Romanos loco pulsos, victorem hostem signa in percussos inferentem. Ceterum omnia mutavit repente consulis adventus: nam et conspectu ducis reffectus militum est animus: et, majus quam pro numero auxilium, advenerant fortes viri: et partis alterius victoria audita, mox visa etiam, prælium restituit. Tota deinde jam vincere acie Romanus, et, omisso certamine, cædi capique Samnites; nisi qui Maleventum, cui nunc urbi Beneventum nomen est, perfugerunt. Ad triginta millia cæsa aut capta Samnitium, proditum memoriæ est.

Vincunt
 Romani.

XXVIII. Consules, egregia victoria parta, protinus inde ad Bovianum obpugnandum legiones ducunt: ibique hiberna egerunt, donec ab novis consulibus L. Papirio Cursore quintum, C. Junio Bublico iterum, nominatus dictator C. Pœtelius cum M. Foslio magistro equitum exercitum accepit. Is, quum audisset arcem Fregellanam ab Samnitibus captam, omisso Boviano ad Fregellas pergit: unde,

U. C. 441.
 A. C. 311.
 Pœtelius
 dictator.

U. C. 441. nocturna Samnitium fuga sine certamine receptis
 A. C. 311. Fregellis, præsidioque valido inposito, in Campaniam reditum maxime ad Nolam armis repetendam: eo se intra mœnia, sub adventum dictatoris, et Samnitium omnis multitudo et Nolani agrestes contulerant. Dictator, urbis situ circumspecto, quo apertior aditus ad mœnia esset, omnia ædificia (et frequenter ibi habitabatur) circumjecta muris incendit: nec ita multo post, sive a Pœtelio dictatore, sive ab C. Junio consule, (nam utrumque traditur) Nola est capta. Qui captæ decus Nolæ ad consulem trahunt, adjiciunt, Atinam et Calatiam ab eodem captas; Pœtelium autem, pestilentia orta, clavi figendi causa dictatorem dictum. Suessa et Pontia eodem anno coloniæ deductæ sunt. Suessa Auruncorum fuerat: Volsci Pontias, insulam sitam in conspectu litoris sui, incoluerant: et, Interamna et Casinum ut deducerentur coloniæ, senatusconsultum factum est: sed triumviros creare, ac misere colonorum quatuor millia insequentes consules M. Valerius, P. Decius.

U. C. 442. XXIX. Profligato fere Samnitium bello, priusquam ea cura decederet Patribus Romanis, Etrusci belli fama exorta est: nec erat ea tempestate gens alia, cujus secundum Gallicos tumultus arma terribiliora essent, quam propinquitate agri, tum multitudine hominum. Itaque, altero consulum in Samnio reliquias belli persequente, P. Decius, qui graviter æger Romæ restiterat, auctore senatu dictatorem C. Junium Bubulcum dixit: is, prout rei magnitudo postulabat, omnes juniores sacramento adigit: arma, quæque alia res poscit, summa industria parat: nec tantis adparatibus elatus de infe-

rendo bello agitat, quieturus haud dubie, nisi ultro U. C. 442.
 arma Etrusci inferrent. Eadem in comparando co- A. C. 310.
 hibendoque bello consilia et apud Etruscos fuere: Ap. Clau-
 neutri finibus egressi. Et censura clara eo anno dus et C.
 Ap. Claudii, et C. Plautii fuit; memoriæ tamen fe- Plautius
 licioris ad posteros nomen Appii, quod viam muni- censores.
 vit, et aquam in urbem duxit, eaque unus perfecit;
 quia, ob infamem atque invidiosam senatus lectio-
 nem verecundia victus, collega magistratu se abdi-
 caverat. Appius, jam inde antiquitus insitam per-
 tinaciam familiæ gerendo, solus censuram obtinuit.
 Eodem Appio auctore, Potitii, gens, cujus ad aram Potitia gens
 Maximam Herculis familiare sacerdotium fuerat, intra an-
 servos publicos, ministerii delegandi caussa, sollem- num ex-
 nia ejus sacri docuerat. Traditur inde dictu mira- stincta.
 bile, et quod dimovendis statu suo sacris religionem
 facere posset, quum duodecim familiæ ea tempe-
 state Potitiorum essent, puberes ad triginta, omnes
 intra annum cum stirpe extinctos: nec nomen
 tantum Potitiorum interisse, sed censorem etiam
 Appium, memori Deum ira, post aliquot annos lu-
 minibus captum.

XXX. Itaque consules, qui eum annum secuti U. C. 443.
 sunt, C. Junius Bubulcus tertium et Q. Æmilius A. C. 309.
 Barbula iterum, initio anni questi apud populum,
 deformatum ordinem prava lectione senatus, qua
 potiores aliquot lectis præteriti essent; negaverunt,
 eam lectionem se, quæ sine recti pravique discri-
 mine ad gratiam ac libidinem facta esset, observa-
 turos: et senatum extemplo citaverunt eo ordine, qui
 ante censores Ap. Claudium et C. Plautium fuerat.
 Et duo imperia eo anno dari cœpta per populum,
 utraque pertinentia ad rem militarem: unum, ut tri-

U. C. 443. buni militum seni deni in quatuor legiones a populo
 A. C. 309. crearentur; quæ antea, perquam paucis suffragio
 populi relictis locis, dictatorum et consulum ferme
 fuerant beneficia: tulere eam rogationem tribuni
 plebei L. Atilius, C. Marcius. Alterum, ut duum-
 viros navales classis ornandæ reficiendæque caussa
 idem populus juberet: lator hujus plebisciti fuit M.
 Decius tribunus plebis. Ejusdem anni rem dictu
 parvam præterirem, ni ad religionem visa esset per-
 tinere. Tibicines, quia prohibiti a proximis censo-
 ribus erant in æde Jovis vesci, quod traditum anti-
 quitus erat, ægre passi, Tibur uno agmine abierunt:
 adeo ut nemo in urbe esset, qui sacrificiis præcine-
 ret. Ejus rei religio tenuit senatum; legatosque
 Tibur miserunt, ut darent operam, ut hi homines
 Romanis restituerentur. Tiburtini, benigne polli-
 citi, primum aditos eos in curiam hortati sunt, uti
 reverterentur Romam: postquam perpelli nequi-
 bant, consilio, haud abhorrente ab ingeniis homi-
 num, eos adgrediuntur. Die festo alii alios per
 speciem celebrandarum cantu epularum caussa invi-
 tant, et vino, cujus avidum ferme genus est, onera-
 tos sopiunt: atque ita in plaustra somno vinctos
 conjiciunt, ac Romam deportant: nec prius sensere,
 quam, plaustis in foro relictis, plenos crapulæ eos
 lux obpressit. Tunc concursus populi factus, inpe-
 tratoque, ut manerent, datum, ut triduum quotan-
 nis ornati, cum cantu atque hac, quæ nunc sollem-
 nis est, licentia per urbem vagarentur: restitutum-
 que in æde vescendi jus iis, qui sacris præcinerent.
 Hæc inter duorum ingentium bellorum curam gere-
 bantur.

XXXI. Consules inter se provincias partiti;

Junio Samnites, Æmilio novum bellum Etruria sorte obvenit. In Samnio Cluviam, præsidium Romanum, quia nequiverat vi capi, obsessum fame in deditionem acceperant Samnites, verberibusque fœdum in modum laceratos occiderant deditos. Huic infensus crudelitati Junius, nihil antiquius obpugnatione Cluviana ratus, quo die adgressus est mœnia, vi cepit, atque omnes puberes interfecit. Inde victor exercitus Bovianum ductus : caput hoc erat Pentrorum Samnitium, longe ditissimum atque opulentissimum armis virisque. Ibi quia haud tantum irarum erat, spe prædæ milites accensi, oppido potiuntur : minus itaque sævitum in hostes est : prædæ plus pene, quam ex omni Samnio umquam, egestum, benigneque omnis militi concessa. Et postquam præpotentem armis Romanum nec acies subsistere ullæ, nec castra, nec urbes poterant ; omnium principum in Samnio eo curæ sunt intentæ, ut insidiis quæreretur locus, si qua licentia populando effusus exercitus excipi ac circumveniri posset. Transfugæ agrestes et captivi quidam, pars forte, pars consilio oblatis, congruentia ad consulem adferentes, quæ et vera erant, pecoris vim ingentem in saltum avium compulsam esse, perpulerunt, ut prædatum eo expeditæ ducerentur legiones. Ibi ingens hostium exercitus itinera occultus insederat, et, postquam intrasse Romanos vidit saltum, repente exortus cum clamore ac tumultu incautos invadit. Et primo nova res trepidationem fecit, dum arma capiunt, sarcinas congerunt in medium : dein, postquam, ut quisque liberaverat se onere, aptaveratque armis, ad signa undique coibant, et notis ordinibus in vetere disciplina militiæ, jam sine præ-

U. C. 443.

A. C. 309.

Res gestæ
in Samnio.

U. C. 443. cepto ullius sua sponte struebatur acies, consul, ad
 A. C. 309. ancipitem maxime pugnam advectus, desilit ex equo,
 et Jovem, Martemque atque alios testatur Deos, se
 nullam suam gloriam inde, sed prædam militi quæren-
 tem, in eum locum devenisse : neque in se aliud, quam
 nimiam ditandi ex hoste militis curam, reprehendi
 posse : ab eo se dedecore nullam rem aliam, quam vir-
 tutem militum, vindicaturam : conniterentur modo uno
 animo omnes invadere hostem, victum acie, castris
 exutum, nudatum urbibus, ultimam spem furto insidia-
 rum tentantem, et loco, non armis, fretum. Sed quem
 esse jam virtuti Romanæ inexpugnabilem locum? Fre-
 gellana arx, Soranaque, et ubicumque iniquo suc-
 cessum erat loco, memorabantur. His accensus
 miles, omnium inmemor difficultatum, vadit adver-
 sus imminentem hostium aciem : ibi paullum labo-
 ris fuit, dum in adversum clivum erigitur agmen :
 ceterum, postquam prima signa planiciem summam
 ceperunt, sensitque acies æquo se jam institisse lo-
 co, versus extemplo est terror in insidiatores, eas-
 demque latebras, quibus se paullo ante texerant,
 palati atque inermes fuga repetebant : sed loca dif-
 ficilia, hosti quæsita, ipsos tum sua fraude inpedie-
 bant. Itaque ergo perpaucis effugium patuit : cæsa
 ad viginti millia hominum, victorque Romanus ad
 oblatam ultro ab hoste prædam pecorum discurrit.

Etrusci Su-
 trium ob-
 pugnant.

XXXII. Dum hæc geruntur in Samnio, jam
 omnes Etruriæ populi præter Arretinos ad arma ie-
 rant, ab obpugnando Sutrio, quæ urbs, socia Ro-
 manis, velut claustra Etruriæ erat, ingens orsi bel-
 lum. Eo alter consulum Æmilius cum exercitu ad
 liberandos obsidione socios venit. Advenientibus
 Romanis, Sutrini compectus benigne in castra ante

urbem posita advexere. Etrusci diem primum con-^{U. C. 443.}
sultando, maturarent, traherentne bellum, tradux-^{A. C. 309.}
erunt. Postero die, ubi celeriora, quam tutiora,
consilia magis placuere ducibus, sole orto signum
pugnæ propositum est, armatique in aciem proce-
dunt. Quod postquam consuli nunciatum est, ex-
templo tesseram dari jubet, ut prandeat miles, fir-
matisque cibo viribus arma capiat: dicto paretur.
Consul, ubi armatos paratosque vidit, signa extra
vallum proferri jussit, et haud procul hoste instruxit
aciem. Aliquamdiu intenti utrimque steterunt, ex-
spectantes ut ab adversariis clamor et pugna inci-
peret: et prius sol meridie se inclinavit, quam telum
hinc aut illinc emissum est: inde, ne infecta re abi-
retur, clamor ab Etruscis oritur, concinuntque tu-
bæ, et signa inferuntur. Nec segnius ab Romanis
pugna initur: concurrunt infensis animis: numero
hostis, virtute Romanus superat. Anceps prælium
multos utrimque, et fortissimum quemque, absumit:
nec prius inclinata res est, quam secunda acies Ro-
mana ad prima signa, integri fessis, successerunt.
Etrusci, quia nullis recentibus subsidiis fulta prima
acies fuit, ante signa circaque omnes ceciderunt:
nullo umquam prælio fugæ minus, nec plus cædis
fuisset, ni obstinatos mori Tuscos nox texisset; ita
ut victores prius, quam victi, pugnandi finem face-
rent. Post occasum solis signum receptui datum
est: nocte ab utroque in castra reditum. Nec deinde
quidquam eo anno rei memoria dignæ apud Sutrium
gestum est; quia et ex hostium exercitu prima tota
acies deleta uno prælio fuerat, subsidiariis modo re-
lictis, vix quod satis esset ad castrorum præsidium:
et apud Romanos tantum vulnere fuit, ut plures

post prœlium saucii decesserint, quam ceciderant in acie.

U. C. 444.

A. C. 305.

Ap. Claudius censuram ultra legitimum tempus retinet.

XXXIII. Q. Fabius insequentis anni consul, bellum ad Sutrium excepit: collega Fabio C. Marcius Rutilus datus est. Ceterum et Fabius supplementum ab Roma adduxit, et novus exercitus domo aditus Etruscis venit. Permulti anni jam erant, quum inter patricios magistratus tribunosque nulla certamina fuerant: quum ex ea familia, quæ velut fatalis tum tribunis ac plebi erat, certamen oritur. Ap. Claudius censor, circumactis decem et octo mensibus, quod Æmilia lege finitum censuræ spatium temporis erat, quum C. Plautius collega ejus magistratu se abdicasset, nulla vi compelli, ut abdicaret, potuit. P. Sempronius erat tribunus plebis; qui finiendæ censuræ intra legitimum tempus actionem susceperat, non popularem magis, quam justam; nec in vulgus, quam optimo cuique, gratiorem. Is, quum identidem legem Æmiliam recitaret, auctoremque ejus Mam. Æmilium dictatorem laudibus ferret; qui quinquennalem ante censuram, et longinquitate potestatem dominantem, intra sex mensium et anni coëgisset spatium: *Dic, agedum, inquit, Ap. Claudii, quidnam facturus fueris, si eo tempore, quo C. Furius et M. Geganius censores fuerunt, censor fuisses. Negare Appius, interrogationem tribuni magno opere ad causam pertinere suam: nam, etsi tenuerit lex Æmilia eos censores, quorum in magistratu lata esset, quia post illos censores creatos eam legem populus jussisset, quodque postremum jussisset, id jus ratumque esset; non tamen aut se, aut eorum quemquam, qui post eam legem latam creati censores essent, teneri ea lege potuisse.*

XXXIV. Hæc sine ullius adsensu cavillante Ap-
 pio, En, inquit, Quirites, illius Appii progenies, qui,
 decemvir in annum creatus, altero anno se ipse crea-
 vit: tertio, nec ab se, nec ab ullo creatus, privatus
 fasces et imperium obtinuit: nec ante continuando ab-
 stitit magistratu, quam obruerent eum male parta,
 male gesta, male retenta imperia. Hæc est eadem fa-
 milia, Quirites, cujus vi atque injuriis compulsi, extor-
 res patria, Sacrum montem cepistis: hæc, adversus
 quam tribunicium auxilium vobis comparastis: hæc,
 propter quam duo exercitus Aventinum insedistis: hæc,
 quæ fœnebres leges; hæc, quæ agrarias semper inpug-
 navit: hæc connubia Patrum et plebis interrupit: hæc
 plebi ad curules magistratus iter obsepsit: hoc est no-
 men multo, quam Tarquiniorum, infestius vestræ li-
 bertati. Itane tandem, Ap. Claudii, quum centesimus
 jam annus sit ab Mam. Æmilio dictatore, tot censores
 fuerint, nobilissimi fortissimique viri, nemo eorum
 duodecim tabulas legit? nemo id jus esse, quod postre-
 mo populus jussisset, scivit? Immo vero omnes scive-
 runt; et ideo Æmiliæ potius legi paruerunt, quam
 illi antiquæ, qua primum censores creati erant, quia
 hanc postremam jusserat populus: et quia, ubi duæ
 contrariæ leges sunt, semper antiquæ obrogat nova.
 An hoc dicis, Appi, non teneri Æmilia lege populum?
 an populum teneri, te unum exlegem esse? Tenuit
 Æmilia lex violentos illos censores, C. Furium et M.
 Geganium; qui, quid iste magistratus in republica
 mali facere posset, indicarunt: quum, ira finitæ po-
 testatis, Mam. Æmilium, principem ætatis suæ belli
 domique, ærarium fecerunt: tenuit deinceps omnes cen-
 sores intra centum annorum spatium: tenet C. Plau-
 tium collegam tuum iisdem auspiciis, eodem jure crea-

U. C. 444.
 A. C. 308.
 P. Semprom-
 nii tr. pl.
 oratio in
 Claudium.

U. C. 444. tum. *An hunc non, ut qui optimo jure censor creatus*
 A. C. 308. *esset, populus creavit? tu unus eximius es, in quo hoc*
præcipuum ac singulare valeat? Quem tu regem sa-
crificiorum crees, amplexus regni nomen, ut qui optimo
jure rex Romæ creatus sit, creatum se dicet? quem
semestri dictatura, quem interregno quinque dierum
contentum fore putes? quem clavi figendi, aut ludo-
rum caussa dictatorem audacter crees? Quam isti sto-
lidos ac socordes videri creditis eos, qui intra vicesimum
diem, ingentibus rebus gestis, dictatura se abdicave-
runt, aut qui vitio creati abierunt magistratu? Quid
ego antiqua repetam? Nuper intra decem annos C.
Mænius dictator, quia, quum quæstiones severius, quam
quibusdam potentibus tutum erat, exerceret, contagio
ejus, quod quærebat ipse, criminis objectata ab inimicis
est, ut privatus obviam iret crimini, dictatura se ab-
dicavit. Nolo ego istam in te modestiam: ne dege-
neraveris a familia imperiosissima et superbissima:
non die, non hora citius, quam necesse est, magistratu
abieris; modo ne excedas finitum tempus. Satis est,
aut diem, aut mensem censuræ adjicere? Triennium,
inquit, et sex menses ultra, quam licet Æmilia lege,
censuram geram, et solus geram: hoc quidem jam
regno simile est. An collegam subrogabis, quem ne
in demortui quidem locum subrogari fas est? Pænitet
enim, quod antiquissimum sollemne, et solum ab ipso,
cui fit, institutum Deo, ab nobilissimis antistitibus ejus
sacri ad servorum ministerium religiosus censor de-
duxisti: gens antiquior originibus urbis hujus, hospitio
Deorum immortalium sancta, propter te ac tuam cen-
suram intra annum ab stirpe extincta est: nisi uni-
versam rempublicam eo nefario obstrinxeris, quod omi-
nori etiam reformidat animus. Urbs eo lustrò capta

est, quo, demortuo collega C. Julio censore, L. Papirius Cursor, ne abiret magistratu, M. Cornelium Maluginensem collegam subrogavit. Et quanto modestior illius cupiditas fuit, quam tua, Appi? Nec solus, nec ultra finitum lege tempus L. Papirius censuram gessit, tamen neminem invenit, qui se postea auctorem sequeretur: omnes deinceps censores post mortem collegæ se magistratu abdicarunt. Te, nec quod dies exit censuræ, nec quod collega magistratu abiit, nec lex, nec pudor coercet: virtutem in superbia, in audacia, in contentu Deorum hominumque ponis. Ego te, Ap. Claudii, pro istius magistratus majestate ac verecundia, quem gessisti, non modo manu violatum, sed ne verbo quidem inclementiori a me adpellatum vellem: sed et hæc, quæ adhuc egi, pervicacia tua et superbia coëgit me loqui; et, nisi Æmiliæ legi parueris, in vincula duci jubebo; nec, quum ita comparatum a majoribus sit, ut, comitiis censoriis nisi duo confecerint legitima suffragia, non renunciato altero, comitia differantur, ego te, qui solus censor creari non possis, solum censuram gerere patiar. Hæc taliaque quum dixisset, prendi censorem, et in vincula duci jussit. Adprobantibus sex tribunis actionem collegæ, tres adpellanti Appio auxilio fuerunt; summaque invidia omnium ordinum solus censuram gessit.

XXXV. Dum ea Romæ geruntur, jam Sutrium ab Etruscis obsidebatur: consulique Fabio, imis montibus ducenti ad ferendam opem sociis tentandasque munitiones, si qua posset, acies hostium instructa obcurrit; quorum ingentem multitudinem quum ostenderet subjecta late planicies; consul, ut loco paucitatem suorum adjuvaret, flectit paullulum in clivos agmen, (aspreta erant strata saxis) inde

Fabii prælium cum Etruscis.

U. C. 444 signa in hostem obvertit. Etrusci, omnium, præ-
 A. C. 308. terquam multitudinis suæ, qua sola freti erant, in-
 memores, prælium ineunt adeo raptim et avide, ut,
 abjectis missilibus, quo celerius manus consererent,
 stringerent gladios, vadentes in hostem. Romanus
 contra nunc tela, nunc saxa, quibus eos adfatim lo-
 cus ipse armabat, ingerere. Igitur scuta galeæque
 ictæ quum etiam, quos non vulneraverant, turba-
 rent, (neque subire erat facile ad propiorem pug-
 nam, neque missilia habebant, quibus eminus rem-
 gererent) stantes et expositos ad ictus quum jam
 satis nihil tegetet, quosdam etiam pedem referentes,
 fluctuantemque et instabilem aciem, redintegrato
 clamore, strictis gladiis hastati et principes inva-
 dunt: eum inpetum non tulerunt Etrusci, versisque
 signis, fuga effusa castra repetunt. Sed equites Ro-
 mani, prævecti per obliqua campi, quum se fugien-
 tibus obtulissent, omisso ad castra itinere, montes
 petunt. Inde inermi pene agmine ac vexato vulne-
 ribus in silvam Ciminiam penetratum. Romanus,
 multis millibus Etruscorum cæsis, duodequadraginta
 signis militaribus captis, castris etiam hostium cum
 præda ingenti potitur. Tum de persequendo hoste
 agitari cœptum.

Ciminia
 silva.

XXXVI. Silva erat Ciminia magis tum invia at-
 que horrenda, quam nuper fuere Germanici saltus,
 nulli ad eam diem ne mercatorum quidem adita:
 eam intrare haud fere quisquam, præter ducem ip-
 sum, audebat: aliis omnibus cladis Caudinæ non-
 dum memoria aboleverat. Tum ex iis, qui aderant,
 (consulis fratrem M. Fabium, Kæsonem alii, C.
 Claudium quidam matre eadem, qua consulem, ge-
 nitum tradunt) speculatum se iturum professus, bre-

vique omnia certa adlaturum. Cære educatus apud U. C. 444.
 hospites, Etruscis inde literis eruditus erat, lin- A. C. 309.
 guamque Etruscam probe noverat. Habeo auctores,
 vulgo tum Romanos pueros, sicut nunc Græcis, ita
 Etruscis literis erudiri solitos. Sed propius est vero
 præcipuum aliquid fuisse in eo, qui se tam audaci
 simulatione hostibus immiscuerit: servus ei dicitur
 comes unus fuisse, nutritus una, eoque haud igna-
 rus linguæ ejusdem: nec quidquam aliud proficis-
 centes, quam summatim regionis, quæ intranda erat,
 naturam ac nomina principum in populis acceperere;
 ne qua inter colloquia insigni nota hæsitantes de-
 prehendi possent. Iere pastorali habitu, agrestibus
 telis, falcibus gæsisque binis armati. Sed neque
 commercium linguæ, nec vestis armorumve habitus
 sic eos texit, quam quod abhorrebat ab fide, quem-
 quam externum Ciminios saltus intraturum. Usque
 ad Camertes Umbros penetrasse dicuntur: ibi, qui
 essent, fateri Romanum ausum: introductumque in
 senatum consulis verbis egisse de societate amicitia-
 que: atque inde comi hospitio acceptum, nunciare
 Romanis jussum, commeatum exercitui dierum tri-
 ginta præsto fore, si ea loca intrasset; juventutem-
 que Camertium Umbrorum in armis paratam im-
 perio futuram. Hæc quum relata consuli essent,
 impedimentis prima vigilia præmissis, legionibus post
 impedimenta ire jussis, ipse substitit cum equitatu:
 et, luce orta, postero die obequitavit stationibus
 hostium, quæ extra saltum dispositæ erant: et,
 quum satis diu tenuisset hostem, in castra sese re-
 cepit; portaque altera egressus, ante noctem ag-
 men adsequitur. Postero die, luce prima, juga Ci-
 minii montis tenebat: inde, contemplatus opulentâ

U. C. 444. Etruriæ arva, milites emittit. Ingenti jam abacta
 A. C. 308. præda, tumultuariæ agrestium Etruscorum cohortes,
 repente a principibus regionis ejus concitatæ, Ro-
 manis obcurrunt, adeo incompositæ, ut vindices
 prædarum prope ipsi prædæ fuerint. Cæsis fugatis-
 que iis, late depopulato agro, victor Romanus, opu-
 lentusque rerum omnium copia, in castra rediit. Eo
 forte quinque legati cum duobus tribunis plebis ve-
 nerant, denunciatum Fabio senatus verbis, ne sal-
 tum Ciminium transiret: lætati serius se, quam ut
 impedire bellum possent, venisse, nuncii victoriæ
 Romam revertuntur.

XXXVII. Hac expeditione consulis motum la-
 tius erat, quam profligatum, bellum: vastationem
 namque sub Ciminii montis radicibus jacens ora
 senserat, conciveratque indignatione non Etruriæ
 modo populos, sed Umbriæ finitima. Itaque, quan-
 tus non umquam antea, exercitus ad Sutrium ve-
 nit: neque e silvis tantummodo promota castra,
 sed etiam aviditate dimicandi quam primum in cam-
 pos delata acies: deinde instructa primo suo stare
 loco, relicto hostibus ad instruendum contra spatio:
 dein, postquam detractare hostem sensere pugnam,
 ad vallum subeunt. Ubi postquam stationes quoque
 receptas intra munimenta sensere, clamor repente
 circa duces ortus, ut *eo sibi e castris cibaria ejus diei*
deferri juberent; mansuros se sub armis, et aut nocte,
aut certe luce prima castra hostium invasuros. Nihilo
 quietior Romanus exercitus imperio ducis contine-
 tur: decima erat fere diei hora, quum cibum capere
 consul milites jubet; præcipit, ut in armis sint,
 quacumque diei noctisve hora signum dederit. Pau-
 cis milites adloquitur, Samnitium bella extollit, ele-

Ingens E-
truscorum
exercitus
conligitur.

vat Etruscos: *nec hostem hosti, nec multitudinem* U. C. 444.
multitudini comparandam ait esse. Præterea telum A. C. 308.
aliud occultum scituros in tempore: interea taceri opus
esse. His ambagibus prodi simulabat hostes, quo
 animus militum multitudine territus restitueretur:
 et, quod sine munimento consederant, verisimilius
 erat, quod simulabatur. Curati cibo corpora quieti
 dant, et quarta fere vigilia sine tumultu excitati ar-
 ma capiunt. Dolabræ calonibus dividuntur ad val-
 lum prouendum fossasque implendas: intra muni-
 menta instruitur acies: delectæ cohortes ad porta-
 rum exitus conlocantur: dato deinde signo paullo
 ante lucem, quod æstivis noctibus sopitæ maxime Etrusci ob-
 quietis tempus est, proruto vallo erupit acies; stra-
 pressi.
 tos passim invadit hostes: alios immobiles, alios se-
 misomnos in cubilibus suis, maximam partem ad ar-
 ma trepidantes, cædes obpressit: paucis armandi se
 datum spatium est. Eos ipsos, non signum certum,
 non ducem sequentes, fundit Romanus, fugatos
 eques persequitur: ad castra, ad silvas diversi ten-
 debant. Silvæ tutius dedere refugium: nam castra
 in campis sita eodem die capiuntur: aurum argen-
 tumque jussum referri ad consulem: cetera præda
 militis fuit. Cæsa aut capta eo die hostium millia
 ad sexaginta. Eam tam claram pugnam trans
 Ciminiam silvam ad Perusiam pugnatam, quidam
 auctores sunt; metuque in magno civitatem fuisse,
 ne interclusus exercitus tam infesto saltu, co-
 ortis undique Tuscis Umbrisque, obprimeretur.
 Sed, ubicumque pugnatum est, res Romana su-
 perior fuit: itaque a Perusia, et Cortona, et Arre-
 tio, quæ ferme capita Etruriæ populorum ea tem-
 pestate erant, legati, pacem foedusque ab Roma-

U. C. 444. nis petentes, inducias in triginta annos inpetra-
A. C. 308. verunt.

XXXVIII. Dum hæc in Etruria geruntur, consul alter C. Marcius Rutilus Allifas de Samnitibus vi cepit: multa alia castella vicique, aut deleta hostiliter, aut integra in potestatem venire. Per idem tempus et classis Romana a P. Cornelio, quem senatus maritimæ oræ præfecerat, in Campaniam acta, quum adpulsa Pompeios esset; socii inde navales ad depopulandum agrum Nucerinum profecti, proximis raptim vastatis, unde reditus tutus ad naves esset, dulcedine (ut fit) prædæ longius progressi, excivere hostes. Palatis per agros nemo obvius fuit, quum occidione occidi possent: redeuntes agmine incauto haud procul navibus adsecuti agrestes exuerunt præda, partem etiam occiderunt: quæ superfuit cædi, trepida multitudo ad naves compulsa est. Profectio Q. Fabii trans Cimniniam silvam quantum Romæ terrorem fecerat, tam lætam famam in Samnium ad hostes tulerat: *interclusum Romanum exercitum obsideri, cludisque imaginem Furculas Cawlinas memorabant: eadem temeritate avidam ulteriorum semper gentem in saltus invios deductam, septam non hostium magis armis, quam locorum iniquitatibus esse.* Jam gaudium invidia quadam miscebatur, quod belli Romani decus ab Samnitibus fortuna ad Etruscos avertisset: itaque armis virisque ad obterendum C. Marcium consulem concurrunt; protinus inde Etruriam per Marsos ac Sabinos petitori, si Marcius dimicandi potestatem non faciat. Obvius iis consul fuit: dimicatum prælio utrimque atroci, atque incerto eventu est: et quum anceps cædes fuisset, adversæ tamen rei fama in Romanos vertit, ob amissos

Classis
Romana.

Anceps
prælium
cum Sam-
nitibus.

quosdam equestris ordinis, tribunosque militum, atque unum legatum, et (quod insigne maxime fuit) consulis ipsius vulnus. Ob hæc etiam aucta fama (ut solet) ingens terror Patres invasit, dictatoremque dici placebat: nec, quin Cursor Papirius diceretur, in quo tum summa rei bellicæ ponebatur, dubium cuiquam erat: sed nec in Samnium nuncium perferri, omnibus infestis, tuto posse; nec vivere Marcium consulem satis fidebant. Alter consul Fabius infestus privatim Papirio erat: quæ ne ira obstaret bono publico, legatos ex consularium numero mittendos ad eum senatus censuit: qui sua quoque eum, non publica solum, auctoritate moverent, ut memoriam simultatum patriæ remitteret. Profecti legati ad Fabium quum senatusconsultum tradidissent, adjecissentque orationem convenientem mandatis, consul, demissis in terram oculis, tacitus ab incertis, quidnam acturus esset, legatis recessit: nocte deinde silentio (ut mos est) L. Papirium dictatorem dixit: cui quum ob animum egregie victum legati gratias agerent, obstinatum silentium obtinuit, ac sine responso ac mentione facti sui legatos dimisit, ut adpareret, insignem dolorem ingenti comprimi animo. Papirius C. Junium Bubulum magistrum equitum dixit: atque ei, legem curiatam de imperio ferenti, triste omen diem diffidit, quod Fautia curia fuit principium, duabus insignis cladibus, captæ urbis, et Caudinæ pacis: quod utroque anno eadem curia fuerat principium. Macer Licinius tertia etiam clade, quæ ad Cremeram accepta est, abominandam eam curiam facit.

U. C. 444.
A. C. 308.

Fabius Papirium dictatorem dicit.

Fautia curia.

XXXIX. Dictator postero die auspiciis repeti-

U. C. 444. tis, pertulit legem : et, profectus cum legionibus, ad
 A. C. 308. terrorem traducti silvam Ciminiam exercitus nuper
 scriptis, ad Longulam pervenit : acceptisque a Mar-
 cio consule veteribus militibus, in aciem copias
 eduxit : nec hostes detractare visi pugnam : in-
 structos deinde armatosque (quum ab neutris præ-
 lium inciperet) nox obpressit. Quieti aliquamdiu,
 nec suis diffidentes viribus, nec hostem spernentes,
 stativa in propinquo habuere. Interea res in Etruria
 Res in Etruria bene gestæ. gestæ : nam et cum Umbrorum exercitu acie depug-
 natum est ; (fusi tamen magis, quam cæsi, hostes,
 quia cœptam acriter non tolerarunt pugnam) et ad
 Vadimonis lacum Etrusci, lege sacrata coacto ex-
 exercitu, quum vir virum legisset, quantis numquam
 alias antea simul copiis, simul animis, dimicarunt :
 tantoque irarum certamine gesta res est, ut ab neu-
 tra parte emissa sint tela : gladiis pugna cœpit, et,
 acerrime commissa, ipso certamine, quod aliquamdiu
 anceps fuit, accensa est : ut non cum Etruscis to-
 ties victis, sed cum aliqua nova gente, videretur di-
 micatio esse. Nihil ab ulla parte movetur fugæ :
 cadunt antesignani : et, ne nudentur propugnatori-
 bus signa, fit ex secunda prima acies. Ab ultimis
 deinde subsidiis cietur miles ; adeoque ad ultimum
 laboris ac periculi ventum est, ut equites Romani,
 omissis equis, ad primos ordines peditum per arma,
 per corpora evaserint : ea velut nova inter fessos ex-
 orta acies turbavit signa Etruscorum. Secuta deinde
 inpetum eorum, utcumque adfecta erat, cetera mul-
 tudo tandem perrumpit ordines hostium. Tunc
 vinci pertinacia cœpta, et averti manipuli quidam :
 et, ut semel dedere terga, etiam certiolem capessere

fugam. Ille primum dies fortuna veteri abundantes U. C. 444.
 Etruscorum fregit opes : cæsum in acie, quod robo- A. C. 308.
 ris fuit ; castra eo inpetu capta direptaque.

XL. Pari subinde periculo gloriæque eventu bel- Samnitium
 lum in Samnitibus erat ; qui, præter ceteros belli acies insig-
 adparatus, ut acies sua fulgeret novis armorum in- nibus armis
 signibus, fecerunt. Duo exercitus erant : scuta al- fulgens.
 terius auro, alterius argento cælaverunt. Forma erat
 scuti : summum latius, qua pectus atque humeri te-
 guntur, fastigio æquali ; ad imum cuneatior, mobi-
 litatis caussa : spongia pectori tegumentum ; et si-
 nistrum crus ocrea tectum : galeæ cristatæ, quæ
 speciem magnitudini corporum adderent : tunicæ au-
 ratis militibus versicolores, argentatis linteæ can-
 didæ : his dextrum cornu datum ; illi in sinistro
 consistunt. Notus jam Romanis adparatus insig-
 nium armorum fuerat ; doctique a ducibus erant,
horridum militem esse debere ; non cælatum auro et
argento, sed ferro et animis fretum : quippe illa præ-
dam verius, quam arma, esse ; nitentia ante rem, de-
formia inter sanguinem et vulnere. Virtutem esse mi-
litis decus, et omnia illa victoriam sequi ; et ditem
hostem quamvis pauperis victoris præmium esse. His
 Cursor vocibus instinctos milites in prælium ducit :
 dextro ipse cornu consistit ; sinistro præfecit ma-
 gistrum equitum. Simul est concursus, ingens fuit
 cum hoste certamen ; non segnius inter dictatorem
 et magistrum equitum, ubi utra parte victoria inci-
 peret. Prior forte Junius commovit hostem, lævo
 dextrum cornu, sacros more Samnitium milites,
 eoque candida veste et paribus candore armis insig-
 nes : eos se Orco mactare Junius dictitans, quum in-
 tulisset signa, turbavit ordines, et haud dubie impulit

U. C. 444. aciem. Quod ubi sensit dictator, *Ab lævone cornu*
 A. C. 308. *victoria incipiet?* inquit, *et dextrum cornu, dictatoris*

acies, alienam pugnam sequetur, non partem maximam
victoriæ trahet? Concitat milites: nec peditum vir-
 tuti equites, aut legatorum studia ducibus cedunt.
 M. Valerius a dextro, P. Decius ab lævo cornu, am-
 bo consulares ad equites in cornibus positos eve-
 huntur: adhortatique eos, ut partem secum capes-
 serent decoris, in transversa latera hostium incur-

Vincitur. runt. Is novus additus terror quum ex parte utra-
 que circumvasisset aciem, et ad terrorem hostium
 legiones Romanæ, redintegrato clamore, intulissent
 gradum, tum fuga ab Samnitibus cœpta. Jam strage
 hominum armorumque insignium campi repleri; ac
 primo pavidos Samnites castra sua accepere: deinde
 ne ea quidem retenta: captis direptisque ante noctem
 injectus ignis. Dictator ex senatusconsulto trium-
 phavit: cujus triumpho longe maximam speciem
 captiva arma præbuere: tantum magnificentiæ vi-
 sum in iis, ut aurata scuta dominis argentariarum
 ad forum ornandum dividerentur: inde natum ini-
 tium dicitur fori ornandi ab ædilibus, quum tensæ
 ducerentur. Et Romani quidem ad honorem Deum
 insignibus armis hostium usi sunt: Campani, ab
 Samnites
 gladiato-
 res, superbia et odio Samnitium, gladiatores (quod spec-
 taculum inter epulas erat) eo ornatu armarunt,
 Samnitiumque nomine compellarunt. Eodem anno
 cum reliquis Etruscorum ad Perusiam, quæ et ipsa
 induciarum fidem ruperat, Fabius consul nec dubia
 nec difficili victoria dimicat: ipsum oppidum (nam
 ad mœnia victor accessit) cepisset, ni legati deden-
 tes urbem exissent. Præsidio Perusiæ inposito, le-
 gationibus Etruriæ amicitiam petentibus præ se Ro-

nam ad senatum missis, consul, præstantiore etiam, U. C. 444.
 quam dictator, victoria triumphans, urbem est in- A. C. 308.
 vectus. Quin etiam devictorum Samnitium decus
 magna ex parte ad legatos, P. Decium et M. Vale-
 rium, est versum: quos populus proximis comitiis
 ingenti consensu consulem alterum, alterum præto-
 rem declaravit.

XLI. Fabio ob egregie perdomitam Etruriam U. C. 445.
 continuatur consulatus; Decius collega datur. Va- A. C. 307.
 lerius prætor quartum creatus. Consules partiti pro-
 vincias: Etruria Decio, Samnium Fabio evenit. Is
 profectus ad Nuceriam Alfaternam, tum pacem pe-
 tentes, quod uti ea, quum daretur, noluissent, ad-
 spernatus, obpugnando ad deditionem subegit. Cum Bene res
 Samnitibus acie dimicatum: haud magno certamine gesta contra
 hostes victi: neque ejus pugnae memoria tradita Samnites.
 foret, ni Marsi eo primum prælio cum Romanis bel-
 lassent. Secuti Marsorum defectionem Peligni, eam-
 dem fortunam habuerunt. Decio quoque alteri con-
 suli secunda belli fortuna erat. Tarquiniensem metu Contra
 subegerat frumentum exercitui præbere, atque indu- Etruscos.
 cias in quadraginta annos petere. Volsiniensium cas-
 tella aliquot vi cepit: quædam ex iis diruit, ne re-
 ceptaculo hostibus essent: circumferendoque passim
 bello, tantum terrorem sui fecit, ut nomen omne
 Etruscum fœdus ab consule peteret. Ac de eo qui-
 dem nihil inpetratum: induciæ annuæ datæ: sti-
 pendium exercitui Romano ab hoste in eum annum
 pensum, et binæ tunicæ in militem exactæ: ea mer-
 ces induciarum fuit. Tranquillas res jam Etruscis
 turbavit repentina defectio Umbrorum, gentis inte-
 græ a cladibus belli, nisi quod transitum exercitus
 ager senserat. Ii, concitata omni juventute sua, et

U. C. 445. magna parte Etruscorum ad rebellionem compulsâ,
 A. C. 307. tantum exercitum fecerant, ut, relicto post se in
 Etruria Decio, ad obpugnandam inde Romam itur-
 ros, magnifice de se, ac contentim de Romanis lo-
 quentes, jactarent. Quod inceptum eorum ubi ad
 Decium consulem perlatum est, ad urbem ex Etru-
 ria magnis itineribus pergit, et in agro Pupiniensi
 ad famam intentus hostium consedit. Nec Romæ
 spernebatur Umbrorum bellum: et ipsæ minæ me-
 tum fecerant expertis a Gallica clade, quam intutam
 urbem incoherent. Itaque legati ad Fabium consu-
 lem missi sunt, ut, si quid laxamenti a bello Sam-
 nitium esset, in Umbriam propere exercitum duceret.
 Dicto paruit consul, magnisque itineribus ad Meva-
 niam, ubi tum copię Umbrorum erant, perrexit.
 Repens adventus consulis, quem procul Umbria in
 Samnio bello alio occupatum crediderant, ita exter-
 ruit Umbros, ut alii recedendum ad urbes munitas,
 quidam omittendum bellum censerent. Plaga una
 (Materinam ipsi adpellant) non continuit modo ce-
 teros in armis, sed confestim ad certamen egit: cas-
 tra vallantem Fabium adorti sunt. Quos ubi effusos
 ruere in munimenta consul vidit, revocatos milites
 ab opere, prout loci natura tempusque patiebatur,
 ita instruxit: cohortatusque prædicatione vera qua
 in Tuscis, qua in Samnio partorum decorum, exi-
 guam adpendicem Etrusci belli conficere jubet: et
 vocis inpię pœnas expetere, qua se urbem Roma-
 nam obpugnatueros minati sunt. Hæc tanta sunt
 alacritate militum audita, ut clamor, sua sponte
 ortus, loquentem interpellaverit ducem: ante im-
 perium deinde concentu tubarum ac cornuum cursu
 effuso in hostem feruntur. Non tamquam in viros

Contra
 Umbros.

aut armatos incurrunt : (mirabilia dictu !) signa primo eripi cœpta signiferis ; deinde ipsi signiferi trahi ad consulem, armatique milites ex acie in aciem transferri : et, sicubi est certamen, scutis magis, quam gladiis, geritur res. Umbonibus incussa que ala sternuntur hostes : plus capitur hominum, quam cœditur : atque una vox ponere arma jubentium per totam fertur aciem. Itaque inter ipsum certamen facta deditio est a primis auctoribus belli : postero insequentibusque diebus et ceteri Umbrorum populi deduntur. Ocriculani sponsione in amicitiam accepti.

XLII. Fabius, alienæ sortis victor belli, in suam provinciam exercitum reduxit : itaque ei, ob res tam feliciter gestas, sicut priore anno populus continuaverat consulatum, ita senatus in insequentem annum, quo Ap. Claudius, L. Volumnius consules fuerunt, prorogavit, maxime Appio adversante, imperium. Appium censorem petisse consulatum, comitiaque ejus ab L. Furio tribuno plebis interpellata, donec se censura abdicavit, in quibusdam annalibus invenio. Creatus consul, quum collegæ novum bellum, Sallentini hostes decernerentur, Romæ mansit, ut urbanis artibus opes augeret, quando belli decus penes alios esset. Volumnium provinciæ haud pœnituit : multa secunda prælia fecit : aliquot urbes hostium vi cepit : prædæ erat largitor, et benignitatem per se gratam comitate adjuvabat : militemque iis artibus fecerat et periculi et laboris avidum. Q. Fabius proconsul ad urbem Allifas cum Samnitium exercitu signis conlatis configit : minime ambigua res fuit. Fusi hostes, atque in castra compulsi : nec castra forent retenta, ni exiguum su-

U. C. 445.

A. C. 307.

U. C. 446.

A. C. 306.

Sallentini
victi.Samnites
victi.

U. C. 446. perfuisset diei : ante noctem tamen sunt circumses-
 A. C. 365. sa, et nocte custodita, ne quis elabi posset. Postero die, vixdum luce certa, deditio fieri cœpta : et pacti, qui Samnitium forent, ut cum singulis vestimentis emitterentur. Hi omnes sub jugum missi : sociis Samnitium nihil cautum : ad septem millia sub corona venire : qui se civem Hernicum dixerat, seorsum in custodia habitus. Eos omnes Fabius Romam ad senatum misit : et, quum quæsitum esset, delectu, an voluntarii pro Samnitibus adversus Romanos bellassent, per Latinos populos custodiendi dantur : jussique eam integram rem novi consules, P. Cornelius Arvina, Q. Marcius Tremulus, (ii enim jam creati erant) ad senatum referre : id ægre passi Hernici, concilium populorum omnium habentibus Anagninis in circo, quem Maritimum vocant, præter Alatrinatem, Ferentinatemque, et Verulanum, omnes Hernici nominis populo Romano bellum indixerunt.

Bellum
 Herni-
 cum.

XLIII. In Samnio quoque, quia decesserat inde Fabius, novi motus exorti. Calatia et Sora, præsidiaque, quæ in iis Romana erant, expugnata : et in captivorum corpora militum fœde sævitum : itaque eo P. Cornelius cum exercitu missus. Marcio novi hostes (jam enim Anagninis Hernicisque aliis bellum jussum erat) decernuntur. Primo ita omnia opportuna loca hostes inter consulum castra interceperunt, ut pervadere expeditus nuncius non posset, et per aliquot dies incerti rerum omnium, suspensique de statu alterius, uterque consul ageret, Romanamque is metus manaret ; adeo ut omnes juniores sacramento adigerentur, atque ad subita rerum duo justi scriberentur exercitus. Ceterum Hernicum bel-

lum nequaquam pro præsentī terrore ac vetustate U. C. 447.
gentis gloriæ fuit : nihil usquam dictu dignum ausi, A. C. 305.
trinis castris intra paucos dies exuti, triginta dierum
inducias, ita ut ad senatum Romam legatos mitte-
rent, pacti sunt bimestri stipendio frumentoque, et
singulis in militem tunicis. Ab senatu ad Marcium
rejecti, cui senatusconsulto permissum de Hernicis
erat : isque eam gentem in deditionem accepit. Et
in Samnio alter consul superior viribus, locis inpe-
ditior erat. Omnia itinera obseperant hostes, sal-
tusque pervios ceperant, ne qua subvehi commeatus
possent : neque eos, quum quotidie signa in aciem
consul proferret, elicere ad certamen poterat : satis-
que adparebat, neque Samnitē certamen præsens,
nec Romanum dilationem belli laturum. Adventus
Marcii, qui, Hernicis subactis, maturavit collegæ ve-
nire auxilio, moram certaminis hosti exemit : nam,
ut qui ne alteri quidem exercitui se ad certamen cre-
didissent pares, conjungi utique passi duos consula-
res exercitus nihil crederent superesse spei, adveni-
entem incomposito agmine Marcium adgrediuntur.
Raptim conlatæ sarcinæ in medium ; et, prout tem-
pus patiebatur, instructa acies. Clamor primum in
stativa perlatus, dein conspectus procul pulvis, tu-
multum apud alterum consulem in castris fecit : is-
que, confestim arma capere jussis, raptimque eductis
in aciem militibus, transversam hostium aciem, at-
que alio certamine occupatam, invadit ; clamitans,
summum flagitium fore, si alterum exercitum utriusque
victoriæ compotem sinerent fieri, nec ad se sui belli
vindicarent decus. Qua inpetum dederat, perrumpit ; Victi Sam-
aciemque per mediam in castra hostium tendit, et ^{nites.}
vacua defensoribus capit atque incendit. Quæ ubi

U. C. 447. A. C. 305. flagrantia Marcianus miles conspexit, et hostes respexere, tum passim fuga cœpta Samnitium fieri : sed omnia obtinet cædes, nec in ullam partem tutum perfugium est. Jam, triginta millibus hostium cæsis, signum receptui consules dederant, conligebantque in unum copias, in vicem inter se gratantes : quum repente visæ procul hostium novæ cohortes, quæ in supplementum scriptæ fuerant, integravere cædem : in quas, nec jussu consulum, nec signo accepto, victores vadunt ; *malo tirocinio inbuendum Samnitum*, clamitantes. Indulgent consules legionum ardori, ut qui probe scirent, novum militem hostium inter percussos fuga veteranos ne tentando quidem satis certamini fore. Nec eos opinio fefellit : omnes Samnitium copię, veteres novæque, montes proximos fuga capiunt : eo et Romana erigitur acies ; nec quidquam satis tuti loci victis est : et de jugis, quæ ceperant, funduntur ; jamque una voce omnes pacem petebant. Tum, trium mensium frumento imperato, et annuo stipendio, ac singulis in militem tunicis, ad senatum pacis oratores missi. Cornelius in Samnio relictus. Marcius de Hernicis triumphans in urbem rediit ; statuaque equestris in foro decreta est, quæ ante templum Castoris posita est. Hernicorum tribus populis, Alatrinati, Verulano, Ferentinati, quia maluerunt, quam civitatem, suæ leges redditæ : connubiumque inter ipsos, quod aliquamdiu soli Hernicorum habuerunt, permissum. Anagninis, quique arma Romanis intulerant, civitas sine suffragii latione data : concilia connubiaque adempta : et magistratibus, præterquam sacrorum curatione, interdictum. Eodem anno ædes Salutis a C. Junio Bubulco censore locata est, quam consul bello Sam-

nitium voverat: ab eodem collegaue ejus M. Valerius Maximo viæ per agros publica inpenſa factæ. U. C. 447.
A. C. 305.
Et cum Karthaginiensibus eodem anno fœdus tertio renovatum: legatisque eorum, qui ad id venerant, Karthaginienses legati.
comiter munera miſſa.

XLIV. Dictatorem idem annus habuit P. Cornelium Scipionem, cum magistro equitum P. Decio Mure: ab iis, propter quæ creati erant, comitia consularia habita, quia neuter consulum potuerat bello abesse. Creati consules L. Postumius, Ti. Minucius. Hos consules Piso Q. Fabio et P. Decio U. C. 448.
A. C. 304.
subgerit, biennio exempto, quo Claudium Voluminiumque, et Cornelium cum Marcio consules factos tradidimus: memoriane fugerit in annalibus digerendis, an consulto binos consules, falsos ratus, transcenderit, incertum est. Eodem anno in campum Stellatæ agri Campani Samnitium incursiones factæ. Itaque ambo consules, in Samnium miſſi, Coss. in Samnium eunt.
quum diversas regiones, Tifernum Postumius, Bovianum Minucius, petissent; Postumii prius ductu ad Tifernum pugnatum. Alii haud dubie Samnites victos, ac viginti millia hominum capta tradunt: alii Marte æquo discessum, et Postumium, metum simulantem nocturno itinere, clam in montes copias abduxisse: hostes secutos duo millia inde locis nunitis et ipsos consedisſe. Consul, ut stativa tuta copiosaue (et ita erant) petisse videretur, postquam et munimentis castra firmavit, et omni adparatu rerum utilium instruxit; relicto firmo præsidio, de vigilia tertia, qua duci proxime potest, expeditas legiones ad collegam, et ipsum adversus alios sedentem, ducit: ubi, auctore Postumio, Minucius cum Samnites vincuntur.
hostibus signa confert; et, quum anceps prælium

U. C. 445. in multum dici processisset, tum Postumius integris
 A. C. 304. legionibus defessam jam aciem hostium inproviso invadit. Itaque, quum lassitudo ac vulnera fugam quoque præpedissent, occidione occisi hostes, signa unum et viginti capta: atque inde ad castra Postumii perrectum. Ibi duo victores exercitus perculsum jam fama hostem adorti fundunt fugantque: signa militaria sex et viginti capta, et imperator Samnitium Staius Gellius, multique alii mortales, et castra utraque capta: et Bovianum, ubi postero die cœptum obpugnari, brevi capitur: magnaue gloria rerum gestarum consules triumpharunt. Minucium consulem, cum vulnere gravi relatum in castra, mortuum, quidam auctores sunt, et M. Fulvium in locum ejus consulem subfectum: et ab eo, quum ad exercitum Minucii missus esset, Bovianum captum. Eodem anno Sora, Arpinum, Censennia, recepta ab Samnitibus. Herculis magnum simulacrum in Capitolio positum dedicatumque.

U. C. 449. XLV. P. Sulpicio Saverione, P. Sempronio Sopho consulibus, Samnites, seu finem, seu dilationem belli quærentes, legatos de pace Romam misere: quibus suppliciter agentibus responsum est, *nisi sæpe bellum parantes pacem petissent Samnites, oratione ultro citroque habita, de pace transigi potuisse: nunc, quando verba vana ad id locorum fuerint, rebus standum esse. P. Sempronium consulem cum exercitu brevi in Samnio fore: eum, ad bellum pacemne inclinent animi, falli non posse: comperta omnia senatui relaturum: decedentem ex Samnio consulem legati sequerentur. Eo anno quum pacatum Samnium exercitus Romanus, benigne præbito commeatu, peragrasset, fœdus antiquum Samnitibus redditum. Ad Æquos*

Pacem petunt Samnites.

inde veteres hostes, ceterum per multos annos sub specie infidæ pacis quietos, versa arma Romana: quod, incolumi Hernico nomine, missitaverant simul cum iis Samniti auxilia; et, post Hernicos subactos, universa prope gens, sine dissimulatione consilii publici, ad hostes desciverat: et postquam, icto Romæ cum Samnitibus fœdere, feciales venerant res repetitum, *tentationem aiebant esse, ut, terrore incusso belli, Romanos se fieri paterentur: quod quantopere optandum foret, Hernicos docuisse: quum, quibus licuerit, suas leges Romanæ civitati præoptaverint: quibus legendi, quid mallent, copia non fuerit, pro pœna necessariam civitatem fore.* Ob hæc vulgo in conciliis jactata, populus Romanus bellum fieri Æquis jussit: consulesque ambo, ad novum profecti bellum, quatuor millibus a castris hostium consederunt. Æquorum exercitus, (ut qui suo nomine per multos annos inbelles egissent) tumultuario similis, sine ducibus certis, sine imperio, trepidare: alii exeundum in aciem, alii castra tuenda censent: movet plerosque vastatio futura agrorum, ac deinceps cum levibus præsidiis urbium relictarum excidia. Itaque, postquam inter multas sententias una, quæ, omissa cura communium, ad respectum suarum quemque rerum vertisset, audita; ut prima vigilia diversi e castris ad deportanda omnia tuendaque mœnibus in urbes abirent; cuncti eam sententiam ingenti adsensu acceperunt. Palatis hostibus per agros, prima luce Romani, signis prolatis, in acie consistunt; et, ubi nemo obvius ibat, pleno gradu ad castra hostium tendunt. Ceterum, postquam ibi neque stationes pro portis, nec quemquam in vallo, nec fremitum consuetum castrorum animadverterunt; insolito silentio

U. C. 449.

A. C. 303.

Bellum

cum

Æquis.

U. C. 449. **moti, metu insidiarum subsistunt : transgressi deinde**
 A. C. 303. **vallum, quum deserta omnia invenissent, pergunt**
hostem vestigiis sequi : sed vestigia, in omnes æque
ferentia partes, ut in dilapsis passim, primo errorem
faciebant ; post, per exploratores compertis hostium
consiliis, ad singulas urbes circumferendo bello,
unum et quadraginta oppida intra dies quinquaginta
omnia obpugnando ceperunt ; quorum pleraque di-
ruta atque incensa, nomenque Æquorum prope ad
internecionem deletum. De Æquis triumphatum :
exemploque eorum clades fuit, ut Marrucini, Marsi,
Peligni, Frentani mitterent Romam oratores pacis
petendæ amicitiaque : iis populis fœdus petentibus
datum.

C. Flavius
 ædilis cu-
 rulis.

XLVI. Eodem anno Cn. Flavius Cn. filius scriba,
patre libertino, humili fortuna ortus, ceterum calli-
duus vir et facundus, ædilis curulis fuit. Invenio in
quibusdam annalibus, quum adpareret ædilibus, fie-
rique se pro tribu ædilem videret, neque accipi no-
men, quia scriptum faceret ; tabulam posuisse, et
jurasse, se scriptum non facturum : quem aliquanto
ante desisse scriptum facere, arguit Macer Licinius,
tribunatu ante gesto triumviratibusque, nocturno al-
tero, altero coloniæ deducendæ. Ceterum (id quod
haud discrepat) contumacia adversus contemnentes
humilitatem suam nobiles certavit : civile jus, repo-
situm in penetralibus pontificum, evulgavit, fastos-
que circa forum in albo proposuit, ut, quando lege
agi posset, sciretur : ædem Concordiæ in area Vul-
cani summa invidia nobilium dedicavit ; coactusque
consensu populi Cornelius Barbatus pontifex maxi-
mus verba præire, quum more majorum negaret, ni-
si consulem aut imperatorem, posse templum dedi-

care. Itaque ex auctoritate senatus latum ad popu- U. C. 449.
 lum est, ne quis templum aramve injussu senatus A. C. 303.
 aut tribunorum plebei partis majoris dedicaret.
 Haud memorabilem rem per se, nisi documentum
 sit adversus superbiam nobilium plebeiae libertatis,
 referam. Ad collegam ægrum visendi caussa Flavius
 quum venisset, consensuque nobilium adolescentium,
 qui ibi adsidebant, adurrectum ei non esset, curu-
 lem adferri sellam eo jussit, ac sede honoris sui
 anxios invidia inimicos spectavit. Ceterum Flavium
 dixerat ædilem forensis factio, Ap. Claudii censura
 vires nacta, qui senatum primus libertinorum filiis
 lectis inquinaverat: et postquam eam lectionem ne-
 mo ratam habuit, nec in curia adeptus erat, quas pe-
 tierat, opes urbanas; humilibus per omnes tribus di-
 visis, forum et campum corrupit: tantumque Flavii
 comitia indignitatis habuerunt, ut plerique nobilium
 annulos aureos et phaleras deponerent. Ex eo tem-
 pore in duas partes discessit civitas: aliud integer
 populus, fautor et cultor bonorum, aliud forensis
 factio tenebat; donec Q. Fabius et P. Decius cen-
 sores facti: et Fabius, simul concordiae caussa, si-
 mul ne humillimorum in manu comitia essent, om-
 nem forensem turbam excretam in quatuor tribus
 conjecit, urbanasque eas adpellavit: adeoque eam
 rem acceptam gratis animis ferunt, ut Maximi cog-
 nomen, quod tot victoriis non pepererat, hac ordi-
 num temperatione pareret. Ab eodem institutum
 dicitur, ut equites Idibus Quinctilibus transvehe-
 rentur.

Forensis
 turba in
 tribus ur-
 banas con-
 jecta.

EPITOME LIBRI X.

COLONIÆ deductæ sunt Sora, et Alba, et Carseoli.

Marsi in deditionem accepti sunt. Collegium augurum ampliatur, ut essent novem, quum antea quaterni fuissent. Lex de provocatione ad populum a Valerio consule tunc tertium lata est. Duæ tribus adjectæ sunt, Aniensis et Terentina. Samnitibus bellum indictum, et adversus eos sæpe prospere pugnatum est. Quum adversus Etruscos, Umbros, Samnites, Gallos, P. Decio et Q. Fabio ducibus, pugnaretur, Romanusque exercitus in maximo esset discrimine, P. Decius, secutus exemplum patris, devovit se pro exercitu, et morte sua victoriam ejus pugnae populo Romano dedit. Papirius Cursor Samnitium exercitum, qui jurejurando obstrictus, quo majore constantia virtutis pugnaret, in aciem descenderat, fudit. Census actus est: lustrum conditum: censa sunt civium capita ducenta sexaginta duo millia, et trecenta viginti duo.

T. LIVII PATAVINI

LIBER X.

L. GENUCIO, Ser. Cornelio consulibus, ab ex-U. C. 450.
ternis ferme bellis otium fuit. Soram atque A. C. 302.
Albam coloniæ deductæ. Albam in Æquos sex mil-
lia colonorum scripta. Sora agri Volsci fuerat; sed
possederant Samnites: eo quatuor millia hominum
missa. Eodem anno Arpinatibus Trebulanisque ci-
vitas data. Frusinates tertia parte agri damnati,
quod Hernicos ab eis sollicitatos compertum; capi-
taque conjurationis ejus, quæstione ab consulibus
ex senatusconsulto habita, virgis cæsi ac securi per-
cussi. Tamen, ne prorsus inbellem agerent annum,
parva expeditio in Umbria facta est; quod nuncia-
batur, ex spelunca quadam excursiones armatorum Latrones in spelunca obpressi.
in agros fieri. In eam speluncam penetratum cum
signis est: et ex eo loco obscuro multa vulnera ac-
cepta, maximeque lapidum ictu; donec, altero spe-
cus ejus ore (nam pervius erat) invento, utræque
fauces congestis lignis accensæ: ita intus fumo ac
vapore ad duo millia armatorum, ruentia novissime
in ipsas flammæ, dum evadere tendunt, absumpta.
Marcis Livio Dentre et Æmilio consulibus, redinte-
gratum Æquicum bellum. Coloniam, ægre patientes U. C. 451.
A. C. 301.
velut arcem suis finibus inpositam, summa vi expug-
nare adorti, ab ipsis colonis pelluntur. Ceterum

U. C. 451. tantum Romæ terrorem fecere, quia vix credibile
 A. C. 301. erat, tam adfectis rebus solos per se Æquos ad bel-
 lum coortos, ut tumultus ejus caussa dictator dice-
 retur C. Junius Bubulcus: is, cum M. Titinio ma-
 gistro equitum profectus, primo congressu Æquos
 subegit, ac, die octavo triumphans in urbem quum
 redisset, ædem Salutis, quam consul voverat, censor
 locaverat, dictator dedicavit.

Cleony-
 mus La-
 con.

II. Eodem anno classis Græcorum, Cleonymo
 duce Lacedæmonio, ad Italiæ litora adpulsa, Thurias
 urbem in Sallentinis cepit. Adversus hunc hostem
 consul Æmilius missus prælio uno fugatum compu-
 lit in naves. Thuriæ redditæ veteri cultori: Sallen-
 tinoque agro pax parta. Junium Bubulcum dicta-
 torem missum in Sallentinos, in quibusdam annali-
 bus invenio: et Cleonymum prius, quam confligen-
 dum esset cum Romanis, Italia excessisse: circum-
 vectus inde Brundisii promontorium, medioque sinu
 Hadriatico ventis latus, quum læva inportuosa Italiæ
 litora, dextra Illyrii Liburnique et Istri, gentes feræ,
 et magna ex parte latrociniis maritimis infames,
 terrerent, penitus ad litora Venetorum pervenit: ibi
 expositis paucis, qui loca explorarent, quum audis-
 set, tenue prætentum litus esse; quod transgressis
 stagna ab tergo sint, inrigua æstibus maritimis;
 agros haud procul proximos campestres cerni; ul-
 teriora colles; inde esse ostium fluminis præalti,
 quo circumagi naves in stationem tutam vidisse:
 (Meduacus annis erat) eo invectam classem subire
 flumine adverso jussit. Gravissimas navium non per-
 tulit alveus fluminis: in leviora navigia transgressa
 multitudo armatorum ad frequentes agros, tribus
 maritimis Patavinorum vicis colentibus eam oram,

pervenit. Ibi egressi, levi præsidio navibus relicto, U. C. 451.
 vicos expugnant, inflammant tecta, hominum pecu- A. C. 301.
 dumque prædas agunt, et dulcedine prædandi lon-
 gius usque a navibus procedunt. Hæc ubi Patavium
 sunt nunciata, (semper autem eos in armis adcolæ
 Galli habebant) in duas partes juventutem dividunt:
 altera in regionem, qua effusa populatio nunciaba-
 tur; altera, ne cui prædonum obvia fieret, altero
 itinere ad stationem navium (millia autem quatuor-
 decim ab oppido aberat) ducta. In naves parvas,
 custodibus interemtis, inpetus factus; territique
 nautæ coguntur naves in alteram ripam amnis
 transjicere: et in terra prosperum æque in palatos
 prædatores prælium fuerat: refugientibusque ad
 stationem Græcis Veneti obsistunt. Ita in medio
 circumventi hostes cæsique; pars capti classem in-
 dicant regemque Cleonymum tria millia abesse.
 Inde, captivis proximo vico in custodiam datis, pars
 fluviatiles naves, ad superanda vada stagnorum apte
 planis alveis fabricatas, pars captiva navigia armatis
 complent: profectique ad classem, immobiles naves,
 et loca ignota plus, quam hostem, timentes, circum-
 vadunt: fugientesque in altum acrius, quam repug-
 nantes, usque ad ostium amnis persecuti, captis qui-
 busdam incensisque navibus hostium, quas trepida-
 tio in vada intulerat, victores revertuntur. Cleony-
 mus, vix quinta parte navium incolumi, nulla regi-
 one maris Hadriatici prospere adita, discessit. Ros-
 tra navium spoliaque Laconum, in æde Junonis ve-
 teri fixa, multi supersunt, qui viderunt. Patavii mo-
 numentum navalis pugnae eo die, quo pugnatum est,
 quotannis sollemni certamine navium in flumine op-
 pidi medio exercetur.

U. C. 451. III. Eodem anno Romæ cum Vestinis, petentibus
 A. C. 301. amicitiam, ictum est fœdus. Multiplex deinde ex-
 Fœdus ortus terror. Etruriam rebellare, ab Arretinorum
 cum Ve- seditionibus motu orto, nunciabatur: ubi Cilnium
 stinis. genus præpotens, divitiarum invidia pelli armis cœp-
 tum: simul Marsos agrum vi tueri, in quem colonia
 Carseoli deducta erat, quatuor millibus hominum
 scriptis. Itaque propter eos tumultus dictus M. Va-
 M. Vale- lerus Maximus dictator, magistrum equitum sibi le-
 rius dicta- git M. Æmilium Paullum: id magis credo, quam
 tor. Q. Fabium ea ætate atque eis honoribus Valerio
 subjectum: ceterum ex Maximi cognomine ortum
 errorem haud abnuerim. Profectus dictator cum ex-
 exercitu prælio uno Marsos fundit: compulsis deinde
 in urbes munitas, Miloniam, Plestinam, Fresiliam,
 intra dies paucos cepit: et parte agri multatis Mar-
 sis fœdus restituit. Tum in Etruscos versum bel-
 lum: et, quum dictator auspiciorum repetendorum
 causa profectus Romam esset, magister equitum,
 pabulatum egressus, ex insidiis circumvenitur; sig-
 nisque aliquot amissis, fœda militum cæde ac fuga
 in castra est compulsus: qui terror non eo tantum
 a Fabio abhorret, quod si qua alia arte cognomen
 suum æquavit, tum maxime bellicis laudibus: sed
 etiam, quod, memor Papirianæ sævitiae, numquam,
 ut dictatoris injussu dimicaret, adduci potuisset.

Etruscum
bellum.

IV. Nunciata ea clades Romam majorem, quam
 res erat, terrorem excivit: nam, ut exercitu deleta,
 ita justitium indictum; custodiæ in portis, vigiliæ
 vicatim exactæ; arma, tela in muros congesta. Om-
 nibus junioribus sacramento adactis, dictator, ad
 exercitum missus, omnia spe tranquilliora et com-
 posita magistri equitum cura, castra in tutiorem lo-

cum redacta, cohortes, quæ signa amiserant, extra vallum sine tentoriis destitutas invenit; exercitum avidum pugnae, quo maturius ignominia aboleretur. Itaque confestim castra inde in agrum Rusellanum promovit. Eo et hostes secuti: et quamquam ex bene gesta re summam et in aperto certamine virium spem habebant; tamen insidiis quoque, quas feliciter experti erant, hostem tentant. Tecta semirutæ vici, per vastationem agrorum deusti, haud procul castris Romanorum aberant. Ibi abditis armatis, pecus in conspectu præsidii Romani, cui præerat Cn. Fulvius legatus, propulsum: ad quam inlecebram quum moveretur nemo ab Romana statione, pastorum unus, progressus sub ipsas munitiones, inclamat alios, cunctanter ab ruinis vici pecus propellentes, *quid cessarent, quum per media castra Romana tuto agere possent?* Hæc quum legato Cærites quidam interpretarentur, et per omnes manipulos militum indignatio ingens esset, nec tamen injussu movere auderent; jubet peritos linguæ adtendere animum, pastorum sermo agresti, an urbano, propior esset. Quum referrent, sonum linguæ, et corporum habitum, et nitorem, cultiora, quam pastoralia, esse; *ite igitur, dicite, inquit, detegant nequidquam conditis insidias: omnia scire Romanum: nec magis jam dolo capi, quam armis vinci, posse.* Hæc ubi audita sunt, et ad eos, qui consederant in insidiis, perlata, consurrectum repente ex latebris est, et in patentem ad conspectum undique campum prolata signa. Visa legato major acies, quam quæ ab suo præsidio sustineri posset: itaque propere ad dictatorem auxilia adcitum mittit; interea ipse impetus hostium sustinet.

U. C. 451. V. Nuncio adlato, dictator signa ferri, ac sequi
A. C. 301. armatos jubet; sed celeriora prope omnia imperio
erant. Rapta extemplo signa armaque; et vix ab
inpetu et cursu tenebantur; quum ira ab accepta
nuper clade stimulabat, tum concitator accidens
clamor ab increcente certamine. Urgent itaque
alii alios, hortanturque signiferos, ut ocius eant:
quo magis festinantes videt dictator, eo impensius
retentat agmen, ac sensim incedere jubet. Etrusci
contra, principio exciti pugnae, omnibus copiis ade-
rant. Et super alios alii nunciant dictatori, omnes
legiones Etruscorum capessisse pugnam; nec jam
ab suis resisti posse: et ipse cernit ex superiore lo-
co, in quanto discrimine praesidium esset. Ceterum,
satis fretus esse etiam nunc tolerando certamini le-
gatum, nec se procul abesse periculi vindicem, quam
maxime vult fatigari hostem, ut integris adoriatur
viribus fessos. Quamquam lente procedunt, jam ta-
men ad inpetum capiendum, equiti utique, modicum
erat spatium: prima incedebant signa legionum, ne
quid occultum aut repentinum hostis timeret: sed
reliquerat intervalla inter ordines peditum, qua satis
laxo spatio equi permitti possent. Pariter sustulit
clamorem acies; et emissus eques libero cursu in
hostem invehitur, incompositisque adversus eques-
trem procellam subitum pavorem obfundit. Itaque,
ut prope serum auxilium jam pene circumventis, ita
universa requies data est: integri accepere pugnam:
nec ea ipsa longa, aut anceps fuit. Fusi hostes castra
repetunt, inferentibusque jam signa Romanis ce-
dunt, et in ultimam castrorum partem conglobantur.
Haerent fugientes in angustiis portarum: pars mag-
na aggerem vallumque conscendunt, si aut ex supe-

riore loco tueri se, aut superare aliqua et evadere possent. Forte quodam loco male densatus agger pondere superstantium in fossam procubuit: atque ea quum Deos pandere viam fugæ conclamassent, plures inermes, quam armati, evadunt. Hoc prælio fractæ iterum Etruscorum vires: et, pacto annuo stipendio, et duûm mensium frumento, permissum ab dictatore, ut de pace legatos mitterent Romam. Pax negata: induciæ biennii datæ: dictator triumphans in urbem rediit. Habeo auctores, sine ullo memorabili prælio pacatam ab dictatore Etruriam esse, seditionibus tantum Arretinorum compositis, et Cilnio genere cum plebe in gratiam reducto. Consul ex dictatura factus M. Valerius: non petentem, atque adeo etiam absentem, creatum credidere quidam; et per interregem ea comitia facta: id unum non ambigitur, consulatum cum Appuleio Pansa gessisse.

VI. M. Valerio et Q. Appuleio consulibus, satis pacatæ foris res fuere. Etruscum adversa belli res et induciæ quietum tenebant: Samnitum, multorum annorum cladibus domitum, hauddum fœderis novi pœnitebat. Romæ quoque plebem quietam et exoneratam deducta in colonias multitudo præstabat: tamen, ne undique tranquillæ res essent, certamen injectum inter primores civitatis, patricos plebeiosque, ab tribunis plebis Q. et Cn. Ogulniis: qui, undique criminandorum Patrum apud plebem occasio-
Certamen inter patricos et plebeios, de sacerdotiis
 nibus quæsitæ, postquam alia frustra tentata erant, eam actionem susceperunt, qua non infimam plebem accenderent, sed ipsa capita plebis, consulares triumphalesque plebeios: quorum honoribus nihil, præter sacerdotia, quæ nondum promiscua erant, deesset.

U. C. 452. Rogationem ergo promulgarunt, ut, quum quatuor
 A. C. 300. augures, quatuor pontifices ea tempestate essent, placeretque augeri sacerdotum numerum, quatuor pontifices, quinque augures, de plebe omnes, adlegerentur. Quemadmodum ad quatuor augurum numerum, nisi morte duorum, id redigi collegium potuerit, non invenio; quum inter augures constet, inparem numerum debere esse, ut tres antiquæ tribus, Ramnes, Titienses, Luceres, suum quæque augurem habeant; aut, si pluribus sit opus, pari inter se numero sacerdotes multiplicent: sicut multiplicati sunt, quum ad quatuor quinque adjecti novem numerum, ut terni in singulas essent, expleverunt. Ceterum, quia de plebe adlegebantur, juxta eam rem ægre passi Patres, quam quum consulatum vulgari viderent. Simulabant ad Deos id magis, quam ad se, pertinere: ipsos visuros, ne sacra sua polluantur: id se optare tantum, ne qua in rempublicam clades veniat. Minus autem tetendere, adsueti jam tali genere certaminum vinci: et cernebant, adversarios non id, quod olim vix speraverint, adfectantes magnos honores, sed omnia jam, in quorum spem dubiam erat certatum, tamen adeptos, multiplices consulatus, censurasque et triumphos.

VII. Certatum tamen suadenda dissuadendaque lege inter Ap. Claudium maxime ferunt, et inter P. Decium Murem: qui quum eadem ferme de jure Patrum ac plebis, quæ pro lege Licinia quondam contraque eam dicta erant, quum plebeiis consulatus rogabatur, disseruissent; retulisse dicitur Decius parentis sui speciem, qualem eum multi, qui in concione erant, viderant, incinctum Gabino cultu, super telum stantem, quo se habitu pro populo ac

legionibus Romanis devovisset : tum *P. Decium* con- U. C. 452.
 sulem purum piūque Deis immortalibus visum, æque A. C. 300.
 ac si *T. Manlius* collega ejus devoveretur : eundem *P.* Decii oratio
Decium, qui sacra publica populi Romani faceret, legi de sacerdo-
 rite non potuisse ? id esse periculum, ne suas preces mi- tiis cum
 nus audirent Dii, quam *Ap. Claudii* ? castius eum sa- plebe com-
 cra privata facere, et religiosius Deos colere, quam munican-
 se ? quem pænitere votorum, quæ pro republica nun- dis.
 cupaverint tot consules plebei, tot dictatores, aut ad
 exercitus euntes, aut inter ipsa bella ? Numerarentur
 duces eorum annorum, quibus plebeiorum ductu et aus-
 picio res geri captæ sunt : numerarentur triumphi :
 jam ne nobilitatis quidem suæ plebeios pænitere : pro
 certo habere, si quod repens bellum oriat, non plus
 spei fore senatui populoque Romano in patriciis, quam
 in plebeiis ducibus. Quod quum ita se habeat, cui *De-*
orum hominumve indignum videri potest, inquit, eos
 viros, quos vos sellis curulibus, toga prætexta, tunica
 palmata, et toga picta, et corona triumphali laurea-
 que honoraritis, quorum domos spoliis hostium adfixis in-
 signes inter alias feceritis, pontificalia atque auguralia
 insignia adjicere ? qui, *Jovis optimi maximi* ornatu de-
 coratus, curru aurato per urbem vectus in Capitolium
 adscenderit, si conspiciatur cum capide ac lituo, capite
 velato victimam cædat, auguriumve ex arce capiat ?
 Cujus imaginis titulo consulatus, censuraque, et trium-
 phus, æquo animo legetur ; si auguratum aut pontifi-
 catum adjeceritis, non sustinebunt legentium oculi ?
Equidem (pace dixerim *Deum*) eos nos jam populi
Romani beneficio esse spero, qui sacerdotiis non minus
 reddamus dignatione nostra honoris, quam acceperi-
 mus ; et *Deorum* magis, quam nostra causa expeta-
 mus, ut, quos privatim colimus, publice colamus.

U. C. 452.

A. C. 300.

VIII. *Quid autem ego sic adhuc egi, tamquam integra sit caussa patriciorum de sacerdotiis, et non jam in possessione unius amplissimi simul sacerdotii? Decemviros sacris faciundis, carminum Sibyllæ ac fatorum populi hujus interpretes, antistites eosdem Apollinaris sacri ceremoniarumque aliarum, plebeios videmus. Nec tum patriciis ulla injuria facta est, quum duumviris sacris faciundis adjectus est propter plebeios numerus: et nunc tribunus, vir fortis ac strenuus, quinque augurum loca, quatuor pontificum adjecit, in quæ plebei nominentur; non ut vos, Appi, vestro loco pellant, sed ut adjuvent vos homines plebei divinis quoque rebus procurandis, sicut in ceteris humanis pro parte virili adjuvant. Noli erubescere, Appi, collegam in sacerdotio habere, quem in censura, quem in consulatu collegam habere potuisti: cujus tam dictatoris magister equitum, quam magistri equitum dictator esse potes. Sabinum advenam, principem nobilitatis vestræ, seu Attum Clausum, seu Ap. Claudium mavultis, illi antiqui patricii in suum numerum acceperunt. Ne fastidieris nos in sacerdotum numerum accipere: multa nobiscum decora adferimus: immo omnia eadem, quæ vos superbos fecerunt. L. Sertius primus de plebe consul est factus. C. Licinius Stolo primus magister equitum, C. Marcius Rutilus primus et dictator et censor, Q. Publilius Philo primus prætor. Semper ista audita sunt eadem, penes vos auspicia esse, vos solos gentem habere, vos solos justum imperium et auspiciū domi militiæque. Æque adhuc prosperum plebeium ac patricium fuit, porroque erit. En unquam fando audistis, patricos primo esse factos, non de calo demissos, sed qui patrem ciere possent, id est, nihil ultra quam ingenuos? Consulem jam patrem ciere possum, acrumque*

jam poterit filius meus. Nihil est aliud in re, Quirites, U. C. 452.
A. C. 300.
nisi ut omnia negata adipiscamur: certamen tantum
patriciū petunt, nec curant, quem eventum certaminum
habeant. Ego hanc legem, quod bonum, faustum, fe-
lixque sit vobis ac reipublicæ, uti rogas, jubendam
censeo.

IX. Vocare tribus extemplo populus jubebat, ad-
parebatque accipi legem: ille tamen dies est inter-
cessione sublatus: postero die, deterritis tribunis,
ingenti consensu accepta est. Pontifices creantur Pontifices
et augures
plebei.
suasor legis P. Decius Mūs, P. Sempronius Sophus,
C. Marcius Rutilus, M. Livius Denter. Quinque au-
gures item de plebe, C. Genucius, P. Ælius Pætus,
M. Minucius Fessus, C. Marcius, T. Publilius. Ita
octo pontificum, novem augurum numerus factus.
Eodem anno M. Valerius consul de provocatione Lex de pro-
vocatione
tertio lata.
legem tulit, diligentius sanctam: tertio ea tum post
reges exactos lata est, semper a familia eadem.
Caussam renovandæ sæpius haud aliam fuisse reor,
quam quod plus paucorum opes, quam libertas ple-
bis, poterant. Porcia tamen lex sola pro tergo ci- Porcia lex.
vium lata videtur: quod gravi pœna, si quis verbe-
rasset necassetve civem Romanum, sanxit. Valeria
lex, quum eum, qui provocasset, virgis cædi, secu-
rique necari vetuisset, si quis adversus ea fecisset,
nihil ultra, quam inprobe factum, adjecit. Id (qui
tum pudor hominum erat) visum, credo, vinculum
satis validum legis: nunc vix serio ita minetur quis-
quam. Bellum ab eodem consule haudquaquam me-
morabile adversus rebellantes Æquos, quum præter
animos feroces nihil ex antiqua fortuna haberent,
gestum est. Alter consul Appuleius in Umbria Ne-
quinum oppidum circumscedit: locus erat arduus,

atque in parte una præceps, ubi nunc Narnia sita
 U. C. 453. est: nec vi, nec munimento capi poterat. Itaque
 A. C. 299. eam infectam rem M. Fulvius Pætinus, T. Manlius
 Torquatus, novi consules, acceperunt. In eum an-
 num quum Q. Fabium consulem non petentem om-
 nes dicerent centuriæ, ipsum auctorem fuisse Macer
 Licinius ac Tubero tradunt differendi sibi consula-
 tus in bellicosiore annum: eo anno majori se usui
 reipublicæ fore, urbano gesto magistratu: ita nec
 dissimulantem, quid mallet, nec petentem tamen,
 ædilem curulem cum L. Papirio Cursore factum. Id
 ne pro certo ponerem, vetustior annalium auctor
 Piso effecit; qui eo anno ædiles curules fuisse tradit
 C. Domitium Cn. F. Calvinum et Sp. Carvilium Q.
 F. Maximum. Id credo cognomen errorem in ædi-
 libus fecisse: secutamque fabulam mixtam ex ædi-
 liciis et consularibus comitiis, convenientem errori.
 Et lustrum eo anno conditum a P. Sempronio So-
 pho et P. Sulpicio Saverione censoribus: tribus-
 que additæ duæ, Aniensis ac Terentina. Hæc Ro-
 mæ gesta.

Tribus
novæ.

X. Ceterum ad Nequinum oppidum quum segni
 obsidione tempus tereretur, duo ex oppidanis, quo-
 rum erant ædificia juncta muro, specu facto ad sta-
 tiones Romanas itinere occulto perveniunt: inde
 ad consulem deducti, præsidium armatum se intra
 mœnia et muros accepturos confirmant. Nec ad-
 spernanda res visa, neque incaute credenda: cum
 altero eorum (nam alter obses retentus) duo explo-
 ratores per cuniculum missi: per quos satis com-
 perta re, trecenti armati, transfuga duce in urbem
 ingressi, nocte portam, quæ proxima erat, cepere:
 qua refracta, consul exercitusque Romanus sine cer-

tamine urbem invasere. Ita Nequinum in ditionem ^{U. C. 453.} populi Romani venit. Colonia eo adversus Umbros ^{A. C. 299.} missa, a flumine Narnia adpellata: exercitus cum magna præda Roman redactus. Eodem anno ab Etruseis adversus inducias paratum bellum: sed eos ^{Etrusci bellum adversus Romanos moluntur.} alia molientes Gallorum ingens exercitus, fines ingressus, paullisper a proposito avertit. Pecunia deinde, qua multum poterant, freti, socios ex hostibus facere Gallos conantur, ut eo adjuncto exercitu cum Romanis bellarent. De societate haud abnuunt barbari: de mercede agitur: qua pacta acceptaque, quum parata cetera ad bellum essent, sequique Etruscus juberet, inficias eunt, *mercedem se belli Romanis inferendi pactos: quidquid acceperint, accepisse, ne agrum Etruscum vastarent, armisque lacerarent cultores. Militaturos tamen se, si utique Etrusci velint; sed nulla alia mercede, quam ut in partem agri accipiantur, tandemque aliqua sede certa constant.* Multa de eo concilia populorum Etruriæ habita: nec perfici quidquam potuit; non tam quia imminui agrum, quam quia adcolas sibi quisque adjungere tam effrata gentis homines horrebat: ita dimissi Galli pecuniam ingentem sine labore ac periculo partam retulerunt. Romæ terrorem præbuit fama Gallici tumultus ad bellum Etruscum adjecti: eo minus cunctanter fœdus ictum cum Picenti populo est.

XI. T. Manlio consuli Etruria provincia sorte ^{T. Manlii cos. mors.} evenit: qui, vixdum ingressus hostium fines, quum exerceretur inter equites, ab rapido cursu circumagendo equo effusus, extemplo prope exspiravit: tertius ab eo casu dies finis vitæ consuli fuit. Quo velut omine belli accepto, Deos pro se commisisse bellum memorantes Etrusci sustulere animos. Ro-

U. C. 453. mæ, tum desiderio viri, tum incommoditate tempo-
 A. C. 299. ris, tristis nuncius fuit : ut Patres ab jubendo dicta-
 tore consulis subrogandi comitia, ex sententia prin-

M. Valerius cipum habita, deterruerint. M. Valerium consulem
 subfectus. omnes sententiæ centuriæque dixere, quem senatus

dictatorem dici jussurus fuerat : tum extemplo in Etruriam ad legiones proficisci jussit. Adventus ejus compressit Etruscos, adeo ut nemo extra manimenta egredi auderet, timorque ipsorum obsidioni similis esset : neque illos novus consul vastandis agris urendisque tectis, quum passim non villæ solum, sed frequentes quoque vici, incendiis fumarent, elicere ad certamen potuit. Quum hoc segnius bellum opinione esset, alterius belli, quod multis in vicem cladibus haud immerito terribile erat, fama Picentium, novorum sociorum, indicio exorta est : *Samnites arma et rebellionem spectare, sequæ ab iis sollicitatos esse. Picentibus gratiæ actæ, et magna pars curæ Patribus ab Etruria in Samnites versa est. Caritas etiam annonæ sollicitam civitatem habuit : ventumque ad inopiæ ultimum foret, ut scripsere, quibus ædilem fuisse eo anno Fabium Maximum placet, ni ejus viri cura, qualis in bellicis rebus multis tempestatibus fuerat, talis domi tum in annonæ dispensatione, præparando ac convehendo frumento, fuisset. Eo anno (nec traditur caussa) interregnum initum : interreges fuere Ap. Claudius, dein P. Sulpicius. Is*

U. C. 454. comitia consularia habuit : creavit L. Cornelium
 A. C. 298. Scipionem, Cn. Fulvium consules. Principio hujus anni oratores Lucanorum ad novos consules venerant, questum, *quia conditionibus perlicere se nequiverint ad societatem armorum, Samnites infesto exercitu ingressos fines suos vastare, belloque ad bellum co-*

Samnites
 rebellant.

*gere. Lucano populo satis superque erratum quondam : U. C. 454.
nunc ita obstinatos animos esse, ut omnia ferre ac pati A. C. 298.
tolerabilius ducant, quam ut umquam postea nomen
Romanum violent. Orare Patres, ut et Lucanos in fi-
dem accipiant, et vim atque injuriam ab se Samnitium
arceant. Se, quamquam, bello cum Samnitibus suscepto,
necessaria jam facta adversus Romanos fides sit, tamen
obsides dare paratos esse.*

XII. Brevis consultatio senatus fuit : ad unum
omnes jungendum fœdus cum Lucanis, resque repe- Fœdus
cum Lu-
canis.
tendas ab Samnitibus, censent. Benigne responsum
Lucanis, ictumque fœdus. Feciales missi, qui Sam-
nitum decedere agro sociorum, ac deducere exerci-
tum finibus Lucanis juberent : quibus obviam missi
ab Samnitibus, qui denunciarent, *Si quod adissent in
Samnio concilium, haud inviolatos abituros.* Hæc post-
quam audita sunt Romæ, bellum Samnitibus et Pa-
tres censuerunt, et populus jussit. Consules inter se
provincias partiti sunt : Scipioni Etruria, Fulvio
Samnites obvenerunt ; diversique, ad suum quisque
bellum, proficiscuntur. Scipioni, segne bellum et
simile prioris anni militiæ expectanti, hostes ad
Volaterras instructo agmine occurrerunt. Pugna- Pugna cum
Etruscis.
tum majore parte diei, magna utrimque cæde : nox
incertis, qua data victoria esset, intervenit : lux in-
sequens victorem victumque ostendit. Nam Etrusci
silentio noctis castra reliquerunt. Romanus, egres-
sus in aciem, ubi protectione hostium concessam
victoriam videt, progressus ad castra, vacuis cum
plurima præda (nam et stativa trepide deserta fue-
rant) potitur : inde in Faliscum agrum copiosè re-
ductis, quum impedimenta Faleriis cum modico præ-
sidio reliquisset, expedito agmine ad depopulandos

U. C. 454. hostiū fines incedit. Omnia ferro ignique vastan-
 A. C. 298. tur; prædæ undique actæ: nec solum modo vastum
 hosti relictum, sed castellis etiam vicisque inlatus
 ignis: urbibus obpugnandis temperatum, in quas
 timor Etruscos compulerat. Cn. Fulvii consulis clara
 Samnites pugna in Samnio ad Bovianum haudquaquam am-
 victi. biguæ victoriæ fuit. Bovianum inde adgressus, nec
 ita multo post Aufidenam vi cepit.

XIII. Eodem anno Carseolos colonia in agrum
 Æquicolorum deducta. Fulvius consul de Samniti-
 bus triumphavit. Quum comitia consularia insta-
 rent, fama exorta, Etruscos Samnitesque ingentes
 conscribere exercitus; palam omnibus conciliis vex-
 ari principes Etruscorum, quod non Gallos quacum-
 que conditione traxerint ad bellum: increpari ma-
 gistratus Samnitium, quod exercitum, adversus Lu-
 canum hostem comparatum, objecerint Romanis:
 itaque suis sociorumque viribus consurgere hostes
 ad bellum, et haudquaquam pari defungendum esse
 certamine. Hic terror, quum illustres viri consula-

Q. Fabius tum peterent, omnes in Q. Fabium Maximum, pri-
 invitus mo non petentem, deinde, ut inclinata studia vidit,
 consul etiam recusantem convertit. *Quid se jam senem, ac*
 creatur. *perfunctum laboribus laborumque præmiis, sollicita-*
rent? Nec corporis, nec animi vigorem remanere eum-
dem: et fortunam ipsam vereri, ne cui Deorum nimia
jam in se, et constantior, quam velint humanæ res, vi-
deatur. Et se gloriæ seniorum subcrevisse, et ad suam
gloriam consurgentes alios lætum adspicere: nec ho-
nores magnos fortissimis viris Romæ, nec honoribus
desse fortes viros. Acuebat hac moderatione tam
justa studia; quæ verecundia legum restinguenda
ratus, legem recitari jussit, qua intra decem annos

eundem consulem refici non liceret. Vix præ stre-
 pitu audita lex est: tribunique plebis, *nihil id in-*
pedimenti futurum, aiebant: *se ad populum laturos,*
uti legibus solveretur. Et ille quidem in recusando
 perstabat, *quid ergo adtineret leges ferri*, rogitans,
quibus per eosdem, qui tulissent, fraus fieret? Jam re-
gi leges, non regere. Populus nihilominus suffragia
 inibat: et, ut quæque intro vocata erat centuria,
 consulem haud dubie Fabium dicebat. Tum demum
 consensu civitatis victus, *Dii adprobent*, inquit, *quod*
agitis, acturique estis, Quirites. Ceterum, *quoniam in*
me, quod vos vultis, facturi estis, in collega sit meæ
apud vos gratiæ locus. P. Decium, *expertum mihi*
concordi collegio virum, dignum vobis, dignum parente
suo, quæso, mecum consulem faciat. Justa suffraga-
 tio visa: omnes, quæ supererant, centuriæ Q. Fa-
 bium, P. Decium consules dixere. Eo anno pleris-
 que dies dicta ab ædilibus, quia plus, quam quod
 lege finitum erat, agri possiderent: nec quisquam
 ferme est purgatus: vinculumque ingens inmodicæ
 cupiditatis injectum est.

XIV. Consules novi, Q. Fabius Maximus quar-
 tum et P. Decius Mus tertium, quum inter se agi-
 tarent, uti alter Samnites hostes, alter Etruscos de-
 ligeret; quantæque in hanc aut in illam provinciam
 copiæ satis, et uter ad utrum bellum dux idoneus
 magis esset; ab Sutrio et Nepete et Faleriis legati,
 auctores, concilia Etruriæ populorum de petenda
 pace haberi, totam belli molem in Samnium averte-
 runt. Profecti consules, quo expeditiores commeatibus
 essent, et incertior hostis, qua venturum bellum fo-
 ret, Fabius per Soranum, Decius per Sidicinum
 agrum, in Samnium legiones ducunt. Ubi in hos-

U. C. 454.
A. C. 298.

U. C. 455.
A. C. 297.

Ambo cons.
in Sam-
nium lega-
ones du-
cunt.

U. C. 455. tium fines ventum est, uterque populabundus effuso
 A. C. 297.

Prælium
 atrox cum
 Samni-
 tibus.

agmine incedit: explorant tamen latius, quam populantur. Igitur non fefellere ad Tifernum hostes in occulta valle instructi, quam ingressos Romanos superiore ex loco adoriri parabant. Fabius, inpedimentis in locum tutum remotis, præsidioque modico inposito, præmonitis militibus adesse certamen, quadrato agmine ad prædictas hostium latebras succedit. Samnites, desperato inproviso tumultu, quando in apertum semel discrimen evasura esset res, et ipsi acie justa maluerunt concurrere: itaque et in æquum descendunt, ac fortunæ se, majore animo, quam spe, committunt. Ceterum, sive quia ex omnium Samnitium populis, quodcumque roboris fuerat, contraxerant, seu quia discrimen summæ rerum augebat animos, aliquantum aperta quoque pugna præbuerunt terroris. Fabius, ubi nulla ex parte hostem loco moveri vidit, M. Fulvium et M. Valerium, tribunos militum, cum quibus ad primam aciem procurrerat, ire ad equites jubet, et adhortari, *ut, si quando umquam equestri ope adjunctam rempublicam meminerint, illo die adnitantur, ut ordinis ejus gloriam invictam præsent. Peditum certamine immobilem hostem restare; omnem reliquam spem in inpetu esse equitum: et ipsos nominatim juvenes, pari comitate utrumque, nunc laudibus, nunc promissis onerat. Ceterum, quando ne ea quoque tentata vis proficeret, consilio grassandum, si nihil vires juverent, ratus, Scipionem legatum hastatos primæ legionis subtrahere ex acie, et ad montes proximos, quam posset occultissime, circumducere jubet: inde adscensu abdito a conspectu erigere in montes agmen, aversoque hosti ab tergo repente se ostendere.*

Equites, ducibus tribunis, haud multo plus hostibus, U. C. 455.
 quam suis, ex improviso ante signa evecti, præbue- A. C. 297.
 runt tumultus. Adversus incitatas turmas stetit in-
 mota Samnitium acies, nec parte ulla pelli aut per-
 rumpi potuit. Et, postquam irritum inceptum erat,
 recepti post signa prælio excesserunt. Crevit ex eo
 hostium animus; nec sustinere frons prima tam lon-
 gum certamen increscentemque fiducia sui vim po-
 tuisset, ni secunda acies jussu consulis in primum
 successisset. Ibi integræ vires sistunt invehentem
 se jam Samnitem: et tempore improvisa ex monti-
 bus signa clamorque sublatus non vero tantum metu
 terruere Samnitium animos: nam et Fabius Decium
 collegam adpropinquare exclamavit, et pro se quis-
 que miles, *adesse alterum consulem, adesse legiones*,
 gaudio alacres fremunt; errorque utilis Romanis
 oblatus fugæ formidinisque Samnites inplevit, maxi-
 me territos, ne ab altero exercitu integro intactoque
 fessi obprimerentur: et, quia passim in fugam dissi-
 pati sunt, minor cædes, quam pro tanta victoria,
 fuit: tria millia et quadringenti cæsi: capti trecen-
 ti ferme et triginta: signa militaria capta tria et
 viginti.

Vincunt
Romani.

XV. Samnitibus Apuli se ante prælium conjunx-
 issent, ni P. Decius consul iis ad Maleventum castra
 objecisset, extractos deinde ad certamen fudisset.
 Ibi quoque plus fugæ fuit, quam cædis: duo millia
 Apulorum cæsa: spretoque eo hoste, Decius in Sam-
 nium legiones duxit. Ibi duo consulares exercitus,
 diversis vagati partibus, omnia spatio quinque men-
 sium evastarunt. Quadraginta et quinque loca in
 Samnio fuere, in quibus Decii castra fuerunt: al-
 terius consulis sex et octoginta: nec valli tantum

U. C. 455. ac fossarum vestigia relictæ, sed multo illis insigni-
 A. C. 297. ora monumenta vastitatis circa regionumque depopulatarum. Fabius etiam urbem Cimetricam cepit:

ibi capta armatorum duo millia quadringenti: cæsi ferme pugnantes ad quadringentos triginta. Inde, comitiorum causa Romam profectus, maturavit eam rem agere: quum primo vocatæ Q. Fabium consulem dicerent omnes centuriæ, Ap. Claudius consularis candidatus, vir acer et ambitiosus, non sui magis honoris causa, quam ut patricii recuperarent duo consularia loca, quum suis, tum totius

Q. Fabius
 consula-
 tum recu-
 sat.

nobilitatis viribus, incubuit, ut se cum Q. Fabio consulem dicerent. Fabius primo, de se eadem fere, quæ priore anno, dicendo, abnuere: circumstare sellam omnis nobilitas; orare, ut ex cœno plebeo consulatum extraheret, majestatemque pristinam tum honori, tum patriciis gentibus redderet. Fabius, silentio facto, media oratione studia hominum sedavit: *facturum enim se fuisse dixit, ut duorum patriciorum nomina reciperet, si alium, quam se, consulem fieri videret: nunc se sui rationem comitiis, quum contra leges futurum sit, pessimo exemplo non habitu-*

U. C. 456. rum. Ita L. Volumnius de plebe cum Ap. Claudio
 A. C. 296. consul est factus, priore item consulatu inter se comparati. Nobilitas objectare Fabio, fugisse eum

Ap. Claudium collegam, eloquentia civilibusque artibus haud dubie præstantem.

XVI. Comitiiis perfectis, veteres consules jussi bellum in Samnio gerere, prorogato in sex menses imperio. Itaque insequenti quoque anno, L. Volumnio, Ap. Claudio consulibus, P. Decius, qui consul in Samnio relictus a collega fuerat, proconsul idem populari non destitit agros, donec Samni-

tium exercitum, nusquam se prælio committentem, U. C. 456.
A. C. 296.
 postremo expulit finibus. Etruriam pulsi petierunt : Samnites
pulsi fini-
bus suis
Etruriam
petunt.
 et, quod legationibus nequidquam sæpe tentaverant,
 id se tanto agmine armatorum, mixtis terrore pre-
 cibus, acturos efficacius rati, postulaverunt princi-
 pum Etruriæ concilium. Quo coacto, per quot an-
 nos pro libertate dimicent cum Romanis, exponunt :
*omnia expertos esse, si suismet ipsorum viribus tolerare
 tantam molem belli possent : tentasse etiam haud mag-
 ni momenti finitimarum gentium auxilia : petisse pacem
 a populo Romano, quum bellum tolerare non possent :
 rebellasse, quod pax servientibus gravior, quam liberis
 bellum, esset. Unam sibi spem reliquam in Etruscis
 restare. Scire, gentem Italiæ opulentissimam armis,
 viris, pecunia, esse : habere adcolas Gallos, inter fer-
 rum et arma natos, feroces quum suoapte ingenio, tum
 adversus Romanum populum : quem captum a se au-
 roque redemptum, haud vana jactantes, memorent. Ni-
 hil abesse, si sit animus Etruscis, qui Porsenæ quondam
 majoribusque eorum fuerit, quin Romanos, omni agro cis
 Tiberim pulsos, dimicare pro salute sua, non de into-
 lerando Italiæ regno, cogant. Samnitem illis exercitum
 paratum, instructum armis, stipendio, venisse : con-
 festim secuturos, vel si ad ipsam Romanam urbem ob-
 pugnandam ducant.*

XVII. Hæc eos in Etruria jactantes molientesque
 bellum domi Romanum urebat : nam P. Decius, ubi
 comperit per exploratores profectum Samnitium ex-
 ercitus, advocato consilio, *Quid per agros, inquit,
 vagamur, vaticum circumferentes bellum ? quin urbes
 et mænia adgredimur ? nullus jam exercitus Samnio* Tres in
Samnio ur-
bes a Ro-
manis cap-
tæ.
*præsidet : cessare finibus, ac sibimet ipsi exsilium consci-
 vere. Adprobantibus cunctis, ad Murgantiam, va-*

U. C. 456. lidam urbem, obpugnandam ducit : tantusque ardor

A. C. 296. militum fuit, et caritate ducis, et spe majoris, quam ex agrestibus populationibus, prædæ, ut uno die vi atque armis urbem caperent : ibi duo millia Samnitium et centum pugnantes circumventi captique : et alia præda ingens capta est : quæ ne impedimentis gravibus agmen oneraret, convocari milites Decius jubet. *Haccine, inquit, victoria sola, aut hac præda contenti estis futuri? Vultis vos pro virtute spes gere-re? omnes Samnitium urbes, fortunæque in urbibus relictæ, vestræ sunt; quando legiones eorum, tot præliis fusas, postremo finibus expulistis. Vendite ista, et illicite lucro mercatorem, ut sequatur agmen : ego subinde subgeram, quæ vendatis. Ad Romuleam urbem hinc eamus, ubi vos labor haud major, præda major manet.* Divendita præda, ultro adhortantes imperatorem ad Romuleam pergunt. Ibi quoque sine opere, sine tormentis, simul admota sunt signa, nulla vi deterriti a muris, qua cuique proximum fuit, scalis raptim admotis, in mœnia evasere : captum oppidum ac direptum est : ad duo millia et trecenti occisi ; et sex millia hominum capta ; et miles ingenti præda potitus : quam vendere, sicut priorem, coactus, Ferentinum inde, quamquam nihil quietis dabatur, tamen summa alacritate ductus. Ceterum ibi plus laboris ac periculi fuit : et defensa summa vi mœnia sunt, et locus erat munimento naturaque tutus : sed evicit omnia adsuetus prædæ miles : ad tria millia hostium circa muros cæsa : præda militis fuit. Hujus obpugnatarum urbium decoris pars major in quibusdam annalibus ad Maximum trahitur. Murgantiam ab Decio, a Fabio Ferentinum Romuleamque obpugnatas tradunt : sunt, qui novorum

consulum hanc gloriam faciant. Quidam non am- U. C. 456.
 borum, sed alterius, L. Volumnii: ei Samnium pro- A. C. 296.
 vinciam evenisse.

XVIII. Dum ea in Samnio, cujuscumque ductu Bellum
 auspicioque, gererentur; Romanis in Etruria iterum Etruscum.
 bellum ingens multis ex gentibus concitur; cujus
 auctor Gellius Egnatius ex Samnitibus erat. Tusci
 fere omnes consciverant bellum: traxerat contagio
 proximos Umbriæ populos; et Gallica auxilia mer-
 cede sollicitabantur: omnis ea multitudo ad castra
 Samnitium conveniebat. Qui tumultus repens post-
 quam Romam perlatus est, quum jam L. Volumnius
 consul cum legionibus secunda ac tertia, sociorum-
 que millibus quindecim profectus in Samnium esset,
 Ap. Claudium primo quoque tempore in Etruriam Eo profi-
 ire placuit: duæ Romanæ legiones secutæ, prima ciscitur
 et quarta, et sociorum duodecim millia: castra haud Appius.
 procul ab hoste posita. Ceterum magis eo profectum
 est, quod mature ventum erat, ut quosdam spectantes
 jam arma Etruriæ populos metus Romani nominis
 comprimeret, quam quod ductu consulis quidquam
 ibi satis scite aut fortunate gestum sit. Multa prælia Res nec
 locis et temporibus iniquis commissa: spesque in scite nec
 dies graviolem hostem faciebat: et jam prope erat, fortunate
 ut nec duci milites, nec militibus dux satis fideret, gerit.
 Literas ad collegam arcessendum ex Samnio missas,
 in trinis annalibus invenio: piget tamen incertum
 ponere, quum ea ipsa inter consules populi Romani,
 jam iterum eodem honore fungentes, discrepatio
 fuerit: Appio abnuente missas; Volumnio adfir-
 mante, Appii se literis adcitum. Jam Volumnius in
 Samnio tria castella ceperat, in quibus ad tria millia
 hostium cæsa erant, dimidium fere ejus captum: et

U. C. 456. Lucanorum seditiones, a plebeiis et egentibus ducibus ortas, summa optimatum voluntate per Q. Fabium proconsulem, missum eo cum veteri exercitu, compresserat. Decio depopulandos hostium agros relinquit : ipse cum suis copiis in Etruriam ad col-

Volumnius it ad Appium. legam pergīt : quem advenientem læti omnes accipere. Appium ex conscientia sua credo animum habuisse haud inmerito iratum, si nihil scripserat : inliberali et ingrato animo, si eguerat ope, dissimulantem. Vix enim salute mutua reddita, quum ob-

Altercatio COSS. viam egressus esset, *Satin' salvæ*, inquit, *L. Volumni ? ut sese in Samnio res habent ? Quæ te caussa, ut provincia tua excederes, induxit ?* Volumnius in Samnio res prosperas esse ait, literis ejus adcitum venisse : quæ si falsæ fuerint, nec usus sui sit in Etruria, extemplo conversis signis abiturum. Tu vero abeas, inquit, neque te quisquam moratur : etenim minime consentaneum est, quum bello tuo forsitan vix sufficias, hic te ad opem ferendam aliis gloriari venisse. Bene, Hercules, verteret, dicere Volumnius : malle frustra operam insuntam, quam quidquam incidisse, cur non satis esset Etruriæ unus consularis exercitus.

XIX. Digredientes jam consules legati tribunique ex Appiano exercitu circumsi tunt : pars imperatorem suum orare, ne collegæ auxilium, quod adciendum ultro fuerit, sua sponte oblatum sperneretur : plures abeunti Volumnio obsistere atque obtestari, ne pravo cum collega certamine rempublicam prodat. Si qua clades incidisset, desertori magis, quam deserto, noxiæ fore. Eo rem adductam, ut omne rei bene aut secus gestæ in Etruria decus dedecusque ad L. Volumnium sit delegatum : neminem quæsiturum, quæ verba Appii, sed quæ fortuna exercitus fuerit. Dimitti ab Appio

eum, sed a republica et ab exercitu retineri; experiretur modo voluntatem militum. Hæc monendo obtestan- U. C. 456.
A. C. 296.

doque, prope restitantes consules in concionem pertraxerunt: ibi orationes longiores habitæ in eadem ferme sententiam, in quam inter paucos certatum verbis fuerat. Et quum Volumnius, caussa superior, ne infacundus quidem adversus eximiam eloquentiam collegæ visus esset; cavillansque Appius, sibi acceptum referre, diceret, debere, quod ex muto atque elingui facundum etiam consulem haberent: priore consulatu, primis utique mensibus, hiscere eum nequisse, nunc jam populares orationes serere. Quam mallet, inquit Volumnius, tu a me strenue facere, quam ego abs te scite loqui didicissem. Postremo conditionem ferre, quæ decretura sit, non orator, (neque enim id desiderare rempublicam) sed imperator uter sit melior: Etruriam et Samnium provincias esse: utram mallet, eligeret: suo exercitu se vel in Etruria, vel in Samnio rem gesturum. Tum militum clamor ortus, ut simul ambo bellum Etruscum susciperent: quo animadverso consensu, Volumnius, Quoniam in collegæ voluntate interpretanda, inquit, errari; non committam, ut, quid vos velitis, obscurum sit: manere, an abire me velitis, clamore significate. Tum vero tantus est clamor exortus, ut hostes e castris exciret: armis adreptis in aciem descendunt: et Volumnius signa canere, ac vexilla efferri e castris iussit. Appium addubitasse ferunt, cernentem, seu pugnantem, seu quieto se, fore collegæ victoriam: deinde veritum, ne suæ quoque legiones Volumnium sequerentur, et ipsum flagitantibus suis signum dedisse.

Ab neutra parte satis commode instructi fuerunt: Pugna cum
Samnitibus
et Tuscis.
nam et Samnitium dux Gellius Egnatius pabulatum

U.C. 456. cum cohortibus paucis ierat; suoque inpetu magis
 A.C. 296. milites, quam cujusquam ductu aut imperio, pugnam capessebant: et Romani exercitus nec pariter ambo ducti, nec satis temporis ad instruendum fuit. Prius concurrit Volumnius, quam Appius ad hostem perveniret: itaque fronte inæquali concursus est: et, velut forte quadam mutante aduetos inter se hostes, Etrusci Volumnio, Samnites, parumper cunctati, quia dux aberat, Appio obcurrere. Dicitur Appius in medio pugnae discrimine, ita ut inter prima signa manibus ad cælum sublati conspiceretur, ita precatus esse: *Bellona, si hodie nobis victoriam duis, ast ego templum tibi voveo.* Hæc precatus velut instigante Dea, et ipse collegæ et exercitus virtutem æquavit. Duces imperatoria opera exsequuntur; et milites, ne ab altera parte prius victoria incipiat, adnuntantur. Ergo fundunt fugantque hostes, majorem molem haud facile sustinentes, quam cum qua manus conserere adueti fuerant: urgendo cedentes, insequendoque effusos compulere ad castra. Ibi, interventu Gellii cohortiumque Sabellarum, paullisper recruduit pugna: iis quoque mox fuis, jam a victoribus castra obpugnabantur: et, quum Volumnius ipse portæ signa inferret; Appius, Bellonam victricem idemtidem celebrans, accenderet militum animos, per vallum, per fossas intruperunt. Castra capta direptaque: præda ingens parta et militi concessa est: septem millia ac trecenti hostium occisi, duo millia et centum viginti capti.

Romanus
 superior.

XX. Dum ambo consules omnisque Romana vis in Etruscum bellum magis inclinât, in Samnio novi exercitus, exorti ad depopulandos imperii Romani fines, per Vescinos in Campaniam Falernumque

agrum transcendunt, ingentesque prædas faciunt. U. C. 456.
 Volumnium, magnis itineribus in Samnium redeun- A. C. 296.
 tem, (jam enim Fabio Decioque prorogati imperii
 finis aderat) fama de Samnitium exercitu populatio-
 nibusque Campani agri ad tuendos socios convertit.
 Ut in Calenum agrum venit, et ipse cernit recentia
 cladis vestigia, et Caleni narrant, tantum jam prædæ
 hostes trahere, ut vix explicare agmen possint: ita-
 que jam propalam duces loqui, extemplo eundum in
 Samnium esse; ut, relicta ibi præda, in expeditionem
 redeant, nec tam oneratum agmen dimicationi com-
 mittant. Ea, quamquam similia veris erant, certius
 tamen exploranda ratus, dimittit equites, qui vagos
 prædatores in agros palantes excipiant: ex quibus
 inquirendo cognoscit, ad Vulturnum flumen sedere
 hostem; inde tertia vigilia moturum: iter in Sam-
 nium esse. His satis exploratis profectus, tanto in-
 tervallo ab hostibus consedit, ut nec adventus suus
 propinquitate nimia nosci posset, et egredientem e
 castris hostem obprimeret. Aliquanto ante lucem ad
 castra accessit; gnarosque Oscæ linguæ, exploratum
 quid agatur, mittit. Intermixti ho- tibus (quod facile
 erat in nocturna trepidatione) cognoscunt, infre-
 quentia armatis signa egressa, prædam prædæque
 custodes exire, ignobile agmen, et sua quemque mo-
 lientem, nullo inter alios consensu, nec satis certo
 imperio. Tempus adgrediendi aptissimum visum est:
 et jam lux adpetebat: itaque signa canere jussit;
 agmenque hostium adgreditur. Samnites, præda in-
 pediti, infrequentes armati, pars addere gradum, ac
 præ se agere prædam, pars stare, incerti utrum pro-
 gredi, an regredi in castra tutius foret, inter cuncta-
 tionem obprimuntur: et Romani jam transcederant

Obprimit
 Samnites
 prædatores
 Campaniæ.

U. C. 456. vallum, cædesque ac tumultus erat in castris. Sam-
 A. C. 296. nitium agmen, præterquam hostili tumultu, capti-
 vorum etiam repentina defectione turbatum erat :
 qui partim ipsi soluti vinctos solvebant : partim ar-
 ma in sarcinis deligata rapiebant, tumultumque,
 prælio ipso terribiliorem, intermixti agmini præbe-
 bant. Memorandum deinde edidere facinus : nam
 Staium Minacium ducem, adeuntem ordines hortan-
 temque, invadunt : dissipatis inde equitibus, qui cum
 eo aderant, ipsum circumstant, insidentemque equo
 captum ad consulem Romanum rapiunt. Revocata
 eo tumultu prima signa Samnitium : præliumque
 jam profligatum integratum est, nec diutius susti-
 neri potuit. Cæsa ad sex millia hominum : duo mil-
 lia et quingenti capti : in eis tribuni militum qua-
 tuor : signa militaria triginta : et, quod lætissimum
 victoribus fuit, captivorum recepta septem millia et
 quadringenti ; præda ingens sociorum : adicitque
 edicto domini ad res suas noscendas recipiendasque.
 Præstituta die, quarum rerum non exstitit dominus,
 militi concessæ : coactique vendere prædam, ne alibi,
 quam in armis, animum haberent.

XXI. Magnum ea populatio Campani agri tu-
 multum Romæ præbuerat : et per eos forte dies ex
 Etruria adlatum erat, post deductum inde Volumni-
 anum exercitum Etruriam concitam in arma, et
 Gellium Egnatium, Samnitium ducem, et Umbros
 ad defectionem vocari, et Gallos pretio ingenti sol-
 licitari. His nunciis senatus conterritus justitium
 indici, delectum omnis generis hominum haberi jus-
 sit : nec ingenui modo aut juniores sacramento
 adacti, sed seniorum etiam cohortes factæ, liberti-
 nique centuriati : et defendendæ urbis consilia agi-

tabantur; summæque rerum prætor P. Sempronius U. C. 456.
præerat. Ceterum parte curæ exonerarunt senatum A. C. 296.

L. Volumnii consulis literæ, quibus cæsos fusosque
populatores Campaniæ cognitum est. Itaque et sup-
plicationes ob rem bene gestam consulis nomine de-
cernunt: justitium remittitur, quod fuerat dies de-
cem et octo, supplicatioque perlæta fuit. Tam de
præsidio regionis depopulatæ ab Samnitibus, agitari
cœptum. Itaque placuit, ut duæ coloniæ circa Ves-
cinum et Falernum agrum deducerentur: una ad
ostium Liris fluvii, quæ Minturnæ adpellata; altera
in saltu Vescino, Falernum contingente agrum, ubi
Sinope dicitur Græca urbs fuisse, Sinnessa deinde
ab colonis Romanis adpellata. Tribunis plebis ne-
gotium datum est, ut plebeiscito juberetur P. Sem-
pronius prætor triumviros in ea loca colonis dedu-
cendis creare: nec, qui nomina darent, facile inve-
niebantur, quia in stationem se prope perpetuam
infestæ regionis, non in agros, mitti rebantur.
Avertit ab eis curis senatum Etruriæ ingravescens
bellum, et crebræ literæ Appii, monentis, ne regio-
nis ejus motum negligerent: *quatuor gentes conferre*

arma, Etruscos, Samnites, Umbros, Gallos: jam castra
bifariam facta esse, quia unus locus capere tantam
multitudinem non possit. Ob hæc, et (jam adpetebat
tempus) comitiorum caussa L. Volumnius consul

Quatuor
gentes in
Etruria
conferunt
arma ad-
versus
Rom.

Romam revocatus: qui prius, quam ad suffragium
centurias vocaret, in concionem advocato populo,
multa de magnitudine belli Etrusci disseruit: *jam*
tum, quum ipse ibi cum collega rem pariter gesserit,
fuisse tantum bellum, ut nec duce uno, nec exercitu
geri potuerit: accessisse postea dici Umbros, et ingen-
tem exercitum Gallorum. Adversus quatuor populos

U. C. 456. *duces consules illo die deligi meminissent : se, nisi con-*
 A. C. 296. *fideret, eum consensu populi Romani consulem declar-*
atum iri, qui haud dubie tum primus omnium ductor
habeatur, dictatorem fuisse extemplo dicturum.

Fabius re-
cusans
cos. eli-
gitur.

XXII. Nemini dubium erat, quin Q. Fabius om-
nium consensu destinaretur; eumque et præroga-
tivæ, et primo vocatæ omnes centuriæ consulem
cum L. Volumnio dicebant. Fabii oratio fuit, qua-
lis biennio ante: deinde, ut vincebatur consensu,
versa postremo ad collegam P. Decium poscendum:
id senectuti suæ adminiculum fore: censura duobusque
consulatibus simul gestis expertum se, nil concordi col-
legio firmitus ad rempublicam tuendam esse: novo im-
perii socio vix jam adsuescere senilem animum posse:
cum moribus notis facilius se communicaturum consilia.
 Subscripsit orationi ejus consul, quum meritis P.
Decii laudibus, tum, quæ ex concordia consulum bona,
quæque ex discordia mala in administratione rerum mi-
litarium evenirent, memorando, quam prope ultimum
discrimen suis et collegæ certaminibus nuper ventum
foret: admonendo Decium Fabiumque, ut uno ani-
mo, una mente viverent: esse præterea viros natos mi-
litia, factis magnos, ad verborum linguæque certamina
rudes: ea ingenia consularia esse. Callidos solertesque,
juris atque eloquentiæ consultos, qualis Ap. Claudius
esset, urbi ac foro præsides habendos, prætoresque ad
reddenda jura creandos esse. His agendis dies est
consumtus: postridie ad præscriptum consulis et
consularia et prætoria comitia habita. Consules
creati Q. Fabius et P. Decius: Ap. Claudius præ-
tor; omnes absentes: et L. Volumnio ex senatus-
consulto et scito plebis prorogatum in annum im-
perium est.

XXIII. Eo anno prodigia multa fuerunt; quorum ^{U. C. 456.}averruncandorum caussa supplicationes in biduum ^{A. C. 295.}senatus decrevit. Publice vinum ac tus præbitum: supplicatum iere frequentes viri feminæque. Insignem supplicationem fecit certamen in sacello Pudicitiae patriciae, quæ in foro boario est ad ædem rotundam Herculis inter matronas ortum. Virginiam, Auli filiam, patriciam plebeio nuptam L. Volumnio ^{Pudicitia patricia.}consuli, matronæ, quod e Patribus enupsisset, sacris arcuerant. Brevis altercatio inde ex iracundia muliebri in contentionem animorum exarsit: quum se Virginia et patriciam et pudicam in patriciæ Pudicitiae templum ingressam, et uni nuptam, ad quem virgo deducta sit; nec se viri honorumve ejus ac rerum gestarum poenitere, vero gloriaretur. Facto deinde egregio magnifica verba adauxit: in vico Longo, ubi habitabat, ex parte ædium, quod satis esset loci modico sacello, exclusit; aramque ibi posuit: et, convocatis plebeiis matronis, conquesta injuriam patriciarum, *Hanc ego aram, inquit, Pudicitiae plebeiae dedico: vosque hortor, ut, quod certamen virtutis viros in hac civitate tenet, hoc pudicitiae inter matronas sit: detisque operam, ut hæc ara, quam illa, si* ^{Pudicitia plebeia.}*quid potest, sanctius et a castioribus coli dicatur.* Eodem ferme ritu et hæc ara, quo illa antiquior, culta est; ut nulla, nisi spectatæ pudicitiae matrona, et quæ uni viro nupta fuisset, jus sacrificandi haberet. Vulgata dein religio a pollutis, nec matronis solum, sed omnis ordinis feminis, postremo in oblivionem venit. Eodem anno Cn. et Q. Ogulnii ædiles curules aliquot foeneratoribus diem dixerunt: quorum bonis multatis, ex eo, quod in publicum redactum est, ænea in Capitolio limina, et trium mensarum

U. C. 456. argentea vasa in cella Jovis, Jovemque in culmine
 A. C. 296. cum quadrigis, et ad ficum Ruminalem simulacra
 infantium conditorum Urbis sub uberibus lupæ po-
 suerunt; semitamque saxo quadrato a Capena porta
 ad Martis straverunt: et ab ædilibus plebeiis L.
 Ælio Pæto et C. Fulvio Cúrvo, ex multatícia item
 pecunia, quam exegerunt pecuariis damnatis, ludi
 facti; pateræque aureæ ad Cereris positæ.

U. C. 457. XXIV. Q. inde Fabius quintum et P. Decius
 A. C. 295. quartum consulatum ineunt, tribus consulatibus cen-
 suraque collegæ; nec gloria magis rerum, quæ in-
 gens erat, quam concordia, inter se clari: quæ ne
 perpetua esset, ordinum magis, quam ipsorum, inter
 se certamen intervenisse reor: patriciis tendentibus,

Inter coss. ut Fabius Etruriam extra ordinem provinciam habe-
 orta con- ret; plebeiis auctoribus Decio, ut ad sortem revo-
 tentio de caret. Fuit certe contentio in senatu; et, postquam
 provin- ibi Fabius plus poterat, revocata res ad populum
 cis. est: in concione, ut inter militares viros, et factis
 potius, quam dictis, fretos, pauca verba habita:
*Fabius, quam arborem conseruisset, sub ea legere alium
 fructum, indignum esse, dicere; se aperuisse Ciminiam
 silvam, viamque per devios saltus Romano bello fecisse.
 Quid se id ætatis sollicitassent, si alio duce bellum
 gesturi essent? Nimirum adversarium se, non socium
 imperiî, legisse, sensim exprobrat: et invidisse Decium
 concordibus collegiis tribus. Postremo, se tendere ni-
 hil ultra, quam ut, si se dignum provincia ducerent, in
 eam mitterent: in senatus arbitrio se fuisse, et in po-
 testate populi futurum. P. Decius senatus injuriam
 querebatur: quoad potuerint, Patres adnisos, ne ple-
 beiiis aditus ad magnos honores esset: postquam ipsa
 virtus pervicerit, ne in ullo genere hominum inhono-*

rata esset, quæri, quemadmodum irrita sint non suffragia modo populi, sed arbitria etiam fortunæ, et in paucorum potestatem vertantur. Omnes ante se consules sortitos provincias esse; nunc extra sortem Fabio senatum provinciam dare. Si honoris ejus causa: ita eum de se, deque republica meritum esse, ut faveat Q. Fabii gloriæ, quæ modo non sua contumelia splendeat. Cui autem dubium esse, ubi unum bellum sit asperum ac difficile, quum id alteri extra sortem mandetur, quin alter consul pro supervacaneo atque inutili habeatur? Gloriarî Fabium rebus in Etruria gestis: velle et P. Decium gloriarî: et forsitan, quem ille obrutum ignem reliquerit, ita ut toties novum ex inproviso incendium daret, eum se extincturum. Postremo se collegæ honores præmiaque concessurum verecundia ætatis ejus majestatisque; quum periculum, quum dimicatio proposita sit, neque cedere sua sponte, neque cessurum: et, si nihil aliud ex eo certamine tulerit, illud certe laturum, ut, quod populi sit, populus jubeat potius, quam patres gratificentur. Jovem optimum maximum Deosque immortales se precari, ut ita sortem æquam sibi cum collega dent, si eandem virtutem felicitatemque in bello administrando daturi sint: certe id et natura æquum, et exemplo utile esse, et ad famam populi Romani pertinere, eos consules esse, quorum utrolibet duce bellum Etruscum geri recte possit. Fabius, nihil aliud precatus populum, quam ut prius, quam intro vocarentur ad suffragium tribus, Ap. Claudii prætoris adlatas ex Etruria literas audirent, comitio abijt: nec minore populi consensu, quam senatus, provin-

U. C. 457.
A. C. 295.

Fabio extra
sortem da-
tur Etruria.

XXV. Concursus inde ad consulem factus omnium ferme juniorum: et pro se quisque nomina

U. C. 457. dabant : tanta cupido erat sub eo duce stipendia faciendi. Qua circumfusus turba, *Quatuor millia*, inquit, *peditum et sexcentos equites dumtaxat scribere in animo est : hodierno et crastino die qui nomina dederitis, mecum ducam : majori mihi curæ est, ut omnes locupletes reducam, quam ut multis rem geram militibus.*

Fabius in
provin-
ciam ve-
nit.

Profectus apto exercitu, et eo plus fiduciæ ac spei gerente, quod non desiderata multitudo erat, ad oppidum Aharnam, unde haud procul hostes erant, ad castra Appii prætoris pergit : paucis citra millibus lignatores ei cum præsidio obcurrunt ; qui, ut lictores prægredi viderunt, Fabiumque esse consulem accepere, læti atque alacres Diis populoque Romano grates agunt, quod eum sibi imperatorem misissent. Circumfusi deinde quum consulem salutarent, quærit Fabius, quo pergerent ; respondentibusque, lignatum se ire, *ain' tandem*, inquit, *num castra vallata non habetis ?* Ad hoc quum subclamatum esset ; *duplici quidem vallo, et fossa, et tamen in ingenti metu esse : habetis igitur*, inquit, *adfatim lignorum : redite, et vellite vallum.* Redeunt in castra, terroremque ibi, vellentes vallum, et iis, qui in castris remanserant, militibus, et ipsi Appio fecerunt. Tum pro se quisque alii aliis dicere, *consulis se Q. Fabii facere jussu.* Postero inde die castra mota, et Appius prætor Romam dimissus : inde nusquam stativa Romanis fuere : negabat utile esse, uno loco sedere exercitum : itineribus ac mutatione locorum nobiliorem ac salubriorem esse : fiebant autem itinera, quanta fieri sinebat hiems hauddum exacta. Vere inde primo, relicta secunda legione ad Clusium, quod Camars olim adpellabant, præpositoque castris L. Scipione pro prætore, Romam ipse ad consultandum

de bello rediit: sive ipse sponte sua, quia bellum ei ^{U. C. 457.}
 majus in conspectu erat, quam quantum esse famæ ^{A. C. 295.}
 crediderat; sive senatusconsulto aditus: nam in ^{Redit Ro-}
 utrumque auctores sunt. Ab Ap: Claudio prætore ^{mum ad}
 retractum quidam videri volunt; quum in senatu et ^{consultan-}
 apud populum (id quod per literas adsidue fecerat) ^{dum de}
 terrorem belli Etrusci augeret: *non subfecturum du-*
cem unum, nec exercitum unum, adversus quatuor po-
pulos. Periculosum esse, sive juncti unum premant,
sive id diversi gerant bellum, ne ad omnia simul obire
unus non possit. Duas se ibi legiones Romanas reli-
quisse: et minus quinque millia peditum equitumque
cum Fabio venisse: sibi placere, P. Decium consulem
primo quoque tempore in Etruriam ad collegam pro-
ficisci: L. Volumnio Samnium provinciam dari. Si
consul velit in suam provinciam ire, Volumnium in
Etruriam ad consulem cum exercitu justo consulari
proficisci. Quum magnam partem moveret oratio
prætoris, P. Decium censuisse ferunt, ut omnia in-
tegra ac libera Q. Fabio servarentur, donec vel ipse,
si per commodum reipublicæ posset, Romam ve-
nisset, vel aliquem ex legatis misisset; a quo dis-
ceret senatus, quantum in Etruria belli esset, quan-
tisque administrandum copiis, et quot per duces
esset.

XXVI. Fabius, ut Romam rediit, et in senatu et productus ad populum mediam orationem habuit, ut nec augere, nec minuire videretur belli famam; magisque in altero adsumendo duce aliorum indulgere timori, quam suo aut reipublicæ periculo consulere: *ceterum, si sibi adiutorem belli sociumque imperii darent, quonam modo se oblivisci P. Decii consulis per tot collegia experti posse? Neminem omnium secum*

U. C. 457. *conjugi malle: et copiarum satis sibi cum P. Decio,*
 A. C. 295. *et nunquam nimium hostium fore. Sin collega quid*
aliud malit, at sibi L. Volumnium darent adiutorem.
 Omnium rerum arbitrium et a populo, et a senatu,
 et ab ipso collega, Fabio permissum est: et quum
 P. Decius se in Samnium vel in Etruriam proficisci
 paratum esse ostendisset, tanta lætitia ac gratulatio
 fuit, ut præciperetur victoria animis, triumphusque,
 non bellum, decretum consulibus videretur. Invenio
 apud quosdam, extemplo, consulatu inito, profectos
 in Etruriam Fabium Deciumque, sine ulla mentione
 sortis provinciarum certaminumque inter collegas,
 quæ exposui. Sunt, quibus ne hæc quidem certa-
 mina exponere satis fuerit: adjecerunt et Appii cri-
 minationes de Fabio absente ad populum, et perti-
 naciam adversus præsentem consulem prætoris, con-
 tentionemque aliam inter collegas, tendente Decio,
 ut suæ quisque provinciæ sortem tueretur. Constare
 res incipit ex eo tempore, quo profecti ambo con-
 sules ad bellum sunt. Ceterum, antequam consules
 in Etruriam pervenirent, Senones Galli multitudine
 ingenti ad Clusium venerunt, legionem Romanam
 castraque obpugnaturi. Scipio, qui castris præerat,
 loco adjuvandam paucitatem suorum militum ratus,
 in colle, qui inter urbem et castra erat, aciem erexit.
 Sed, ut in re subita, parum explorato itinere ad ju-
 gum perrexit, quod hostes ceperant, parte alia egres-
 si: ita cæsa ab tergo legio, atque in medio, quum
 hostis undique urgeret, circumventa. Deletam quo-
 que ibi legionem, ita ut nuncius non superesset, qui-
 dam auctores sunt; nec ante ad consules, qui jam
 haud procul a Clusio aberant, famam ejus cladis
 perlatam, quam in conspectu fuere Gallorum equites,

Galli le-
 gionem
 Romanam
 circumve-
 niunt.

pectoribus equorum suspensa gestantes capita, et lanceis infixæ, orantesque moris sui carmine. Sunt, qui Umbros fuisse, non Gallos, tradant; nec tantum cladis acceptum: et circumventis pabulatoribus cum L. Manlio Torquato legato Scipionem proprætorem subsidium e castris tulisse, victoresque Umbros, redintegrato prælio, victos esse, captivosque eis ac prædam ademptam. Similius vero est, a Gallo hoste, quam Umbro, eam cladem acceptam; quod, quum sæpe alias, tum eo anno, Gallici tumultus præcipuus terror civitatem tenuit. Itaque præterquam quod ambo consules profecti ad bellum erant cum quatuor legionibus, et magno equitatu Romano, Campanisque mille equitibus delectis, ad id bellum missis, et sociorum nominisque Latini majore exercitu, quam Romani; alii duo exercitus haud procul urbe Etruriæ obpositi, unus in Falisco, alter in Vaticano agro. Cn. Fulvius et L. Postumius Megellus, proprætores ambo, stativa in eis locis habere jussi.

XXVII. Consules ad hostes, transgresso Apennino, in agrum Sentinatem pervenerunt. Ibi quatuor millium ferme intervallo castra posita. Inter hostes deinde consultationes habitæ: atque ita convenit, ne unis castris miscerentur omnes, neve in aciem descenderent simul. Samnitibus Galli, Etruscis Umbri adjecti: dies indicta pugna: Samniti Gallisque delegata pugna: inter ipsum certamen Etrusci Umbrique jussi castra Romana obpugnare. Hæc consilia turbarunt transfugæ Ciusini tres, clam nocte ad Fabium consulem transgressi: qui, editis hostium consiliis, dimissi cum donis, ut subinde, ut quæque res nova decreta esset, exploratam perferrent. Consules Fulvio, ut ex Falisco, Postumio, ut

Ambo cons.
in agro
Sentinati.

U. C. 457. ex Vaticano exercitum ad Clusium admoveant, sum-
 A. C. 295. maque vi fines hostium depopulentur, scribunt. Hu-
 Etrusci jus populationis fama Etruscos ex agro Sentinate ad
 advocati ad suos fines tuendos movit. Instare inde consules, ut
 sua tu- absentibus iis pugnaretur: per biduum lacessere
 enda. prælio hostem: biduo nihil dignum dictu actum.
 Pauci utrimque cecidere: magisque irritati sunt ad
 justum certamen animi, quam ad discrimen summa
 rerum adducta: tertio die descensum in campum
 omnibus copiis est. Quum instructæ acies starent,
 cerva fugiens lupum e montibus exacta per campos
 inter duas acies decurrit; inde diversæ feræ, cerva
 ad Gallos, lupus ad Romanos cursum deflexit. Lu-
 po data inter ordines via; cervam Galli confixere.
 Tum ex antesignanis Romanus miles, *Illac fuga, in-*
quit, et cædes vertit, ubi sacram Dianæ feram jacen-
tem videtis. Hinc victor Martius lupus, integer et in-
tactus, gentis nos Martiæ et conditoris nostri admonuit.
 Dextro cornu Galli, sinistro Samnites constitunt:
 adversus Samnites Q. Fabius primam ac tertiam le-
 giones pro dextro cornu; adversus Gallos pro si-
 nistro Decius quintam et sextam instruxit: secunda
 et quarta cum L. Volumnio proconsule in Samnio
 gerebant bellum. Primo concursu adeo æquis viri-
 bus gesta res est, ut, si adfuissent Etrusci et Umbri,
 aut in acie, aut in castris, quocumque se inclinassent,
 accipienda clades fuerit.

Prælium
 cum Gal-
 lis et Sam-
 nitibus.

XXVIII. Ceterum, quamquam communis adhuc
 Mars belli erat, necdum discrimen fortuna fecerat,
 qua datura vires esset, haudquaquam similis pugna
 in dextro lævoque cornu erat. Romani apud Fabium
 arcebant magis, quam inferebant, pugnam; extra-
 hebaturque in quato maxime serum diei certamen:

quia ita persuasum erat duci, et Samnites et Gallos primo inpetu feroces esse, quos sustineri satis sit; longiore certamine sensim residere Samnitium animos: Gallorum quidem etiam corpora intolerantissima laboris atque æstus fluere; primaque eorum prælia plus quam virorum, postrema minus quam feminarum esse. In id tempus igitur, quo vinci solebat hostis, quam integerrimas vires militi servabat. Ferocior Decius et ætate et vigore animi, quantumcumque virium habuit, certamine primo effudit: et, quia lentior videbatur pedestris pugna, equitatum in pugnam concitat: et ipse, fortissimæ juvenum turmæ inmixtus, orat procures juventutis, in hostem ut secum inpetum faciant: duplicem illorum gloriam fore, si ab lævo cornu et ab equite victoria incipiat. Bis avertere Gallicum equitatum: iterum longius evectos, et jam inter media equitum agmina prælium cientes, novum pugnæ conterruit genus: essedis carrisque superstans armatus hostis ingenti sonitu equorum rotarumque advenit, et insolitos ejus tumultus Romanorum conterruit equos. Ita victorem equitatum velut lymphaticus pavor dissipat: sternit inde ruentes equos virosque improvida fuga. Turbata hinc etiam signa legionum: multique inpetu equorum ac vehiculorum raptorum per agmen obtriti antesignani: et insecuta, simul territos hostes vidit, Gallica acies nullum spatium respirandi recipiendique se dedit. Vociferari Decius, *Quo fugerent? quamve in fuga spem haberent?* obsistere cedentibus, ac revocare fusos: deinde, ut nulla vi perculsos sustinere poterat, patrem P. Decium nomine compellens, *Quid ultra moror, inquit, familiare fatum? datum hoc nostro generi est, ut luendis periculis publicis*

U. C. 457.
A. C. 295.

Decius se
devovet.

U. C. 457. *piacula simus. Jam ego mecum hostium legiones mae-*
 A. C. 295. *tandas Telluri ac Diis Manibus dabo.* Hæc locutus
 M. Livium pontificem, quem, descendens in aciem,
 digredi vetuerat ab se, præire jussit verba, quibus
 se legionesque hostium pro exercitu populi Romani
 Quiritium devoveret. Devotus inde eadem preca-
 tione eodemque habitu, quo pater P. Decius ad Ve-
 serim bello Latino se jusserat devoveri. Quum se-
 cundum sollemnes preces adiecisset, *præ se age-*
re sese formidinem ac fugam, cædemque ac cruorem,
caelestium, inferorum iras: contacturum funebribus di-
ris signa, tela, arma hostium; locumque eundem suæ
pestis et Gallorum ac Samnitium fore. Hæc exsecra-
 tus in se hostesque, qua confertissimam cernebat
 Gallorum aciem, concitat equum: inferensque se
 ipse infestis telis est interfectus.

XXIX. Vix humanæ inde opis videri pugna po-
 tuit. Romani, duce amisso, quæ res terrori alias
 esse solet, sistere fugam, ac novam de integro vel-
 le instaurare pugnam. Galli, et maxime globus cir-
 cumstans consulis corpus, velut alienata mente, va-
 na incassum jactare tela: torpere quidam, et nec
 pugnae meminisse, nec fugæ. At ex parte altera
 pontifex Livius, cui lictores Decius tradiderat, jus-
 seratque proprætorem esse, vociferari, *Vicisse Ro-*
manos, defunctos consulis fato. Gallos Samnitesque
Telluris matris ac Deorum Manium esse. Rapere ad
se ac vocare Decium devotam secum aciem; furium-
que ac formidinis plena omnia ad hostes esse. Super-
 veniunt deinde his restituentibus pugnam L. Cor-
 nelius Scipio et C. Marcius, cum subsidiis ex no-
 vissima acie jussu Q. Fabii consulis ad præsidium
 collegæ missi: ibi auditur P. Decii eventus, ingens

hortamen ad omnia pro republica audenda. Itaque U. C. 457.
A. C. 295. quum Galli structis ante se scutis conferti starent, nec facilis pede conlato videretur pugna; jussu legatorum conlecta humi pila, quæ strata inter duas acies jacebant, atque in testudinem hostium conlecta: quibus plerisque in scuta, verutis in corpora ipsa fixis, sternitur cuneus; ita ut magna pars integris corporibus adtoniti conciderent: hæc in sinistro cornu Romanorum fortuna variaverat. Fabius in dextro, primo (ut ante dictum est) cunctando extraxerat diem: deinde, postquam nec clamor hostium, nec inpetus, nec tela missa, eandem vim habere visa; præfectis equitum jussis ad latus Samnitium circumducere alas, ut signo dato in transversos, quanto maximo possent inpetu, incurrerent; sensim suos signa inferre jussit, et commovere hostem. Postquam non resisti vidit, et haud dubiam lassitudinem esse; tum, conlectis omnibus subsidiis, quæ ad id tempus reservaverat, et legiones concitavit, et signum ad invadendos hostes equitibus dedit. Nec sustinuerunt Samnites inpetum; præterque aciem ipsam Gallorum, relictis in dimicatione sociis, ad castra effuso cursu ferebantur. Galli, testudine facta, conferti stabant. Tum Fabius, audita morte collegæ, Campanorum alam, quingentos fere equites, excedere acie jubet, et circumvectos ab tergo Gallicam invadere aciem: tertiæ deinde legionis subsequi principes, et, qua turbatum agmen hostium viderent inpetu equitum, instare ac territos cedere. Ipse ædem Jovi Victori spoliaque hostium quum vo-
Galli circumventi.

U. C. 457. ab exclusis turba suorum pugna est. Ibi Gellius
 A. C. 295. Egnatius imperator Samnitium cecidit: compulsi
 deinde intra vallum Samnites, parvoque certamine
 Victoria capta castra, et Galli ab tergo circumventi. Cæsa eo
 Romano- die hostium viginti quinque millia, octo capta: nec
 rum cru- incruenta victoria fuit. Nam ex P. Decii exercitu
 enta, cæsa septem millia; ex Fabii, mille ac ducenti. Fa-
 bius, dimissis ad quærendum collegæ corpus, spolia
 hostium coniecta in acervum Jovi Victori cremavit.
 Consulis corpus eo die, quia obrutum superstratis
 Gallorum cumulis erat, inveniri non potuit: postero
 die inventum relatumque est cum multis militum
 lacrimis. Intermissa inde omnium aliarum rerum
 cura, Fabius collegæ funus omni honore laudibus-
 que meritis celebrat.

Res in
 Etruria
 bene ge-
 sta.

XXX. Et in Etruria per eosdem dies ab Cn. Ful-
 vio pro prætore res ex sententia gesta; et, præter
 ingentem inlatam populationibus agrorum hosti cla-
 dem, pugnatum etiam egregie est: Perusinorumque
 et Clusinorum cæsa amplius millia tria, et signa mi-
 litaria ad viginti capta. Samnitium agmen, quum
 per Pelignum agrum fugeret, circumventum a Pe-
 lignis est: ex millibus quinque ad mille cæsi. Mag-
 na ejus dici, quo in Sentinati agro bellatum, fama
 est, etiam vero stanti: sed superjecere quidam
 augendo fidem; qui in hostium exercitu peditum
 quadraginta millia trecentos triginta, equitum sex
 millia, mille carpentorum scripsere fuisse: scilicet
 cum Umbris Tuscisque, quos et ipsos pugnae adfu-
 isse: et, ut Romanorum quoque augerent copias,
 L. Volumnium pro consule ducem consulibus, ex-
 ercitumque ejus legionibus consulum adjiciunt. In
 pluribus annalibus duorum ea consulum propria

victoria est. Volumnius in Samnio interim res gerit, U. C. 457.
A. C. 295. Samnitiumque exercitum, in Tifernum montem compulsum, non deterritus iniquitate loci, fundit fugatque. Q. Fabius, Deciano exercitu relicto in Etruria, suis legionibus deductis ad urbem, de Gallis Etruscisque ac Samnitibus triumphavit: milites triumphantem secuti sunt. Celebrata inconditis carminibus militaribus non magis victoria Q. Fabii, quam mors præclara P. Decii est: excitataque memoria parentis, æquata eventu publico privatoque filii laudibus. Data ex præda militibus æris octogeni bini, sagaque et tunicæ; præmia illa tempestate militiæ haudquaquam spernenda.

XXXI. His ita rebus gestis, nec in Samnitibus Etrusci et
Samnites
bellum re-
parant. adhuc, nec in Etruria pax erat: nam et, Perusinis auctoribus, post deductum ab consule exercitum rebellatum fuerat: et Samnites prædatum in agrum Vescinum Formianumque, et parte alia in Æserninum, quæ Vulturno adjacent flumini, descendere. Adversus eos Ap. Claudius prætor cum exercitu Deciano missus. Fabius in Etruria rebellante denuo quatuor millia et quingentos Perusinorum occidit: cepit ad mille septingentos quadraginta: qui redempti singuli æris trecentis decem: præda alia omnis militibus concessa. Samnitium legiones, quum partim Ap. Claudius prætor, partim L. Volumnius pro consule sequeretur, in agrum Stellatem convenerunt: ibi et Samnitium legiones omnes considunt, et Appius Volumniusque castra conjungunt. Pugnatum infestissimis animis, hinc ira stimulante adversus rebellantes toties, illinc ab ultima jam dimicantibus spe. Cæsa ergo Samnitium sexdecim millia trecenti, capta duo millia septingenti: ex Ro-

U. C. 457. mano exercitu cecidere duo millia septingenti. Felix

A. C. 295. annus bellicis rebus, pestilentia gravis, prodigiisque sollicitus : nam, et terram multifariam pluisse, et in exercitu Ap. Claudii plerosque fulminibus ictos, nunciatum est : librique ob hæc aditi. Eo anno Q. Fabius Gurgès, consulis filius, aliquot matronas ad populum stupri damnatas pecunia multavit : ex quo multaticio ære Veneris ædem, quæ prope circum est, faciendam curavit. Supersunt etiam nunc Samnitium bella, quæ continua per quartum jam volumen annumque sextum et quadragesimum, a M. Valerio, A. Cornelio consulibus, qui primi Samnio arma intulerunt, agimus : et ne tot annorum clades utriusque gentis laboresque actos nunc referam, quibus nequiverint tamen dura illa pectora vinci ; proximo anno Samnites in Sentinati agro, Pelignis, ad Tifernum, Stellatibus campis, suis ipsi legionibus, mixti alienis, ab quatuor exercitibus, quatuor ducibus Romanis cæsi fuerant, imperatorem clarissimum gentis suæ amiserant ; socios belli, Etruscos, Umbros, Gallos, in eadem fortuna videbant, quæ ipsi erant : nec suis, nec externis viribus jam stare poterant ; tamen bello non abstinebant : adeo ne infeliciter quidem defensæ libertatis tædebat : et vinci, quam non tentare victoriam, malebant. Quinam sit ille, quem non pigeat longinquitatis bellorum scribendo legendoque, quæ gerentes non fatigaverunt ?

U. C. 458. XXXII. Q. Fabium, P. Decium, L. Postumius

A. C. 294. Megellus et M. Atilius Regulus consules secuti sunt. Samnium ambobus decreta provincia est ; quia tres scriptos hostium exercitus, uno Etruriam, altero populationes Campaniæ repeti, tertiam tuendis parari

Belli
Samnitici
diuturnitas, et
atrocitas.

finibus, fama erat. Postumium valetudo adversa U. C. 458.
 Romæ tenuit : Atilius extemplo profectus, ut in A. C. 294.
 Samnio hostes (ita enim placuerat Patribus) non-
 dum egressos obprimeret. Velut ex composito ibi
 obvium habuere hostem ; ubi et intrare, nedum va-
 stare, ipsi Samnitium agrum prohiberentur : et egre-
 di inde in pacata sociorumque populi Romani fines
 Samnitum prohiberent. Quum castra castris con- Samnites
 lata essent, quod vix Romanus toties victor auderet, castra Ro-
 ausi Samnites sunt (tantum desperatio ultima teme- mana ad-
 ritatis facit) castra Romana obpugnare : et quam- grediuntur.
 quam non venit ad finem tam audax inceptum, ta-
 men haud omnino vanum fuit. Nebula erat ad
 multum diei densa adeo, ut lucis usum eriperet, non
 prospectu modo extra vallum adempto, sed propinquo
 etiam congregientium inter se conspectu. Hac velut
 latebra insidiarum freti Samnites, vixdum satis certa
 luce, et eam ipsam premente caligine, ad stationem
 Romanam in porta segniter agentem vigilias perve-
 niunt. Inproviso obpressis nec animi satis ad re-
 sistendum, nec virium fuit. Ab tergo castrorum
 decumana porta inpetus factus : itaque captum quæ-
 storium ; quæstorque ibi L. Opimius Pansa occisus :
 conclamatum inde ad arma.

XXXIII. Consul, tumultu excitus, cohortes duas
 sociorum, Lucanam Suessanamque, quæ proximæ
 forte erant, tueri prætorium jubet : manipulos le-
 gionum principali via inducit. Vixdum satis aptatis
 armis, in ordines eunt : et clamore magis, quam
 oculis, hostem noscunt : nec, quantus numerus sit,
 æstimari potest. Cedunt primo incerti fortunæ suæ,
 et hostem introrsum in media castra accipiunt : inde
 quum consul vociferaretur, *expulsine extra vallum,*

U. C. 458. *castra deinde sua obpugnaturi essent, rogicans; cla-*
 A. C. 294. *more sublato connisi primo resistunt: deinde infe-*
runt pedem urgentque, et impulsos semel terrore
eodem agunt, quo cœperunt. Expellunt extra por-
tam vallumque: inde pergere ac persequi (quia tur-
bida lux metum circa insidiarum faciebat) non ausi,
liberatis castris contenti, receperunt se intra vallum
trecentis ferme hostium occisis. Romanorum sta-
tionis primæ vigilumque et eorum, qui circa quæ-
storium obpressi, periere ad ducentos triginta. Ani-
mos inde Samnitibus non infelix audacia auxit; et
non modo proferre inde castra Romanum, sed ne
pabulari quidem per agros suos, patiebantur: retro
in pacatum Soranum agrum pabulatores ibant. Qua-
rum rerum fama, tumultuosior etiam, quam res
erant, perlata Romam, coëgit L. Postumium con-
sulem, vixdum validum, proficisci ex urbe. Prius
tamen, quam exiret, militibus edicto Soram jussis
convenire, ipse ædem Victoriæ, quam ædilis curulis
ex multaticia pecunia faciendam curaverat, dedica-
vit. Ita ad exercitum profectus, ab Sora in Sam-
nium ad castra collegæ perrexit: inde postquam
Samnites, diffisi duobus exercitibus resisti posse,
recesserunt; diversi consules ad vastandos agros
urbesque obpugnandas discedunt.

Urbes
 Samniti-
 um captæ.

XXXIV. Postumius Milioniam obpugnare ador-
 tus, vi primo atque inpetu, dein, postquam ea pa-
 rum procedebant, opere ac vineis demum adjunctis
 muro cepit. Ibi, capta jam urbe, ab hora quarta
 usque ad octavam fere horam omnibus partibus ur-
 bis diu incerto eventu pugnatum est: postremo po-
 titur oppido Romanus. Samnitium cæsi tria millia
 ducenti: capti quatuor millia ducenti, præter præ-

dam aliam. Inde Ferentinum ductæ legiones : unde U. C. 458.
oppidani cum omnibus rebus suis, quæ ferri agique A. C. 294.
potuerunt, nocte per aversam portam silentio excesserunt. Igitur, simul advenit consul, primo ita compositus instructusque mœnibus successit, tamquam idem, quod ad Miloniam fuerat, certaminis foret : deinde, ut silentium vastum in urbe, nec arma, nec viros in turribus ac muris vidit, avidum invadendi deserta mœnia militem detinet, ne quam occultam in fraudem incautus rueret. Duas turmas sociorum Latini nominis circumequitare mœnia, atque explorare omnia jubet : equites portam unam alteramque eadem regione in propinquo patentes conspiciunt, itineribusque iis vestigia nocturnæ hostium fugæ. Adequitant deinde sensim portis, urbemque ex tuto rectis itineribus perviam conspiciunt : ad consulem referunt, excessum urbe ; solitudine haud dubia id perspicuum esse, et recentibus vestigiis fugæ, ac strage rerum in trepidatione nocturna passim relictarum. His auditis, consul ad eam partem urbis, qua adierant equites, circumducit agmen : constitutisque haud procul porta signis, quinque equites jubet intrare urbem, et, modicum spatium progressos, tres manere eodem loco, si tuta videntur ; duos explorata ad se referre. Qui ubi redierunt, retuleruntque, eo se progressos, unde in omnes partes circumspectus esset, longe lateque silentium ac solitudinem vidisse ; extemplo consul cohortes expeditas in urbem induxit ; ceteros interim castra communire jussit : ingressi milites, refractis foribus, paucos graves ætate aut invalidos inveniunt, relictæque, quæ migratu difficilia essent. Ea direpta ; et cognitum ex captivis est, communi consilio

U. C. 458. aliquot circa urbes conscisse fugam ; suos prima vi-
 A. C. 294. gilia profectos : credere, eandem in aliis urbibus so-
 litudinem inventuros. Dictis captivorum fides existi-
 tit : desertis oppidis consul potitur.

Bellum
 Atilio non
 facile.

XXXV. Alteri consuli M. Atilio nequaquam tam
 facile bellum fuit. Quum ad Luceriam duceret le-
 giones, quam obpugnari ab Samnitibus audierat, ad
 finem Lucerinum ei hostis obvius fuit : ibi ira vires
 æquavit. Prælium varium et anceps fuit : tristius
 tamen eventu Romanis ; et quia insueti erant vinci,
 et quia digredientes magis, quam in ipso certamine,
 senserunt, quantum in sua parte plus vulnerum ac
 cædis fuisset. Itaque is terror in castris ortus, qui
 si pugnantes cepisset, insignis accepta clades foret.
 Tum quoque sollicita nox fuit jam invasurum ca-
 stra Samnitum credentibus, aut prima luce cum
 victoribus conserendas manus. Minus cladis, cete-
 rum non plus animorum, ad hostes erat : ubi pri-
 mum inluxit, abire sine certamine cupiunt. Sed
 via una, et ea ipsa præter hostes, erat : qua ingres-
 si, præbuere speciem recta tendentium ad castra
 obpugnanda. Consul arma capere milites jubet, et
 sequi se extra vallum : legatis, tribunis, præfectis
 sociorum imperat, quod apud quemque facto opus
 est. Omnes adfirmant, *se quidem omnia facturos,*
sed militum jacere animos : tota nocte inter vulnera et
gemitus morientium vigilatum esse. Si ante lucem ad
castra ventum foret, tantum pavoris fuisse, ut relicturi
signa fuerint : nunc pudore a fuga contineri, alioquin
pro victis esse. Quæ ubi consul accepit, sibimet ipsi
 circumeundos adloquendosque milites ratus, ut ad
 quosque venerat, cunctantes arma capere increpa-
 bat ; *Quid cessarent, tergiversarenturque ? Hostem in*

castra venturum, nisi illi extra castra exissent: et pro U. C. 458.
tentoriis suis pugnatu-
ros, si pro vallo nollent: arma- A. C. 294.
tis ac dimicantibus dubiam victoriam esse. Qui nudus
atque inermis hostem maneat, ei aut mortem, aut ser-
vitutem patiendam. Hæc jurganti increpantique re-
spondebant: Confectos se pugna hesternæ esse: nec
virium quidquam, nec sanguinis superesse: majorem
multitudinem hostium adpurere, quam pridie fuerit.
Inter hæc adpropinquabat agmen: et, jam brevior
intervallo certiora intuentes, vallum secum portare
Samnitum adfirmant, nec dubium esse, quin castra
circumvallaturi sint. Tunc, enimvero, consul, in-
dignum facinus esse, vociferari, tantam contumeliam
ignominiamque ab ignavissimo accipi hoste. Etiamne
circumsedebimur, inquit, in castris, ut fame potius
per ignominiam, quam ferro, si necesse est, per virtu-
tem, moriamur? Dii bene verterent, facerentque, quod
se dignum quisque ducerent. Consulem M. Atilium vel
solum, si nemo alius sequatur, iturum adversus hostes:
casurumque inter signa Samnitium potius, quam cir-
cumvallari castra Romana videat. Dicta consulis le-
gati, tribuni, et omnes turmæ equitum, et cen-
turiones primorum ordinum, adprobavere. Tum pu-
dore victus miles segniter arma capit, segniter e ca-
stris egreditur: longo agminis, nec continenti, mœ-
sti ac prope victi procedunt adversus hostem, nec
spe, nec animo certiores. Itaque simul conspecta
sunt Romana signa, extemplo a primo Samnitium
agmine ad novissimum fremitus perfertur, Exire, id
quod timuerint, ad impediendum iter Romanos. Nul-
lam inde ne fugæ quidem potere viam: illo loco aut
cadendum esse, aut, stratis hostibus, per corpora eo-
rum evadendum.

U. C. 458. XXXVI. In medio sarcinas conjiciunt; armati
A. C. 294. suis quisque ordinibus instruunt aciem. Jam exiguum inter duas acies erat spatium, et stabant expectantes, dum ab hostibus prius inpetus, prius clamor inciperet: neutris animus est ad pugnandum. Diversique integri atque intacti abissent, ni cedenti instaturum alterum timuissent: sua sponte inter invitos tergiversantesque segnis pugna, clamore incerto atque inpari, cœpit: nec vestigio ququam movebatur. Tum consul Romanus, ut rem excitaret, equitum paucas turmas extra ordinem inmisit: quorum quum plerique delapsi ex equis essent, et alii turbati; et ab Samnitium acie ad obprimendos eos, qui ceciderant, et ad suos tuendos ab Romanis procursum est. Inde paullulum irritata pugna est, sed aliquanto et inpigre magis, et plures procurrerant Samnites: et turbatus eques sua ipse subsidia territis equis proculcavit: hinc fuga cœpta totam avertit aciem Romanam. Jamque in terga fugientium Samnites pugnabant, quum consul, equo prævectus ad portam castrorum, ac statione equitum ibi obposita, edictoque, *ut, quicumque ad vallum tenderet, sive ille Romanus, sive Samnis esset, pro hoste haberent*; hæc ipsa minitans, obstitit profuse tendentibus suis in castra. *Quo pergis, inquit, miles? et hic arma et viros invenies: nec, vivo consule tuo, nisi victor castra intrabis. Proinde elige, cum cive, an hoste, pugnare malis.* Hæc dicente consule, equites infestis cuspidibus circumfunduntur, ac peditem in pugnam redire jubent. Non virtus solum consulem, sed fors etiam adjuvit; quod non institerunt Samnites, spatiumque circumagendi signa, vertendique aciem a castris in hostem fuit. Tum

alii alios hortari, ut repeterent pugnam: centuriones ab signiferis rapta signa inferre: et ostendere suis, paucos et ordinibus incompositis effuse venire hostes. Inter hæc consul, manus ad cælum adtol-^{U. C. 458.}
lens, voce clara, ita ut exaudiretur, templum Jovi^{A. C. 294.}
Statori vovet, si constitisset a fuga Romana acies, redintegratoque prælio cecidisset vicissetque legiones Samnitium. Omnes undique adnisi ad restituendam pugnam, duces, milites, peditum equitumque vis: numen etiam Deorum respexisse nomen Romanum visum: adeo facile inclinata res, repulsique a castris hostes; mox etiam redacti ad eum locum, in quo commissa pugna erat. Ibi, obijacente sarcinarum cumulo, quas conjecerant in medium, hæserè inpediti: deinde, ne diriperentur res, orbem armorum sarcinis circumdant. Tum vero eos a fronte urgere pedites, ab tergo circumvecti equites: ita in medio cæsi captique. Captivorum numerus fuit septem millium ac ducentorum, qui omnes nudi sub jugum missi: cæsos retulere ad quatuor millia octingentos. Ne Romanis quidem læta victoria fuit: recensente consule biduo acceptam cladem, amissorum militum numerus relatus septem millium ac ducentorum. Dum hæc in Apulia gerebantur, altero exercitu Samnites Interamnam, coloniam Romanam, quæ via Latina est, occupare conati, urbem non tenuerunt: agros depopulati quum prædam aliam inde mixtam hominum atque pecudum, colonosque captos agerent, in victorem incidunt consulem, ab Luceria redeuntem: nec prædam solum amittunt, sed ipsi longo atque inpedito agmine incompositi cæduntur. Consul, Interamnam edicto dominis ad res suas noscendas recipiendasque re-

U. C. 458. vocatis, et exercitu ibi relicto, comitiorum caussa

A. C. 294. Romam est profectus. Cui de triumpho agenti negatus honos, et ob amissa tot millia militum, et quod captivos sine pactione sub jugum misisset.

Etruria a
Postumio
vastata.

XXXVII. Consul alter Postumius, quia in Samnitibus materia belli deerat, in Etruriam traducto exercitu, primum pervastaverat Volsiniensem agrum: dein cum egressis ad tuendos fines haud procul mœnibus ipsorum depugnat: duo millia octingenti Etruscorum cæsi: ceteros propinquitas urbis tutata est. In Rusellanum agrum exercitus traductus: ibi non agri tantum vastati, sed oppidum etiam expugnatum: capta amplius duo millia hominum, minus duo millia circa muros cæsa. Pax tamen clarior majorque, quam bellum in Etruria eo anno fuerat, parta est. Tres validissimæ urbes, Etruriæ capita, Volsinii, Perusia, Arretium, pacem petiere; et, vestimentis militum frumentoque pacti cum consule, ut mitti Romam oratores liceret, inducias in quadraginta annos inpetraverunt: multa præsens quingentûm millium æris in singulas civitates inposita. Ob hasce res gestas, consul quum triumphum ab senatu, moris magis caussa, quam spe inpetrandi, petisset, videretque alios, quod tardius ab urbe exisset; alios, quod injussu senatus ex Samnio in Etruriam transisset, partim suos inimicos, partim collegæ amicos, ad solatium æquatae repulsæ sibi quoque negare triumphum: *Non ita, inquit, Patres conscripti, vestræ majestatis meminero, ut me consulem esse obliviscar: eodem jure imperii, quo bella gessi, bellis feliciter gēstis, Samnio atque Etruria subactis, victoria et pace parta, triumphabo.* Ita senatum reliquit. Inde inter tribunos plebis contentio orta

pars intercessuros, ne novo exemplo triumpharet, U. C. 458. A. C. 294.
 aiebant; pars auxilio se adversus collegas triumphanti futuros. Jactata res ad populum est: vocatusque eo consul, quum M. Horatium, L. Valerium consules, C. Martium Rutilum nuper, patrem ejus, qui tunc censor esset, non ex auctoritate senatus sed jussu populi triumphasse diceret; adjiciebat, *se quoque laturum fuisse ad populum, ni sciret, mancipia nobilium tribunos plebis legem inpedituros: voluntatem sibi ac favorem consentientis populi pro omnibus jussis esse, ac futura.* Posteroque die auxilio tribunorum plebis trium, adversus intercessionem septem Postumius triumphat senatu adversante.
 tribunorum et consensum senatus, celebrante populo diem, triumphavit. Et hujus anni parum constans memoria est. Postumium, auctor est Claudius, in Samnio captis aliquot urbibus, in Apulia fusum fugatumque, saucium ipsum cum paucis Luceriam compulsum: ab Atilio in Etruria res gestas, eumque triumphasse. Fabius, ambo consules in Samnio et ad Luceriam res gessisse, scribit, traductumque in Etruriam exercitum, (sed ab utro consule non adjecit) et ad Luceriam utrimque multos occisos, inque ea pugna Jovis Statoris ædem votam, ut Romulus ante voverat: sed fanum tantum, id est locus, templo effatus, sacratus fuerat. Ceterum, hoc demum anno ut ædem etiam fieri senatus juberet, bis ejusdem voti damnata respublica in religionem venit.

XXXVIII. Sequitur hunc annum et consul insignis L. Papirius Cursor, qua paterna gloria, qua U. C. 459. A. C. 293.
 sua, et bellum ingens victoriaque, quantam de Samnitibus nemo ad eam diem, præter L. Papirium patrem consulis, pepererat: et forte eodem conatu

U. C. 459. adparatuque omni opulentia insignium armorum
 A. C. 293. bellum adornaverant: et Deorum etiam adhibuerant opes, ritu quodam sacramenti vetusto velut initiatis militibus, delectu per omne Samnium habito nova lege: ut, qui juniorum non convenisset ad imperatorium edictum, quique injussu abisset, caput Jovi sacratum esset. Tum exercitus omnis Aquiloniam est indictus: ad quadraginta millia militum, quod roboris in Samnio erat, convenerunt. Ibi mediis fere castris locus est conseptus cratibus pluteisque, et linteis contectus, patens ducentos maxime pedes in omnes pariter partes. Ibi ex libro vetere linteo lecto sacrificatum, sacerdote Ovio Pactio quodam, homine magno natu, qui se id sacrum petere adfirmabat ex vetusta Samnitium religione; qua quondam usi majores eorum fuissent, quum adimendæ Etruscis Capuæ clandestinum cepissent consilium. Sacrificio perfecto, per viatorem imperator adciri jubebat nobilissimum quemque genere factisque: singuli introducebantur. Erat quum alius adparatus sacri, qui perfundere religione animum posset; tum in loco circa omni contecto aræ in medio, victimæque circa cæsæ, et circumstantes centuriones strictis gladiis. Admovebatur altaribus miles, magis ut victima, quam ut sacri particeps: adigebaturque jurejurando, quæ visa auditaque in eo loco essent, non enunciaturum. Dein jurare cogebatur diro quodam carmine, in execrationem capitis familiæque et stirpis composito, nisi isset in prælium, quo imperatores duxissent: et si aut ipse ex acie fugisset, aut, si quem fugientem vidisset, non extemplo occidisset. Id primo quidam abnuentes juraturos se, obtruncati circa altaria sunt:

Sacramento ad-
 igitur
 milites
 Samni-
 tium hor-
 rendo
 quodam
 ritu.

jacentes deinde inter stragem victimarum documento U. C. 459.
A. C. 293.
 ceteris fuere, ne abnuerent. Primoribus Samnitium
 ea detestatione obstrictis, decem nominatis ab im-
 peratore, eis dictum, ut vir virum legerent, donec
 sexdecim millium numerum confecissent: ea legio
 linteata ab integumento consepti, quo sacrata no-
 bilitas erat, adpellata est. His arma insignia data,
 et cristatæ galeæ, ut inter ceteros emerent. Paul-
 lo plus viginti millium alius exercitus fuit, nec cor-
 porum specie, nec gloria belli, nec adparatu linte-
 atæ legioni dispar: hic hominum numerus, quod
 roboris erat, ad Aquiloniam consedit.

XXXIX. Consules profecti ab urbe: prior Sp. Samnium
vasant
coss.
 Carvilius, cui veteres legiones, quas M. Atilius, su-
 prioris anni consul, in agro Interamnati relique-
 rat, decretæ erant, cum eis in Samnium profectus,
 dum hostes, operati superstitionibus, concilia se-
 creta agunt, Amiternum oppidum de Samnitibus vi-
 cepit. Cæsa ibi millia hominum duo ferme atque
 octingenti: capta quatuor millia ducenti septua-
 ginta. Papirius novo exercitu (ita decretum erat)
 scripto, Duroniam urbem expugnavit: minus, quam
 collega, cepit hominum, plus aliquanto occidit:
 præda opulenta utrobique est parta. Inde perva-
 gati Samnium consules, maxime depopulato Atinate
 agro, Carvilius ad Cominium, Papirius ad Aquilo-
 niam (ubi summa rei Samnitium erat) pervenit:
 ibi aliquamdiu nec cessatum ab armis est, neque
 naviter pugnatum: lacessendo quietos, resistenti-
 bus cedendo, comminandoque magis, quam infe-
 rendo pugnam, dies absumebatur: quod quum in-
 ciperetur, remittereturque, omnium rerum etiam

U. C. 459. parvarum eventus proferebatur in dies. Altera Ro-
 A. C. 293. mana castra viginti millium spatio aberant: et ab-
 sentis collegæ consilia omnibus gerendis intererant
 rebus: intentiorque Carvilius, quo majore discrimi-
 ne res vertebatur, in Aquiloniam, quam ad Co-
 minium, quod obsidebat, erat. L. Papirius, jam
 per omnia ad dimicandum satis paratus, nuncium
 ad collegam mittit; *sibi in animo esse, postero die, si
 per auspicia liceret, confluere cum hoste. Opus esse,
 et illum, quanta maxima vi posset, Cominium obpug-
 nare, ne quid laxamenti sit Samnitibus ad subsidia
 Aquiloniam mittenda. Diem ad proficiscendum nun-
 cius habuit: nocte rediit, adprobare collegam con-
 sulta referens. Papirius, nuncio misso, extemplo
 concionem habuit; multa de universo genere belli,
 multa de præsentī hostiū adparatu, vana magis
 specie, quam efficaci ad eventum, disseruit. Non
 enim cristas vulnera facere; et per picta atque aurata
 scuta transire Romanum pilum: et candore tunicarum
 fulgentem aciem, ubi res ferro geratur, cruentari.
 Auream olim atque argenteam Samnitium aciem a pa-
 rente suo occisione occisam: spoliaque ea honestiora
 victori hosti, quam ipsis arma, fuisse. Datum hoc
 forsā nomini familiæque suæ, ut adversus maximos
 conatus Samnitium obponerentur duces; spoliaque ea
 referrent, quæ insignia publicis etiam locis decorandis
 essent. Deos immortales adesse propter toties petita
 fœdera, toties rupta: tum, si qua conjectura mentis
 divinæ sit, nulli unquam exercitui fuisse infestiores,
 quam qui, nefando sacro mixta hominum pecudumque
 cæde respersus, incipiti Deum iræ devotus, hinc fœ-
 derum cum Romanis ictorum testes Deos, hinc juris-*

Papirius
 milites
 hortatur.

*jurandi adversus fœdera suscepti exsecrationes horrens, U.C. 459.
 invitus juraverit, oderit sacramentum, uno tempore A.C. 293.
 Deos, cives, hostes metuat.*

XL. Hæc, comperta perfugarum indiciis, quum apud infensos jam sua sponte milites disseruisset, simul divinæ humanæque spei pleni, clamore consentienti pugnam poscunt; pœnitet in posterum diem dilatum certamen; moram diei noctisque ode-runt. Tertia vigilia noctis, jam relatis literis a col-lega, Papirius silentio surgit, et pullarium in auspi-cium mittit. Nullum erat genus hominum in castris intactum cupiditate pugnæ: summi infimique æque intenti erant: dux militum, miles ducis ardorem spectabat. Is ardor omnium etiam ad eos, qui au-spicio intererant, pervenit: nam, quum pulli non pascerentur, pullarius, auspicium mentiri ausus, tri-Auspicium mentitur pullarius. pudium solistimum consuli nunciavit. Consul lætus auspicium egregium esse, et Deis auctoribus rem gesturos, pronunciat; signumque pugnæ proponit. Exeunti jam forte in aciem nunciat perfuga, viginti cohortes Samnitium (quadringenariæ ferme erant) Cominium profectas, quod ne ignoraret collega, ex-temple nuncium mittit: ipse signa ocus proferri jubet, subsidiaque suis quæque locis, et præfectos subsidiis adtribuerat. Dextro cornu L. Volumnium, sinistro L. Scipionem, equitibus legatos alios, Caios Cædicium et Trebonium, præfecit. Sp. Nautium mu-los, detractis elitellis, cum cohortibus alariis in tu-mulum conspectum propere circumducere jubet, at-que inde inter ipsam dimicationem, quanto maxime posset, moto pulvere ostendere. Dum his intentus imperator erat, altercatio inter pullarios orta de auspicio ejus diei, exauditaque ab equitibus Roma-

U. C. 459. nis : qui, rem haud spernendam rati, Sp. Papirio
 A. C. 298. fratris filio consulis, ambigi de auspicio, renun-
 ciaverunt. Juvenis, ante doctrinam Deos spernentem
 natus, rem inquisitam, ne quid incompertum defer-
 ret ad consulem, detulit. Cui ille, *Tu quidem macte*
virtute diligentiaque esto : ceterum qui auspicio adest,
si quid falsi nunciat, in semet ipsum religionem recipit.
Mihi quidem tripudium nunciatum, populo Romano
exercituique egregium auspiciū est. Centurionibus
 deinde imperavit, ut pullarios inter prima signa
 constituerent. Promovent et Samnites signa ; in-
 sequitur acies ornata armataque, ut hostium quo-
 que magnificum spectaculum esset. Priusquam cla-
 mor tolleretur, concurrereturque, emissio temere pi-
 lo ictus pullarius ante signa cecidit : quod ubi con-
 suli nunciatum est, *Dii in prælio sunt,* inquit ; *habet*
pœnam noxium caput. Ante consulem hæc dicentem
 corvus voce clara occinuit : quo lætus augurio con-
 sul, adfirmans numquam humanis rebus magis præ-
 sentes interfuisse Deos, signa canere, et clamorem
 tolli jussit.

Isque
 ictus pilo
 cadit.

XLI. Prælium commissum atrox, ceterum longe
 disparibus animis. Romanos ira, spes, ardor certa-
 minis, avidos hostium sanguinis in prælium rapit :
 Samnitium magnam partem necessitas ac religio in-
 vitos magis resistere, quam inferre pugnam, cogit :
 nec sustinuissent primum clamorem atque inpetum
 Romanorum, per aliquot jam annos vinci adsueti,
 ni potentior alius metus insidens pectoribus a fuga
 retineret. Quippe in oculis erat omnis ille occulti
 paratus sacri, et armati sacerdotes, et promiscua
 hominum pecudumque strages, et respersæ fando
 nefandoque sanguine aræ, et dira exsecratio, ac

furiale carmen, detestandæ familiæ stirpique com- U. C. 459.
positum : his vinculis fugæ obstricti stabant, civem A. C. 293.
magis, quam hostem, timentes. Instare Romanus
a cornu utroque, a media acie, et cædere Deorum
hominumque adtonitos metu : repugnatur segniter,
ut ab iis, quos timor moraretur a fuga. Jam prope
ad signa cædes pervenerat, quum ex transverso pul-
vis, velut ingentis agminis incessu motus, adparuit.
Sp. Nautius (Octavium Metium quidam eum tra-
dunt) dux alaribus cohortibus erat : pulverem ma-
jorem, quam pro numero, excitabant : insidentes
mulis calones frondosos ramos per terram trahe-
bant : arma signaque per turbidam lucem in primo
adparebant : post altior densiorque pulvis equitum
speciem cogentium agmen dabat. Fefellitque non
Samnites modo, sed etiam Romanos : et consul ad-
firmavit errorem, clamitans inter prima signa, ita ut
vox etiam ad hostes accideret, *captum Cominium, vic-
torem collegam adesse ; adniterentur vincere prius,
quam gloria alterius exercitus fieret.* Hæc insidens
equo : inde tribunis centurionibusque imperat, ut
viam equitibus patefacian. Ipse Trebonio Cædi-
cioque prædixerat, ut, ubi se cuspidem erectam
quatientem vidissent, quanta maxima vi possent,
concitarent equites in hostem. Ad natum omnia,
ut ex ante præparato, fiunt : panduntur inter ordi-
nes viæ : provolat eques, atque infestis cuspidibus
in mediam agmen hostium ruit : perrumpitque or-
dines, quacumque inpetem dedit : instant Volum-
nius et Scipio, et perculos sternunt. Tum, jam Victi Sam-
Deorum hominumque victa vi, funduntur linteatæ nites.
cohortes : pariter jurati injuratique fugiunt, nec
quemquam, præter hostes, metuunt. Peditum ag-

U. C. 459. men, quod superfuit pugnae, in castra ad Aquiloniam
 A. C. 293. compulsum est : nobilitas equitesque Bovianum per-
 fugerunt : equites eques sequitur, peditem pedes : ac
 diversa cornua, dextrum ad castra Samnitium, læ-
 vum ad urbem tendit. Prior aliquanto Volumnius
 castra cepit : ad urbem Scipioni majore resistitur
 vi ; non quia plus animi victis est, sed melius muri,
 quam vallum, armatos arcent : inde lapidibus pro-
 pulsant hostem. Scipio, nisi in primo pavore, pri-
 usquam conligerentur animi, transacta res esset,
 lentio rem fore munitæ urbis obpugnationem ratus,
 interrogat milites, *Satin' æquo animo paterentur, ab*
altero cornu castra capta esse : se victores pelli a por-
tis urbis ? Reclamantibus universis, primus ipse,
 scuto super caput elato, pergit ad portam : secuti
 alii, testudine facta, in urbem perrumpunt : detur-
 batisque Samnitibus, qui circa portam erant, muros
 occupavere : penetrare in interiora urbis, quia pauci
 admodum erant, non audent.

XLII. Hæc primo ignorare consul, et intentus
 recipiendo exercitui esse : jam enim præceps in oc-
 casum sol erat, et adpetens nox periculosa et sus-
 pecta omnia etiam victoribus faciebat. Progres-
 sus longius ab dextra castra capta videt : ab læva
 clamorem in urbe mixtum pugnantium ac paventium
 fremitu esse : et tum forte certamen ad portam erat.
 Advectus deinde equo propius, ut suos in muris vi-
 det, nec jam integri quidquam esse, quoniam teme-
 ritate paucorum magnæ rei parta occasio esset, ad-
 ciri, quas receperat, copias, signaque in urbem in-
 ferri jussit. Ingressi proxima ex parte, quia nox
 adpropinquabat, quievire : nocte oppidum ab ho-
 stibus desertum est. Cæsa illo die ad Aquiloniam

Samnitium millia triginta trecenti quadraginta : cap- U. C. 459.
 ta tria millia octingenti et septuaginta : signa mili- A. C. 293.
 taria nonaginta septem. Ceterum illud memoriæ tra-
 ditur, non ferme alium ducem lætiorem in acie vi-
 sum, seu suopte ingenio, seu fiducia bene gerundæ
 rei. Ab eodem robore animi neque controverso au-
 spicio revocari a prælio potuit ; et in ipso discrimi-
 ne, quo templa Diis immortalibus voveri mos erat,
 voverat Jovi Victori, si legiones hostium fudisset,
 pocillum mulsi prius, quam temetum biberet, sese
 facturum : id votum Diis cordi fuit : et auspicia in
 bonum verterunt. Pocillum
mulsi vo-
tum Jovi.

XLIII. Eadem fortuna ab altero consule ad Co-
 minium gesta res. Prima luce, ad mœnia omnibus
 copiis admotis, corona cinxit urbem ; subsidiaque
 firma, ne qua eruptio fieret, portis obposuit. Jam
 signum dantem eum nuncius a collega trepidus de
 viginti cohortium adventu et ab inpetu moratus est,
 et partem copiarum revocare instructam intentam-
 que ad obpugnandum coëgit. D. Brutum Scævam
 legatum cum legione prima et decem cohortibus
 alariis equitatuque ire adversus subsidium hostium
 jussit : quocumque in loco fuisset obvius, obsisteret
 ac moraretur ; manumque, si forte ita res posceret,
 conferret : modo ne ad Cominium eæ copię admo- Cominium
a Carvilio
captum.
 veri possent. Ipse scalas ferri ad muros ab omni
 parte urbis jussit, ac testudine ad portas successit :
 simul et refringebantur portæ, et vis undique in mu-
 ros fiebat. Samnites, sicut, antequam in muris vi-
 derent armatos, satis animi habuerunt ad prohiben-
 dos urbis aditu hostes ; ita, postquam jam non ex
 intervallo nec missilibus, sed cominus gerebatur res ;
 et, qui ægre successerant ex plano in muros, loco,

U. C. 459. quem magis timuerant, victo, facile in hostem in-
 A. C. 295. parem ex æquo pugnabant; relictis turribus murisque, in forum omnes compulsi, paullisper inde tentaverunt extremam pugnae fortunam. Deinde, abjectis armis, ad undecim millia hominum et quadringenti in fidem consulis venerunt: cæsa ad quatuor millia trecenti octoginta. Sic ad Cominium, sic ad Aquiloniam gesta res. Inde medio inter duas urbes spatio, ubi tertia exspectata erat pugna, hostes non inventi: septem millia passuum quum abessent a Cominio, revocati ab suis neutri prælio obcurrerunt. Primis ferme tenebris quum in conspectu jam castra, jam Aquiloniam habuissent, clamor eos utrimque par accidens sustinuit: deinde e regione castrorum, quæ incensa ab Romanis erant, flamma late fusa certioris cladis indicio progredi longius prohibuit. Eo ipso loco prope temere sub armis strati passim inquietum omne tempus noctis, exspectando timendoque lucem, egere: prima luce, incerti quam in partem intenderent iter, repente in fugam consternantur, conspecti ab equitibus: qui, egressos nocte ab oppido Samnites persecuti, viderant multitudinem, non vallo, non stationibus firmatam. Conspecta et ex muris Aquiloniæ ea multitudo erat: jamque etiam legionariæ cohortes sequebantur. Ceterum nec pedes fugientes persequi potuit: et ab equite novissimi agminis ducenti ferme et octoginta interfecti. Arma multa pavidi ac signa militaria duodeviginti reliquere: alio agmine incolumi, ut ex tanta trepidatione, Bovianum perventum est.

XLIV. Lætitiam utriusque exercitus Romani auxit et ab altera parte feliciter gesta res: uterque

ex alterius sententia consul captum oppidum diripiendum militi dedit; exhaustis deinde tectis ignem iniecit: eodemque die Aquilonia et Cominium deflagraverunt: et consules, cum gratulatione mutua legionum suarum, castra conjungere. In conspectu duorum exercituum et Carvilius suos pro cuiusque merito laudavit donavitque; et Papirius, apud quem multiplex in acie, circa castra, circa urbem, fuerat certamen, Sp. Nautium, Sp. Papirium, fratris filium, et quatuor centuriones, manipulumque hastatorum, armillis aureisque coronis donavit: Nautium propter expeditionem, qua magni agminis modo terruerat hostes: juvenem Papirium propter navatam cum equitatu et in proelio operam, et nocte, qua fugam infestam Samnitibus ab Aquilonia clam egressis fecit: centuriones militesque, quia primi portam murumque Aquiloniæ ceperant: equites omnes, ob insignem multis locis operam, corniculis armillisque argenteis donat. Consilium inde habitum, quum jam tempus esset deducendi ab Samnio exercitus, aut utriusque, aut certe alterius. Optimum visum, quo magis fractæ res Samnitium essent, eo pertinacius et infestius agere cetera et persequi: ut perdomitum Samnium insequentibus consulibus tradi posset. Quando jam nullus esset hostium exercitus, qui signis conlatis dimicaturus videretur, unum superesse belli genus, urbium obpugnationes; quarum per excidia militem locupletare præda, et hostem pro aris ac focis dimicantem conficere possent. Itaque, literis missis ad senatum populumque Romanum de rebus ab se gestis, diversi, Papirius ad Sæpinum, Carvilius ad Volaniam obpugnandam legiones ducunt.

U. C. 459.

A. C. 293.

U. C. 459.
A. C. 293.

Etrusco-
rum re-
bellio.

XLV. Literæ consulum ingenti lætitia et in curia et in concione auditæ; et quadridui supplicatione publicum gaudium privatis studiis celebratum est: nec populo Romano magna solum, sed peropportuna etiam, ea victoria fuit; quia per idem forte tempus rebellasse Etruscos adlatum est. Subibat cogitatio animum, quonam modo tolerabilis futura Etruria fuisset, si quid in Samnio adversi venisset; quæ, conjuratione Samnitium erecta, quoniam ambo consules omnisque Romana vis aversa in Samnium esset, occupationem populi Romani pro occasione rebellandi habuisset. Legationes sociorum, a M. Atilio prætore in senatum introductæ, querebantur, uri et vastari agros a finitimis Etruscis, quod desciscere a populo Romano nollent: obtestabanturque Patres conscriptos, ut se a vi atque injuria communium hostium tutarentur. Responsum legatis, *curæ senatui futurum, ne socios fidei suæ pæniteret: Etruscorum prope diem eamdem fortunam, quam Samnitium, fore.* Segnius tamen quod ad Etruriam adtinebat, acta res esset, ni Faliscos quoque, qui per multos annos in amicitia fuerant, adlatum foret, arma Etruscis junxisse. Hujus propinquitas populi acuit curam Patribus, ut feciales mittendos ad res repetendas censerent: quibus non redditis, ex auctoritate Patrum jussu populi bellum Faliscis indictum est: jussique consules sortiri, uter ex Samnio in Etruriam cum exercitu transiret. Jam Carvilius Volanam, et Palumbinum, et Herculanum ex Samnitibus ceperat: Volanam intra paucos dies, Palumbinum eodem, quo ad nueros accessit. Ad Herculanum bis etiam signis conlatis ancipiti prælio, et cum majore sua, quam hostium, jactura dimicavit.

Castris deinde positis, mœnibus hostem inclusit. U. C. 459.
 •bpugnatum oppidum captumque. In his tribus ur- A. C. 293.
 bibus capta aut cæsa ad decem millia hominum : ita
 ut parvo admodum plures caperentur. Sortientibus
 provincias consulibus, Etruria Carvilio evenit secun-
 dum vota militum, qui vim frigoris jam in Samnio
 non patiebantur. Papirio ad Sæpinum major vis ho-
 stium restitit : sæpe in acie, sæpe in agmine, sæpe
 circa ipsam urbem adversus eruptiones hostium
 pugnatum : neque obsidio, neque bellum ex æquo
 erat : non enim muris magis se Samnites, quam
 armis ac viris mœnia, tutabantur. Tandem pug-
 nando in obsidionem justam coëgit hostes : obsi-
 dendoque vi atque operibus urbem expugnavit : ita-
 que ab ira plus cædis editum, capta urbe : septem
 millia quadringenti cæsi : capta minus tria millia
 hominum : præda, quæ plurima fuit, congestis Sam-
 nitium rebus in urbes paucas, militi concessa est.

XLVI. Nives jam omnia oppleverant, nec du- Papirii tri-
 rari extra tecta poterat ; itaque consul exercitum de- umphus.
 Samnio deduxit. Venienti Romam triumphus om-
 nium consensu est delatus : triumphavit in magi-
 stratu, insigni, ut illorum temporum habitus erat,
 triumpho. Pedites equitesque insignes donis trans-
 iere, ac transvecti sunt : multæ civicæ coronæ, val-
 laresque, ac murales conspectæ. Inspectata spolia
 Samnitium : et decore ac pulchritudine paternis
 spoliis, quæ nota frequenti publicorum ornatu lo-
 corum erant, comparabantur : nobiles aliquot cap-
 tivi, clari suis patrumque factis, ducti. Æris gravis
 transvecta vicies centena et ad triginta tria millia :
 id æs redactum ex captivis dicebatur : argenti, quod
 captum ex urbibus erat, pondo millia trecenta tri-

U. C. 459. ginta : omne æs argentumque in ærarium conditum.

A. C. 293. Militibus nihil datum ex præda est : auctaque ea invidia est ad plebem, quod tributum etiam in stipendium militum conlatum est : quum, si spreta gloria fuisset captivæ pecuniæ in ærarium inlatæ, et militum dari ex præda, et stipendium militare præstari potuisset. Ædem Quirini, quam in ipsa dimicatione votam apud neminem veterem auctorem invenio, (neque, Hercule, tam exiguo tempore perficere potuisset) ab dictatore patre votam, filius consul dedicavit, exornavitque hostium spoliis : quorum tanta multitudo fuit, ut non templum tantum forumque his ornaretur ; sed sociis etiam colonisque finitimis, ad templorum locorumque publicorum ornatum, dividerentur. A triumpho exercitum in agrum Vescinum, quia regio ea infesta ab Samnitibus erat, hibernatum duxit. Inter hæc Carvilius consul, in Etruria Troilium primum obpugnare adortus, quadringentos septuaginta ditissimos, pecunia grandi pactos, ut abire inde liceret, dimisit : ceteram multitudinem oppidumque ipsum vi cepit : inde quinque castella, locis sita munitis, expugnavit. Cæsa ibi hostium duo millia quadringenti ; minus duo millia capti. Et Faliscis pacem petentibus annuas inducias dedit, pactus centum millia gravis æris, et stipendium ejus anni militibus. His rebus actis ad triumphum decessit, ut minus clarum de Samnitibus, quam collegæ triumphus fuerat, ita cumulo Etrusci belli æquatum. Æris gravis tulit in ærarium trecenta octoginta millia : de reliquo ære ædem Fortis Fortunæ de manubiis faciendam locavit, prope ædem ejus Deæ ab rege Ser. Tullio dedicatam : et militibus ex præda centenos binos asses, et alterum

Carvillii
trium-
phus.

tantum centurionibus atque equitibus (malignitate collegæ gratius accipientibus munus) divisit. Favor consulis tutatus ad populum est L. Postumium legatum ejus: qui dicta die a M. Cantio tribuno plebis, fugerat in legationem (ut fama ferebat) populi judicium: jactarique magis, quam peragi, accusatio ejus poterat.

XLVII. Exacto jam anno, novi tribuni plebis magistratum inierant: iisque ipsis, quia vitio creati erant, quinque post dies alii subfecti. Lustrum conditum eo anno est a P. Cornelio Arvina, C. Marcio Rutilo, censoribus: censa capitum millia ducenta sexaginta duo trecenta viginti duo. Censores vicesimi sexti a primis censoribus; lustrum undevicesimum fuit. Eodem anno coronati primum, ob res bello bene gestas, ludos Romanos spectaverunt: palmæque tum primum, translato e Græcia more, victoribus datæ. Eodem anno ab ædilibus curulibus, qui eos ludos fecerunt, damnatis aliquot pecuariis, via a Martis silice ad Bovillas perstrata est. Comitia consularia L. Papirius habuit: creavit consules Q. Fabium Maximi filium Gurgitem et D. Junium Brutum Scævam: ipse Papirius prætor factus. Multis rebus lætus annus vix ad solatium unius mali, pestilentiae urentis simul urbem atque agros, subfecit; portentoque jam similis clades erat: et libri aditi, quinam finis, aut quod remedium ejus mali ab Diis daretur. Inventum in libris, Æsculapium ab Epidauro Romanam arcessendum: neque eo anno, quia bello occupati consules erant, quidquam de ea re actum: præterquam quod unum diem Æsculapio supplicatio habita est.

U. C. 459.
A. C. 293.

Lustrum
conditum

Pestilentia.

EPITOME LIBRI XI.

QUUM Fabius Gurgēs consul male adversus Samnites pugnasset, et senatus de removendo eo ab exercitu ageret, Fabius Maximus pater, deprecatus hanc filii ignominiam, eo maxime senatum movit, quod iturum se filio legatum pollicitus est, idque præstitit: ejus consiliis et opera filius consul adjutus, cæsis Samnitibus, triumphavit. C. Pontium, imperatorem Samnitium, ductum in triumpho securi percussit. Quum civitas pestilentia laboraret, missi legati, ut Æsculapii signum Romam ab Epidauro transferrent, anguem, qui se in nucem eorum contulerat, in quo ipsum numen esse constabat, deportavere: eoque in insulam Tiberis egresso, eodem loco ædes Æsculapio consecrata est. L. Postumius consularis, quoniam, quum exercitui præesset, opera militum in agro suo usus erat, damnatus est. Cum Samnitibus pacem petentibus fœdus quarto renovatum est. Curius Dentatus consul, Samnitibus cæsis, et Sabinis, qui rebellaverant, victis, et in deditionem acceptis, bis in eodem magistratu triumphavit. Coloniae deductæ sunt, Castrum, Sena, Hadria. Triumviri capitales tunc primum creati sunt. Censu acto, lustrum conditum est: censa sunt civium capita ducenta septuaginta duo millia. Plebs propter æs alienum, post graves et longas seditiones, ad ultimum se-

cessit in Janiculum: unde a Q. Hortensio dictatore deducta est, isque in ipso magistratu decessit. Res præterea contra Volsinienses gestas continet: item adversus Lucanos, contra quos auxilium Thurinis ferre placuerat.

EPITOME LIBRI XII.

QUUM legati Romanorum a Gallis Senonibus interfecti essent, bello ob id Gallis indicto, L. Cæcilius prætor cum legionibus ab iis cæsus est. Quum a Tarentinis classis Romana direpta esset, duumviro, qui præerat classi, occiso, legati, ad eos a senatu, ut de iis injuriis quererentur, missi, pulsati sunt : ob id, bellum iis indictum est. Samnites defecerunt. Adversus eos, et Lucanos, et Bruttios, et Etruscos aliquot præliis a compluribus ducibus bene pugnatum est. Pyrrhus Epirotarum rex, ut auxilium ferret Tarentinis, in Italiam venit. Quum in præsidium Rheginorum legio Campana cum præfecto Decio Jubellio missa esset, occisis Rheginis Rhegium occupavit.

EPITOME LIBRI XIII.

VALERIUS Lævinus consul parum prospere adversus Pyrrhum pugnavit, elephantorum maxime inusitata facie territis militibus. Post id prælium cum corpora Romanorum, qui in acie ceciderant, Pyrrhus inspiceret, omnia versa in hostem invenit, populabundusque ad urbem Romam processit. C. Fabricius, missus ad eum a senatu, ut de redimendis captivis ageret, frustra, ut patriam desereret, a rege tentatus est: captivi sine pretio remissi sunt. Cineas, legatus a Pyrrho ad senatum missus, petiit, ut componendæ pacis causa rex in urbem reciperetur: de qua re quum ad frequentiores senatum referri placuisset, Ap. Claudius, qui propter valetudinem oculorum jamdiu consiliis publicis se abstinuerat, venit in curiam, et sententia sua tenuit, ut id Pyrrho negaretur. Cn. Domitius censor primus ex plebe lustrum condidit: censa sunt civium capita ducenta septuaginta octo millia, ducenta viginti duo. Iterum adversus Pyrrhum dubio eventu pugnatum est. Cum Karthaginiensibus quartum fœdus renovatum est. Quum C. Fabricio consuli is, qui ad eum a Pyrrho transfugerat, polliceretur, se regi venenum daturum, cum indicio ad regem remissus est. Res præterea contra Etruscos, Lucanos, Bruttios, et Samnites prospere gestas continet.

EPITOME LIBRI XIV.

PYRRHUS in Siciliam trajecit. Quum inter alia prodigia fulmine dejectum esset in Capitolio Jovis signum, caput ejus per aruspices inventum est. Curius Dentatus, quum delectum haberet, ejus, qui citatus non responderat, bona primus vendidit. Pyrrhum iterum ex Sicilia in Italiam reversum vicit, et Italia expulit. Fabricius censor P. Corneliū Rufinum consularem senatu movit, quod is decem pondo argenti facti haberet. Lustrum a censoribus condito, censa sunt capita civium ducenta septuaginta unum millia, ducenta viginti quatuor. Cum Ptolomæo Ægypti rege societas juncta est. Sextilia virgo Vestalis, damnata incesti, viva defossa est. Colonia deductæ sunt Posidonia et Cosa. Karthaginensium classis auxilio Tarentinis venit: quo facto ab iis fœdus violatum est. Res præterea contra Lucanos, Samnites, et Bruttios feliciter gestas, et Pyrrhi regis mortem continet.

EPITOME LIBRI XV.

*V*ICTIS Tarentinis pax et libertas data est. Legio Campana, quæ Rhegium occupaverat, obsessa, deditione facta, securi percussa est. Quum legatos Apolloniatium ad senatum missos quidam juvenes pulsassent, dediti sunt Apolloniatibus. Picentibus victis pax data est: coloniæ deductæ, Ariminum in Piceno, Beneventum in Samnio. Tunc primum populus Romanus argento uti cæpit. Umbri et Sallentini victi in deditionem accepti sunt. Quæstorum numerus ampliatus est, ut essent octo.

EPITOME LIBRI XVI.

ORIGO *Karthaginiensium et primordia urbis eorum referuntur; contra quos et Hieronem regem Syracusanorum auxilium Mamertinis ferendum censuit senatus, quum de ea re inter suadentes, ut id fieret, dissuadentesque contentio fuisset. Transgressis tum primum mare equitibus Romanis, adversus Hieronem sapius bene pugnatum. Petenti pax data est. Lustrum a censoribus conditum est: censa sunt civium capita ducenta octoginta duo millia, ducenta triginta quatuor. D. Junius Brutus munus gladiatorium in honorem defuncti patris dedit primus. Colonia Æsernia deducta est. Res præterea contra Pænos et Vulsinios prospere gestas continet.*

EPITOME LIBRI XVII.

CN. Cornelius consul, a classe Punica circumventus, et per fraudem velut in conloquium evocatus, captus est. C. Duilius consul adversus classem Pænorum prospere pugnavit, primusque omnium Romanorum ducum navalis victoriæ duxit triumphum: ob quam causam ei perpetuus honos habitus est, ut revertenti a cæna, tibicine canente, funale præferretur. L. Cornelius consul in Sardinia et Corsica contra Sardos, et Corsos, et Hannonem Pænorum ducem feliciter pugnavit. Atilius Calatinus consul, quum in locum iniquum, a Pænis circumsessum, temere duxisset exercitum, M. Calpurnii tribuni militum virtute et opera evasit: qui, cum trecentis militibus eruptione facta, hostes in se converterat. Hannibal dux Pænorum, victa classe, cui præfuerat, a militibus suis in crucem sublatus est. Atilius Regulus consul, victis navali prælio Pænis, in Africam trajecit.

EPITOME LIBRI XVIII.

ATILIUS Regulus in Africa serpentem portentosa magnitudinis cum magna militum clade occidit, et, quum aliquot praeliis bene adversus Karthaginienses pugnasset, successorque ei a senatu prospere bellum gerenti non mitteretur, id ipsum per literas ad senatum missas questus est: in quibus inter causas petendi successoris erat, quod agellus ejus a mercenariis desertus esset. Quærente deinde fortuna, ut magnum utriusque casus exemplum in Regulo proderetur, accessit a Karthaginiensibus Xanthippo Lacedæmoniorum duce, victus praelio et captus est. Res deinde a ducebus Romanis omnibus terra marique prospere gestas deformaverunt naufragia classium. Ti. Coruncanius primus ex plebe pontifex maximus creatus est. P. Sempronius Sophus, M. Valerius Maximus censores, quum senatum legerent, tredecim senatu moverunt: lustrum condiderunt, quo censa sunt civium capita ducenta nonaginta septem millia, septingenta nonaginta septem. Regulus missus a Karthaginiensibus ad senatum, ut de pace, et, si eam non posset inpetrare, de captivis commutandis ageret, et jurejurando adstrictus, rediturum se Karthaginem, si commutari captivos non placuisset; utrumque negandi auctor senatui fuit: et, quum fide custodita reversus esset, supplicio a Karthaginiensibus de eo sumto, periit.

EPITOME LIBRI XIX.

CÆCILIVS Metellus, rebus adversus Pœnos prospere gestis, speciosum egit triumphum, tredecim ducibus hostium et centum viginti elephantis in eo ductis. Claudius Pulcher consul, contra auspicia profectus, jussis mergi pullis, qui cibari nolebant, infelicitèr adversus Karthaginienses classe pugnavit; et, revocatus a senatu, jussusque dictatorem dicere, Claudium Gliciam dixit, sortis ultimæ hominem: qui, coactus abdicare se magistratu, postea ludos prætextatus spectavit. Atilius Calatinus primus dictator extra Italiam exercitum duxit. Cum Pœnis captivorum commutatio facta est. Colonia deductæ sunt Fregenæ, in agro Sallentino Brundisium. Lustrum a censoribus conditum est: censa sunt civium capita ducenta quinquaginta unum millia, ducenta viginti-duo. Claudia, soror P. Claudii, qui, contemptis auspiciis, male pugnaverat, a ludis revertens, quum turba premeretur, dixit: Utinam frater meus viveret, iterumque classem duceret! ob eam causam multa ei dicta est. Duo prætores tum primum creati sunt. Cæcilius Metellus pontifex maximus A. Postumium consulem, quoniam idem et flamen Martialis erat, quum is ad bellum gerendum proficisci vellet, in urbe tenuit, nec passus est a sacris recedere. Rebus adversus Pœnos a pluribus ducibus prospere gestis, summam victoriæ C. Lu-

latius consul, victa ad Ægates insulas classe Pœnorum, inposuit. Petentibus Karthaginiensibus pax data est. Quum templum Vestæ arderet, Cæcilius Metellus pontifex maximus ex incendio sacra rapuit. Duæ tribus adjectæ sunt, Velina et Quirina. Falisci quum rebellassent, sexto die perdomiti, in deditionem venerunt.

EPITOME LIBRI XX.

SPOLETIUM colonia deducta est. *Adversus Ligures tunc primum exercitus promotus est. Sardi et Corsi, quum rebellassent, subacti sunt. Tuccia virgo Vestalis incesti damnata est. Bellum Illyriis, propter unum ex legatis, qui ad eos missi erant, occisum, indictum est: subactique in deditionem venerunt. Prætorum numerus ampliatus est, ut essent quatuor. Galli Transalpini, qui in Italiam intruperant, cæsi sunt. Eo bello populus Romanus sui Latinique nominis trecenta millia armatorum habuisse dicitur. Exercitibus Romanis tum primum trans Padum ductis, Galli Insubres, aliquot præliis fusi, in deditionem venerunt. M. Claudius Marcellus consul, occiso Insubrium Gallorum duce Virdomaro, opima spolia retulit. Istri subacti sunt. Item Illyrii, quum rebellassent, domiti in deditionem venerunt. Lustrum a censoribus conditum est, quo censa sunt civium capita ducenta septuaginta millia, ducenta tredecim. Libertini in quatuor tribus redacti sunt, quum antea dispersi per omnes fuissent; Esquilinam, Palatinam, Suburranam, Collinam. C. Flaminius censor viam Flaminiam munivit, et circum Flaminium extruxit. Colonia deductæ in agro de Gallis capto, Placentia et Cremona.*

EPITOME LIBRI XXI.

IN Italiam belli Punici secundi ortus narratur, et Hannibalis Pænorum ducis contra fœdus per Iberum amnem transitus, a quo Saguntum, sociorum populi Romani civitas, obsessa octavo mense capta est. De quibus injuriis missi legati ad Karthaginienses, qui quererentur: quum satisfacere nollent, bellum iis indictum est. Hannibal, superato Pyrenæo saltu, per Gallias, fuis Volcis, qui obsistere conati erant, ad Alpes venit; et laborioso per eas transitu (quum montanos quoque Gallos obvios aliquot præliis repulisset) descendit in Italiam, et ad Ticinum amnem Romanos equestri prælio fudit: in quo vulneratum P. Cornelium Scipionem protexit filius, qui Africani postea nomen accepit: iterumque exercitu Romano ad flumen Trebiam fuso, Hannibal Apenninum quoque, per magnam militum vexationem propter vim tempestatum, transiit. Cn. Cornelius Scipio in Hispania contra Pænos prospere pugnavit, duce hostium Magone capto.

T. LIVII PATAVINI

LIBER XXI.

IN parte operis mei licet mihi præfari, quod in principio summæ totius professi plerique sunt rerum scriptores, bellum maxime omnium memorabile, quæ umquam gesta sint, me scripturum; quod, Hannibale duce, Karthaginienses cum populo Romano gessere. Nam neque validiores opibus ullæ inter se civitates gentesque contulerunt arma, neque his ipsis tantum umquam virium aut roboris fuit: et haud ignotas belli artes inter se, sed expertas primo Punico conserebant bello: et adeo varia belli fortuna ancepsque Mars fuit, ut propius periculum fuerint, qui vicerunt. Odiis etiam prope majoribus certarunt, quam viribus: Romanis indignantibus, quod victoribus victi ultro inferrent arma; Pœnis, quod superbe avareque crederent imperitatum victis esse. Fama etiam est, Hannibalem annorum ferme novem, pueriliter blandientem patri Hamilcari, ut duceretur in Hispaniam, quum, perfecto Africo bello, exercitum eo trajecturus sacrificaret, altaribus admotum, tactis sacris jurejurando adactum, se, quum primum posset, hostem fore populo Romano. Angebant ingentis spiritus virum Sicilia Sardiniaque amissæ: nam et Siciliam nimis celeri desperatione rerum concessam, et Sardiniam

Belli Punici secundi magnitudo.

Hannibal odium jurat in Romanos.

Hamilcar bellum Romanum meditatur.

inter motum Africæ fraude Romanorum, stipendio etiam insuper inposito, interceptam.

II. His anxius curis ita se Africo bello, quod fuit sub recentem Romanam pacem, per quinque annos, ita deinde novem annis in Hispania augendo Punico imperio gessit; ut adpareret, majus eum, quam quod gereret, agitare in animo bellum: et, si diutius vixisset, Hamilcare duce Pœnos arma Italiæ inlaturos fuisse, quæ Hannibalis ductu intulerunt.

Moritur. Mors Hamilcaris peropportuna et pueritia Hanni-
Hasdrubal balis distulerunt bellum. Medius Hasdrubal inter
gener ei patrem et filium octo ferme annos imperium obti-
succedit. nuit; flore ætatis (uti ferunt) primo Hamilcari con-
 ciliatus: gener inde ob altam indolem provento an-
 nis adscitus, et, quia gener erat, factionis Barcinæ
 opibus, quæ apud milites plebemque plus quam mo-
 dicæ erant, haud sane voluntate principum, imperio
 potitus. Is, plura consilio, quam vi, gerens, hos-
 pitiis regulorum magis, conciliandisque per amici-
 tiam principum novis gentibus, quam bello aut ar-
Occiditur. mis, rem Karthaginiensem auxit. Ceterum nihilo
 ei pax tutior fuit: barbarus eum quidam palam, ob
 iram interfecti ab eo domini, obtruncavit; compre-
 hensusque ab circumstantibus haud alio, quam si
 evasisset, vultu; tormentis quoque quum lacerare-
 tur, eo fuit habitu oris, ut, superante lætitia dolo-
 res, ridentis etiam speciem præbuerit. Cum hoc
 Hasdrubale, quia miræ artis in sollicitandis genti-
 bus, imperioque jungendis suo fuerat, fœdus reno-
 vaverat populus Romanus, ut finis utriusque imperii
 esset amnis Iberus, Saguntinisque mediis inter im-
 peria duorum populorum libertas servaretur.

III. In Hasdrubalis locum haud dubia res fuit,

quin prærogativam militarem, qua extemplo juvenis Hannibal in prætorium delatus, imperatorque in- Ei succedit Hannibal. genti omnium clamore atque adsensu adpellatus erat, favor etiam plebis sequeretur. Hunc vixdum puberem Hasdrubal literis ad se arcessierat: actaque res etiam in senatu fuerat, Barcinis nitentibus, ut adsuesceret militiæ Hannibal, atque in paternas succederet opes. Hanno, alterius factionis princeps, *Et æquum postulare videtur, inquit, Hasdrubal; et ego tamen non censeo, quod petit, tribuendum. Quum admiratione tam ancipitis sententiæ in se omnes convertisset, Florem ætatis, inquit, Hasdrubal, quem ipse patri Hannibalis fruentum præbuit, justo jure eum a filio repeti censet: nos tamen minime decet, juventutem nostram pro militari rudimento adsuefacere libidini prætorum. An hoc timemus, ne Hamilcaris filius nimis sero imperia inmodica et regni paterni speciem videat? et, cujus regis genero hereditarii sint relictis exercitus nostri, ejus filio parum mature serviamus? Ego, istum juvenem domi tenendum, sub legibus, sed magistratibus docendum vivere æquo jure cum ceteris, censeo: ne quandoque parvus hic ignis incendium ingens exsuscitet.*

IV. Pauci, ac ferme optimus quisque, Hannoni adsentiebantur: sed (ut plerumque fit) major pars meliorem vicit. Missus Hannibal in Hispaniam Hannibal's dotes et ingenium. primo statim adventu omnem exercitum in se convertit. Hamilcarem juvenem redditum sibi veteres milites credere; eundem vigorem in vultu, vimque in oculis, habitum oris, lineamenta que intueri: dein brevi effecit, ut pater in se minimum momentum ad favorem conciliandum esset. Numquam ingenium idem ad res diversissimas, parendum atque impe-

randum, habilis fuit : itaque haud facile decerneres, utrum imperatori, an exercitui, carior esset : neque Hasdrubal alium quemquam præficere malle, ubi quid fortiter ac strenue agendum esset : neque milites alio duce plus confidere, aut audere. Plurimum audaciæ ad pericula capessenda, plurimum consilii inter ipsa pericula erat : nullo labore aut corpus fatigari, aut animus vinci poterat. Caloris ac frigoris patientia par : cibi potionisque desiderio naturali, non voluptate, modus finitus : vigiliarum somnique nec die, nec nocte discriminata tempora. Id, quod gerendis rebus superesset, quieti datum : ea neque molli strato, neque silentio arcessita. Multi sæpe militari sagulo opertum, humi jacentem inter custodias stationesque militum, conspexerunt. Vestitus nihil inter æquales excellens : arma atque equi conspicebantur. Equitum peditumque idem longe primus erat : princeps in prælium ibat : ultimus conserto prælio excedebat. Has tantas viri virtutes ingentia vitia æquabant ; inhumana crudelitas, perfidia plus quam Punica, nihil veri, nihil sancti, nullus Deum metus, nullum jusjurandum, nulla religio. Cum hac indole virtutum atque vitiorum triennio sub Hasdrubale imperatore meruit, nulla re, quæ agenda videndaque magno futuro duci esset, prætermissa.

Hannibal bellum inferre Saguntinis statuit.

V. Ceterum ex quo die dux est declaratus, velut Italia ei provincia decreta, bellumque Romanum mandatum esset, nihil prolatandum ratus, ne se quoque, ut patrem Hamilcarem, deinde Hasdrubalem, cunctantem casus aliquis obprimeret, Saguntinis inferre bellum statuit : quibus obpugnandis quia haud dubie Romana arma movebantur, in Ol-

cadum fines prius (ultra Iberum ea gens in parte Sed prius
varios
Hispaniæ
populos
subigit. magis, quam in ditione, Karthaginensium erat) induxit exercitum, ut non petisse Saguntinos, sed rerum serie, finitimis domitis gentibus, jungendoque, tractus ad id bellum videri posset. Carteiam, urbem opulentam, caput gentis ejus, expugnat diripitque. Quo metu percussæ minores civitate, stipendio imposito, imperium accipere: victor exercitus, opulentusque præda, Karthaginem novam in hiberna est deductus. Ibi large partiendo prædam, stipendio præterito cum fide exsolvendo, cunctis civium sociorumque animis in se firmatis, vere primo in Vaccæos promotum bellum. Hermandica et Arbocala urbes vi captæ. Arbocala et virtute et multitudine oppidanorum diu defensa. Ab Hermandica profugi, exsulibus Olcadum, priore æstate domitæ gentis, quum se junxissent, concitant Carpetanos: adortique Hannibalem, regressum ex Vaccæis, haud procul Tago flumine agmen grave præda turbavere. Hannibal prælio abstinuit; castrisque super ripam positis, quum prima quies silentiumque ab hostibus fuit, annem vado trajecit: valloque ita producto, ut locum ad transgrediendum hostes haberent, invadere eos transeuntes statuit. Equitibus præcepit, ut, quum ingressos aquam viderent, adorirentur. Peditum agmen in ripa, elephantos ante quadraginta disposuit. Carpetanorum cum adpendicibus Olcadum Vaccæorumque centum millia fuere; invicta acies, si æquo dimicaretur campo. Itaque et ingenio feroces, et multitudine freti, et quod metu cessisse credebant hostem, id morari victoriam rati, quod interesset annis, clamore subiato, passim sine ullius imperio, qua cuique proximum est, in annem

ruunt. Et ex parte altera ripæ vis ingens equitum in flumen inmissa, medioque alveo haudquaquam pari certamine concursus; quippe ubi pedes instabilis, ac vix vado fidens, vel ab inermi equite, equo tenere acto, perverti posset: eques, corpore armisque liber, equo vel per medios gurgites stabili, comminus eminusque rem gereret. Pars magna flumine absunta: quidam, vorticoso amni delati in hostes, ab elephantis obtriti sunt: postremi, quibus regressus in suam ripam tutior fuit, ex varia trepidatione quum in unum conligerentur, priusquam ex tanto pavore reciperent animos, Hannibal, agmine quadrato amnem ingressus, fugam ex ripa fecit: vastatisque agris, intra paucos dies Carpetanos quoque in deditionem accepit. Et jam omnia trans Iberum, præter Saguntinos, Karthaginensium erant.

VI. Cum Saguntinis bellum nondum erat: ceterum jam belli causa certamina cum finitimis serebantur, maxime Turdetanis: quibus quum adesset idem, qui litis erat sator, nec certamen juris, sed vim quæri adpareret; legati a Saguntinis Romam missi, auxilium ad bellum jam haud dubie imminens orantes. Consules tunc Romæ erant P. Cornelius Scipio et Ti. Sempronius Longus: qui quum, legatis in senatum introductis, de republica retulissent, placuissetque mitti legatos in Hispaniam, ad res sociorum inspiciendas; quibus si videretur digna causa, et Hannibali denunciarent, ut ab Saguntinis, sociis populi Romani, abstineret, et Karthaginem in Africam trajicerent, ac sociorum populi Romani querimonias deferrent. Hac legatione decreta, necdum missa, omnium spe celerius Saguntum obpugnari adlatum est. Tunc relata ex integro

Saguntini
Romam
legatos
mittunt.

U. C. 534.
A. C. 218.

Sagunti
obpug-
natio.

res ad senatum. Alii, provincias consulibus Hispaniam atque Africam decernentes, terra marique rem gerendam censebant : alii totum in Hispaniam Hannibalemque intendebant bellum. Erant, qui non temere movendam rem tantam, exspectandosque ex Hispania legatos censerent. Hæc sententia, quæ tutissima videbatur, vicit : legatique eo maturius missi, P. Valerius Flaccus et Q. Bæbius Tamphilus, Saguntum ad Hannibalem, atque inde Karthaginem, si non absisteretur bello, ad ducem ipsum in pœnam fœderis rupti deposcendum.

VII. Dum ea Romani parant consultantque, jam Saguntum summa vi obpugnabatur. Civitas eâ longe opulentissima ultra Iberum fuit, sita passus mille ferme a mari. Oriundi a Zacyntho insula dicuntur, mixtique etiam ab Ardea Rutulorum quidam generis : ceterum in tantas brevi creverant opes, seu maritimis, seu terrestribus fructibus, seu multitudinis incremento, seu sanctitate disciplinæ, qua fidem socialem usque ad perniciem suam coluerunt. Hannibal, infesto exercitu ingressus fines, pervastatis passim agris, urbem tripartito adgreditur. Angulus muri erat in planiorem patentioreque, quam cetera circa, vallem vergens : adversus eum vineas agere instituit, per quas aries mœnibus admoveri posset. Sed ut locus procul muro satis æquus agendis vineis fuit ; ita haudquaquam prospere, postquam ad effectum operis ventum est, cœptis succedebat : et turris ingens iminebat : et murus, ut in suspecto loco, supra ceteræ modum altitudinis emunitus erat : et juvenus delecta, ubi plurimum periculi ac laboris ostendebatur, ibi vi majore obsistebant. Ac primo missilibus submovere hos-

U. C. 534.

A. C. 218.

U. C. 534. tem, nec quidquam satis tutum munientibus pati :
 A. C. 218. deinde jam non pro mœnibus modo atque turri tela
 micare, sed ad erumpendum etiam in stationes ope-
 raque hostium animus erat : quibus tumultuariis
 certaminibus haud ferme plures Saguntini cadebant,
 quam Pœni. Ut vero Hannibal ipse, dum murum
 incautius subit, adversum femur tragula graviter
 ictus cecidit ; tanta circa fuga ac trepidatio fuit, ut
 non multum abesset, quin opera ac vineæ desere-
 rentur.

Hannibal
 vulnera-
 tus.

VIII. Obsidio deinde per paucos dies magis,
 quam obpugnatio, fuit, dum vulnus ducis curaretur :
 per quod tempus ut quies certaminum erat, ita ab
 adparatu operum ac munitionum nihil cessatum.
 Itaque acrius de integro obortum est bellum, pluri-
 busque partibus, vix accipientibus quibusdam opera
 locis, vineæ cœptæ agi, admoverique aries. Abun-
 dabat multitudine hominum Pœnus ; ad centum
 enim quinquaginta millia habuisse in armis satis
 creditur. Oppidani ad omnia tuenda atque obeunda
 multifariam distineri cœpti sunt : et non subficie-
 bant (jam enim feriebantur arietibus) muri, quas-
 satæque multæ partes erant : una continentibus
 ruinis nudaverat urbem : tres deinceps turres, quan-
 tumque inter eas muri erat, cum fragore ingenti
 prociderant : captumque oppidum ea ruina credide-
 rant Pœni ; qua, velut si pariter utrosque murus
 texisset, ita utrimque in pugnam procursum est.
 Nihil tumultuariæ pugnae simile erat, quales in ob-
 pugnationibus urbium per occasionem partis alterius
 conseri solent : sed justæ acies, velut patienti cam-
 po, inter ruinas muri tectaque urbis modico distan-
 tiæ intervallo constiterant : hinc spes, hinc despe-

ratio animos irritat: Poeno cepisse jam se urbem, U. C. 534.
 si paullulum adnitatur, credente; Saguntinis pro A. C. 218.
 nudata mœnibus patria corpora obponentibus, nec
 ullo pedem referente, ne in relictum a se locum
 hostem inmitteret. Itaque quo acrius et conferti
 magis utrimque pugnabant, eo plures vulnerabantur,
 nullo inter arma corporaque vano intercidente telo.
 Falarica erat Saguntinis, missile telum hastili abieg-
 no, et cetera tereti, præterquam ad extremum, unde
 ferrum exstabat: id, sicut in pilo, quadratum stuppa
 circumligabant, liniebantque pice. Ferrum autem
 tres longum habebat pedes, ut cum armis transfi-
 gere corpus posset. Sed id maxime, etiamsi hæ-
 sisset in scuto, nec penetrasset in corpus, pavorem
 faciebat; quod, quum medium accensum mittere-
 tur, conceptumque ipso motu multo majorem ignem
 ferret, arma omitti cogebat, nudumque militem ad
 insequentes ictus præbebat.

IX. Quum diu anceps fuisset certamen, et Sa-
 guntinis, quia præter spem resisterent, crevissent
 animi; Pœnus, quia non vicisset, pro victo esset;
 clamorem repente oppidani tollunt, hostemque in
 ruinas muri expellunt; inde inpeditum trepidan-
 temque exturbant; postremo fusum fugatumque in
 castra redigunt. Interim ab Roma legatos venisse Hannibal
 nunciatum est: quibus obviam ad mare missi ab legatos
 Hannibale, qui dicerent, nec tuto eos adituros inter Rom. non
 tot tam efferatarum gentium arma: nec Hannibali,
 in tanto discrimine rerum, operæ esse legationes
 audire. Adparebat, non admissos protinus Kartha-
 ginem ituros: literas igitur nunciosque ad principes
 actionis Barcinæ præmittit, ut præpararent suorum

U. C. 534. animos, ne quid pars altera gratificari pro Romanis
 A. C. 218. posset.

Legati
 Rom.
 Carthagi-
 nem eunt.
 Hanno-
 nis oratio
 in Hanni-
 balem.

X. Itaque, præterquam quod admissi auditique sunt, ea quoque vana atque irrita legatio fuit. Hannone unus adverso senatu causam fœderis, magno silentio propter auctoritatem suam, non ad sensum audientium, egit. *Per Deos, fœderum arbitros ac testes, monuisse, prædixisse se, ne Hamilcaris progeniem ad exercitum mitterent: non manes, non stirpem ejus conquiescere viri: nec umquam, donec sanguinis nominisque Barcini quisquam supersit, quietura Romana fœdera. Juvenem flagrantem cupidine regni, vitamque unam ad id cernentem, si ex bellis bella serendo subcinctus armis legionibusque vivat, velut materiam igni præbentes, ad exercitus misistis: aluistis ergo hoc incendium, quo nunc ardetis. Saguntum vestri circumcident exercitus, unde arcentur fœdere: mox Karthaginem circumsidebunt Romanæ legiones, ducibus iisdem Diis, per quos priore bello rupta fœdera sunt ultia. Utrum hostem, an vos, an fortunam utriusque populi, ignoratis? Legatos, ab sociis et pro sociis venientes, bonus imperator vester in castra non admisit, jus gentium sustulit: hi tamen, unde ne hostium quidem legati arcentur, pulsati ad vos veniunt, res ex fœdere repetunt: publica fraus absit; auctorem culpæ et reum criminis deposcunt. Quo lenius agunt, segnius incipiunt; eo, quum cæperint, vereor, ne perseverantius sciant. Ægates insulas Erycemque ante oculos proponite; quæ terra marique per quatuor et viginti annos passi sitis. Nec puer hic dux erat, sed pater ipse Hamilcar, Mars alter, ut isti volunt: sed Tarento, id est Italia, non abstinueramus ex fœdere: sicut nunc*

Sagunto non abstinemus. Vicerunt ergo Dii hominesque; et, id de quo verbis ambigebatur, uter populus fœdus rupisset, eventus belli, velut æquus iudex, unde jus stabat, ei victoriam dedit. Karthagini nunc Hannibal vineas turresque admovet: Karthaginis mœnia quatit ariete. Sagunti ruinæ (falsus utinam vates sim) nostris capitibus incident: susceptumque cum Saguntinis bellum, habendum cum Romanis est. Deditus ergo Hannibalem? dicet aliquis. Scio, meam levem esse in eo auctoritatem propter paternas inimicitias. Sed et Hamilcarem eo perisse lætatus sum, quod, si ille viveret, bellum jam cum Romanis haberemus; et hunc juvenem, tamquam furiam facemque hujus belli, odi ac detestor. Nec dedendum solum id piaculum rupti fœderis; sed, si nemo deposcat, devehendum in ultimas maris terrarumque oras, ablegandumque eo, unde nec ad nos nomen famaue ejus accedere, neque sollicitare quietæ civitatis statum possit. Ego ita censeo, legatos extemplo Romam mittendos, qui senatui satisfaciant: alios, qui Hannibali nuncient, ut exercitum ab Sagunto abducatur, ipsumque Hannibalem ex fœdere Romanis dedant: tertiam legationem ad res Saguntinis reddendas decerno.

XI. Quum Hanno perorasset, nemini omnium certare oratione cum eo necesse fuit: adeo prope omnis senatus Hannibalis erat; infestiusque locutum arguebant Hannonem, quam Flaccum Valerium, legatum Romanum. Responsum inde legatis Romanis est, *Bellum ortum ab Saguntinis, non ab Hannibale esse: populum Romanum injuste facere, si Saguntinos vetustissimæ Karthaginiensium societati præponat. Dum Romani tempus terunt legationibus mittendis, Hannibal, quia fessum militem præliis*

U.C. 534.

A.C. 218.

Favet senatus Carthagin. Hannibali.

U. C. 534. operibusque habebat, paucorum iis dierum quietem
 A. C. 218.

dedit, stationibus ad custodiam vinearum aliorumque operum dispositis : interim animos eorum nunc ira in hostes stimulando, nunc spe præmiorum accendit. Ut vero pro concione prædam captæ urbis edixit militum fore, adeo accensi omnes sunt, ut, si extemplo signum datum esset, nulla vi resisti videretur posse. Saguntini ut a præliis quietem haberant, nec lacescentes, nec lacesciti per aliquot dies ; ita non nocte, non die umquam cessaverant ab opere, ut novum murum ab ea parte, qua patefactum oppidum ruinis erat, reficerent. Inde obpugnatione eos aliquanto atrocior, quam ante, adorta est : nec, qua primum aut potissimum parte ferrent opem, (quum omnia variis clamoribus streperent) satis scire poterant. Ipse Hannibal, qua turris mobilis, omnia munimenta urbis superans altitudine, agebatur, hortator aderat : quæ quum admota, catapultis ballistisque per omnia tabulata dispositis, muros defensoribus nudasset ; tum Hannibal, occasionem ratus, quingentos ferme Afros cum dolabris ad subruendum ab imo murum mittit : nec erat difficile opus, quod cæmenta non calce durata erant, sed interlita luto, structuræ antiquæ genere. Itaque latius, quam cæderetur, ruebat : perque patientia ruinis agmina armatorum in urbem vadebant. Locum quoque editum capiunt : conlatisque eo catapultis ballistisque, ut castellum in ipsa urbe velut arcem imminens haberent, muro circumdant : et Saguntini murum interiorē ab nondum capta urbis parte ducunt. Utrumque summa vi et inuniant, et pugnant : sed, interiora tuendo, minorem in dies urbem Saguntini faciunt. Simul crescit inopia om-

Saguntinorum constantia.

nium longa obsidione, et minuitur expectatio ex-
 ternæ opis; quum tam procul Romani, unica spes,
 circa omnia hostium essent. Paullisper tamen ad-
 fectos animos recreavit repentina profectio Han-
 nibalis in Oretanos Carpetanosque: qui duo po-
 puli, delectus acerbitate consternati, retentis con-
 quisitoribus, metum defectionis quum præbuis-
 sent, obpressi celeritate Hannibalis, omiserunt mo-
 ta arma.

XII. Nec Sagunti obpugnatio segnior erat, Ma-
 harbale, Himilconis filio, (eum præfecerat Hanni-
 bal) ita inpigre rem agente, ut ducem abesse nec
 cives, nec hostes sentirent. Is et prælia aliquot se-
 cunda fecit, et tribus arietibus aliquantulum muri
 discussit; strataque omnia recentibus ruinis adve-
 nienti Hannibali ostendit. Itaque ad ipsam arcem
 extemplo ductus exercitus, atroxque prælium cum
 multorum utrimque cæde initum, et pars arcis capta
 est. Tentata deinde per duos est exigua pacis spes,
 Alconem Saguntinum, et Alorcum Hispanum. Al-
 con, insciis Saguntinis, precibus aliquid moturum
 ratus, quum ad Hannibalem noctu transisset,
 postquam nihil lacrimæ movebant, conditionesque
 tristes, ut ab irato victore, ferebantur, transfuga
 ex oratore factus, apud hostem mansit; meritorium
 adfirmans, qui sub conditionibus his de pace ageret.
 Postulabatur autem, redderent res Turdetanis; tra-
 ditoque omni auro atque argento, egressi urbe cum
 singulis vestimentis ibi habitarent, ubi Pœnus jus-
 sisset. Has pacis leges abnuente Alcone acceptu-
 ros Saguntinos, Alorcus, vinci animos, ubi alia
 vincantur, adfirmans, se pacis ejus interpretem fore
 pollicetur. Erat autem tum miles Hannibalis; ce-

Pax frustra
 tentata.

U. C. 534. terum publice Saguntinis amicus atque hospes. Tra-
 A. C. 218. dito palam telo custodibus hostium, transgressus
 munimenta, ad prætorem Saguntinum (et ipse ita
 jubebat) est deductus : quo quum extemplo concur-
 sus omnis generis hominum esset factus, submota
 cetera multitudine, senatus Alorco datus est : cujus
 talis oratio fuit.

Alorci
 oratio de
 pace.

XIII. *Si civis vester Alcon, sicut ad pacem peten-
 dam ad Hannibalem venit, ita pacis condiciones ab
 Hannibale ad vos retulisset, supervacaneum hoc mihi
 fuisset iter, quo nec orator Hannibalis, nec transfuga
 ad vos venissem. Quum ille, aut vestra, aut sua
 culpa, manserit apud hostem, (si metum simulavit,
 sua; vestra, si periculum est apud vos vera referen-
 tibus) ego, ne ignoraretis, esse aliquas et salutis et
 pacis vobis condiciones, pro vetusto hospitio, quod mihi
 vobiscum est, ad vos veni. Vestra autem caussa me,
 nec ullius alterius, loqui, quæ loquor apud vos, vel ea
 fides sit, quod, neque dum vestris viribus restitistis, ne-
 que dum auxilia ab Romanis sperastis, pacis umquam
 apud vos mentionem feci. Postquam nec ab Romanis
 vobis ulla spes est, nec vestra jam aut arma vos, aut
 mœnia satis defendunt, pacem adfero ad vos magis
 necessariam, quam æquam : cujus ita aliqua spes est,
 si eam quemadmodum ut victor fert Hannibal, sic vos
 ut victi audiat : si non id, quod amittitur, in damno,
 (quum omnia victoris sint) sed, quidquid relinquitur,
 pro munere habituri estis. Urbem vobis, quam ex
 magna jam parte dirutam, captam fere totam habet,
 adimit, agros relinquit, locum adsignaturus, in quo
 novum oppidum ædificetis : aurum argentumque omne,
 publicum privatumque, ad se jubet deferri : conjugum
 vestraque corpora ac liberorum vestrorum servat in-*

violata, si inermes cum binis vestimentis velitis ab Sagunto exire. Hæc victor hostis imperat. Hæc, quam- U. C. 534.
A. C. 218.
quam sint gravia atque acerba, fortuna vestra vobis suadet. Equidem haud despero, quum omnium potestas ei facta sit, aliquid ex his rebus remissurum. Sed vel hæc patienda censeo potius, quam trucidari corpora vestra, rapi trahique ante ora vestra conjuges ac liberos belli jure sinatis.

XIV. Ad hæc audienda quum, circumfusa paulatim multitudine, permixtum senatui esset populi concilium; repente primores, secessione facta, (priusquam responsum daretur) argentum aurumque omne, ex publico privatoque in forum conlatum, in ignem ad id raptim factum conjicientes, eodem plerique semet ipsi præcipitaverunt. Quum ex eo pavor ac trepidatio totam urbem pervasisset, alius insuper tumultus ex arce auditur. Turre diu quassata prociderat: perque ruinam ejus cohors Pœnorum inpetu facto quum signum imperatori dedisset, nudatam stationibus custodiisque solitis hostium esse urbem; non cunctandum in tali occasione ratus Hannibal, totis viribus adgressus urbem, momento cepit, signo dato, ut omnes puberes interficerentur: quod imperium crudele, ceterum prope necessarium Captum Saguntum. cognitum ipso eventu est. Cui enim parci potuit ex iis, qui aut inclusi cum conjugibus ac liberis domos super se ipsos concremaverunt, aut armati nullum ante finem pugnae, quam morientes, fecerunt?

XV. Captum oppidum est cum ingenti præda. Quamquam pleraque ab dominis de industria corrupta erant, et in cædibus vix ullum discrimen ætatis ira fecerat, et captivi militum præda fuerant;

U. C. 534. tamen et ex pretio rerum venditarum aliquantum
 A. C. 218. pecuniæ redactum esse constat, et multam pretio-
 sam suppellectilem vestemque missam Karthaginem.
 Octavo mense, quam cœptum obpugnari, captum
 Saguntum, quidam scripsere : inde Karthaginem no-
 vam in hiberna Hannibalem concessisse : quinto
 deinde mense, quam ab Karthagine profectus sit, in
 Italiam pervenisse. Quæ si ita sunt, fieri non potuit,
 ut P. Cornelius, Ti. Sempronius consules fuerint, ad
 quos et principio obpugnationis legati Saguntini mis-
 si sint, et qui in suo magistratu cum Hannibale, al-
 ter ad Ticinum animum, ambo aliquanto post ad
 Trebiam, pugnaverint. Aut omnia breviora aliquan-
 to fuere, aut Saguntum principio anni, quo P. Cor-
 nelius, Ti. Sempronius consules fuerunt, non cœp-
 tum obpugnari est, sed captum. Nam excessisse
 pugna ad Trebiam in annum Cn. Servilii et C. Fla-
 minii non potest : quia Flaminius Arimini consula-
 tum iniit, creatus ab Ti. Sempronio consule ; qui,
 post pugnam ad Trebiam ad creandos consules Ro-
 mam quum venisset, comitiis perfectis ad exercitum
 in hiberna rediit.

Capto Sa- XVI. Sub idem fere tempus et legati, qui redie-
 gunt tre- rant a Karthagine, Romam retulerunt, omnia hosti-
 pidant Ro- lia esse, et Sagunti excidium nunciatum est : tan-
 mani. tusque simul mœror Patres, misericordiaeque socio-
 rum peremtorum indigne, et pudor non lati auxilii,
 et ira in Karthaginienses, metusque de summa rerum
 cepit, velut si jam ad portas hostis esset ; ut, tot
 uno tempore motibus animi turbati, trepidarent ma-
 gis, quam consulerent. Nam neque hostem acrio-
 rem bellicosioremq; secum congressum ; nec rem
 Romanam tam desidem umquam fuisse atque inbel-

lem. Sardos, Corsosque, et Istros, atque Illyrios, U. C. 534.
 lacessisse magis, quam exercuisse, Romana arma: A. C. 218.
 et cum Gallis tumultuatum verius, quam belligera-
 tum. Pœnum, hostem veteranum, trium et viginti
 annorum militia durissima inter Hispanas gentes
 semper victorem, primum Hamilcare, deinde Has-
 drubale, nunc Hannibale, duce acerrimo adsueta,
 recentem ab excidio opulentissimæ urbis, Iberum
 transire: trahere secum tot excitos Hispanorum
 populos: concitum avidas semper armorum Gal-
 licas gentes: cum orbe terrarum bellum gerendum
 in Italia ac pro mœnibus Romanis esse.

XVII. Nominatæ jam antea consulibus provinciæ Belli adpa-
 erant; tum sortiri jussi. Cornelio Hispania, Sem- ratus apud
 pronio Africa cum Sicilia evenit. Sex in eum Romanos.
 num decretæ legiones, et socium quantum ipsis vide-
 retur, et classis quanta parari posset. Quatuor et
 viginti peditum Romanorum millia sunt scripta, et
 mille octingenti equites: sociorum quadraginta mil-
 lia peditum, quatuor millia et quadringenti equites:
 naves ducentæ viginti quinqueres, celoces viginti
 deductæ. Latum inde ad populum, *vellent, juberent,*
populo Karthaginensi bellum indici. Ejusque belli
 caussa supplicatio per urbem habita, atque adorati
 Dii, ut bene ac feliciter eveniret, quod bellum popu-
 lus Romanus jussisset. Inter consules ita copiarum di-
 visæ. Sempronio datæ legiones duæ, (ea quaternæ
 millia erant peditum, et trecenti equites) et sociorum
 sexdecim millia peditum, equites mille octingenti:
 naves longæ centum sexaginta, celoces duodecim.
 Cum his terrestribus maritimisque copiis Ti. Sem-
 pronius missus in Siciliam; ita in Africam trans-
 missurus, si ad arcendum Italia Pœnum consul alter

U. C. 534. satis esset. Cornelio minus copiarum datum, quia L. A. C. 218. Manlius prætor et ipse cum haud invalido præsidio in Galliam mittebatur. Navium maxime Cornelio numerus deminutus : sexaginta quinqueremes datæ (neque enim mari venturum, aut ea parte belli dimicaturum hostem credebant) et duæ Romanæ legiones cum suo justo equitatu, et quatuordecim millibus sociorum peditum, equitibus mille sexcentis. Duas legiones Romanas, et decem millia sociorum peditum, mille equites socios, sexcentos Romanos Gallia provincia eodem anno versa in Punicum bellum habuit.

Legati
missi Car-
thaginem.

XVIII. His ita comparatis, ut omnia justa ante bellum fierent, legatos majores natu, Q. Fabium, M. Livium, L. Æmilium, C. Licinium, Q. Bæbium, in Africam mittunt ad percunctandos Karthaginenses, publicone consilio Hannibal Saguntum obpugnasset? et si, id quod facturi videbantur, faterentur, ac defenderent publico consilio factum, ut indicerent populo Karthaginensi bellum. Romani postquam Karthaginem venerunt, quum senatus datus esset, et Q. Fabius nihil ultra, quam unum, quod mandatum erat, percunctatus esset; tum ex Karthaginiensibus unus : *Præceps vestra, Romani, et prior legatio fuit, quum Hannibalem, tamquam suo consilio Saguntum obpugnantem deposcebatis : ceterum hæc legatio verbis adhuc lenior est, re asperior. Tunc enim Hannibal et insimulabatur, et deposcebatur : nunc ab nobis et confessio culpæ exprimitur ; et, ut a confessis, res extemplo repetuntur. Ego autem non, privato publicone consilio Saguntum obpugnatum sit, quærendum censeam : sed utrum jure, an injuria. Nostra enim hæc questio atque animadversio in civem nos-*

trum est; nostro, an suo fecerit arbitrio. Vobiscum una disceptatio est, licueritne per fœdus fieri. Itaque quoniam discerni placet, quid publico consilio, quid sua sponte imperatores faciant; nobis vobiscum fœdus est a Lutatio consule ictum: in quo quum caveretur utrorumque sociis, nihil de Saguntinis (nec dum enim erant socii vestri) cautum est. At enim eo fœdere, quod cum Hasdrubale ictum est, Saguntini excipiuntur: adversus quod nihil ego dicturus sum, nisi quod a vobis didici. Vos enim, quod C. Lutatius consal primo nobiscum fœdus icit, quia neque auctoritate Patrum, nec populi jussu ictum erat, negastis vos eo teneri: itaque aliud de integro fœdus publico consilio ictum est. Si vos non tenent vestra fœdera, nisi ex auctoritate aut jussu vestro icta; ne nos quidem Hasdrubalis fœdus, quod nobis insciis icit, obligare potuit. Proinde omitte Sagunti atque Iberi mentionem facere, et, quod diu parturit animus vester, aliquando pariat. Tum Romanus, sinu ex toga facto, Hic, inquit, vobis bellum et pacem portamus; utrum placet, sumite. Sub hanc vocem haud minus ferociter, daret, utrum vellet, subclamatum est: et quum is iterum sinu effuso bellum dare dixisset, accipere se omnes responderunt, et, quibus acciperent animis, iisdem se gesturos.

U. C. 534.
A. C. 218.

Bellum in-
dicunt.

XIX. Hæc directa percunctatio ac denunciatio belli magis ex dignitate populi Romani visa est, quam de fœderum jure verbis disceptare, quum antea, tum maxime Sagunto excisa: nam, si verborum disceptationis res esset, quid fœdus Hasdrubalis cum Lutatii priore fœdere, quod mutatum est, comparandum erat? quum in Lutatii fœdere diserte additum esset, ita id ratum fore, si populus censuisset; in Hasdrubalis fœdere nec exceptum tale quidquam

Disceptatio
de fœde-
rum jure.

U. C. 534. fuerit, et tot annorum silentio ita vivo eo compro-
 A. C. 218. batum sit foedus, ut ne mortuo quidem auctore
 quidquam mutaretur. Quamquam, etsi priore fœ-
 dere staretur, satis cautum erat Saguntinis, sociis
 utrorumque exceptis : nam neque additum erat, iis,
qui tunc essent : nec, *ne qui postea adsumerentur* : et
 quum adsumere novos liceret socios, quis æquum
 censeret, aut ob nulla quemquam merita in amici-
 tiam recipi ? aut receptos in fidem non defendi ?
 tantum, ne Karthaginiensium socii aut sollicita-
 rentur ad defectionem, aut sua sponte desciscen-
 tes reciperentur. Legati Romani ab Karthagine,
 sicut his Romæ imperatum erat, in Hispaniam, ut
 adirent civitates, ut in societatem perlicerent, aut
 averterent a Pœnis, trajecerunt. Ad Bargusios pri-
 mum venerunt : a quibus benigne excepti, quia tæ-
 debat imperii Punici, multos trans Iberum populos
 ad cupidinem novæ fortunæ erexerunt. Ad Volcia-
 nos inde est ventum : quorum celebre per Hispan-
 niam responsum ceteros populos ab societate Ro-
 mana avertit : ita enim maximus natus ex iis in con-
 cilio respondit : *Quæ verecundia est, Romani, postu-
 lare vos, uti vestram Karthaginiensium amicitiae præ-
 ponamus, quum, qui id fecerunt, Saguntinos crudelius,
 quam Pœnus hostis perdidit, vos socii prodideritis ? ibi
 quæratiss socios, censeo, ubi Saguntina clades ignota
 est. Hispanis populis, sicut lugubre, ita insigne do-
 cumentum Sagunti ruinæ erunt, ne quis fidei Romanæ
 aut societati confidat.* Inde extemplo abire finibus
 Volcianorum jussi, ab nullo deinde concilio Hispan-
 niæ benigniora verba tulere : itaque nequidquam
 peragrata Hispania, in Galliam transeunt.

XX. In his nova terribilisque species visa est,

Legati Ro-
 mani in
 Hispan-
 niam tra-
 jiciunt.

quod armati (ita mos gentis erat) in concilium venerunt: quum, verbis extollentes gloriam virtutemque populi Romani ac magnitudinem imperii, petissent, ne Pœno, bellum Italiæ inferenti, per agros urbesque suas transitum darent; tantus cum fremitu risus dicitur ortus, ut vix a magistratibus maioribusque natu juvenus sedaretur. Adeo stolidi impudensque postulatio visa est, censere, ne in Italiam transmittant Galli bellum, ipsos id avertere in se, agrosque suos pro alienis populandos objicere. Sedato tandem fremitu, responsum legatis est, *Neque Romanorum in se meritum esse, neque Karthaginiensium injuriam, ob quæ aut pro Romanis, aut adversus Pœnos sumant arma. Contra ea audire sese, gentis suæ homines agris finibusque Italiæ pelli a populo Romano, stipendiumque pendere, et cetera indigna pati.* Eadem ferme in ceteris Galliæ conciliis dicta auditaque: nec hospitale quidquam pacatumve satis prius auditum, quam Massiliam venere. Ibi omnia, ab sociis inquisita cum cura ac fide, cognita, præoccupatos jam ante ab Hannibale Gallorum animos esse: sed ne illi quidem ipsi satis mitem gentem fore, (adeo ferocia atque indomita ingenia esse) ni subinde auro, cujus avidissima gens est, principum animi concilientur. Ita peragratis Hispaniæ et Galliæ populis, legati Romam redeunt, haud ita multo post, quam consules in provincias profecti erant: civitatem omnem in expectationem belli erectam invenerunt, satis constante fama, jam Iberum Pœnos transmisisse.

XXI. Hannibal, Sagunto capto, Karthaginem novam in hiberna concesserat: ibique, auditis, quæ Romæ, quæque Karthagine acta decretaque forent,

U. C. 534. seque non ducem solum, sed etiam caussam esse

A. C. 218. belli, partitis divenditisque reliquiis prædæ, nihil ultra differendum ratus, Hispani generis milites con-

Hannibalis oratio ad milites. vocat: *Credo ego vos, inquit, socii, et ipsos cernere, pacatis omnibus Hispaniæ populis, aut finiendam nobis militiam, exercitusque dimittendos esse: aut in alias terras transferendum bellum: ita enim hæ gentes non pacis solum, sed etiam victoriæ, bonis floreant, si ex aliis gentibus prædam et gloriam quæremus. Itaque, quum longinqua ab domo instet militia, incertumque sit, quando domos vestras, et quæ cuique ibi cara sunt, visuri sitis, si quis vestrum suos invisere vult, conmeatum do. Primo vere, edico, adsitis; ut, Diis bene juvantibus, bellum ingentis gloriæ prædæque futurum incipiamus. Omnibus fere visendi domos oblata ultro potestas grata erat, et jam desiderantibus suos, et longius in futurum providentibus desiderium. Per totum tempus hiemis quies inter labores, aut jam exhaustos, aut mox exhauriendos, renovavit corpora animosque ad omnia de integro patienda.*

Adparatus Hannibalis ad bellum. Vere primo ad edictum convenere. Hannibal, quum recensuisset omnium auxilia gentium, Gades profectus Herculi vota exsolvit: novisque se obligat votis, si cetera prospera evenissent. Inde partiens curas simul in inferendum atque arcendum bellum, ne, dum ipse terrestri per Hispaniam Galliasque itinere Italiam peteret, nuda aperta que Romanis Africa ab Sicilia esset, valido præsidio firmare eam statuit. Pro eo supplementum ipse ex Africa, maxime jaculatorum, levium armis, petiit; ut Afri in Hispania, in Africa Hispani, melior procul ab domo futurus uterque miles, velut mutuis pignoribus obligati, stipendia facerent. Tredecim millia octin-

gentos quinquaginta pedites cætratos misit in Afri- U. C. 534.
cam, et funditores Baliares octingentos septuaginta: A. C. 218.
equites mixtos ex multis gentibus mille ducentos.
Has copias partim Karthagini præsidio esse, partim
distribui per Africam jubet: simul conquisitoribus
in civitates missis, quatuor millia conscripta delectæ
juventutis, præsidium eosdem et obsides, duci Kar-
thaginem jubet.

XXII. Neque Hispaniam negligendam ratus,
(atque ideo haud minus, quod haud ignarus erat,
circumitam ab Romanis eam legatis ad sollicitandos
principum animos) Hasdrubali fratri, viro inpigro,
eam provinciam destinat, firmatque eum Africis
maxime præsiidiis, peditum Afrorum undecim milli-
bus octingentis quinquaginta, Liguribus trecentis,
Baliaribus quingentis: ad hæc peditum auxilia ad-
diti equites Libyphœnices (mixtum Punicum Afris
genus) trecenti, et Numidæ Maurique adcolæ Ocea-
ni ad mille octingentos, et parva Ilergetum manus
ex Hispania, ducenti equites: et, ne quid terrestris
deesset auxilii genus, elephanti quatuordecim: clas-
sis præterea data ad tuendam maritimam oram,
(quia, qua parte belli vicerant, ea tum quoque rem
gesturos Romanos, credi poterat) quinquaginta quin-
queremes, quadriremes duæ, triremes quinque: sed
aptæ instructæque remigio triginta et duæ quinque-
remes erant, et triremes quinque. Ab Gadibus
Karthaginem ad hiberna exercitus rediit: atque
inde, profectus præter Etovissam urbem, ad Ibe-
rum maritimamque oram ducit. Ibi, fama est, in
quiete visum ab eo juvenem divina specie, qui *se ab
Jove diceret ducem in Italiam Hannibali missum*: Somnium
proinde sequeretur, neque usquam a se deflecteret ocu- Hannibalis.

U. C. 534. *los.* Pavidum primo, nusquam circumspicientem aut
 A. C. 218. respicientem, secutum; deinde, cura humani ingenii,
 quum, quidnam id esset, quod respicere vetitus esset,
 agigaret animo, temperare oculis nequivisse; tum
 vidisse, post sese serpentem mira magnitudine cum
 ingenti arborum ac virgultorum strage ferri, ac post
 insequi cum fragore cœli nimbum: tum, *quæ moles*
ea, quidve prodigii esset, quærentem audisse: *Vasti-*
tatem Italiæ esse: pergeret porro ire, nec ultra inqui-
reret, sineretque fata in occulto esse.

Hannibal
 Iberum
 transit.

Pyrenæ-
 um sal-
 tum su-
 perat.

XXIII. Hoc visu lætus tripartito Iberum copias
 trajecit, præmissis, qui Gallorum animos, qua tradu-
 cendus exercitus erat, donis conciliarent, Alpiumque
 transitus specularentur: nonaginta millia peditum,
 duodecim millia equitum Iberum traduxit. Ilergetes
 inde, Bargusiosque, et Ausetanos, et Lacetaniam,
 quæ subjecta Pyrenæis montibus est, subegit: oræ-
 que huic omni præfecit Hannonem, ut fauces, quæ
 Hispanias Galliis jungunt, in potestate essent. De-
 cem millia peditum Hannoni ad præsidium obti-
 nendæ regionis data, et mille equites. Postquam
 per Pyrenæum saltum traduci exercitus est cœptus,
 rumorque per barbaros manavit certior de bello Ro-
 mano; tria millia inde Carpetanorum peditum iter
 averterunt: constabat, non tam bello motos, quam
 longinquitate viæ insuperabilique Alpium transitu.
 Hannibal, quia revocare aut vi retinere eos anceps
 erat, ne ceterorum etiam feroces animi irritarentur,
 supra septem millia hominum domos remisit, quos
 et ipse gravari militia senserat, Carpetanos quoque
 ab se dimissos simulans.

XXIV. Inde, ne mora atque otium animos sol-
 licitent, cum reliquis copiis Pyrenæum transgre-

ditur, et ad oppidum Illiberi castra locat. Galli U. C. 534.
A. C. 218. quamquam Italiæ bellum inferri audiebant, tamen, quia vi subactos trans Pyrenæum Hispanos fama erat, præsidiaque valida inposita, metu servitutis ad arma consternati, Ruscinonem aliquot populi conveniunt: quod ubi Hannibali nunciatum est, mo- Gallos sibi
conciliat. ram magis, quam bellum, metuens, oratores ad regulos eorum misit, *conloqui semet ipsum velle cum his; et vel illi propius Illiberi accederent, vel se Ruscinonem processurum, ut ex propinquo congressus faciliior esset: nam et accepturum eos in castra sua se latum, nec cunctanter se ipsum ad eos venturum. Hospitem enim se Galliæ, non hostem, advenisse: nec stricturum ante gladium, si per Gallos liceat, quam in Italiam venisset.* Et per nuncios quidem hæc. Ut vero reguli Gallorum, castris ad Illiberim extemplo motis, haud gravate ad Pœnum venerunt; capti donis, cum bona pace exercitum per fines suos præter Ruscinonem oppidum transmiserunt.

XXV. In Italiam interim nihil ultra, quam Iberum transisse Hannibalem, a Massiliensium legatis Romam perlatum erat: quum perinde, ac si Alpes jam transisset, Boii, sollicitatis Insubribus, defece- Boii in Ita-
lia rebel-
lant. runt; nec tam ob veteres in populum Romanum iras, quam quod nuper circa Padum, Placentiam Cremonamque colonias in agrum Gallicum deductas ægre patiebantur. Itaque, armis repente adreptis, in eum ipsum agrum inpetu facto, tantum terroris ac tumultus fecerunt, ut non agrestis modo multitudo, sed ipsi triumviri Romani, qui ad agrum venerant adsignandum, diffusi Placentiæ mœnibus, Mutinam confugerint, C. Lutatius, C. Servilius, T.

U. C. 534. Annius. Lutatii nomen haud dubium est : pro C.

A. C. 218. Servilio et T. Annio, Q. Acilium et C. Herennium habent quidam annales : alii P. Cornelium Asinam et C. Papirium Masonem. Id quoque dubium est, legati, ad expostulandum missi ad Boios, violati sint, an in triumviros agrum metantes inpetus sit factus. Mutinæ quum obsiderentur, et gens, ad obpugnandarum urbium artes rudis, pigerrima eadem ad militaria opera, segnis intactis adsideret muris, simulari cœptum de pace agi : evocatique ab Gallorum principibus legati ad conloquium, non contra jus modo gentium, sed violata etiam, quæ data in id tempus erat, fide, comprehenduntur ; negantibus Gallis, nisi obsides sibi redderentur, eos dimissuros. Quum hæc de legatis nunciata essent, et Mutina præsidiumque in periculo esset, L. Manlius prætor, ira accensus, effusum agmen ad Mutinam ducit. Silvæ tunc circa viam erant, plerisque incultis : ibi, inexplorato profectus, in insidias præcipitatus, multaque cum cæde suorum ægre in apertos campos emersit : ibi castra communita ; et, quia Gallis ad tentanda ea defuit spes, refectioni sunt militum animi, quamquam adcisas res satis constabat. Iter deinde de integro cœptum ; nec, dum per patentia loca ducebatur agmen, adparuit hostis ; ubi rursus silvæ intratæ, tum postremos adorti, cum magna trepidatione ac pavore omnium, octingentos milites occiderunt, sex signa ademere. Finis et Gallis territandi, et pavendi Romanis fuit, ut e saltu invio atque inpedito evasere : inde, apertis locis facile tutantes agmen, Romani Tanetum, vicum propinquum Pado, contendere : ibi se munimento

Manlius
prætor
male rem
gerit.

ad tempus commeatibusque fluminis et Brixianorum U. C. 534.
 Gallorum auxilio, adversus crescentem in dies mul- A. C. 218.
 titudinem hostium, tutabantur.

XXVI. Qui tumultus repens postquam est Ro-
 mam perlatus, et Punicum insuper Gallico bello
 auctum Patres acceperunt; C. Atilium prætorem
 cum una legione Romana et quinque millibus socio-
 rum, delectu novo a consule conscriptis, auxilium
 ferre Manlio jubent: qui sine ullo certamine (abs-
 cesserant enim metu hostes) Tanetum pervenit.

Et P. Cornelius, in locum ejus, quæ missa cum
 prætore fuerat, transcripta legione nova, profectus
 ab urbe sexaginta longis navibus, præter oram
 Etruriæ Ligurumque, et inde Salyum montes, per-
 venit Massiliam, et ad proximum ostium Rhodani

P. Corne-
 lius cos.
 cum classe
 pervenit
 Massiliam.

(pluribus enim divisus amnis in mare decurrit) ca-
 stra locat: vixdum satis credens, Hannibalem su-
 perasse Pyrenæos montes: quem ut de Rhodani
 quoque transitu agitare animadvertit, incertus, quo-
 nam ei loco obcurreret, necdum satis reffectis ab
 jactatione maritima militibus, trecentos interim de-
 lectos equites, ducibus Massiliensibus et auxiliari-
 bus Gallis, ad exploranda omnia visendosque ex
 tuto hostes præmittit. Hannibal, ceteris metu aut

Hannibal
 ad Rhoda-
 num.

pretio pacatis, jam in Volcarum pervenerat agrum,
 gentis validæ. Colunt autem circa utramque ripam
 Rhodani: sed, diffusi citeriore agro arceri Pœnum
 posse, ut flumen pro munimento haberent, omnibus
 ferme suis trans Rhodanum trajectis, ulteriorem
 ripam amnis armis obtinebant. Ceteros adcolas
 fluminis Hannibal, et eorum ipsorum quos sedes
 tenuerant, simul perlicit donis ad naves undique
 contrahendas fabricandasque: simul et ipsi trajici

U. C. 534. exercitum, levatique quamprimum regionem suam
 A. C. 218. tanta urgente hominum turba cupiebant. Itaque
 ingens coacta vis navium est lintriumque temere ad
 vicinalem usum paratarum: novasque alias primum
 Galli inchoantes cavabant ex singulis arboribus:
 deinde et ipsi milites, simul copia materiæ, simul
 facilitate operis inducti, alveos informes, (nihil,
 dummodo innare aquæ et capere onera possent, cu-
 rantes) quibus se suaque transveherent, raptim fa-
 ciebant.

Hanniba-
 lis strata-
 gema.

XXVII. Jamque omnibus satis comparatis ad
 trajiciendum, terrebant ex adverso hostes, omnem
 ripam equites virique obtinentes: quos ut averteret,
 Hannonem, Bomilcaris filium, vigilia prima noctis,
 cum parte copiarum, maxime Hispanis, adverso
 flumine ire iter unius diei jubet; et, ubi primum
 possit, quam occultissime trajecto amni, circumdu-
 cere agmen, ut, quum opus facto sit, adoriatur ab
 tergo hostem. Ad id dati duces Galli edocent, inde
 millia quinque et viginti ferme supra, parvæ insulæ
 circumfusum amnem, latiore, ubi dividebatur, eo-
 que minus alto alveo, transitum ostendere: ibi rap-
 tim cæsa materia ratesque fabricatæ, in quibus equi
 virique et alia onera trajicerentur. Hispani sine
 ulla mole, in utres vestimentis conjectis, ipsi cætris
 subpositis incubantes, flumen tranavere. Et alius
 exercitus, ratibus junctis trajectus, castris prope
 flumen positis, nocturno itinere atque operis labore
 fessus, quiete unius diei reficitur, intento duce ad
 consilium opportune exsequendum. Postero die,
 profecti ex loco, prodito fumo significant, se trans-
 isse, et haud procul abesse: quod ubi accepit Han-
 nibal, ne tempori deesset, dat signum ad trajicien-

dum. Jam paratas aptatasque habebat pedes lin- U. C. 534.
 tres : equites fere propter equos nantes navium ag- A. C. 218.
 men, ad excipiendum adversi inpetum fluminis parte Trajicit Rhoda-
 superiore transmittens, tranquillitatem infra traji- num.
 cientibus lintribus præbebat. Equorum pars mag-
 na nantes loris a puppibus trahebantur, præter eos,
 quos instructos frenatosque, ut extemplo egresso in
 ripam equiti usui essent, inposuerant in naves.

XXVIII. Galli obscurant in ripam cum variis
 ululatibus cantuque moris sui, quatientes scuta su-
 per capita, vibrantesque dextris tela : quamquam et
 ex adverso terrebat tanta vis navium cum ingenti
 sono fluminis et clamore vario nautarum et mili-
 tum, qui nitebantur perrumpere inpetum fluminis,
 et qui ex altera ripa trajicientes suos hortabantur.
 Jam satis paventes adverso tumultu terribilior ab
 tergo adortus clamor, castris ab Hannone captis :
 mox et ipse aderat, ancepsque terror circumstabat,
 et e navibus tanta vi armatorum in terram evadente,
 et ab tergo improvisa premente acie. Galli, post-
 quam, ultro vim facere conati, pellebantur, qua pa-
 tere visum maxime iter, perrumpunt, trepidique in
 vicos passim suos diffugiunt. Hannibal, ceteris
 copiis per otium trajectis, spernens jam Gallicos
 tumultus, castra locat. Elephantorum trajiciendo- Elephanti
 rum varia consilia fuisse credo : certe variata me- quomodo
 moria actæ rei : quidam, congregatis ad ripam ele- trajecti.
 phantis, tradunt, ferocissimum ex iis irritatum ab
 rectore suo, quem refugientem in aquam nantem
 sequeretur, traxisse gregem, ut quemque timentem
 altitudinem destituerat vadum, inpetu ipso fluminis
 in alteram ripam rapiente. Ceterum magis constat,
 ratibus trajectos id ut tutius consilium ante reta

U. C. 534. foret, ita, acta re, ad fidem pronius est. Ratem
 A. C. 218. unam, ducentos longam pedes, quinquaginta latam,
 a terra in amnem porrexerunt: quam, ne secunda
 aqua deferretur, pluribus validis retinaculis parte
 superiore ripæ religatam, pontis in modum humo
 injecta constraverunt; ut belluæ audacter velut per
 solum ingrederentur: altera ratis, æque lata, longa
 pedes centum, ad trajiciendum flumen apta, huic
 copulata est: et quum elephanti, per stabilem ra-
 tem, tamquam viam, prægredientibus feminis, acti,
 in minorem adplicatam transgressi sunt; extemplo
 resolutis, quibus leviter adnexa erat, vinculis, ab
 actuariis aliquot navibus ad alteram ripam pertra-
 hitur: ita primis expositis, alii deinde repetiti ac
 trajecti sunt. Nihil sane trepidabant, donec con-
 tinenti velut ponte agerentur: primus erat pavor,
 quum, soluta ab ceteris rate, in altum raperentur:
 ibi, urgentes inter se, cedentibus extremis ab aqua,
 trepidationis aliquantum edebant; donec quietem
 ipse timor circumspectantibus aquam fecisset: ex-
 cidere etiam sævientes quidam in flumen: sed, pon-
 dere ipso stabiles, dejectis rectoribus, quærendis
 pedetentim vadis, in terram evasere.

XXIX. Dum elephanti trajiciuntur, interim Han-
 nibal Numidas equites quingentos ad castra Romana
 miserat speculatum, ubi, et quantæ copiæ essent, et
 quid pararent. Huic alæ equitum missi, ut ante
 dictum est, ab ostio Rhodani trecenti Romanorum
 equites obcurrunt: prælium atrocius, quam pro nu-
 mero pugnantium, editur. Nam præter multa vul-
 nera, cædes etiam prope par utrimque fuit: fugaque
 et pavor Numidarum Romanis, jam admodum fes-
 sis, victoriam dedit: victores ad centum sexaginta,

Equestre
 prælium
 inter Nu-
 midas et
 Rom.

nec omnes Romani, sed pars Gallorum : victi amplius ducenti ceciderunt. Hoc principium simul omenque belli, ut summæ rerum prosperum eventum, ita haud sane incruentam ancipitisque certaminis victoriam, Romanis portendit. Ut, re ita gesta, ad utrumque ducem sui redierunt, nec Scipioni stare sententia poterat, nisi ut ex consiliis cœptisque hostis et ipse conatus caperet : et Hannibalem incertum, utrum cœptum in Italiam intenderet iter, an cum eo, qui primus se obtulisset Romanus exercitus, manus consereret, avertit a præsentī certamine Boiorum legatorum regulique Magali adventus : qui se duces itinerum, socios periculi fore, adfirmantes, integro bello, nusquam ante libatis viribus, Italiam adgrediendam censent. Multitudo timebat quidem hostem, nondum oblitterata memoria superioris belli : sed magis iter inmensum Alpesque, rem fama utique inexpertis horrendam, metuebat.

XXX. Itaque Hannibal, postquam ipsi sententia stetit pergere ire, atque Italiam petere, advocata concione, varie militum versat animos castigando adhortandoque. *Mirari se, quinam pectora semper inpavida repens terror invaserit : per tot annos vincentes eos stipendia facere ; neque ante Hispania excessisse, quam omnes gentesque et terræ eæ, quas duo diversa maria amplectantur, Karthaginiensium essent. Indignatos deinde, quod, quicumque Saguntum obse- dissent, velut ob noxam, sibi dedi postularet populus Romanus, Iberum trajecisse ad delendum nomen Romanorum, liberandumque orbem terrarum. Tum nemini visum id longum, quum ab occasu solis ad exortus intenderent iter. Nunc, postquam multo majorem par-*

U. C. 534.

A. C. 219.

Hannibal
hortatur
milites.

U. C. 534. *tem itineris emensam cernant, Pyrenæum saltum inter*
 A. C. 218. *ferocissimas gentes superatum, Rhodanum, tantum am-*
nem, tot millibus Gallorum prohibentibus, domita etiam
ipsius fluminis vi, trajectum, in conspectu Alpes ha-
beant, quarum alterum latus Italiæ sit; in ipsis portis
hostium fatigatos subsistere, quid Alpes aliud esse cre-
dentes, quam montium altitudines? Fingerent altiores
Pyrenæi jugis: nullas profecto terras cælum contin-
gere, nec inexcuperabiles humano generi esse. Alpes
quidem habitari, coli, gignere atque alere animantes:
pervias paucis esse, exercitibus invias? eos ipsos, quos
cernant, legatos non pennis sublime elatos Alpes trans-
gressos: ne majores quidem eorum indigenas; sed ad-
venas Italiæ cultores, has ipsas Alpes ingentibus sæpe
agminibus cum liberis ac conjugibus, migrantium modo,
tuto transmisisse. Militi quidem armato, nihil secum
præter instrumenta belli portanti, quid invium aut in-
excuperabile esse? Saguntum ut caperetur, quid per
octo menses periculi, quid laboris exhaustum esse?
Romam, orbis terrarum caput, petentibus quidquam
adeo asperum atque arduum videri, quod inceptum
moretur? Cepisse quondam Gallos ea, quæ adiri posse
Pænus desperet: proinde aut cederent animo atque
virtute genti, per eos dies toties ab se victæ: aut iti-
neris finem sperent campum interjacentem Tiberi ac
mænibus Romanis.

Mediterranea Gal-
 liæ petit.

XXXI. His adhortationibus incitatos corpora
 curare, atque ad iter se parare jubet. Postero die,
 profectus adversa ripa Rhodani, mediterranea Gal-
 liæ petit: non quia rectior ad Alpes via esset, sed,
 quantum a mari recessisset, minus obvium fore Ro-
 manum credens: cum quo, priusquam in Italiam
 ventum foret, non erat in animo manus conserere.

Quartis castris ad Insulam pervenit: ibi Arar Rhodanusque amnes, diversis ex Alpibus decurrentes, agri aliquantum amplexi, confluunt in unum. Mediis campis Insulæ nomen inditum. Incolunt prope Allobroges, gens jam inde nulla Gallica gente opibus aut fama inferior: tum discors erat. Regni certamine ambigebant fratres: major, et qui prius imperitarat, Brancus nomine, minore ab fratre et cœtu juniorum, qui jure minus, vi plus poterant, pellebatur. Hujus seditionis peropportuna disceptatio quum ad Hannibalem rejecta esset, arbiter regni factus, quod ea senatus principumque sententia fuerat, imperium majori restituit: ob id meritum commeatu copiaeque rerum omnium, maxime vestis, est adjunctus, quam infames frigoribus Alpes præparari cogebant. Sedatis certaminibus Allobrogum, quum jam Alpes peteret, non recta regione iter instituit; sed ad lævam in Tricastinos flexit; inde per extremam oram Vocontiorum agri tetendit in Tricorios: haud usquam inpedita via, priusquam ad Druentiam flumen pervenit. Is et ipse Alpinus amnis longe omnium Galliæ fluminum difficillimus transitu est: nam, quum aquæ vim vehat ingentem, non tamen navium patiens est: quia nullis coercitus ripis, pluribus simul, neque iisdem alveis fluens, nova semper vada novosque gurgites faciens, (et ob eadem pediti quoque incerta via est) ad hæc saxa glareosa volvens, nihil stabile nec tutum ingredienti præbet; et tum, forte imbribus auctus, ingentem transgredientibus tumultum fecit, quum super cetera trepidatione ipsi sua atque incertis clamoribus turbarentur.

U. C. 534.

A. C. 218.

Druentia
amnis.

XXXII. P. Cornelius consul, triduo fere post, quam Hannibal ab ripa Rhodani movit, quadrato

P. Cornelius classe
in Italiam
redit.

U. C. 594. agmine ad castra hostium venerat, nullam dimi-
 A. C. 218. candi moram factururus : ceterum, ubi deserta muni-
 menta, nec facile se tantum prægressos adsecutu-
 rum videt ; ad mare ac naves rediit, tutius facilius-
 que ita descendentem ab Alpibus Hannibali obcursum.
 Hannibal transit Alpes. Ne tamen nuda auxiliis Romanis Hispania
 esset, quam provinciam sortitus erat, Cn. Scipionem
 fratrem cum maxima parte copiarum adversus Has-
 drubalem misit ; non ad tuendos tantummodo ve-
 teres socios conciliandosque novos, sed etiam ad
 pellendum Hispania Hasdrubalem : ipse cum ad-
 modum exiguis copiis Genuam repetit, eo, qui circa
 Padum erat, exercitu Italiam defensurus. Hanni-
 bal ab Druentia campestri maxime itinere cum bona
 pace ad Alpes incolentium ea loca Gallorum perve-
 nit. Tum, quamquam fama prius (qua incerta in
 majus vero ferri solent) præcepta res erat, tamen
 ex propinquo visa montium altitudo, nivesque cœlo
 prope inmixtæ, tecta informia inposita rupibus, pe-
 cora jumentaue torrida frigore, homines intonsi et
 inculti, animalia inanimaue omnia rigentia gelu,
 cetera visu, quam dictu, fœdiora, terrorem renova-
 runt. Erigentibus in primos agmen clivos adparue-
 runt imminentes tumulos insidentes montani : qui,
 si valles occultiores insedissent, coorti in pugnam
 repente, ingentem fugam stragemque dedissent.
 Hannibal consistere signa jubet ; Gallisque ad vi-
 senda loca præmissis, postquam comperit, transitum
 ea non esse, castra inter confragosa omnia prærup-
 taue, quam extentissima potest valle, locat. Tum
 per eosdem Gallos, haud sane multum lingua mori-
 busque abhorrentes, quum se inniscuissent conlo-
 quiis montanorum, edoctus interdum tantum obsideri

saltum, nocte in sua quemque dilabi tecta; luce pri- U. C. 534.
 ma subiit tumulos, ut ex aperto atque interdiu vim A. C. 218.
 per angustias facturus. Die deinde simulando aliud,
 quam quod parabatur, consumto, quum eodem quo
 constiterant, loco castra communissent, ubi primum
 degressos tumulis montanos laxatasque sensit cus-
 todias, pluribus ignibus, quam pro numero manen-
 tium, in speciem factis, impedimentisque cum equite
 relictis, et maxima parte peditum; ipse cum expe-
 ditis, acerrimo quoque viro, raptim angustias eva-
 dit: iisque ipsis tumulis, quos hostes tenuerant,
 consedit.

XXXIII. Prima deinde luce castra mota, et ag-
 men reliquum incedere cœpit. Jam montani signo
 dato ex castellis ad stationem solitam convenie-
 bant; quum repente conspiciunt alios, arce occu-
 pata sua, super caput imminentes, alios via transire
 hostes. Utraque simul objecta res oculis animisque
 immobiles parumper eos defixit: deinde ut trepida-
 tionem in angustiis, suoque ipsum tumultu misceri
 agmen videre, equis maxime consternatis, quidquid
 adjecissent ipsi terroris, satis ad perniciem fore rati,
 perversis rupibus juxta invia ac devia adsueta dis-
 currunt. Tum vero simul ab hostibus, simul ab
 iniquitate locorum Pœni obpugnabantur; plusque
 inter ipsos, (sibi quoque tendente, ut periculo prius
 evaderet) quam cum hostibus, certaminis erat. Equi
 maxime infestum agmen faciebant, qui et clamori-
 bus dissonis, quos nemora etiam repercussæque val-
 les augebant, territi trepidabant; et icti forte aut
 vulnerati adeo consternabantur, ut stragem ingen-
 tem simul hominum ac sarcinarum omnis generis
 facerent: multosque turba, quum præcipites de-

U. C. 534. ruptæque utrimque angustiae essent, in inmensum
 A. C. 218. altitudinis dejecit; quosdam et armatos: sed ruinæ
 maximæ modo jumenta cum oneribus devolveban-
 tur. Quæ quamquam fœda visu erant, stetit pa-
 rumper tamen Hannibal, ac suos continuit, ne tu-
 multum ac trepidationem augetet: deinde postquam
 interrumpi agmen vidit, periculumque esse, ne exu-
 tum impedimentis exercitum nequidquam incolumem
 traduxisset, decurrit ex superiore loco; et, quum
 inpetu ipso fudisset hostem, suis quoque tumultum
 auxit: sed is tumultus momento temporis, postquam
 liberata itinera fuga montanorum erant, sedatur:
 nec per otium modo, sed prope silentio, mox omnes
 traducti. Castellum inde, quod caput ejus regionis
 erat, viculosque circumjectos capit, et captivorum
 pecoribus per triduum exercitum aluit: et quia nec
 montanis primo percussis, nec loco magnopere in-
 pediebantur, aliquantum eo triduo viæ confecit.

XXXIV. Perventum inde ad frequentem cultori-
 bus alium, ut inter montana, populum: ibi non bello
 aperto, sed suis artibus, fraude, deinde insidiis est
 prope circumventus. Magno natu principes castel-
 lorum oratores ad Pœnum veniunt: *alienis malis,*
utili exemplo, doctos, memorantes, amicitiam malle,
quam vim experiri Pœnorum: itaque obedienter im-
perata facturos, commeatum itinerisque duces, et ad
fidem promissorum obsides acciperet. Hannibal nec
 temere credendo, nec adspernando, ne repudiati
 aperte hostes fierent, benigne quum respondisset;
 obsidibus, quos dabant, acceptis, et commeatu,
 quem in viam ipsi detulerant, usus, nequaquam ut
 inter pacatos, composito agmine duces eorum sequi-
 tur. Primum agmen elephanti et equites erant:

ipse post cum robore peditum, circumspectans sol- U. C. 534.
licitusque omnia, incedebat. Ubi in angustiores A. C. 218.
viam ex parte altera subjectam jugo insuper inmi-
nenti ventum est, undique ex insidiis barbari a
fronte, ab tergo coorti, cominus eminus petunt:
saxa ingentia in agmen devolvunt: maxima ab ter-
go vis hominum urgebat: in eos versa peditum
acies haud dubium fecit, quin, nisi firmata extrema
agminis fuissent, ingens in eo saltu accipienda clades
fuerit. Tunc quoque ad extremum periculi ac prope
perniciem ventum est: nam, dum cunctatur Hanni-
bal demittere agmen in angustias; quia non, ut ipse
equitibus præsidio erat, ita peditibus quidquam ab
tergo auxilii reliquerat; obscursantes per obliqua
montani, perrupto medio agmine, viam insedere;
noxque una Hannibali sine equitibus atque inpedi-
mentis acta est.

XXXV. Postero die, jam segnius intercursanti-
bus barbaris, junctæ copiæ, saltusque haud sine
clade (majore tamen jumentorum, quam hominum,
pernicie) superatus: inde montani pauciores jam,
et latrocinii magis quam belli more, concursabant;
modo in primum, modo in novissimum agmen, ut-
cumque aut locus opportunitatem daret, aut pro-
gressi morative aliquam occasionem fecissent. Ele-
phanti, sicut præcipites per artas vias magna mora
agebantur, ita tutum ab hostibus, quacumque in-
cederent, (quia insuetis adeundi propius metus erat)
agmen præbebant. Nono die in jugum Alpium per-
ventum est, per invia pleraque et errores, quos aut
ducentium fraus, aut, ubi fides iis non esset, temere
initæ valles a conjectantibus iter, faciebant. Bidu-
um in jugo stativa habita: fessisque labore ac pug-

U. C. 534. nando quies data militibus : jumenta^{que} aliquot,
 A. C. 218. quæ prolapsa in rupibus erant, sequendo vestigia
 agminis in castra pervenere. Fessis tædio tot ma-
 lorum nivis etiam casus, occidente jam sidere Ver-
 giliarum, ingentem terrorem adjecit. Per omnia
 nive oppleta quum, signis prima luce motis, segniter
 agmen incederet, pigritiaque et desperatio in om-
 nium vultu emineret; prægressus signa Hannibal
 in promontorio quodam, unde longe ac late pro-
 spectus erat, consistere jussis militibus Italiam osten-
 tat, subjectosque Alpini montibus Circumpadanos
 campos : *mæniaque eos tum transcendere non Italiæ
 modo, sed etiam urbis Romanæ : cetera plana, procli-
 via fore : uno, aut summum altero prælio arcem et
 caput Italiæ in manu ac potestate habituros.* Pro-
 cedere inde agmen cœpit; jam nihil ne hostibus
 quidem, præter parva furta per occasionem, tentan-
 tibus. Ceterum iter multo, quam in adscensu fuerat,
 (ut pleraque Alpium ab Italia sicut breviora, ita ad-
 rectiora sunt) difficilius fuit : omnis enim ferme via
 præceps, angusta, lubrica erat : ut neque sustinere
 se a lapsu possent; nec, qui paullulum titubassent,
 hædere afflictis vestigio suo; alique super alios, et
 jumenta et homines, occiderent.

XXXVI. Ventum deinde ad multo angustio-
 rem rupem, atque ita rectis saxis, ut ægre expeditus mi-
 les tentabundus, manibusque retinens virgulta ac
 stirpes circa eminentes, demittere sese posset. Na-
 tura locus jam ante præceps, recenti lapsu terræ in
 pedum mille admodum altitudinem abruptus erat.
 Ibi quum, velut ad finem viæ, equites constitissent,
 miranti Hannibali, quæ res moraretur agmen, nun-
 tiatur, rupem inviam esse : digressus deinde ipse ad

locum visendum: haud dubia res visa, quin per in- U. C. 534.
 via circa nec trita antea, quamvis longo ambitu, A. C. 218.
 circumduceret agmen. Ea vero via insuperabilis
 fuit: nam quum super veterem nivem intactam no-
 va modicæ altitudinis esset, molli nec præaltæ nivi
 facile pedes ingredientium insistebant: ut vero tot
 hominum jumentorumque incessu dilapsa est, per
 nudam infra glaciem fluentemque tabem liquescentis
 nivis ingrediebantur. Tetra ibi luctatio erat: ut a
 lubrica glacie, non recipiente vestigium, et in prono
 citius pede se fallente, et, seu manibus in adsurgen-
 do seu genu se adjuvissent, ipsis adminiculis prolap-
 sis, iterum corruissent, nec stirpes circa radices-
 ve, ad quas pede aut manu quisquam eniti pos-
 set, erant; ita in levi tantum glacie tabidaque nive
 volutabantur: jumenta secabant; interdum etiam,
 tum infimam ingredientia nivem, et prolapsa jactan-
 dis gravius in continendo ungulis, penitus perfringe-
 bant: ut pleraque, velut pedica capta, hærent in
 durata et alte concreta glacie.

XXXVII. Tandem, nequidquam jumentis atque
 hominibus fatigatis, castra in jugo posita, ægerrime
 ad id ipsum loco purgato: tantum nivis fodiendum
 atque egerendum fuit. Inde ad rupem muniendam,
 per quam unam via esse poterat, milites ducti, quum
 cædendum esset saxum, arboribus circa inmanibus Rupes igne
 et aceto
 mollita.
 dejectis detruncatisque, struem ingentem lignorum
 faciunt: eamque (quum et vis venti apta faciendo
 igni coorta esset) succendunt, ardentiaque saxa in-
 fuso aceto putrefaciunt. Ita torridam incendio ru-
 pem ferro pandunt, molliuntque amfractibus modicis
 clivos, ut non jumenta solum, sed elephantibus
 etiam, deduci possent. Quatriduum circa rupem

U. C. 534. consumtum, jumentis prope fame absumtis : nuda
 A. C. 218. enim fere cacumina sunt, et, si quid est pabuli,
 obruunt nives. Inferiora valles et apricos quosdam
 colles habent, rivosque prope silvas, et jam humano
 cultu digniora loca. Ibi jumenta in pabulum missa,
 et quies muniendo fessis hominibus data triduo :
 inde ad planum descensum, etiam locis mollioribus
 et adcolarum ingeniis.

Italiam
 ingreditur
 Hannibal.

XXXVIII. Hoc maxime modo in Italiam per-
 ventum est, quinto mense a Karthagine nova, (ut
 quidam auctores sunt) quinto decimo die Alpibus
 superatis. Quantæ copiae transgresso in Italiam
 Hannibali fuerint, nequaquam inter auctores con-
 stat : qui plurimum, centum millia peditum, viginti
 equitum fuisse scribunt ; qui minimum, viginti mil-
 lia peditum, sex equitum. L. Cincius Alimentus, qui
 captum se ab Hannibale scribit, maxime auctor me
 moveret, nisi confunderet numerum, Gallis Ligu-
 ribusque additis : cum his octoginta millia peditum,
 decem equitum, adducta in Italiam : (magis ad-
 fluxisse verisimile est, et ita quidam auctores sunt :)
 ex ipso autem audisse Hannibale, postquam Rho-
 danum transierit, triginta sex millia hominum, in-
 gentemque numerum equorum et aliorum jumente-
 rum amisisse in Taurinis, quæ Gallis proxima gens
 erat, in Italiam degresso. Id quum inter omnes
 constet, eo magis miror ambigi, quamam Alpes
 transierit : et vulgo credere, Penino, atque inde
 nomen et jugo Alpium inditum, transgressum. Cæ-
 lius per Cremonis jugum dicit transisse : qui ambo
 saltus eum non in Taurinos, sed per Salassos mon-
 tanos ad Libuos Gallos deduxissent. Nec verisimile
 est, ea tum ad Galliam patuisse itinera ; utique, quæ

ad Peninum ferunt, obsepta gentibus semigermanis U. C. 534.
 fuissent: neque, Hercule, montibus his (si quem A. C. 218.
 forte id movet) ab transitu Pœnorum ullo Veragri,
 incolæ jugi ejus, norunt nomen inditum; sed ab eo,
 quem, in summo sacratum vertice, Peninum mon-
 tani adpellant.

XXXIX. Peroportune ad principia rerum Tau-
 rinis, proximæ genti, adversus Insubres motum bel-
 lum erat: sed armare exercitum Hannibal, ut parti
 alteri auxilio esset, (in reficiendo maxime sentien-
 tem contracta ante mala) non poterat: otium ete-
 nim ex labore, copia ex inopia, cultus ex inluevie
 tabeque, squalida et prope efferata corpora varie
 movebant. Ea P. Cornelio consuli caussa fuit, quum Cornelius
 Pisas navibus venisset, exercitu a Manlio Atilioque cos. ei ob-
 accepto tirone, et in novis ignominiis trepido, ad viam ve-
 Padum festinandi; ut cum hoste nondum reffecto
 manum consereret: sed cum Placentiam consul ve-
 nit, jam ex stativis moverat Hannibal; Taurino-
 rumque unam urbem, caput gentis ejus, quia vo-
 lentis in amicitiam non veniebant, vi expugnarat:
 junxissetque sibi, non metu solum, sed etiam volun-
 tate, Gallos adcolas Padi; ni eos, circumspectantes
 defectionis tempus, subito adventus consulis obpres-
 sisset. Et Hannibal movit ex Taurinis, incertos,
 quæ pars sequenda esset, Gallos præsentem se se-
 cuturos ratus. Jam prope in conspectu erant exer-
 citus, convenerantque duces sicuti inter se nondum
 satis noti, ita jam inbutus uterque quadam admira-
 tione alterius. Nam Hannibalis et apud Romanos,
 jam ante Sagunti excidium, celeberrimum nomen
 erat: et Scipionem Hannibal eo ipso, quod adver-
 sus se dux potissimum lectus esset, præstantem vi-

U. C. 534. rum credebat: et auxerant inter se opinionem, Sci-
 A. C. 218. pio, quod, relictus in Gallia, obvius fuerat in Ita-
 liam transgresso Hannibali; Hannibal, et conatu
 tam audaci trajiciendarum Alpium, et effectum. Oc-
 cupavit tamen Scipio Padum trajicere, et, ad Tici-
 num amnem motis castris, prius, quam educeret in
 aciem, adhortandorum militum causa, talem ora-
 tionem exorsus est:

Cornelius
 milites
 suos ad-
 hortatur.

XL. *Si eum exercitum, milites, educerem in aciem, quem in Gallia mecum habui, supersedissem loqui apud vos: quid enim adhortari referret aut eos equites, qui equitatum hostium ad Rhodanum flumen egregie vicissent, aut eas legiones, cum quibus fugientem hunc ipsum hostem secutus, confessionem cedentis ac detractantis certamen pro victoria habui? Nunc, quia ille exercitus, Hispaniæ provinciæ scriptus, ibi cum fratre Cn. Scipione meis auspiciis rem gerit, ubi eum gerere senatus populusque Romanus voluit; ego, ut consulem ducem adversus Hannibalem ac Pænos haberetis, ipse me huic voluntario certamini obtuli; novo imperatori apud novos milites pauca verba facienda sunt. Ne genus belli, neve hostem ignoretis; cum iis est vobis, milites, pugnandum, quos terra marique priore bello vicistis: a quibus stipendium per viginti annos exegistis: a quibus capta belli præmia, Siciliam ac Sardiniam, habetis. Erit igitur in hoc certamine is vobis illisque animus, qui victoribus et victis esse solet. Nec nunc illi, quia audent, sed quia necesse est, pugnaturi sunt: nisi creditis, qui exercitu incolumi pugnam detractavere, eos, duabus partibus peditum equitumque in transitu Alpium amissis, (quum plures pene perierint, quam supersunt) plus spei nactos esse. At enim vauci quidem sunt, sed vigentes animis corporibusque,*

quorum robora ac vires vix sustinere vis ulla possit. U. C. 534.
Effigies, immo umbræ hominum, fame, frigore, inlu- A. C. 218.
vie, squalore enecti, contusi ac debilitati inter saxa
rupesque: ad hæc, præusti artus, nive rigentes nervi,
membra torrida gelu, quassata fractaque arma, claudi
ac debiles equi. Cum hoc equite, cum hoc pedite pug-
naturi estis: reliquias extremas hostium, non hostes,
habebitis. Ac nihil magis vereor, quam ne, vos quum
pugnaveritis, Alpes vicisse Hannibalem videantur. Sed
ita forsitan decuit, cum fæderum ruptore duce ac po-
pulo Deos ipsos, sine ulla humana ope, committere ac
profligare bellum: nos, qui secundum Deos violati su-
mus, commissum ac profligatum conficere.

XLI. Non vereor, ne quis me hoc vestri adhortandi
caussa magnifice loqui existimet; ipsum aliter animo
adfectum esse. Licuit in Hispaniam, provinciam meam,
quo jam profectus eram, cum exercitu ire meo: ubi et
fratrem consilii participem ac periculi socium haberem,
et Hasdrubalem potius, quam Hannibalem, hostem, et
minorem haud dubie molem belli: tamen, quum præ-
terveherer navibus Gallie oram, ad famam hujus hos-
tis in terram egressus, præmisso equitatu, ad Rhoda-
num movi castra. Equestri prælio, qua parte copia-
rum conserendi manum fortuna data est, hostem fudi:
peditum agmen, quod in modum fugientium raptim
agebatur, quia adsequi terra non poteram, regressus ad
naves, quanta maxima celeritate potui, tanto maris
terrarumque circuitu, in radicibus Alpium obviis fui.
Huic timendo hosti utrum, quum declinare certamen,
inprovisus incidisse videor, an obcurrere in vestigiis
ejus? lacessere ac trahere ad decernendum? Experiri
juvat, utrum alios repente Karthaginienses per viginti
annos terra ediderit: an iidem sint, qui ad Ægates

U. C. 534. *pugnaverunt insulas, et quos ab Eryce duodevicensis de-*
A. C. 218. *nariis æstimatos emisistis: et utrum Hannibal hic sit*
æmulus itinerum Herculis, ut ipse fert, an vectigalis
stipendiariusque et servus populi Romani a patre re-
lictus: quem nisi Saguntinum scelus agitare, respice-
ret profecto, si non patriam victam, domum certe, pa-
tremque, et fœdera Hamilcaris scripta manu: qui,
jussus a consule nostro, præsidium deduxit ab Eryce:
qui graves inpositas victis Karthaginiensibus leges fre-
mens mærensque accepit: qui decedere Sicilia, qui sti-
pendium populo Romano dare pactus est. Itaque vos
ego, milites, non eo solum animo, quo adversus alios
hostes soletis, pugnare velim; sed cum indignatione
quadam atque ira: velut si servos videatis vestros ar-
ma repente contra vos ferentes. Licuit ad Erycem
clausos, ultimo supplicio humanorum, fame interficere:
licuit victricem classem in Africam trajicere, atque in-
tra paucos dies sine ullo certamine Karthaginem delere.
Veniam dedimus precantibus: emisimus ex obsidione:
pacem cum victis fecimus: tutelæ deinde nostræ duxi-
mus, quum Africo bello urgerentur. Pro his inparti-
tis, furiosum juvenem sequentes, obpugnatum patriam
nostram veniunt. Atque utinam pro decore tantum
hoc vobis, et non pro salute, esset certamen: non de
possessione Siciliae ac Sardiniae, de quibus quondam
agebatur, sed pro Italia vobis est pugnandum: nec est
alius ab tergo exercitus, qui, nisi nos vincimus, hosti
obsistat; nec Alpes aliae sunt, quas dum superant, com-
parari nova possint præsidia: hic est obstandum, mi-
lites, velut si ante Romana mœnia pugnemus. Unus-
quisque se non corpus suum, sed conjugem ac liberos
parvos armis protegere putet: nec domesticas solum
agitet curas, sed idemtidem hoc animo reputet, nostras

nunc intueri manus senatum populumque Romanum : qualis nostra vis virtusque fuerit, talem deinde fortunam illius urbis ac Romani imperii fore.

U. C. 534.

A. C. 218.

XLII. Hæc apud Romanos consul. Hannibal, rebus prius, quam verbis, adhortandos milites ratus, circumdato ad spectaculum exercitu, captivos montanos vinctos in medio statuit; armisque Gallicis ante eorum pedes projectis, interrogare interpretem jussit, ecquis, si vinculis levaretur, armaque et equum victor acciperet, decertare ferro vellet? Quum ad unum omnes ferrum pugnamque poscerent, et dejecta in id sors esset, se quisque eum optabat, quem fortuna in id certamen legeret. Ut cujusque sors exciderat, alacer, inter gratulantes gaudio exsultans, cum sui moris tripudiis arma raptim capiebat: ubi vero dimicarent, is habitus animorum non inter ejusdem modo conditionis homines erat, sed etiam inter spectantes vulgo, ut non vincentium magis, quam bene morientium, fortuna laudaretur.

Hannibal
rebus prius,
quam ver-
bis, milites
hortatur.

XLIII. Dum sic aliquot spectatis paribus adfectos dimisisset, concione inde advocata, ita apud eos locutus fertur. Si, quem animum in alienæ sortis exemplo paullo ante habuistis, eundem mox in æstimanda fortuna vestra habueritis, vicimus, milites: neque enim spectaculum modo illud, sed quædam veluti imago vestræ conditionis erat. Ac nescio, an majora vincula majoresque necessitates vobis, quam captivis vestris, fortuna circumdederit. Dextra lævaque duo maria claudunt, nullam, ne ad effugium quidem, navem habentibus: circa Padus amnis, major Padus ac violentior Rhodano; ab tergo Alpes urgent, vix integris vobis ac vigentibus transitæ. Hic vincendum aut moriendum, milites, est, ubi primum hosti occurristis: et

Ejus ora-
tio.

U. C. 534. eadem fortuna, quæ necessitatem pugnandi inposuit,
A. C. 218. præmia vobis ea victoribus proponit, quibus ampliora
homines ne ab Diis quidem immortalibus optare solent.
Si Siciliam tantum ac Sardiniam, parentibus nostris
ereptas, nostra virtute recuperaturi essemus, satis ta-
men ampla pretia essent: quidquid Romani tot trium-
phis partum congestumque possident, id omne vestrum
cum ipsis dominis futurum est. In hanc tam opimam
mercedem, agite, cum Diis bene juvantibus arma capite.
Satis adhuc in vastis Lusitaniæ Celtiberiæque montibus,
pecora consecrando, nullum emolumentum tot laborum
periculorumque vestrorum vidistis: tempus est jam,
opulenta vos ac ditia stipendia facere, et magna operæ
pretia mereri, tantum itineris per tot montes fluminaque
et tot armatas gentes emensos. Hic vobis terminum
laborum fortuna dedit: hic dignam mercedem emeritis
stipendiis dabit. Nec, quam magni nominis bellum
est, tam difficilem existimaritis victoriam fore: sæpe
et contemptus hostis cruentum certamen edidit, et incliti
populi regesque perlevi momento victi sunt. Nam,
demto hoc uno fulgore nominis Romani, quid est, cur
illi vobis comparandi sint? Ut viginti annorum mili-
tiam vestram cum illa virtute, cum illa fortuna ta-
ceam; ab Herculis columnis, ab oceano terminisque
ultimis terrarum, per tot ferocissimos Hispaniæ et Gal-
liæ populos vincentes huc pervenistis: pugnabitis cum
exercitu tirone, hac ipsa æstate cæso, victo, circumses-
so a Gallis, ignoto adhuc duci suo, ignorantique ducem.
An me, in prætorio patris, clarissimi imperatoris, prope
natum, certe eductum, domitorem Hispaniæ Galliæque,
victorem eundem non Alpinarum modo gentium, sed
ipsarum, quod multo majus est, Alpium, cum semestri
hoc conferam duce, desertore exercitus sui? Cui si

quis, demtis signis, Pænos Romanosque hodie ostendat, U.C. 534.
ignoraturum certum habeo, utrius exercitus sit consul. A.C. 218.

*Non ego illud parvi æstimo, milites, quod nemo vestrum est, cujus non ante oculos ipse sæpe militare ali-
 quod ediderim facinus; cui non idem ego, virtutis
 spectator ac testis, notata temporibus locisque referre
 sua possim decora. Cum laudatis a me millies dona-
 tisque, alumnus prius omnium vestrum, quam impera-
 tor, procedam acie adversus ignotos inter se ignoran-
 tesque.*

XLIV. Quocumque circumtuli oculos, plena omnia
 video animorum ac roboris; veteranum peditem, gene-
 rosissimarum gentium equites frenatos et infrenatos,
 vos socios fidelissimos fortissimosque, vos Karthagini-
 enses, quum ob patriam, tum ob iram justissimam,
 pugnaturos. Inferimus bellum, infestisque signis de-
 scendimus in Italiam, tanto audacius fortiusque pugna-
 turi, quanto major spes, major est animus inferentis
 vim, quam arcentis. Accendit præterea animos et
 stimulat dolor, injuria, indignitas: ad supplicium de-
 poposcerunt me ducem primum, deinde vos omnes, qui
 Saguntum obpugnassetis: deditos ultimis cruciatibus
 adfecturi fuerunt. Crudelissima ac superbissima gens
 sua omnia suique arbitrii facit: cum quibus bellum,
 cum quibus pacem habeamus, se modum inponere
 æquum censet: circumscribit includitque nos terminis
 montium fluminumque, quos ne excedamus: neque eos,
 quos statuit, terminos observat. Ne transieris Iberum:
 ne quid rei tibi sit cum Saguntinis. Ad Iberum est
 Saguntum: nusquam te vestigio moveris. Parum est,
 quod veterrimas provinciâs meas Siciliam et Sardiniam
 adimis: etiam Hispanias? et inde cessero, in Africam
 transcendes. Transcendes autem, dico? duos consules

U. C. 534. *hujus anni, unum in Africam, alterum in Hispaniam*
 A. C. 218. *miserunt: nihil usquam nobis relictum est, nisi quod*
armis vindicarimus. Illis timidis et ignavis licet esse,
qui respectum habent, quos suus ager, sua terra, per
tuta ac pacata itinera fugientes, accipient: vobis ne-
cesse est fortibus viris esse, et, omnibus inter victoriam
mortemve certa desperatione abruptis, aut vincere, aut,
si fortuna dubitabit, in prælio potius, quam in fuga,
mortem obpetere. Si hoc bene fixum omnibus destina-
tamque in animo est, iterum dicam, vicistis: nullum
momentum ad vincendum homini ab Diis immortalibus
acrius datum est.

XLV. His adhortationibus quum utrimque ad certamen accensi militum animi essent, Romani ponte Ticinum jungunt, tutandique pontis caussa castellum insuper inponunt. Pœnus, opere occupatis hostibus, Maharbalem cum ala Numidarum, equitibus quingentis, ad depopulandos sociorum populi Romani agros mittit: Gallis parci quam maxime jubet, principumque animos sollicitari ad defectionem. Ponte perfecto, traductus Romanus exercitus in agrum Insubrium, quinque millia passuum a Victumviis consedit. Ibi Hannibal castra habebat: revocatoque propere Maharbale atque equitibus, quum instare certamen cerneret, nihil umquam satis dictum præmonitumque ad cohortandos milites ratus, vocatis ad concionem certa præmia pronuntiat, in quorum spem pugnarent. *Agrum sese daturum esse in Italia, Africa, Hispania, ubi quisque velit, immunem ipsi, qui accepisset, liberisque; qui pecuniam, quam agrum, maluisset, ei se argento satisfacturum: qui sociorum cives Karthaginienses fieri vellet, potestatem facturum: qui domos redire mal-*

Præmia
suis pro-
nuntiat
Hanni-
bal.

lent, daturum se operam, ne cuius suorum popularium U. C. 534.
mutatam secum fortunam esse vellent. Servis quoque A. C. 218.
 dominos prosecutis libertatem proponit, binaque
 pro his mancipia dominis se redditurum. Eaque ut
 rata scirent fore, agnum læva manu, dextera silicem
 retinens, si falleret, Jovem ceterosque precatus Deos,
 ita se mactarent, quemadmodum ipse agnum mac-
 tasset, secundum precationem caput pecudis saxo
 elisit. Tum vero omnes, velut Diis auctoribus in
 spem suam quisque acceptis, id moræ, quod non-
 dum pugnarent, ad potienda sperata rati, prælium
 uno animo et voce una poscunt.

XLVI. Apud Romanos haudquaquam tanta ala-
 critas erat, super cetera recentibus etiam territos
 prodigiis: nam et lupus intraverat castra, laniatis- Prodigia
 que obviis ipse intactus evaserat; et examen apum in castris
 in arbore prætorio imminente consederat. Quibus Romanis.
 procuratis, Scipio, cum equitatu jaculatoribusque
 expeditis profectus ad castra hostium, exque pro-
 pinquo copias, quantæ, et cuius generis essent, spe-
 culandas, obvius fit Hannibali, et ipsi cum equitibus
 ad exploranda circa loca progresso: neutri alteros
 primo cernebant: densior deinde incessu tot homi-
 num equorumque oriens pulvis signum propinquan-
 tium hostium fuit. Constitit utrumque agmen, et
 prælio sese expediebant. Scipio jaculatores et Gal-
 los equites in fronte locat; Romanos, sociorumque Pugna
 quod roboris fuit, in subsidiis. Hannibal frenatos equestris
 equites in medium accipit, cornua Numidis firmat. ad Tici-
num.
 Vixdum clamore sublato, jaculatores fugerunt inter
 subsidia ad secundam aciem: inde equitum certa-
 men erat aliquamdiu anceps: dein, quia turbabant
 equos pedites intermixti, multis labentibus ex equis,

U. C. 534. aut desilientibus, ubi suos premi circumventos vi-
 A. C. 218. dissent, jam magna ex parte ad pedes pugna ierat :
 donec Numidæ, qui in cornibus erant, circumvecti
 paullulum, ab tergo se ostenderunt. Is pavor per-
 culit Romanos, auxitque pavorem consulis vulnus,
 periculumque intercurso tum primum pubescentis fi-
 Cos. a filio lii propulsatum. Hic erit juvenis, penes quem per-
 servatus. fecti hujusce belli laus est, Africanus ob egregiam
 victoriam de Hannibale Pœnisque adpellatus. Fuga
 tamen effusa jaculatorum maxime fuit, quos primos
 Numidæ invaserunt. Alius confertus equitatus con-
 sulem in medium acceptum, non armis modo, sed
 etiam corporibus suis, protegens, in castra, nus-
 quam trepide neque effuse cedendo, reduxit. Ser-
 vati consulis decus Cœlius ad servum natione Ligu-
 rem delegat : malim equidem de filio verum esse,
 quod et plures tradidere auctores, et fama obti-
 nuit.

XLVII. Hoc primum cum Hannibale prælium
 fuit ; quo facile adparuit, et equitatu meliorem Pœ-
 num esse, et ob id campos patentes, quales sunt
 Ultra Pa- inter Padum Alpesque, bello gerendo Romanis ap-
 dum rece- tos non esse. Itaque proxima nocte, jussis militi-
 dunt Ro- bus vasa silentio conligere, castra ab Ticino mota,
 mani. festinatumque ad Padum est ; ut ratibus, quibus
 junxerat flumen, nondum resolutis, sine tumultu
 atque insectatione hostis, copias trajiceret. Prius
 Placentiam pervenere, quam satis sciret Hannibal
 ab Ticino profectos : tamen ad sexcentos morato-
 rum in citeriore ripa, segniter ratem solventes, ce-
 pit : transire non potuit pontem, ut extrema reso-
 luta erant, tota rate in secundam aquam labente.
 Cœlius auctor est, Magonem cum equitatu et His-

panis peditibus flumen extemplo transnasse; ipsum U. C. 534.
 Hannibalem per superiora Padi vada exercitum tra- A. C. 218.
 duxisse, elephantis in ordinem ad sustinendum in-
 petum fluminis obpositis. Ea peritis amnis ejus vix
 fidem fecerint: nam neque equites, armis equisque
 salvis, tantam vim fluminis superasse verisimile est,
 ut jam Hispanos omnes inflati transvexerint utres:
 et multorum dierum circuitu Padi vada petenda fue-
 rant, qua exercitus gravis impedimentis traduci pos-
 set. Potiores apud me auctores sunt, qui biduo vix
 locum rate jungendo flumini inventum tradunt; ea
 cum Magone equites Hispanorum expeditos præ-
 missos: dum Hannibal, circa flumen legationibus Sequitur
 Gallorum audiendis moratus, trajicit gravius pedi- eos Han-
 tum agmen, interim Mago equitesque ab transitu nibal.
 fluminis diei unius itinere Placentiam ad hostes
 contendunt. Hannibal paucis post diebus sex mil-
 lia a Placentia castra communivit, et postero die,
 in conspectu hostium acie directa, potestatem pug-
 næ fecit.

XLVIII. Insequenti nocte cædes in castris Ro-
 manis, tumultu tamen quam re major, ab auxiliari-
 bus Gallis facta est: ad duo millia peditum et du- Gallorum
 centi equites, vigilibus ad portas trucidatis, ad Han- pars magna
 nibalem transfugiunt: quos Pœnus benigne adlo- transfugi-
 cutus, et spe ingentium donorum accensos, in civi- unt ad
 tates quemque suas, ad sollicitandos popularium ani- Hanniba-
 mos dimisit. Scipio, cædem eam signum defectio- lem.
 nis omnium Gallorum esse ratus, contactosque eo
 scelere, velut injecta rabie, ad arma ituros; quam-
 quam gravis adhuc vulnere erat, tamen quarta vi- Scipio ad
 gilia noctis insequentis tacito agmine profectus ad Trebian
 Trebiam fluvium, in loca altiora collesque inpedi- recedit.

U. C. 534. tiores equiti castra movet. Minus, quam ad Tici-
 A. C. 218. num, fefellit: missisque Hannibal primum Numidis,
 deinde omni equitatu, turbasset utique novissimum
 agmen, ni aviditate prædæ in vacua Romana castra
 Numidæ devertissent. Ibi dum, perscrutantes loca
 omnia castrorum, nullo satis digno moræ pretio
 tempus terunt, emissus hostis de manibus est: et
 quum jam transgressos Trebiam Romanos, metan-
 tesque castra conspexissent, paucos moratorum oc-
 ciderunt, citra flumen interceptos. Scipio, nec vex-
 ationem vulneris in via jactanti ultra patiens, et
 collegam (jam enim et revocatum ex Sicilia audie-
 rat) ratus expectandum, locum, qui prope flumen
 tutissimus stativis est visus, delectum communiit.
 Nec procul inde Hannibal quum consedisset, quan-
 tum victoria equestri elatus, tantum anxius inopia,
 quæ per hostium agros euntem, nusquam præpara-
 tis com meatibus, major in dies excipiebat, ad Clasti-
 dium vicum, quo magnum frumenti numerum con-
 gesserant Romani, mittit: ibi quum vim pararent,
 spes facta proditiōis: nec sane magno pretio,
 nummis aureis quadringentis, Dasio Brundusino
 præfecto præsidii corrupto, traditur Hannibali Cla-
 stidium: id horreum fuit Pœnis sedentibus ad Tre-
 biam. In captivos ex tradito præsidio, ut fama cle-
 mentiæ in principio rerum conligeretur, nihil sævi-
 tum est.

Res circa
 Siciliam
 terra ma-
 rique
 gestæ.

XLIX. Quum ad Trebiam terrestre constitisset
 bellum, interim circa Siciliam insulasque Italiæ in-
 minentes, et a Sempronio consule, et ante adven-
 tum ejus, terra marique res gestæ: viginti quinque-
 remes cum mille armatis ad depopulandam oram
 Italiæ a Karthaginiensibus missæ, novem Liparas,

octo insulam Vulcani tenuerunt, tres in fretum U.C. 534.
 avertit æstus. Ad eas conspectas a Messana duo- A.C. 218.
 decim naves ab Hierone rege Syracusanorum mis-
 sæ, qui tum forte Messanæ erat, consulem Roma-
 num obperiens, nullo repugnante captas naves Mes-
 sanam in portum deduxerunt. Cognitum ex cap-
 tivis, præter viginti naves, cujus ipsi classis essent,
 in Italiam missas, quinque et triginta alias quinque-
 remes Siciliam petere ad sollicitandos veteres socios.
 Lilybæi occupandi præcipuam curam esse: credere
 eadem tempestate, qua ipsi disjecti forent, eam
 quoque classem ad Ægates insulas dejectam. Hæc
 sicut audita erant, rex M. Æmilio prætori, cujus
 Sicilia erat provincia, perscribit, monetque, Lily-
 bæum firmo teneret præsidio. Extemplo et circa
 prætorem ad civitates missi legati tribunique, qui
 suos ad curam custodiæ intenderent; ante omnia
 Lilybæum teneri: ad adparatum belli, edicto pro-
 posito, ut socii navales decem dierum cocta cibaria
 ad naves deferrent; ubi signum datum esset, ne
 quis moram conscendendi faceret: perque omnem
 oram qui erant, ex speculis prospicerent adventan-
 tem hostium classem. Simul itaque (quamquam de
 industria morati cursum navium erant Karthagini-
 enses, ut ante lucem accederent Lilybæum) præsen-
 sum tamen est, quia et luna pernox erat, et sublati
 armamenti veniebant; extemplo datum e speculis
 signum, et in oppido ad arma conclamatum est, et
 in naves consensum: pars militum in muris porta-
 rumque in stationibus, pars in navibus erant. Et
 Karthaginienses, quia rem fore haud cum inparatis
 cernebant, usque ad lucem portu se abstinuerunt,
 demendis armamenti eo tempore aptandaque ad

U. C. 534. pugnam classe absumpto. Ubi inluxit, recepere classem in altum, ut spatium pugnae esset, exitumque liberum e portu naves hostium haberent. Nec Romani detractavere pugnam, et memoria circa ea ipsa loca gestarum rerum freti, et militum multitudine ac virtute.

Pugna navalis ad Lilybaeum.

L. Ubi in altum evecti sunt, Romanus conserere pugnam, et ex propinquo vires conferre velle: contra eludere Pœnus, et arte, non vi, rem gerere, naviumque, quam virorum aut armorum, malle certamen facere: nam ut sociis navalibus adfatim instructam classem, ita inopem milite habebant: et, sicubi conserta navis esset, haudquaquam par numerus armatorum ex ea pugnabat. Quod ubi animadversum est, et Romanis multitudo sua auxit animum, et paucitas illis minuit. Extemplo septem naves Punicae circumventae; fugam ceterae ceperunt: mille et septingenti fuere in navibus capti, milites nautaeque; in his tres nobiles Karthaginiensium. Classis Romana incolumis, una tantum perforata navi, sed ea quoque ipsa reduce, in portum rediit. Secundum hanc pugnam, nondum gnaris ejus, qui Messanae erant, Ti. Sempronius consul Messanam venit. Ei fretum intranti rex Hieroclassem ornatam obviam duxit: transgressusque ex regia in praetoriam navem, gratulatus sospitem cum exercitu et navibus advenisse, precatusque prosperum ac felicem in Siciliam transitum; statum deinde insulae et Karthaginiensium conata exposuit: pollicitusque est, quo animo priore bello populum Romanum juvenis adjuvisset, eo senem adjuturum. Frumentum vestimenta que sese legionibus consulis sociisque navalibus gratis praebiturum: grande pe-

riculum Lilybæo maritimisque civitatibus esse, et quibusdam volentibus novas res fore. Ob hæc consuli nihil cunctandum visum, quin Lilybæum classe peteret; et rex regiaque classis una profecti: navigantes inde, pugnatum ad Lilybæum, fusasque et captas hostium naves, accepere.

LI. A Lilybæo consul, Hierone cum classe regia dimisso, relictoque prætore ad tuendam Siciliæ oram, ipse in insulam Melitam, quæ a Karthaginiensibus tenebatur, trajecit. Advenienti Hamilcar, Gisgonis filius, præfectus præsidii, cum paullo minus duobus millibus militum, oppidumque cum insula traditur: inde post paucos dies reditum Lilybæum, captivique et a consule et a prætore, præter insignes nobilitate viros, sub corona venierunt. Postquam ab ea parte satis tutam Siciliam censebat consul, ad insulas Vulcani (quia fama erat, stare ibi Punicam classem) trajecit: nec quisquam hostium circa eas insulas inventus. Jam forte transmiserant ad vastandam Italiæ oram: depopulatoque Vibonensi agro, urbem etiam terrebant. Repetenti Siciliam consuli exscensio hostium in agrum Vibonensem facta nunciatur: literæque ab senatu de transitu in Italiam Hannibalis, et, ut primo quoque tempore collegæ ferret auxilium, missæ traduntur. Multis simul anxius curis, exercitum, extemplo in naves inpositum, Ariminum supero mari misit: Sex. Pomponio legato cum viginti quinque longis navibus Vibonensem agrum maritimamque oram Italiæ tuendam adtribuit: M. Æmilio prætori quinquaginta navium classem explevit: ipse, compositis Siciliæ rebus, decem navibus oram Italiæ legens, Ariminum pervenit:

U. C. 534.
A. C. 218.

Sempro-
nius Meli-
tam capit.

Revocatur
in Italiam.

Ad colle-
gam venit.

U. C. 534. inde cum exercitu suo profectus ad Trebiam flumen,
A. C. 218. collegæ conjungitur.

LII. Jam ambo consules, et quidquid Romanarum virium erat, Hannibali obpositum, aut illis copiis defendi posse Romanum imperium, aut spem nullam aliam esse, satis declarabat. Tamen consul alter, equestri prælio uno et vulnere suo minutus, trahi rem malebat: recentis animi alter, eoque ferocior, nullam dilationem patiebatur. Quod inter Trebiam Padumque agri est, Galli tum incolebant; in duorum præpotentium populorum certamine, per ambiguum favorem, haud dubie gratiam victoris spectantes. Id Romani, ne quid modo moverent, æquo satis, Pænus periniquo animo ferebat, ab Gallis adcitum se venisse ad liberandos eos, dictitans. Ob eam iram, simul ut præda militem aleret, duo millia peditum et mille equites, Numidas plerosque, mixtos quosdam et Gallos, populari omnem deinceps agrum usque ad Padi ripas jussit. Egentes ope Galli, quum ad id dubios servassent animos, coacti ab auctoribus injuriæ ad vindices futuros declinant: legatisque ad consulem missis, auxilium Romanorum terræ, ob nimiam cultorum fidem in Romanos laboranti, orant. Cornelio nec caussa, nec tempus agendæ rei placebat: suspectaque ei gens erat, quum ob infida multa facinora, tum, ut alia vetustate obsolevissent, ob recentem Boiorum perfidiam. Sempronius contra, continendis in fide sociis maximum vinculum esse primos, qui eguissent ope, defensos, censebat. Tum, collega cunctante, equitatum suum, mille peditum jaculatoribus ferme admixtis, ad defendendum Gallicum agrum trans

Trebiā mittit. Ii, sparsos et incompósitos, ad hoc graves praeda plerosque, quum inopinatos invasissent, ingentem terrorem cædemque ac fugam usque ad castra stationesque hostium fecere: unde multitudine effusa pulsī, rursus subsidio suorum praelium restituere. Varia inde pugna sequentes, quamquam ad extremum æquassent certamen, major tamen hostium Romanis fama victoriæ fuit.

U. C. 534.

A. C. 218.

Praelium
equestre
dubium.

LIII. Ceterum nemini omnium major justiorque, quam ipsi consuli, videri; gaudio efferri, *qua parte copiarum alter consul victus foret, ea se vicisse: restitutos ac refectos militibus animos: nec quemquam esse, præter collegam, qui dilatam dimicationem vellet: eum, animo magis, quam corpore, ægrum, memoria vulneris aciem ac tela horrere. Sed non esse cum ægro senescendum. Quid enim ultra differri aut teri tempus? Quem tertium consulem, quem alium exercitum expectari? Castra Karthaginensium in Italia, ac prope in conspectu urbis esse: non Siciliam ac Sardiniam victis ademtas, nec cis Iberum Hispaniam peti, sed solo patrio terraque, in qua geniti forent, pelli Romanos. Quantum ingemiscant, inquit, patres nostri, circa mœnia Karthaginis bellare soliti, si videant nos, progeniem suam, duos consules consularesque exercitus, in media Italia paventes intra castra? Pœnum, quod inter Alpes Apenninumque agri sit, suæ ditionis fecisse? Hæc adsidens ægro collegæ, hæc in prætorio prope concionabundus agere. Stimulabat et tempus propinquum comitiorum, ne in novos consules bellum differretur, et occasio in se unum vertendæ gloriæ, dum æger collega erat. Itaque, nequidquam dissentiente Cornelio, parari ad propinquum certamen milites jubet. Hannibal, quum, quid optimum foret hosti, cerne-*

Sempro-
nius pug-
næ cupi-
dus.

U. C. 534. ret, vix ullam spem habebat, temere atque impro-
 A. C. 218. vide quidquam consules acturos: quum alterius ingenium, fama prius, deinde re cognitum, percitum ac ferox sciret esse, ferociusque factum prospero cum prædatoribus suis certamine crederet; adesse gerendæ rei fortunam haud diffidebat: cujus ne quod prætermitteret tempus, sollicitus intentusque erat, dum tiro hostium esset miles, dum meliorem ex du-cibus inutilem vulnus faceret, dum Gallorum animi vigerent: quorum ingentem multitudinem sciebat segnius secuturam, quanto longius ab domo trahe-rentur. Quum ob hæc taliaque speraret propinquum certamen, et facere, si cessaretur, cuperet; specula-toresque Galli ad ea exploranda, quæ vellet, tutiores, quia in utrisque castris militabant, paratos pugnæ esse Romanos retulissent; locum insidiis circum-spectare Pœnus cœpit.

Locum
 insidiis
 Hannibal
 circum-
 spectat.

LIV. Erat in medio rivus, præaltis utrimque clausus ripis, et circa obsitus palustribus herbis et, quibus inculta ferme vestiuntur, virgultis vepribus-que: quem ubi ad equites quoque tegendos satis latebrosum locum circumvectus ipse oculis perlu-stravit; *Hic erit locus*, Magoni fratri ait, *quem te-neas. Delige centenos viros ex omni pedite atque equite; cum quibus ad me vigilia prima venias. Nunc corpora curare tempus est.* Ita prætorium missum: mox cum delectis Mago aderat. *Robora virorum cer-no*, inquit Hannibal: *sed, ut et numero etiam, non animis modo, valeatis, singulis vobis novenos ex turmis manipulisque vestri similes eligite: Mago locum mon-strabit, quem insideatis. Hostem cæcum ad has belli artes habebitis.* Ita mille equitibus Magoni, mille peditibus dimissis, Hannibal prima luce Numidas

Pugna ad
 Trebiam.

equites, transgressos Trebiam flumen, obequitare U. C. 534.
 jubet hostium portis, jaculandoque in stationes eli- A. C. 218.
 cere ad pugnam hostem: injecto deinde certamine,

cedendo sensim citra flumen pertrahere. Hæc mandata Numidis: ceteris ducibus peditum equitumque præceptum, ut prandere omnes juberent: armatos deinde, instratisque equis, signum expectare. Sempronius, ad tumultum Numidarum primum omnem equitatum, ferox ea parte virium, deinde sex millia peditum, postremo omnes copias ad destinatum jam ante consilio, avidus certaminis, eduxit. Erat forte brumæ tempus et nivalis dies in locis Alpibus Apenninoque interjectis, propinquitate etiam fluminum ac paludium prægelidis: ad hoc raptim eductis hominibus atque equis, non capto ante cibo, non ope ulla ad arcendum frigus adhibita, nihil caloris inerat: et quidquid auræ fluminis adpropinquabant, adflabat acrior frigoris vis. Ut vero refugientes Numidas insequentes aquam ingressi sunt, (et erat pectoribus tenuis aucta nocturno imbri) tum utique egressis rigere omnibus corpora, ut vix armorum tenendorum potentia essent, et simul lassitudine procedente jam die, fame etiam deficere.

LV. Hannibalis interim miles, ignibus ante tentoria factis, oleoque per manipulos, ut mollirent artus, misso, et cibo per otium capto, ubi transgressos flumen hostes nunciatum est, alacer animis corporibusque arma capit, atque in aciem procedit. Baliares locat ante signa, levem armaturam, octo ferme millia hominum; dein graviores armis peditum, quod virium, quod roboris erat: in cornibus circumfudit decem millia equitum; et ab cornibus in utramque partem divisos elephantos statuit. Con-

U. C. 534. sul effusos sequentes equites, quum ab resistantibus
 A. C. 218. subito Numidis incauti exciperentur, signo receptui
 dato, revocatos circumdedit peditibus. Duodevigi-
 ginti millia Romani erant, socium nominis Latini
 viginti; auxilia præterea Cenomanorum: ea sola in
 fide manserat Gallica gens: his copiis concursum
 est. Prælium a Baliaribus ortum est; quibus quum
 majore robore legiones obsisterent, deductæ propere
 in cornua leves armaturæ sunt: quæ res effecit, ut
 equitatus Romanus extemplo urgeretur: nam quum
 vix jam per se resisterent decem millibus equitum
 quatuor millia, et fessi plerisque integris, obruti
 sunt insuper velut nube jaculorum a Baliaribus con-
 jecta: ad hoc elephanti, eminentes ab extremis cor-
 nibus, (equis maxime non visu modo, sed odore in-
 solito territis) fugam late faciebant. Pedestris pu-
 gna par animis magis quam viribus erat; quas re-
 centes Pœnus, paullo ante curatis corporibus, in
 prælium adtulerat: contra, jejuna fessaque corpora
 Romanis et rigentia gelu torpebant: restitissent ta-
 men animis, si cum pedite solum foret pugnatum.
 Sed et Baliares, pulso equite, jaculabantur in latera,
 et elephanti jam in mediam peditum aciem sese tu-
 lerant: et Mago Numidæque, simul latebras eorum
 inprovida præterlata acies est, exorti ab tergo in-
 gentem tumultum ac terrorem fecere. Tamen in tot
 circumstantibus malis mansit aliquamdiu inmotæ
 acies, maxime præter spem omnium adversus ele-
 phantos: eos velites, ad id ipsum locati, verutis
 conjectis et avertere, et insecuti aversos sub caudis,
 qua maxime molli cute vulnera accipiunt, fodie-
 bant.

LVI. Trepidantesque prope jam in suos conster-

natos media acie in extremam, ad sinistrum cornu, U. C. 534.
 adversus Gallos auxiliares agi jussit Hannibal. Ex- A. C. 218.
 templo hand dubiam fecere fugam: additus quoque
 novus terror Romanis, ut fusa auxilia sua viderunt.
 Itaque, quum jam in orbem pugnarent, decem mil- Vincuntur
 lia ferme hominum, quum alii evadere nequissent, Romani.
 media Afrorum acie, quæ Gallicis auxiliis firmata
 erat, cum ingenti cæde hostium perrupere: et, quum
 neque in castra reditus esset flumine interclusis, ne-
 que præ imbri satis decernere possent, qua suis
 opem ferrent, Placentiam recto itinere perrexere.
 Plures deinde in omnes partes eruptiones factæ; et,
 qui flumen petiere, aut gurgitibus absumti sunt, aut
 inter cunctationem ingrediendi ab hostibus obpres-
 si: qui passim per agros fuga sparsi erant, vestigia
 cedentis sequentes agminis, Placentiam contendere: Placentiam
 aliis timor hostium audaciam ingrediendi flumen fe- fugiunt.
 cit, transgressique in castra pervenerunt. Imber nive
 mixtus, et intoleranda vis frigoris, et homines mul-
 tos, et jumenta, et elephantos prope omnes, absum-
 sit. Finis insequendi hostis Pœnis flumen Trebia
 fuit: et ita torpentes gelu in castra rediere, ut vix
 lætitiâ victoriæ sentirent. Itaque nocte inse-
 quenti, quum præsidium castrorum, et quod reli-
 quum ex magna parte militum erat, ratibus Tre-
 biam trajicerent, aut nihil sensere, obstrepente plu-
 via; aut, quia jam moveri præ lassitudine nequi-
 bant ac vulneribus, sentire sese dissimularunt: qui-
 etisque Pœnis, tacito agmine ab Scipione consule
 exercitus Placentiam est perductus: inde Pado tra-
 jectus Cremonam, ne duorum exercituum hibernis
 una colonia premeretur.

LVII. Romam tantus terror ex hac clade perla-

U. C. 534.
A. C. 218.
Romæ tre-
pidatio.

Comitia
consularia.

tus est, ut jam ad urbem crederent infestis signis hostem venturum; nec quidquam spei aut auxilii esse, quo portis mœnibusque vim arcerent. *Uno consule ad Ticinum victo, altero ex Sicilia revocato, duobus consulibus, duobus consularibus exercitibus victis, quos alios duces, quas alias legiones esse, quæ arcessantur?* Ita territis Sempronius consul advenit, ingenti periculo per effusos passim ad prædandum hostium equites (audacia magis, quam consilio aut spe fallendi resistendive, si non falleret) transgressus. Id quod unum maxime in præsentia desiderabatur, comitiis consularibus habitis, in hiberna rediit. Creati consules Cn. Servilius et C. Flaminius. Ceterum ne hiberna quidem Romanis quietæ erant, vagantibus passim Numidis equitibus, et, qua his inpeditiona erant, Celtiberis Lusitanisque. Omnes igitur clausi undique commeatus erant, nisi quos Pado naves subveherent. Emporium prope Placentiam fuit, et opere magno munitum, et valido firmatum præsidio: ejus castelli obpugnandi spe cum equitibus ac levi armatura profectus Hannibal, quum plurimum in celando incepto ad effectum, spei habuisset, nocte adortus, non fefellit vigiles. Tantus repente clamor est sublatus, ut Placentiæ quoque audiretur. Itaque sub lucem cum equitatu consul aderat, jussis quadrato agmine legionibus sequi. Equestre prælium interim commissum: in quo, quia saucius Hannibal pugna excessit, pavore hostibus injecto, defensum egregie præsidium est. Paucorum inde dierum quiete sumta, et vixdum satis percurato vulnere, ad Victumvias ire pergit obpugnandas. Id emporium a Romanis Gallico bello fuerat munitum: inde locum frequentaverant adcolæ

mixti undique ex finitimis populis; et tum terror po-^{U. C. 534.}
pulationum eo plerosque ex agris compulerat. Hu-^{A. C. 218.}
jus generis multitudo, fama inpigre defensi ad Pla-
centiam præsidii accensa, armis adreptis obviam
Hannibali procedit. Magis agmina, quam acies, in
via concurrerunt; et, quum ex altera parte nihil,
præter inconditam turbam, esset, in altera et dux
militi, et duci fidens miles, ad triginta quinque mil-
lia hominum a paucis fusa. Postero die, deditione
facta, præsidium intra mœnia acceperè: jussique
arma tradere quum dicto paruissent, signum repente
victoribus datur, ut tamquam vi captam urbem di-
riperent: neque ulla, quæ in tali re memorabilis
scribentibus videri solet, prætermissa clades est:
adeo omnis libidinis, crudelitatisque, et inhumanæ
superbiæ editum in miseros est exemplum. Hæ fu-
ere hibernæ expeditiones Hannibalis.

LVIII. Haud longis inde temporibus, dum into-
lerabilia frigora erant, quies militi data est: et ad
prima ac dubia signa veris profectus ex hibernis,
in Etruriam ducit, eam quoque gentem, sicut Gal-
los Liguresque, aut vi aut voluntate adjuncturus.
Transeuntem Apenninum adeo atrox adorta tem-^{Transitum}
pestas est, ut Alpium foeditatem prope superaverit.^{Apennini}
Vento mixtus imber quum ferretur in ipsa ora, pri-^{tentat Han-}
mo, quia aut arma omittenda erant, aut contra eni-
tentes vortice intorti adfligebantur, constitere: dein,
quum jam spiritum includeret, nec reciprocare ani-
mam sineret, aversi a vento parumper consedere.
Tum vero ingenti sono cœlum strepere, et inter hor-
rendos fragores micare ignes: capti auribus et ocu-
lis metu omnes torpere. Tandem, effuso imbre,
quum eo magis accensa vis venti esset, ipso illo, quo

U. C. 534. deprehensi erant, loco castra ponere necessarium
 A. C. 218. visum est. Id vero laboris velut de integro initium
 fuit: nam nec explicare quidquam, nec statuere po-
 terant: nec, quod statutum esset, manebat, omnia
 perscindente vento et rapiente: et mox aqua levata
 vento, quum super gelida montium juga concreta es-
 set, tantum nivossæ grandinis dejecit, ut, omnibus
 omissis, procumberent homines, tegminibus suis
 magis obruti, quam tecti: tantaque vis frigoris in-
 secuta est, ut, ex illa miserabili hominum jumento-
 rumque strage quum se quisque adtollere ac levare
 vellet, diu nequiret, quia, torpentibus rigore nervis,
 vix flectere artus poterant: deinde, ut tandem agi-
 tando sese movere ac recepere animos, et raris locis
 ignis fieri est cœptus, ad alienam opem quisque
 inops tendere. Biduum eo loco, velut obsessi, man-
 sere: multi homines, multa jumenta, elephanti quo-
 que ex his, qui prælio ad Trebiam facto superfue-
 rant, septem absumti.

Regreditur. LIX. Degressus Apennino retro ad Placentiam
 castra movit, et ad decem millia progressus conse-
 dit: postero die duodecim millia peditum, quinque
 equitum adversus hostem ducit. Nec Sempronius
 consul (jam enim redierat ab Roma) detractavit
 certamen: atque eo die tria millia passuum inter
 bina castra fuere. Postero die ingentibus animis,
 vario eventu, pugnatum est: primo concursu adeo
 res Romana superior fuit, ut non acie vincerent so-
 lum, sed pulsos hostes in castra persequerentur;
 mox castra quoque obpugnarent. Hannibal, paucis
 propugnatoribus in vallo portisque positus, ceteros
 confertos in media castra recepit, intentosque sig-
 num ad erumpendum spectare jubet. Jam nona fer-

Pugna in-
 ter Sem-
 pronium
 et Hanni-
 balem.

me diei hora erat, quum Romanus, nequidquam fa- U. C. 534.
 tigato milite, postquam nulla spes erat potiundi cas- A. C. 218.
 tris, signum receptui dedit. Quod ubi Hannibal
 accepit, laxatamque pugnam et recessum a castris
 vidit, extemplo equitibus dextra, lævaque emissis in
 hostem, ipse cum peditum robore medius castris
 erupit: pugna raro ulla magis sæva, et cum utrius-
 que partis perniciæ clarior fuisset, si extendi eam
 dies in longum spatium sivisset. Nox accensum
 ingentibus animis prælium diremit: itaque acrior
 concursus fuit, quam cædes; et, sicut æquata ferme
 pugna erat, ita clade pari discessum est: ab neutra
 parte sexcentis plus peditibus, et dimidium ejus
 equitum cecidit. Sed major Romanis, quam pro nu-
 mero, jactura fuit: quia equestris ordinis aliquot,
 et tribuni militum quinque, et præfecti sociorum
 tres, sunt interfecti. Secundum eam pugnam Han-
 nibal in Ligures, Sempronius Lucam concessit.
 Venienti in Ligures Hannibali per insidias inter-
 cepti duo quæstores Romani, C. Fulvius et L. Lu-
 cretius, cum duobus tribunis militum, et quinque
 equestris ordinis senatorum ferme liberis, quo magis
 ratam fore cum his pacem societatemque crederet,
 traduntur.

LX. Dum hæc in Italia geruntur, Cn. Cornelius Res gestæ
 Scipio, in Hispaniam cum classe et exercitu missus, a Cn. Sci-
 quum, ab ostio Rhodani profectus, Pyrenæosque pione in
Hispania.
 montes circumvectus, Emporiis adpulisset classem,
 exposito ibi exercitu, orsus a Lacetanis, omnem
 oram usque ad Iberum flumen, partim renovandis
 societatibus, partim novis instituendis, Romanæ di-
 tionis fecit. Inde conciliata clementiæ fama, non ad
 maritimos modo populos, sed, in mediterraneis quo-

U. C. 534. que ac montanis, ad ferociōres jam gentes valuit :
A. C. 218. nec pax modo apud eos, sed societas etiam armorum, parata est : validæque aliquot auxiliorum cohortes ex iis conscriptæ sunt. Hannonis cis Iberum provincia erat : cum reliquerat Hannibal ad regionis ejus præsidium : itaque prius, quam alienarentur omnia, obviam eundum ratus, castris in conspectu hostium positis, in aciem eduxit : nec Romano differendum certamen visum : quippe qui sciret, cum Hannone et Hasdrubale sibi dimicandum esse ; malletque adversus singulos separatim, quam adversus duos simul, rem gerere. Nec magni certaminis ea dimicatio fuit : sex millia hostium cæsa, duo capta cum præsidio castrorum : nam et castra expugnata sunt, atque ipse dux cum aliquot principibus capiuntur : et Scissis, propinquum castris oppidum, expugnatur. Ceterum præda oppidi parvi pretii rerum fuit ; supellex barbarica, ac vilium mancipiorum : castra militem ditavere ; non ejus modo exercitus, qui victus erat, sed et ejus, qui cum Hannibale in Italia militabat, omnibus fere caris rebus (ne gravia impedimenta ferentibus essent) citra Pyrenæum relictis.

LXI. Priusquam certa hujus cladis fama accideret, transgressus Iberum Hasdrubal cum octo millibus peditum, mille equitum, tamquam ad primum adventum Romanorum obcursurus, postquam perditas res ad Scissim amissaque castra accepit, iter ad mare convertit. Haud procul Tarracone classicos milites navalesque socios, vagos palantesque per agros, (quod ferme fit, ut secundæ res negligentiam creent) equite passim dimisso, cum magna cæde, majore fuga ad naves compellit : nec diutius circa

ea loca morari ausus, ne a Scipione obprimeretur, U. C. 534.
trans Iberum sese recepit. Et Scipio, raptim ad fa- A. C. 218.
mam novorum hostium agmine acto, quum in pau-
cos præfectos navium animadvertisset, præsidio Tar-
racone modico relicto, Emporias cum classe rediit.
Vixdum digresso eo, Hasdrubal aderat: et, Ilerge-
tum populo, qui obsides Scipioni dederat, ad defec-
tionem impulso, cum eorum ipsorum juventute agros
fidelium Romanis sociorum vastat. Excito deinde
Scipione hibernis, toto cis Iberum rursus cedit agro.
Scipio, relictam ab auctore defectionis Ilergetum
gentem quum infesto exercitu invasisset, compulsis
omnibus Athanagiam, urbem (quæ caput ejus po-
puli erat) circumscedit: intraque dies paucos, pluri-
bus quam ante obsidibus imperatis, Ilergetes, pecu-
nia etiam multatos, in jus ditionemque recepit. In-
de in Ausetanos prope Iberum, socios et ipsos Pœ-
norum, procedit: atque, urbe eorum obsessa, Lace-
tanos auxilium finitimis ferentes nocte, haud procul
jam urbe, quum intrare vellent, exceptit insidiis.
Cæsa ad duodecim millia: exuti pene omnes armis,
domos passim palantes per agros diffugere; nec
obsessos alia ulla res, quam iniqua obpugnantibus
hiems, tutabatur: triginta dies obsidio fuit: per
quos raro umquam nix minus quatuor pedes alta ja-
cuit: adeoque pluteos ac vineas Romanorum ope-
ruerat, ut ea sola, ignibus aliquoties conjectis ab
hoste, etiam tutamentum fuerit. Postremo quum
Amusitus princeps eorum ad Hasdrubalem profu-
gisset, viginti argenti talentis pacti deduntur. Tar-
raconem in hiberna reditum est.

LXII. Romæ aut circa urbem multa ea hieme Prodigia.
prodigia facta: aut (quod evenire solet, motis semel

U. C. 534. in religionem animis) multa nunciata, et temere
 A. C. 218. credita sunt: in quâs ingenuum infantem semestrem
 in foro olitorio triumphum clamasse: et foro boario
 bovem in tertiam contignationem sua sponte escen-
 disse: atque inde tumultu habitatorum territum sese
 dejecisse: et navium speciem de cœlo adfuisse, et
 ædem Spei, quæ est in foro olitorio, fulmine ictam:
 et Lanuvii hastam se commovisse: et corvum in
 ædem Junonis devolasse, atque in ipso pulvinario
 consedissee: et in agro Amiternino multis locis ho-
 minum specie procul candida veste visos, nec cum
 ullo congressos: et in Piceno lapidibus pluisse; et
 Cære sortes extenuatas: et in Gallia lupum vigili
 Procurata. gladium e vagina raptum abstulisse. Ob cetera pro-
 digia libros adire decemviri jussi: quod autem lapi-
 dibus plisset in Piceno, novemdiale sacrum edic-
 tum, et subinde aliis procurandis prope tota civitas
 operata fuit. Jam primum omnium urbs lustrata
 est, hostiæque majores, quibus editum est, Diis
 cæsæ; et donum ex auri pondo quadraginta Lanu-
 vium ad Junonis portatum est; et signum æneum
 matronæ Junoni in Aventino dedicaverunt; et lec-
 tisternium Cære, ubi sortes adtenuatæ erant, impe-
 ratum; et supplicatio Fortunæ in Algido; Romæ
 quoque et lectisternium Juventati, et supplicatio
 ad ædem Herculis nominatim; deinde universo po-
 pulo circa omnia pulvinaria, indicta: et Genio ma-
 jores hostiæ cæsæ quinque; et C. Atilius Serranus
 prætor vota suscipere jussus, si in decem annos res-
 publica eodem stetisset statu. Hæc procurata vota-
 que ex libris Sibyllinis, magna ex parte levaverant
 religione animos.

LXIII. Consulum designatorum alter Flaminius,

cui eæ legiones, quæ Placentiæ hibernabant, sorte U.C. 534.
 evenerant, edictum et literas ad consulem misit, ut A.C. 218.
 is exercitus Idibus Martiis Arimini adesset in cas-
 tris. Huic in provincia consulatum inire consilium Temeritas
 erat, memori veterum certaminum cum Patribus ; et adrogan-
 quæ tribunus plebis, et quæ postea consul, prius de tia Flami-
 consulatu, qui abrogabatur, dein de triumpho ha-
 buerat : invisus etiam Patribus ob novam legem,
 quam Q. Claudius tribunus plebis adversus senatum
 uno Patrum adjuvante C. Flaminio, tulerat ; ne quis
 senator, quive senatoris pater fuisset, maritimam
 navem, quæ plus quam trecentarum amphorarum
 esset, haberet. Id satis habitum ad fructus ex agris
 vectandos : quæstus omnis Patribus indecorus visus.
 Res, per summam contentionem acta, invidiam apud
 nobilitatem suasori legis Flaminio, favorem apud
 plebem alterumque inde consulatum, peperit. Ob
 hæc ratus auspiciis ementiendis, Latinarumque fe-
 riarum mora, et consularibus aliis inpedimentis re-
 tenturos se in urbe, simulato itinere privatus clam
 in provinciam abiit. Ea res, ubi palam facta est, Clam in
 novam insuper iram infestis jam ante Patribus mo- provinciam
 vit : *Non cum senatu modo, sed jam cum Diis immor-* abit,
talibus, C. Flaminium bellum gerere : consulem ante
inauspicato factum revocantibus ex ipsa acie Diis at-
que hominibus non paruisse ; et nunc conscientia spre-
torum et Capitolium et sollemnem votorum nuncupa-
tionem fugisse : ne die initi magistratus Jovis optimi
maximi templum adiret : ne senatum, invisus ipse, et
sibi uni invisum, videret consuleretque : ne Latinas in-
diceret, Jovique Latiari sollemne sacrum in monte fa-
ceret : ne, auspicato profectus in Capitolium ad vota
nuncupanda, paludatus inde cum lictoribus ad provin-

- U. C. 534. *ciam iret : lixæ modo sine insignibus, sine lictoribus,*
 A. C. 218. *profectum clam, furtim, haud aliter quam si exsilii*
caussa solum vertisset : magis pro majestate videlicet
imperii Arimini, quam Romæ, magistratum initurum,
et in deversorio hospitali, quam apud penates suos,
prætextam sumtutum. Revocandum universi retra-
hendumque censuerunt ; et cogendum omnibus prius
præsentem in Deos hominesque fungi officiis, quam
 Frustra re- *ad exercitum et in provinciam iret. In eam lega-*
 vocatur. *tionem (legatos enim mitti placuit) Q. Terentius et*
M. Antistius profecti, nihilo magis eum moverunt,
quam priori consulatu literæ moverant ab senatu
 U. C. 535. *missæ. Paucos post dies magistratum iniit, inmo-*
 A. C. 217. *lantique ei vitulus jam ictus e manibus sacrifican-*
tium sese quum proripuisset, multos circumstantes
cruore respersit. Fuga procul etiam major apud ig-
naros, quid trepidaretur, et concursatio fuit : id a
plerisque in omen magni terroris acceptum. Legio-
nibus inde duabus a Sempronio prioris anni con-
sule, duabus a C. Atilio prætore acceptis, in Etru-
riam per Apennini tramites exercitus duci est
cœptus.

EPITOME LIBRI XXII.

HANNIBAL, per continuas vigilias in paludibus oculo amisso, venit in Etruriam : per quas paludes quatriduo et tribus noctibus sine ulla requie iter fecit. C. Flaminius consul, homo temerarius, contra auspicia profectus, signis militaribus effossis, quæ tolli non poterant, et ab equo, quem conscenderat, per caput devolutus, insidiis ab Hannibale circumventus, ad Trasimenum lacum cum exercitu cæsus est. Sex millia, quæ eruperant, fide ab Maharbale data, perfidia Hannibalis vincta sunt. Quum ad nuncium cladis Romæ luctus esset, duæ matres, ex insperato receptis filiis, gaudio mortuæ sunt. Ob hanc cladem ex Sibyllinis libris ver sacrum votum. Quum deinde Q. Fabius Maximus dictator, adversus Hannibalem missus, nollet acie cum eo configere, ne, contra ferocem tot victoriis hostem, terrorem adversis præliis militem pugnæ committeret, et, obponendo se tantummodo, conatus Hannibalis inpediret : M. Minucius magister equitum, ferox et temerarius, criminando dictatorem tamquam segnem et timidum, effecit, ut populi jussu æquaretur ei cum dictatore imperium ; divisoque exercitu, quum iniquo loco conflisset, et in maximo discrimine legiones ejus essent, superveniente cum exercitu Fabio Maximo discrimine liberatus est : quo beneficio victus castra cum eo junxit, et patrem eum salutavit ; idemque facere milites jus-

sit. *Hannibal*, vastata Campania, inter Casilinum oppidum et Calliculam montem a Fabio clausus, sarmenis ad cornua boum adligatis et incensis, præsidium Romanorum, quod Calliculam insidebat, fugavit: et sic transgressus est saltum: idemque Q. Fabii Maximi dictatoris, quum circumposita ureret, agro pepercit, ut illum tanquam proditorem suspectum faceret. *Æmilio* deinde *Paullo* et *Terentio Varrone* consulibus et ducibus, cum maxima clade adversus *Hannibalem* ad Cannas pugnatum est: cæsaque eo prælio Romanorum quadraginta quinque millia, cum *Paullo* consule et senatoribus octoginta, consularibus atque prætoriiis aut ædiliciis triginta. Post quam cladem quum a nobilibus adolescentibus propter desperationem consilium de relinquenda Italia iniretur, P. Cornelius Scipio tribunus militum, qui postea *Africanus* nuncupatus est, stricto super capita deliberantium ferro, juravit, se pro hoste habiturum eum, qui in verba sua non jurasset; effecitque, ut omnes minime relictum iri a se Italiam jurejurando adstringerentur. Præterea trepidationem urbis et luctum, et res in Hispania meliore eventu gestas continet. *Opimia* et *Floronia*, Vestales virgines, incesti damnatæ sunt. Propter paucitatem vero militum servorum octo millia armata sunt: captivi, quum potestas esset redimendi, redempti non sunt. *Varroni* obriam itum est, et gratiæ actæ, quod de republica non desperasset.

T. LIVII PATAVINI

LIBER XXII.

JAM ver adpetebat, quum Hannibal ex hibernis U. C. 535.
movit, et nequidquam ante conatus transcendere A. C. 217.
Apenninum intolerandis frigoribus, et cum ingenti Hannibal
periculo moratus ac metu. Galli, quos prædæ po- movet ex
pulationumque conciverat spes, postquam pro eo, ut hibernis.
ipsi ex alieno agro raperent agerentque, suas terras
sedem belli esse, premique utriusque partis exerci-
tuum hibernis viderunt; verterunt retro ad Hanni-
balem ab Romanis odia: petitusque sæpe princi-
pum insidiis, ipsorum inter se fraude, eadem levi-
tate, qua consenserant, consensum indicantium, ser-
vatus erat; et, mutando nunc vestem, nunc tegu-
menta capitis, errore etiam sese ab insidiis muni-
erat. Ceterum hic quoque ei timor caussa fuit ma-
turius movendi ex hibernis. Per idem tempus Cn.
Servilius consul Romæ Idibus Martiis magistratum
iniit. Ibi quum de republica retulisset, redintegrata
in C. Flaminium invidia est. *Duos se consules cre-* Querelæ
asse, unum habere: quod enim illi justum imperium, Romano-
quod auspiciū esse? Magistratus id a domo, publicis rum de
privatisque penatibus, Latinis feriis actis, sacrificio in Flaminio.
monte perfecto, votis rite in Capitolio nuncupatis, se-
cum ferre: nec privatum auspicia sequi, nec sine aus-
piciis profectum in externo ea solo nova atque integra

U. C. 535. *concupere posse.* Augebant metum prodigia ex pluribus simul locis nunciata: in Sicilia militibus ali-

A. C. 217. Prodigia.

quot spicula, in Sardinia autem in muro circum-eunti vigilias equiti scipionem, quem manu tenuerat, arsisse, et litora crebris ignibus fulsisse, et scuta duo sanguine sudasse, et milites quosdam ictos fulminibus, et solis orbem minui visum: et Præneste ardentem lapides cœlo cecidisse: et Arpis parmas in cœlo visas, pugnantemque cum luna solem: et Capenæ duas interdiu lunas ortas: et aquas Cæretes sanguine mixtas fluxisse; fontemque ipsum Herculis cruentis manasse sparsum maculis: et in Antiati metentibus cruentas in corbem spicas cecidisse: et Faleriis cœlum findi velut magno hiatu visum; quaque patuerit, ingens lumen effulsisse: sortes sua sponte adtenuatas, unamque excidisse, ita scriptam: **MAVORS TELUM SUUM CONCUTIT:** et per idem tempus Romæ signum Martis Appia via ad simulacra luporum sudasse: et Capuæ speciem cœli ardentis fuisse, lunæque inter imbrem cadentis. Inde minoribus etiam dictu prodigiis fides habita: capras lanatas quibusdam factas, et gallinam in marem, gallum in feminam sese vertisse. His, sicut erant nunciata, expositis, auctoribusque in curiam introductis,

Procurata. consul de religione Patres consuluit. Decretum, ut ea prodigia, partim majoribus hostiis, partim lactentibus, procurarentur: et uti supplicatio per triduum ad omnia pulvinaria haberetur. Cetera, quum decemviri libros inspexissent, ut ita fierent, quemadmodum cordi esse Divi carminibus præfarentur. Decemvirorum monitu decretum est, Jovi primum donum fulmen aureum pondo quinquaginta fieret; Junoni Minervæque ex argento dona darentur: et

Junoni Reginæ in Aventino, Junonique Sospitæ La- U. C. 535.
 nuvii majoribus hostiis sacrificaretur; matronæque, A. C. 217.
 pecunia conlata, quantum conferre cuique commo-
 dum esset, donum Junoni Reginæ in Aventinum
 ferrent, lectisterniumque fieret; quin et libertinæ ut
 ipsæ, unde Feroniæ donum daretur, pecuniam pro
 facultatibus suis conferrent. Hæc ubi facta, decem-
 viri Ardeæ in foro majoribus hostiis sacrificarunt:
 postremo Decembri jam mense ad ædem Saturni
 Romæ inmolatum est, lectisterniumque imperatum,
 (et eum lectum senatores straverunt) et convivium
 publicum; ac per urbem Saturnalia diem ac noctem
 clamatum, populusque eum diem festum habere ac
 servare in perpetuum jussus.

II. Dum consul placandis Romæ Diis trahendo-
 que delectu dat operam, Hannibal, profectus ex hi- Hannibal
 bernis, quia jam Flaminium consulem Arretium per- Etruriam
 venisse fama erat, quum aliud longius, ceterum com- petit.
 modius, ostenderetur iter, propiorem viam per palu-
 dem petit, qua fluvius Arnus per eos dies solito ma-
 gis inundaverat. Hispanos et Afros, (id omne vete-
 rani erat robur exercitus) admixtis ipsorum inpedi-
 mentis, necubi consistere coactis necessaria ad usus
 deessent, primos ire jussit: sequi Gallos, ut id ag-
 minis medium esset; novissimos ire equites: Ma-
 gonem inde cum expeditis Numidis cogere agmen,
 maxime Gallos, si tædio laboris longæque viæ (ut
 est mollis ad talia gens) dilaberentur aut subsiste-
 rent, cohibentem. Primi, qua modo præirent du- Molestum
 ces per præaltas fluvii ac profundas voragines, hau- iter per
 sti pene limo inmergentesque se, tamen signa seque- paludes.
 bantur. Galli neque sustinere se prolapsi, neque
 adsurgere ex voraginibus poterant; aut corpora ani-

U.C. 535. mis, aut animos spe sustinebant; alii fessa ægre
 A.C. 217. trahentes membra; alii, ubi semel victis tædio ani-
 mis procubuissent, inter jumenta, et ipsa jacentia
 passim, morientes: maximeque omnium vigiliæ
 conficiebant, per quatrduum jam et tres noctes to-
 leratæ. Quum, omnia obtinentibus aquis, nihil, ubi
 in sicco fessa sternerent corpora, inveniri posset,
 cumlatis in aquas sarcinis insuper incumbabant:
 jumentorum itinere toto prostratorum passim acervi
 tantum, quod exstaret aqua, quærentibus ad quietem
 parvi temporis necessarium cubile dabant. Ipse
 Hannibal, æger oculis ex verna primum intemperie
 variante calores frigoraque, elephanto, qui unus su-
 perfuerat, quo altius ab aqua exstaret, vectus; vigi-
 liis tandem et nocturno humore palustrique cœlo
 gravante caput, et quia medendi nec locus nec tem-
 pus erat, altero oculo capitur.

Hannibal
 oculum
 amittit.

III. Multis hominibus jumentisque fœde amissis,
 quum tandem de paludibus emersisset, ubi primum
 in sicco potuit, castra locat: certumque per præmis-
 sos exploratores habuit, exercitum Romanum circa
 Arretii mœnia esse: consulis deinde consilia atque
 animum, et situm regionum, itineraque, et copias
 ad commeatus expediendos, et cetera, quæ cognosse
 in rem erat, summa omnia cum cura inquirendo ex-
 sequebatur. Regio erat in primis Italiæ fertilis, E-
 trusci campi, qui Fæsulas inter Arretiumque jacent,
 frumenti ac pecoris et omnium copia rerum opu-
 lenti. Consul ferox ab consulatu priore, et non
 modo legum ac Patrum majestatis, sed ne Deorum
 quidem satis metuens. Hanc insitam ingenio ejus
 temeritatem fortuna prospero civilibus bellicisque
 rebus successu aluerat. Itaque satis adparebat, nec

Flaminii
 cos. ferocia.

Deos nec homines consulentem, ferociter omnia ac U. C. 535.
 præpropere acturum : quoque pronior esset in vitia A. C. 217.
 sua, agitare eum atque irritare Pœnus parat : et,
 læva relicto hoste, Fæsulas petens, medio Etruriæ
 agro prædatum profectus, quantam maximam vasti-
 tatem potest, cædibus incendiisque consuli procul
 ostendit. Flaminius, qui ne quieto quidem hoste
 ipse quieturus erat, tum vero, postquam res socio-
 rum ante oculos prope suos ferri agique vidit, suum
 id dedecus ratus, per mediam jam Italiam vagari
 Pœnum, atque, obsistente nullo, ad ipsa Romana
 mœnia ire obpugnanda ; ceteris omnibus in consilio
 salutaria magis, quam speciosa, suadentibus, *colle-*
gam expectandum, ut conjunctis exercitibus, communi
animo consilioque rem gererent ; interim equitatu aux-
iliisque levium armorum ab effusa prædandi licentia
hostem cohibendum ; iratus se ex consilio proripuit,
 signumque simul itineris pugnæque proposuit. *Quin*
immo Arretii ante mœnia sedeamus, inquit ; hic enim
patria et penates sunt. Hannibal emissus e manibus
perpopuletur Italiam, vastandoque et urendo omnia ad
Romana mœnia perveniat ; nec ante nos hinc moveri-
mus, quam, sicut olim Camillum ab Veïis, C. Flami-
nium ab Arretio Patres advixerint. Hæc simul incre-
 pans, quum ocius signa convelli juberet, et ipse in
 equum insilisset, equus repente conruit, consulem-
 que lapsum super caput effudit. Territis omnibus, Ex equo
 qui circa erant, velut fædo omine incipiendæ rei, prolabitur.
 insuper nunciatur, signum, omni vi moliente signi-
 fero, convelli nequire. Conversus ad nuncium, *Num* Signum
literas quoque, inquit, ab senatu adfers, quæ me rem convelli
gerere vetent ? Abi, nuncia, signum effodiant, si ad nequit.
convellendum manus præ metu obtorpuerint. Incedere

U. C. 535. inde agmen cœpit: primoribus, super quam quod
 A. C. 217. dissenserant a consilio, territis etiam duplici prodi-
 gio; milite in vulgus læto ferocia ducis, quum spem
 magis ipsam, quam caussam spei, intueretur.

Pugna ad
 Trasime-
 num.

IV. Hannibal, quod agri est inter Cortonam ur-
 bem Trasimenumque lacum, omni clade belli per-
 vastat, quo magis iram hosti ad vindicandas socio-
 rum injurias acuat. Et jam pervenerant ad loca in-
 sidiis nata, ubi maxime montes Cortonenses Trasi-
 menus subit: via tantum interest perangusta, velut
 ad id ipsum de industria relicto spatio: deinde paul-
 lo latior patescit campus, inde colles adsurgunt.
 Ibi castra in aperto locat, ubi ipse cum Afris modo
 Hispanisque consideret. Baliæres ceteramque levem
 armaturam post montes circumducit: equites ad ip-
 sas fauces saltus, tumultis apte tegentibus, locat; ut,
 ubi intrassent Romani, objecto equitatu, clausa om-
 nia lacu ac montibus essent. Flaminius quum pri-
 die solis occasu ad lacum pervenisset, inexplorato,
 postero die, vix dum satis certa luce, angustis supe-
 ratis, postquam in patentiorem campum pandi ag-
 men cœpit, id tantum hostium, quod ex adverso erat,
 conspexit: ab tergo et super caput decepere insidiæ.
 Pœnus ubi, id quod petierat, clausum lacu ac mon-
 tibus et circumfusum suis copiis habuit hostem, sig-
 num omnibus dat simul invadendi: qui ubi, qua
 cuique proximum fuit, decucurrere, eo magis Ro-
 manis subita atque inprovisa res fuit, quod orta ex
 lacu nebula campo, quam montibus, densior sede-
 rat, agminaque hostium ex pluribus vallibus ipsa
 inter se satis conspecta, eoque magis pariter decu-
 currerunt. Romanus clamore prius undique orto,
 quam satis cerneret, se circumventum esse sensit;

et ante in frontem lateraque pugnari cœptum est, U. C. 595.
quam satis instrueretur acies, aut expediri arma, A. C. 217.
stringique gladii possent.

V. Consul, percussis omnibus, ipse satis, ut in
trepida re, inpavidus, turbatos ordines, vertente se
quoque ad dissonos clamores, instruit, ut tempus
locusque patitur; et, quacumque adire audirique
potest, adhortatur, ac stare et pugnare jubet; *nec
enim inde votis aut inploratione Deum, sed vi ac vir-
tute, evadendum esse. Per medias acies ferro viam fi-
eri: et, quo timoris minus sit, eo minus ferme periculi
esse.* Ceterum præ strepitu ac tumultu nec consi-
lium nec imperium accipi poterat: tantumque ab-
erat, ut sua signa atque ordinem et locum nosceret
miles, ut vix ad arma capienda aptandaque pugnae
competeret animus: obprimerenturque quidam, one-
rati magis his, quam tecti: et erat in tanta caligine
major usus aurium, quam oculorum. Ad gemitus
vulnerum ictusque corporum aut armorum, et mix-
tos strepentium paventiumque clamores, circumfe-
rebant ora oculosque. Alii fugientes pugnantium
globo inlati hærebant: alios redeuntes in pugnam
avertebat fugientium agmen. Deinde, ubi in om-
nes partes nequidquam inpetus capti, et ab lateri-
bus montes ac lacus, a fronte et ab tergo hostium
acies claudebat, adparuitque, nullam, nisi in dextra
ferroque, salutis spem esse; tum sibi quisque dux
adhortatorque factus ad rem gerendam, et nova de
integrali pugna exorta est; non illa ordinata per
principes hastatosque ac triarios, nec ut pro signis
antesignani, post signa alia pugnaret acies; nec ut
in sua legione miles, aut cohorte, aut manipulo es-
set. Fors conglobat, et animus suus cuique ante

U. C. 535. aut post pugnandi ordinem dabat: tantusque fuit
 A. C. 217. ardor armorum, adeo intentus pugnæ animus, ut
 Terræ eum motum terræ, qui multarum urbium Italiæ
 motum magnas partes prostravit, avertitque cursu rapido
 nemo amnes, mare fluminibus invexit, montes lapsu in-
 pugnan- genti proruit, nemo pugnantium senserit.
 tit.

VI. Tres ferme horas pugnatum est, et ubique
 atrociter: circa consulem tamen acrior infestiorque
 pugna est. Eum et robora virorum sequebantur, et
 ipse, quacumque in parte premi ac laborare senserat
 suos, impigre ferebat opem; insignemque armis et
 hostes summa vi petebant, et tuebantur cives: do-
 nec Insuber eques (Ducario nomen erat) facie quo-
 que noscicans, *Consul, en, inquit, hic est*, popularibus
 suis; *qui legiones nostras cecidit, agrosque et urbem*
 Mors Fla- *est depopulatus. Jam ego hanc victimam manibus per-*
 minii. *emtorum fæde civium dabo: subditisque calcaribus*
equo, per confertissimam hostium turbam inpetum
facit: obtruncatoque prius armigero, qui se infesto
venienti obviam objecerat, consulem lancea trans-
fixit: spoliare cupientem triarii objectis scutis arcu-
 Fugiant *ere. Magnæ partis fuga inde primum cœpit: et jam*
 Romani. *nec lacus, nec montes obstabant pavori: per omnia*
arta præruptaque velut cæci evadunt: armaque et
viri super alium alii præcipitantur. Pars magna,
ubi locus fugæ deest, per prima vada paludis in
aquam progressi, quoad capitibus humerisque ex-
stare possunt, sese immergunt: fuere, quos incon-
sultus pavor nando etiam capessere fugam inpulerit.
Quæ ubi immensa ac sine spe erat, aut deficientibus
animis hauriebantur gurgitibus, aut nequidquam
fessi vada retro ægerrime repetebant, atque ibi ab
ingressis aquam hostium equitibus passim trucid-

bantur. Sex millia ferme primi agminis, per ad-
 versos hostes eruptione inpigre facta, ignari om-
 nium, quæ post se agerentur, ex saltu evasere: et,
 quum in tumultu quodam constitissent, clamorem
 modo ac sonum armorum audientes, quæ fortuna
 pugnae esset, neque scire, nec perspicere præ cali-
 gine poterant. Inclinata denique re, quum incales-
 cente sole dispulsa nebula aperuisset diem, tum li-
 quida jam luce montes campique perditas res stra-
 tamque ostendere fœde Romanam aciem: itaque,
 ne in conspectos procul inmitteretur eques, sublati
 raptim signis, quam citatissimo poterant agmine,
 sese abriperunt. Postero die, quum super cetera
 extrema fames etiam instaret, fidem dante Mahar-
 bale, qui cum omnibus equestribus copiis nocte con-
 secutus erat, si arma tradidissent, abire cum singulis
 vestimentis passurum, sese dediderunt: quæ Punica
 religione servata fides ab Hannibale est, atque in
 vincula omnes coniecit.

VII. Hæc est nobilis ad Trasimenum pugna, at-
 que inter paucas memorata populi Romani clades.
 Quindecim millia Romanorum in acie cæsa sunt; Numerus
cæsorū
utrimque.
 decem millia, sparsa fuga per omnem Etruriam, di-
 versis itineribus urbem petiere. Mille quingenti ho-
 stium in acie, multi postea utrimque ex vulneribus
 periere. Multiplex cædes utrimque facta traditur
 ab aliis. Ego, præterquam quod nihil haustum ex
 vano velim, quo nimis inclinant ferme scribentium
 animi, Fabium æqualem temporibus hujusce belli
 potissimum auctorem habui. Hannibal, captivorum
 qui Latini nominis essent, sine pretio dimissis, Ro-
 manis in vincula datis, segregata ex hostium coacer-
 vatorum cumulis corpora suorum quum sepeliri jus-

U. C. 535.

A. C. 217.

U. C. 535. sisset, Flaminii quoque corpus, funeris caussa mag-
 A. C. 217. na cum cura inquisitum, non invenit. Romæ, ad
 Romæ
 magnus
 terror. primum nuncium cladis ejus, cum ingenti terrore
 ac tumultu concursus in forum populi est factus.
 Matronæ vagæ per vias, quæ repens clades adlata,
 quæve fortuna exercitus esset, obvios percunctan-
 tur: et quum frequentis concionis modo turba in
 comitium et curiam versa magistratus vocaret; tan-
 dem haud multo ante solis occasum M. Pomponius
 prætor, *Pugna*, inquit, *magna victi sumus*: et, quam-
 quam nihil certius ex eo auditum est, tamen alius
 ab alio inpleti rumoribus domos referunt, *consulem*
cum magna parte copiarum cæsum: superesse paucos,
aut fuga passim per Etruriam sparsos, aut captos ab
hoste. Quot casus exercitus victi fuerant, tot in
 curas dispertiti eorum animi erant, quorum propin-
 qui sub C. Flaminio consule mæruerant, ignoran-
 tium, quæ cujusque suorum fortuna esset: nec quis-
 quam satis certum habet, quid aut speret, aut timeat.
 Postero, ac deinceps aliquot diebus, ad portas major
 prope mulierum, quam virorum, multitudo stetit,
 aut suorum aliquem, aut nuncios de his obperiens:
 circumfundebanturque obviis sciscitantes; neque a-
 velli, utique ab notis, prius, quam ordine omnia in-
 quisissent, poterant. Inde varios vultus digredien-
 tium ab nunciis cerneres, ut cuique aut læta aut
 tristia nunciabantur: gratulantesque aut consolan-
 tes redeuntibus domos circumfusos. Feminarum
 præcipue et gaudia insignia erant, et luctus. Unam
 Matres re- in ipsa porta, sospiti filio repente oblatam, in con-
 ceptis filiis spectu ejus exspirasse ferunt; alteram, cui mors
 gaudio ex- filii falso nunciata erat, mœstam sedentem domi, ad
 animatæ. primum conspectum redeuntis filii gaudio nimio ex-

animatam. Senatum prætores per dies aliquot ab U. C. 535.
A. C. 217. orto usque ad occidentem solem in curia retinent, consultantes, quonam duce, aut quibus copiis, resisti victoribus Pœnis posset.

VIII. Priusquam satis certa consilia essent, re- Alia clades. pens alia nunciatur clades: quatuor millia equitum, cum C. Centenio pro prætore missa ad collegam ab Servilio consule, in Umbria, quo post pugnam ad Trasimenum auditam averterant iter, ab Hannibale circumventa. Ejus rei fama varie homines adfecit: pars, occupatis majore ægritudine animis, levem, ex comparatione priorum, ducere recentem equitum jacturam: pars non id, quod acciderat, per se æstimare, sed, ut in adfecto corpore quamvis levis causa magis, quam valido gravior, sentiretur; ita tum ægræ et adfectæ civitati quodcumque adversi incidere, non rerum magnitudine, sed viribus extenuatis, quæ nihil, quod adgravaret, pati possent, æstimandum esse. Itaque ad remedium, jam diu neque desideratum nec adhibitum, dictatorem dicendum, civitas confugit: et quia et consul aberat, a quo uno dici posse videbatur; nec per occupatam armis Punice Italia facile erat aut nuncium, aut literas mitti; nec dictatorem populus creare poterat, quod numquam ante eam diem factum erat: prodictatorem populus creavit Q. Fabium Maximum, et magistrum Fabius prodictator. equitum M. Minucium Rufum. Hisque negotium ab senatu datum, ut muros turresque urbis firmarent, et præsidia disponderent, quibus locis videretur, pontesque rescinderent fluminum: ad penates pro urbe dimicandum esse, quando Italiam tueri nequissent.

IX. Hannibal recto itinere per Umbriam usque Hannibal Spoletum frustra tentat. ad Spoletum venit: inde, quum perpopulato agro

U. C. 535. urbem obpugnare adortus esset, cum magna cæde
 A. C. 217. suorum repulsus, conjectans ex unius coloniæ haud
 nimis prospere tentatæ viribus, quanta moles Ro-
 manæ urbis esset; in agrum Picenum avertit iter,
 non copia solum omnis generis frugum abundantem,
 sed refertum præda, quam effuse avidi atque egentes
 rapiebant. Ibi per dies aliquot stativa habita: re-
 fectusque miles, hibernis itineribus ac palustri via
 prælioque, magis ad eventum secundo, quam levi
 aut facili, adfectus. Ubi satis quieti datum, præda
 ac populationibus magis, quam otio aut requie,
 gaudentibus profectus, Prætutianum, Hadrianum-
 que agrum, Marsos inde Marrucinosque et Pelignos
 devastat, circaque Arpos et Luceriam proximam
 Apuliæ regionem. Cn. Servilius consul, levibus præ-
 liis cum Gallis actis, et uno oppido ignobili expug-
 nato, postquam de collegæ exercitusque cæde audi-
 vit, jam mœnibus patriæ metuens, ne abesset in dis-
 crimine extremo, ad urbem iter intendit. Q. Fabius
 Maximus dictator iterum, quo die magistratum iniit,
 vocato senatu, ab Diis orsus, quum edocuisset Pa-
 tres, plus negligentia ceremoniarum auspicio-
 rumque, quam temeritate atque inscitia, peccatum a C.
 Flaminio consule esse, quæque piacula iræ Deum
 essent, ipsos Deos consulendos esse; pervicit, ut,
 quod non ferme decernitur, nisi quum tetra prodigia
 nunciata sunt, decemviri libros Sibyllinos adire ju-
 berentur: qui, inspectis fatalibus libris, retulerunt
 Patribus, *quod ejus belli caussa votum Marti foret, id
 non rite factum, de integro atque amplius faciendum
 esse: et Jovi ludos magnos, et ædes Veneri Erycinæ ac
 Menti vovendas esse, et supplicationem lectisterniumque
 habendum, et ver sacrum vovendum, si bellatum pros-*

Vastat
 Italiam.

Libri Si-
 byllini in-
 specti.

pere esset, resque publica in eodem, quo ante bellum U. C. 535.
fuisset, statu permansisset. Senatus, quoniam Fabium A. C. 217.
 belli cura occupatura esset, M. Æmilium prætorem,
 ex collegii pontificum sententia, omnia ea ut mature
 fiant, curare jubet.

X. His senatusconsultis perfectis, L. Cornelius
 Lentulus pontifex maximus, consulente collegio
 prætorum, omnium primum populum consulendum
 de vere sacro censet: injussu populi voveri non
 posse. Rogatus in hæc verba populus, *Velitis ju-* Ver sacrum
beatissime hoc sic fieri? si res publica populi Romani votum.
Quiritium ad quinquennium proximum, sicut velim
eam, salva servata erit hisce duellis; datum donum
duit populus Romanus Quiritium, (quod duellum po-
pulo Romano cum Karthaginensi est, quæque duella
cum Gallis sunt, qui cis Alpes sunt) quod ver adtulerit
ex suillo, ovillo, caprino, bovillo grege, quæque pro-
fana erunt, Jovi fieri, ex qua die senatus populusque
jusserit. Qui faciet, quando volet, quaque lege volet,
facito: quo modo faxit, probe factum esto. Si id mo-
ritur, quod fieri oportebit, profanum esto, neque scelus
esto: si quis rumpet occidetve insciens, ne fraus esto:
si quis clepsit, ne populo scelus esto, neve cui cleptum
erit: si atro die faxit insciens, probe factum esto: si
nocte sive luce, si servus sive liber faxit, probe factum
esto: si anteidea senatus populusque jusserit fieri, ac
faxit, eo populus solutus, liber esto. Ejusdem rei
 caussa ludi magni voti æris trecentis triginta tribus
 millibus, trecentis triginta tribus, triente: præterea
 bubus Jovi trecentis, multis aliis Divis bubus albis,
 atque ceteris hostiis. Votis rite nuncupatis, suppli-
 catio edicta: supplicatumque iere cum conjugibus
 ac liberis non urbana multitudo tantum, sed agre-

U. C. 535. stium etiam, quos in aliqua sua fortuna publicæ
 A. C. 217. quoque contingebat cura. Tum lectisternium per
 Lectister- triduum habitum, decemviris sacrorum curantibus :
 nium. sex pulvinaria in conspectu fuere : Jovi ac Junoni
 unum ; alterum Neptuno ac Minervæ ; tertium Marti
 ac Veneri ; quartum Apollini ac Dianæ ; quintum
 Vulcano ac Vestæ ; sextum Mercurio ac Cereri.
 Tum ædes votæ. Veneri Erycinæ ædem Q. Fabius
 Maximus dictator vovit ; quia ita ex fatalibus libris
 editum erat, ut is voveret, cujus maximum imperium
 in civitate esset. Menti ædem T. Otacilius prætor
 vovit.

XI. Ita rebus divinis peractis, tum de bello reque
 de publica dictator retulit, quibus quotve legionibus
 victori hosti obviam eundum esse Patres censerent.
 Decretum, *ut ab Cn. Servilio consule exercitum acci-*
peret : scriberet præterea ex civibus sociisque, quantum
equitum ac peditum videretur : cetera omnia ageret fa-
ceretque, ut e re publica duceret. Fabius duas se le-
 giones adjecturum ad Servilianum exercitum dixit :
 his, per magistrum equitum scriptis, Tibur diem ad
 conveniendum edixit : edictoquo proposito, ut, qui-
 bus oppida castellaque inmunita essent, uti in loca
 tuta conmigrarent ; ex agris quoque demigrarent
 omnes regionis ejus, qua iturus Hannibal esset :
 tectis prius incensis ac frugibus corruptis, ne cujus
 rei copia esset ; ipse, via Flaminia profectus obviam
 consuli exercituique, quum ad Tiberim circa Ocri-
 culum prospexisset agmen, consulemque cum equi-
 tibus ad se prodeuntem, viatorem misit, qui consuli
 nunciaret, ut sine lictoribus ad dictatorem veniret.
 Qui quum dicto paruisset, congressusque eorum in-
 gentem speciem dictaturæ apud cives sociosque, ve-

Fabii con-
 silia de
 bello ge-
 rendo.

tustate jam prope oblitos ejus imperii, fecisset; li-
 teræ ab urbe adlatæ sunt, naves onerarias, commea-
 tum ab Ostia in Hispaniam ad exercitum portantes,
 a classe Punica circa portum Cosanum captas esse.
 Itaque extemplo consul Ostiam proficisci jussus, na-
 vibusque, quæ ad urbem Romanam aut Ostiæ essent,
 completis milite ac navalibus sociis, persequi ho-
 stium classem, ac litora Italiæ tutari. Magna vis
 hominum conscripta Romæ erat: libertini etiam,
 quibus liberi essent, et ætas militaris, in verba ju-
 raverant. Ex hoc urbano exercitu, qui minores
 quinque et triginta annis erant, in naves inpositi,
 alii, ut urbi præsiderent, relictæ.

XII. Dictator, exercitu consulis accepto a Fulvio
 Flacco legato, per agrum Sabinum Tibur, quo die
 ad conveniendum edixerat novis militibus, venit:
 inde Præneste, ac transversis limitibus in viam La-
 tinam est egressus: unde, itineribus summa cum
 cura exploratis, ad hostem ducit; nullo loco, nisi
 quantum necessitas cogeret, fortunæ se commissu-
 rus. Quo primum die haud procul Arpis in con-
 spectu hostium posuit castra, nulla mora facta, quin
 Pœnus educeret in aciem, copiamque pugnandi fa-
 ceret: sed ubi quietæ omnia apud hostes, nec castra
 ullo tumultu mota videt; increpans quidem, victos
 tandem quoque Martios animos Romanis, debella-
 tumque, et concessum propalam de virtute ac gloria
 esse, in castra rediit: ceterum tacita cura animum
 incensus, quod cum duce, haudquaquam Flaminio
 Sempronioque simili, futura sibi res esset; ac tum
 demum edocti malis Romani parem Hannibali du-
 cem quæsisserant. Et prudentiam quidem, non vim,
 dictatoris extemplo timuit: constantiam haud dum

U. C. 535.

A. C. 217.

Fabiæ pug-
nam de-
tractat.

U. C. 535. expertus, agitare ac tentare animum movendo cre-
 A. C. 217. bro castra, populandoque in oculis ejus agros socio-
 rum, cœpit: et modo citato agmine e conspectu
 abibat, modo repente in aliquo flexu viæ, si exci-
 pere degressum in æquum posset, occultus subsiste-
 bat. Fabius per loca alta agmen ducebat, modico
 ab hoste intervallo, ut neque omitteret eum, neque
 congrederetur. Castris, nisi quantum usus neces-
 sario cogeret, tenebatur miles: pabulum et ligna
 nec pauci petebant, nec passim. Equitum levisque
 armaturæ statio, composita instructaque in subitos
 tumultus, et suo militi tuta omnia, et infesta effusis
 hostium populatoribus præbebat: neque universo
 periculo summa rerum committebatur: et parva
 momenta levium certaminum ex tuto cœptorum, fi-
 nitimo receptu, adsuefaciebant territum pristinis cla-
 dibus militem, minus jam tandem aut virtutis, aut
 fortunæ pœnitere suæ. Sed non Hannibalem magis
 infestum tam sanis consiliis habebat, quam magis-
 trum equitum: qui nihil aliud, quam quod inpar
 erat imperio, moræ ad rempublicam præcipitandam
 habebat, ferox rapidusque in consiliis, ac lingua in-
 modicus; primo inter paucos, dein propalam in vul-
 gus, pro cunctatore segnem, pro cauto timidum, ad-
 fingens vicina virtutibus vitia, compellabat: pre-
 mendorumque superiorum arte (quæ pessima ars ni-
 mis prosperis multorum successibus crevit) sese ex-
 tollebat.

Fabii ar-
 tes,

Mag.
 equitum
 ferocia.

XIII. Hannibal ex Hirpinis in Samnium transit:
 Beneventanum depopulatur agrum: Telesiam urbem
 capit: irritat etiam de industria ducem, si forte ac-
 census tot indignitatibus cladibusque sociorum de-
 trahere ad æquum certamen possit. Inter multitu-

dinem sociorum Italici generis, qui ad Trasimenum U. C. 535.
 capti ab Hannibale dimissique fuerant, tres Cam- A. C. 217.
 pani equites erant, multis jam tum inlecti donis pro- Hannibal
 missisque Hannibalis ad conciliandos popularium Campani-
 am petit.
 animos. Hi nunciantes, si in Campaniam exercitum
 admovisset, Capuæ potiendæ copiam fore, quum res
 major, quam auctores, esset, dubium Hannibalem,
 alternisque fidentem ac diffidentem, tamen, ut Cam-
 panos ex Samnio peteret, moverunt: monitos, ut
 etiam atque etiam promissa rebus adfirmarent, jus-
 sosque, cum pluribus et aliquibus principum redire
 ad se, dimisit. Ipse imperat duci, ut se in agrum
 Casinatem ducat: edoctus a peritis regionum, si Errore
 eum saltum occupasset, exitum Romano ad opem ducis ad
 ferendam sociis interclusurum. Sed Punicum ab- Casilinum
 deducitur.
 horrens os ab Latinorum nominum prolatione, pro
 Casino Casilinum dux ut acciperet, fecit; aversus-
 que ab suo itinere, per Allifanum, Calatinumque, et
 Calenum agrum, in campum Stellatam descendit:
 ubi quum montibus fluminibusque clausam regio-
 nem circumspexisset, vocatum ducem percunctatur,
 ubi terrarum esset? Quum is Casilini eo die man-
 surum eum dixisset, tum demum cognitus est error,
 et Casinum longe inde alia regione esse: virgisque
 cæso duce, et ad reliquorum terrorem in crucem
 sublato, castris communis, Maharbalem cum equi-
 tibus in agrum Falernum prædatum dimisit. Usque
 ad aquas Sinuessanas populatio ea pervenit: ingen-
 tem cladem, fugam tamen terroremque latius, Nu-
 midæ fecerunt. Nec tamen is terror, quum omnia
 bello flagrarent, fide socios dimovit: videlicet quia
 justo et moderato regebantur imperio; nec abnue-

U. C. 535. bant, quod unum vinculum fidei est, melioribus pa-
A. C. 217. rere.

Seditio in
castris Fa-
bii.

Minucii
seditiosa
oratio.

XIV. Ut vero ad Vulturnum flumen castra sunt posita, exurebaturque amœnissimus Italiæ ager, villæque passim incendiis fumabant, per juga Massici montis Fabio ducente, tum prope de integro seditio accensa: quieverant enim per paucos dies; quia quum celerius solito ductum agmen fuisset, festinari ad prohibendam populationibus Campaniam crediderant. Ut vero in extrema juga Massici montis ventum est, hostesque sub oculis erant, Falerni agri colonorumque Sinuessæ tecta urentes, nec ulla erat mentio pugnæ, *Spectatumne huc, inquit Minucius, ut rem fruendam oculis, sociorum cædes et incendia venimus? nec si nullius alterius nos, ne civium quidem horum pudet, quos Sinuessam colonos patres nostri miserunt, ut ab Samnite hoste tuta hæc ora esset: quam nunc non vicinus Samnis urit, sed Pænus advena, ab extremis orbis terrarum terminis, nostra cunctatione et socordia, jam huc progressus. Tantum (pro!) degeneramus a parentibus nostris, ut, præter quam oram illi Punicas vagari classes, dedecus esse imperii sui duxerint, eam nos nunc plenam hostium Numidarumque ac Maurorum jam factam videamus? Qui modo, Saguntum obpugnari indignando, non homines tantum, sed fœdera et Deos, ciebamus, scandentem mœnia Romanæ coloniæ Hannibalem lenti spectamus. Fumus ex incendiis villarum agrorumque in oculos atque ora venit; strepunt aures clamoribus plorantium sociorum, sæpius nos, quam Deorum invocantium opem: nos hic pecorum modo per æstivos saltus deviasque calles exercitum ducimus, conditi nubibus silvisque. Si hoc modo*

peragrandō cacumina saltusque M. Furius recipere a ^{U. C. 535.}
^{A. C. 217.} Gallis urbem voluisset, quo hic novus Camillus (nobis
 dictator unicus in rebus adfectis quæsitus) Italiam ab
 Hannibale recuperare parat, Gallorum Roma esset:
 quam vereor, ne, sic cunctantibus nobis, Hannibali ac
 Pænis toties servaverint majores nostri: sed vir, ac
 vere Romanus, quo die, dictatorem eum ex auctoritate
 Patrum jussuque populi dictum, Veios adlatum est,
 quum esset satis altum Janiculum, ubi sedens prospec-
 taret hostem, descendit in æquum: atque illo ipso die
 media in urbe, qua nunc busta Gallica sunt, et postero
 die citra Gabios cecidit Gallorum legiones. Quid?
 post multos annos, quum ad Furculas Caudinas ab
 Samnite hoste sub jugum missi sumus, utrum tandem
 L. Papirius Cursor juga Samnii perlustrando, an Lu-
 ceriam premendo obsidendoque, et lacessendo victorem
 hostem, depulsum ab Romanis cervicibus jugum superbo
 Samniti inposuit? Modo C. Lutatio quæ alia res, quam
 celeritas victoriam dedit? quod postero die, quam ho-
 stem vidit, classem gravem commeatibus, inpeditam suo-
 met ipsam instrumento atque adparatu, obpressit. Stul-
 titia est, sedendo aut votis debellari credere posse: ar-
 mari copias oportet, deducendas in æquum, ut vir cum
 viro congrediari. Audendo atque agendo res Roma-
 na crevit, non his segnibus consiliis, quæ timidi cauta
 vocant. Hæc velut concionanti Minucio circumfun-
 debatur tribunorum equitumque Romanorum multi-
 tudo, et ad aures quoque militum dicta ferocia vol-
 vebantur: ac, si militaris suffragii res esset, haud
 dubie ferebant, Minucium Fabio duci prælaturos.

XV. Fabius pariter, in suos haud minus quam in ^{Fabius in}
 hostes intentus, prius ab illis invictum animum præ- ^{cunctatione}
 stat: quamquam probe scit, non in castris modo ^{perstat.}

U. C. 565. suis, sed jam etiam Romæ infamem suam cunctatio-
 A. C. 217. nem esse, obstinatus tamen eodem consiliorum te-
 nore æstatis reliquum extraxit: ut Hannibal, desti-
 tutus ab spe summopere petiti certaminis, jam hi-
 bernis locum circumspectaret: quia ea regio præ-
 sentis erat copiæ, non perpetuæ, arbusta vineæque,
 et consita omnia magis amœnis, quam necessariis
 fructibus. Hæc per exploratores relata Fabio. Quum
 satis sciret, per easdem angustias, quibus intraverat
 Falernum agrum, rediturum, Calliculam montem et
 Casilinum occupat modicis præsiidiis; quæ urbs,
 Vulturno flumine diremta, Falernum ac Campanum
 agros dividit: ipse jugis iisdem exercitum reducit,
 misso exploratum cum quadringentis equitibus so-
 ciorum L. Hostilio Mancino: qui ex turba juvenum
 audientium sæpe ferociter concionantem magistrum
 equitum, progressus primo exploratoris modo, ut ex
 tuto specularetur hostem, ubi vagos passim per vi-
 cos Numidas vidit, per occasionem etiam paucos
 occidit: extemplo occupatus certamine est animus,
 excideruntque præcepta dictatoris; qui, quantum
 tuto posset, progressum prius recipere sese jusserat,
 quam in conspectum hostium veniret. Numidæ, alii
 atque alii obscursantes refugientesque, ad castra prope
 ipsum cum fatigue equorum atque hominum per-
 traxere: inde Karthalo, penes quem summa equestris
 imperii erat, concitatis equis invecus, quum prius,
 quam ad conjectum teli veniret, avertisset hostem,
 quinque millia ferme continenti cursu secutus est
 fugientes. Mancinus, postquam nec hostem desis-
 tere sequi, nec spem vidit effugiendi esse, cohortatus
 suos in prælium rediit, omni parte virium impar.
 Itaque ipse, et delecti equitum, circumventi occi-

duntur: ceteri effuso rursus cursu Cales primum, U. C. 535.
 inde prope inviis callibus ad dictatorem perfugerunt. A. C. 217.

Eo forte die Minucius se conjunxerat Fabio, missus ad firmandum præsidio saltum, qui super Tarracinam, in artas coactus fauces, inminet mari, ne inmunito Appiæ limite Pœnus pervenire in agrum Romanum posset. Coniunctis exercitibus dictator ac magister equitum castra in viam deferunt, qua Hannibal ducturus erat: duo inde millia hostes aberant.

XVI. Postero die Pœni, quod viæ inter bina castra erat, agmine complevere. Quum Romani sub ipso constitissent vallo, haud dubie æquiore loco, successit tamen Pœnus cum expeditis equitibus, atque ad lacessendum hostem carptim et procursando recipiendoque sese pugnare: restitit suo loco Romana acies: lenta pugna et ex dictatoris magis, quam Hannibalis, fuit voluntate: ducenti ab Romanis, octingenti hostium cecidere. Inclusus inde videri Hannibal, via ad Casilinum obsessa: quum Capua et Samnium, et tantum ab tergo divitum sociorum Romanis commeatus subveheret; Pœnus contra inter Formiana saxa ac Literni arenas stagnaque perhorrida situ hibernaturus esset. Nec Han- Inclusus Hannibal se explicat arte.
 nibalem fefellit, suis se artibus peti: itaque, quum per Casilinum evadere non posset, petendique montes et jugum Calliculæ superandum esset, necubi Romanus inclusum vallibus agmen adgrederetur; ludibrium oculorum, specie terribile, ad frustrandum hostem commentus, principio noctis furtim succedere ad montes statuit. Fallacis consilii talis adparatus fuit. Faces undique ex agris conlectæ, fascisque virgarum, atque arida sarmenta præligantur cor-

U. C. 535. nibus boum, quos domitos indomitosque multos in-
 A. C. 217. ter ceteram agrestem prædam agebat : ad duo mil-
 Boves ac- lia ferme boum effecta : Hasdrubalique negotium
 censis cor-
 nibus.

datum, ut primis tenebris noctis id armentum accensis cornibus ad montes ageret ; maxime, si posset, super saltus ab hoste insessos.

XVII. Primis tenebris silentio mota castra ; boves aliquanto ante signa acti : ubi ad radices montium viasque angustas ventum est, signum extemplo datur, ut accensis cornibus armenta in adversos concitentur montes : et metus ipse relucens flammæ ex capite, calorque, jam ad vivum, ad imaque cornuum adveniens, velut stimulatos furore agebat boves : quo repente discursu, haud secus quam silvis montibusque accensis, omnia circum virgulta ardere : capitumque irrita quassatio, excitans flammam, hominum passim discurrentium speciem præbebat. Qui ad transitum saltus insidendum locati erant, ubi in summis montibus ac super se quosdam ignes conspexerunt, circumventos se esse rati, præsidio excessere ; qua minime densæ micabant flammæ, velut tutissimum iter, petentes summa montium juga, tamen in quosdam boves palatos ab suis gregibus inciderunt. Et primo, quum procul cernerent, veluti flammæ spirantium miraculo adtoniti constiterunt : deinde, ut humana adparuit fraus, tum vero insidias rati esse, dum majore metu concitant se in fugam, levi quoque armaturæ hostium incurrere : ceterum nox æquato timore neutros pugnam incipientes ad lucem tenuit. Interea, toto agmine Hannibal transducto per saltum, et quibusdam in ipso saltu hostium obpressis, in agro Allifano posuit castra.

XVIII. Hunc tumultum sensit Fabius : ceterum

et insidias esse ratus, et ab nocturno utique abhor-
rens certamine, suos munimentis tenuit. Luce pri-
ma sub jugo montis prælium fuit; quo interclusam
ab suis levem armaturam facile (etenim numero ali-
quantum præstabant) Romani superassent, nisi His-
panorum cohors, ad id ipsum remissa ab Hannibale,
pervenisset: ea adsuetior montibus, et ad concur-
sandum inter saxa rupesque aptior ac levior, cum
velocitate corporum, tum armorum habitu, campes-
trem hostem, gravem armis statariumque, pugnae ge-
nere facile elusit. Ita haudquaquam pari certamine
digressi, Hispani fere omnes incolumes, Romani,
aliquot suis amissis, in castra contenderunt. Fabius
quoque movit castra: transgressusque saltum super
Allifas, loco alto ac munito consedit. Tum, per
Samnium Romam se petere simulans, Hannibal us-
que in Pelignos populabundus rediit. Fabius medius
inter hostium agmen urbemque Romam jugis duce-
bat; nec absistens, nec congregiens. Ex Pelignis
Pœnus flexit iter, retroque Apuliam repetens, Gero-
nium pervenit; urbem metu, quia conlapsa ruinis
pars mœnium erat, ab suis desertam. Dictator in
Larinate agro castra communiit: inde sacrorum
caussa Romam revocatus, non imperio modo, sed
consilio etiam, ac prope precibus agens cum ma-
gistro equitum, *ut plus consilio, quam fortunæ, con-
fidat: et se potius ducem, quam Sempronium, Flami-
niumque, imitetur: ne nihil actum censeret, extracta
prope aestate per ludificationem hostis: medicos quoque
plus interdum quiete, quam movendo atque agendo,
proficere. Haud parvam rem esse, ab toties victore
hoste vinci desisse, et ab continuis cladibus respirasse.*

U. C. 535.
A. C. 217.

Dictator it
Romam.

U. C. 535. Hæc nequidquam præmonito magistro equitum, Ro-
A. C. 217. mam est profectus.

Res gestæ
in His-
pania.

XIX. Principio æstatis, qua hæc gerebantur, in Hispania quoque terra marique cœptum bellum est. Hasdrubal ad eum navium numerum, quem a fratre instructum paratumque acceperat, decem adjecit: quadraginta navium classem Himilconi tradidit: atque ita Karthagine profectus navibus prope terram, exercitum in litore ducebat, paratus configere, quacumque parte copiarum hostis occurrisset. Cn. Scipioni, postquam movisse ex hibernis hostem audiuit, primo idem consilii fuit: deinde, minus terra, propter ingentem famam novorum auxiliorum, concurrere ausus, delecto milite ad naves inposito, quinque et triginta navium classe ire obviam hosti pergit. Altero ab Tarracone die ad stationem, decem millia passuum distantem ab ostio Iberi amnis, pervenit: inde duæ Massiliensium speculatoriæ præmissæ retulerunt, classem Punicam stare in ostio fluminis, castraque in ripa posita. Itaque, ut inprovidos incautosque universo simul effuso terrore obprimeret, sublatis ancoris ad hostem vadit. Multas et locis altis positas turres Hispania habet, quibus et speculis et propugnaculis adversus latrones utuntur: inde primo, conspectis hostium navibus, datum signum Hasdrubali est; tumultusque prius in terra et castris, quam ad mare et ad naves, est ortus, nondum aut pulsu remorum strepituque alio nautico exaudito, aut aperientibus classem promontoriis: quum repente eques, alius super alium ab Hasdrubale missus, vagos in litore quietosque in tentoriis suis, nihil minus quam hostem aut proelium eo die exspec-

tantes, conscendere naves propere atque arma capere jubet: classem Romanam jam haud procul portu esse. Hæc equites dimissi passim imperabant: mox Hasdrubal ipse cum omni exercitu aderat: varioque omnia tumultu strepunt, ruentibus in naves simul remigibus militibusque, fugientium magis e terra, quam in pugnam euntium modo. Vix dum omnes conscenderant, quum alii resolutis oris in ancoras evehuntur; alii, ne quid teneat, ancoralia incidunt: raptimque omnia præpropere agendo, militum adparatu nautica ministeria inpediuntur, trepidatione nantarum capere et aptare arma miles prohibetur. Et jam Romanus non adpropinquabat modo, sed direxerat etiam in pugnam naves: itaque non ab hoste et prælio magis Poeni, quam suomet ipsi tumultu turbati, tentata verius pugna, quam inita, in fugam averterunt classem: et quum adversi amnis os lato agmine ac tam multis simul venientibus haud sane intrabile esset, in litus passim naves egerunt: atque alii vadis, alii sicco litore excepti, partim armati, partim inermes, ad instructam per litus aciem suorum perfugere. Duæ tamen primo concursu captæ erant Punicæ naves, quatuor suppressæ.

U. C. 535.

A. C. 217.

Classis Punicæ in fugam versa.

XX. Romani, quamquam terra hostium erat, armatamque aciem toto prætentam in litore cernebant, haud cunctanter insecuti trepidam hostium classem, naves omnes, quæ non aut perfregerant proras litore inlisas, aut carinas fixerant vadis, religatas puppibus in altum extraxere: ad quinque et viginti naves ex quadraginta cepere. Neque id pulcherrimum ejus victoriæ fuit, sed quod una levi pugna toto ejus oræ mari potiti erant: itaque ad Honoscā classe pro-

U. C. 535. fecti, excensione ab navibus in terram facta, quum
 A. C. 217. urbem vi cepissent, captamque diripuissent, Kartha-
 ginem inde petunt : atque, omnem agrum circa de-
 populati, postremo tecta quoque conjuncta muro
 portisque incenderunt. Inde jam præda gravis ad
 Longunticam pervenit classis : ubi vis magna sparti
 ad rem nauticam congesta ab Hasdrubale : quod sa-
 tis in usum fuit, sublato, ceterum omne incensum
 est. Nec continentis modo projectas oras præter-
 vecta, sed in Ebusum insulam transmissum : ubi
 urbe, quæ caput insulæ est, biduum nequidquam
 summo labore obpugnata, ubi in spem irritam frus-
 tra teri tempus animadversum est, ad populationem
 agri versi, direptis aliquot incensisque vicis, majore,
 quam ex continenti, præda parta, quum in naves se
 recepissent, ex Baliaribus insulis legati pacem peten-
 tes ad Scipionem venerunt. Inde flexa retro classis,
 reditamque in citeriora provinciæ ; quo omnium po-
 pulorum, qui Iberum incolunt, multorum et ultimæ
 Hispaniæ legati concurrerunt. Sed, qui vere ditio-
 nis imperiique Romani facti sunt, obsidibus datis,
 populi amplius fuerunt centum viginti. Igitur ter-
 restribus quoque copiis satis fidens Romanus usque
 ad saltum Castulonensem est progressus. Hasdru-
 bal in Lusitaniam ac propius oceanum concessit.

XXI. Quietum inde fore videbatur reliquum æsta-
 tis tempus, fuissetque per Pœnum hostem ; sed, præ-
 terquam quod ipsorum Hispanorum inquieta avida-
 que in novas res sunt ingenia, Mandonius Indibilis-
 que, qui antea Ilergetum regulus fuerat, postquam
 Romani ab saltu recessere ad maritimam oram, con-
 citis popularibus, in agrum pacatum sociorum Ro-
 manorum ad populandum venerunt. Adversus eos

tribunus militum cum expeditis auxiliis, a Scipione ^{U. C. 535.}
missi, levi certamine, ut tumultuariam manum, fu- ^{A. C. 217.}
dere omnes; occisis quibusdam captisque, magna
pars armis exuta. Hic tamen tumultus cedentem
ad oceanum Hasdrubalem cis Iberum ad socios tu-
tandos retraxit. Castra Punica in agro Ilercaonen-
sium, castra Romana ad novam classem erant, quum
fama repens alio avertit bellum. Celtiberi, qui prin- ^{Celtiberi}
cipes regionis suæ legatos miserant, obsidesque de- ^{arma ad-}
derant Romanis, nuncio misso a Scipione exciti, ^{versus Pœ-}
arma capiunt, provinciamque Karthaginensium va- ^{nos ca-}
lido exercitu invadunt: tria oppida vi expugnant:
inde, cum ipso Hasdrubale duobus præliis egregie
pugnantes, quindecim millia hostium occiderunt,
quatuor millia cum multis militaribus signis ca-
piunt.

XXII. Hoc statu rerum in Hispania, P. Scipio ^{P. Scipio}
in provinciam venit, prorogato post consulatum im- ^{classe ad-}
perio ab senatu missus, cum triginta longis navibus, ^{vehitur in}
et octo millibus militum, magnoque commeatu ad- ^{Hispaniam.}
vecto. Ea classis ingens agmine onerariarum pro-
cul visa, cum magna lætitia civium sociorumque,
portum Tarraconis ex alto tenuit: ibi milite expo-
sito, profectus Scipio fratri se conjungit: ac deinde
communi animo consilioque gerebant bellum. Oc-
cupatis igitur Karthaginensibus Celtiberico bello,
haud cunctanter Iberum transgrediuntur; nec ullo
viso hoste, Saguntum pergunt ire, quod ibi obsides ^{Obsides}
totius Hispaniæ custodiæ traditos ab Hannibale fa- ^{Hispano-}
ma erat modico in arce custodiri præsidio: id unum ^{rum Sa-}
pignus inclinatos ad Romanam societatem omnium ^{gunti.}
Hispaniæ populorum animes morabatur, ne sanguine
liberum suorum culpa defectionis lueretur. Eo vin-

U. C. 535. culo Hispaniam vir unus, solerti magis quam fideli
 A. C. 217. consilio, exsolvit. Abelux erat Sagunti nobilis His-
 Eos Abe- panus, fidus ante Pœnis: tum (qualia plerumque
 lux tradit sunt barbarorum ingenia) cum fortuna mutaverat
 Romanis. fidem: ceterum, transfugam, sine magnæ rei proditi-
 one venientem ad hostes, nihil aliud quam unum
 vile atque infame corpus esse ratus, id agebat, ut
 quam maximum emolumentum novis sociis esset.
 Circumspectis igitur omnibus, quæ fortuna potesta-
 tis ejus poterat facere, obsidibus potissimum traden-
 dis animum adjecit: eam unam rem maxime ratus
 conciliaturam Romanis principum Hispaniæ amicitiam.
 Sed quum, injussu Bostaris præfecti, satis
 sciret, nihil obsidum custodes facturos esse, Bostarem
 ipsum arte adgreditur. Castra extra urbem in
 ipso litore habebat Bostar, ut aditum ex portu intercluderet
 Romanis: ibi eum in secretum abductum, velut ignorantem, monet,
 quo statu sit res. *Metum continuisse ad eam diem Hispanorum animos,
 quia procul Romani abessent: nunc cis Iberum castra Romana esse,
 arccum tutam perfugiumque novas volentibus res: itaque, quos metus non teneat, beneficio et gratia devinciendos esse.* Miranti Bostari percunctantique,
 quodnam id subitum tantæ rei donum possit esse? *Obsides, inquit, in civitates remitte: id et privatim parentibus, quorum maximum nomen in civitatibus est suis, et publice populis gratum erit. Vult sibi quisque credi, et habita fides ipsam plerumque obligat fidem.* Ministerium restituendorum domos obsidum
 mihimet deposco ipse, ut opera quoque inpen-
 sa consilium adjuvem meum, et rei suapte natura grata,
 quantam insuper gratiam possim, adjiciam. Homini,
 non ad cetera Punica ingenia callido, ut persuasit,

nocte clam progressus ad hostium stationes, con-
 ventis quibusdam auxiliaribus Hispanis, et ab iis ad
 Scipionem perductus, quid adferret, expromit. Fide
 accepta dataque, ac loco et tempore constituto ad
 obsides tradendos, Saguntum redit; diem insequen-
 tem absumsit cum Bostare, mandatis ad rem agen-
 dam accipiendis: dimissus, quum se nocte iturum,
 ut custodias hostium falleret, constituisset, ad com-
 positam cum iis horam excitatis custodibus puerorum
 profectus, veluti ignarus in præparatas sua fraude
 insidias ducit. In castra Romana perducti: cetera
 omnia de reddendis obsidibus, sicut cum Bostare
 constitutum erat, acta per eundem ordinem, quo si
 Karthaginiensium nomine sic ageretur. Major ali-
 quanto Romanorum gratia fuit in re pari, quam
 quanta futura Karthaginiensium fuerat: illos enim,
 graves superbosque in rebus secundis expertos, for-
 tuna et timor mitigasse videri poterat. Romanus
 primo adventu, incognitus ante, ab re clementi li-
 beralique initium fecerat: et Abelux, vir prudens,
 haud frustra videbatur socios mutasse: itaque in-
 genti consensu defectionem omnes spectare: arma-
 que extemplo mota forent, ni hiems, quæ Romanos
 quoque et Karthaginienses concedere in tecta coë-
 git, intervenisset.

U. C. 535.
 A. C. 217.

In castra
 Romana
 perductos
 suis reddit
 Scipio.

XXIII. Hæc in Hispania quoque secunda æstate
 Punici belli gesta, quum in Italia paullum intervalli
 cladibus Romanis solers cunctatio Fabii fecisset:
 quæ ut Hannibalem non mediocri sollicitum cura ha-
 bebat, tandem eum militiæ magistrum delegisse Ro-
 manos cernentem, qui bellum ratione, non fortuna,
 gereret; ita contenta erat inter cives, armatos pa-
 riter togatosque; utique postquam, absente eo, te-

Fabii cunc-
 tatio Romæ
 invisæ.

U. C. 535. meritate magistri equitum, læto verius dixerim, quam
A. C. 217. prospero eventu, pugnatum fuerat. Accesserant duæ

Hannibal- res ad augendam invidiam dictatoris : una fraude ac
lis dolus dolo Hannibalis, quod, quum a perfugis ei monstra-
ad augen- tus ager dictatoris esset, omnibus circa solo æquatis,
dam in- ab uno eo ferrum ignemque et vim omnem hostium
vidiam abstineri jussit, ut occulti alicujus pacti ea merces
dictato- videri posset : altera ipsius facto, primo forsitan
ris. dubio, quia non exspectata in eo senatus auctoritas
est ; ad extremum haud ambigue in maximam lau-
dem verso, in permutandis captivis : quod, sicut pri-
mo Punico bello factum erat, convenerat inter duces
Romanum Pœnumque, ut, quæ pars plus reciperet,
quam daret, argenti pondo bina et selibras in mili-
tem præstaret. Ducentos quadraginta septem quum
plures Romanus, quam Pœnus, recepisset, argen-
tumque pro eis debitum, sæpe jactata in senatu re,
quoniam non consulisset Patres, tardius erogaretur :
inviolatum ab hoste agrum, misso Romam
Quinto filio, vendidit, fidemque publicam inpendio
privato exsolvit. Hannibal pro Geronii mœnibus,
cujus urbis, captæ atque incensæ ab se, in usum
horreorum pauca reliquerat tecta, in stativis erat :
inde frumentatum duas exercitus partes mittebat :
cum tertia ipse expedita in statione erat, simul ca-
stris præsidio, et circumspectans, necunde inpetus
in frumentatores fieret.

Fabius pe-
cunia sua
captivos
redimit.

XXIV. Romanus tunc exercitus in agro Larinati
erat : præerat Minucius magister equitum, profecto,
sicut ante dictum est, ad urbem dictatore. Cete-
rum castra, quæ in monte alto ac tuto loco posita
fuerant, jam in planum deferuntur : agitabanturque
pro ingenio ducis consilia calidiora, ut inpetus aut

Eo ab-
sente Mi-
nucius
rem non
impro-
spere gerit.

in frumentatores palatos, aut in castra, relicta cum U. C. 535.
 levi præsidio, fieret. Nec Hannibalem fefellit, cum A. C. 217.
 duce mutatam esse belli rationem, et ferocius, quam
 consultius, rem hostes gesturos. Ipse autem, (quod
 minime quis crederet) quum hostis propius esset,
 tertiam partem militum frumentatum, duabus in ca-
 stris retentis, dimisit; dein castra ipsa propius ho-
 stem movit, duo ferme a Geronio millia, in tumultum
 hosti conspectum; ut intentum sciret esse ad fru-
 mentatores, si qua vis fieret, tutandos. Propior in-
 de ei, atque ipsis inminens Romanorum castris tu-
 mulus adparuit: ad quem capiendum si luce palam
 iretur, quia haud dubie hostis breviora via præventu-
 rus erat, nocte clam missi Numidæ ceperunt: quos
 tenentes locum, contempta paucitate, Romani pos-
 tero die quum ejecissent, ipsi eo transferunt castra.
 Tum itaque, ut exiguum spatii vallum a vallo aberat,
 et id ipsum totum prope compleverat Romana acies,
 simul et per aversa castra a castris Hannibalis equi-
 tatus, cum levi armatura emissus in frumentatores,
 late cædem fugamque hostium palatorum fecit: nec
 acie certare Hannibal ausus; quia tanta paucitate
 vix castra, si obpugnarentur, tutari poterat. Jamque
 artibus Fabii, (pars exercitus aberat) jam ferme se-
 dendo et cunctando bellum gerebat, receperatque
 suos in priora castra, quæ pro Geronii mœnibus
 erant. Justa quoque acie et conlatis signis dimica-
 tum, quidam auctores sunt: primo concursu Pœ-
 num usque ad castra fusum, inde eruptione facta re-
 pente versum terrorem in Romanos: Num. Deci-
 mii Samnitis deinde interventu prælium restitui-
 tum. Hunc, principem genere ac divitiis non Bo-
 viani modo, unde erat, sed toto Samnio, jussu dic-

U. C. 535. tatoris octo millia peditum, et equites quingentos
 A. C. 217. ducentem in castra, ab tergo quum adparuisset Hannibali, speciem parti utrique præbuisse novi præsidii, cum Q. Fabio ab Roma venientis : Hannibalem insidiarum quoque aliquid timentem recepisse suos : Romanum insecutum, adjuvante Samnite, duo castella eo die expugnasse : sex millia hostium cæsa, quinque admodum Romanorum : tamen in tam pari prope clade famam egregiæ victoriæ cum vanioribus literis magistri equitum Romam perlatam.

Oratio
 Metilii
 trib. pl. in
 Fabium.

XXV. De his rebus persæpe et in senatu et in concione actum est. Quum, læta civitate, dictator unus nihil nec famæ, nec literis crederet ; ut vera omnia essent, secunda se magis, quam adversa, timere diceret : tum M. Metilius tribunus plebis, *id enim ferendum esse negat. Non præsentem solum dictatorem obstitisse rei bene gerendæ, sed absentem etiam gestæ obstare : et in ducendo bello sedulo tempus terere, quo diutius in magistratu sit, solusque et Romæ et in exercitu imperium habeat. Quippe consulum alterum in acie cecidisse ; alterum, specie classis Punicæ persequendæ, procul ab Italia ablegatum. Duos prætores Sicilia atque Sardinia occupatos, quorum neutra hoc tempore provincia prætore egeat. M. Minucium magistrum equitum, ne hostem videret, ne quid rei bellicæ gereret, prope in custodiam habitum. Itaque, Hercule, non Samnium modo, quo jam, tamquam trans Iberum agro, Pænis concessum sit, et Campanum, Calenumque, et Falernum agros pervastatos esse, sedente Casilini dictatore, et legionibus populi Romani agrum suum tutante : exercitum cupientem pugnare, et magistrum equitum, clausos prope intra vallum retentos ; tamquam hostibus captivis arma ademta : tandem, ut abscesserit*

inde dictator, ut obsidione liberatos, extra vallum egres-
 sos fudisse ac fugasse hostes. Quas ob res, si antiquus
 animus plebi Romanæ esset, audaciter se laturum fuisse
 de abrogando Q. Fabii imperio : nunc modicam roga-
 tionem promulgaturum de æquando magistri equitum
 et dictatoris jure : nec tamen ne ita quidem prius mit-
 tendum ad exercitum Q. Fabium, quam consulem in lo-
 cum C. Flamini subfecisset. Dictator concionibus se
 abstinuit, in actione minime popularis : ne in senatu
 quidem satis æquis auribus audiebatur, tunc quum
 hostem verbis extolleret, biennique clades per te-
 meritatem atque inscientiam ducum acceptas refer-
 ret : magistroque equitum, quod contra dictum suum
 pugnasset, rationem diceret reddendam esse. Si penes
 se summa imperii consiliique sit, propediem effecturum,
 ut sciant homines, bono imperatori haud magni fortu-
 nam momenti esse : mentem rationemque dominari. Se
 in tempore et sine ignominia servasse exercitum, quam
 multa millia hostium occidisse, majorem gloriam esse.
 Hujus generis orationibus frustra habitis, et consule
 creato M. Atilio Regulo, ne præsens de jure imperii
 dimicaret, pridie quam rogationis ferendæ dies ad-
 esset, nocte ad exercitum abiit. Luce orta, quum
 plebis concilium esset, magis tacita invidia dictato-
 ris favorque magistri equitum animos versabat, quam
 satis audebant homines ad suadendum, quod vulgo
 placebat, prodire : et, favore superante, auctoritas
 tamen rogationi deerat. Unus inventus est suasor
 legis C. Terentius Varro, qui priore anno prætor
 fuerat, loco non humili solum, sed etiam sordido,
 ortus : patrem lanium fuisse ferunt, ipsum instito-
 rem mercis, filioque hoc ipso in servilia ejus artis
 ministeria usum.

U. C. 535.
 A. C. 217.

Fabius se
 defendit
 apud sena-
 tum.

M. Atilius
 subfectus
 cos.

C. Teren-
 tius Varro

U. C. 535.

A. C. 217.

XXVI. Is juvenis, ubi ex eo genere quæstus pecunia a patre relicta animos ad spem liberalioris fortunæ fecit, togaque et forum placuere, proclamando pro sordidis hominibus caussisque adversus rem et famam bonorum, primum in notitiam populi, deinde ad honores pervenit: quæstura quoque et duabus ædilitatibus, plebeia et curuli, postremo et prætura perfunctus, jam ad consulatus spem quum adtolleret animos, haud parum callide auram favoris popularis ex dictatoria invidia petiit, scitique plebis unam gratiam tulit. Omnes eam rogationem, quique Romæ, quique in exercitu erant, æqui atque iniqui, præter ipsum dictatorem, in contumeliam ejus latam acceperunt: ipse, qua gravitate animi criminantes se ad multitudinem inimicos tulerat, eadem et populi in se sævientis injuriam tulit: acceptisque in ipso itinere literis senatusconsulti de æquato imperio, satis fidens, haudquaquam cum imperii jure artem imperandi æquatam, cumque invicto a civibus hostibusque animo ad exercitum rediit.

Æquatur
dictatori
mag.
equitum.

XXVII. Minucius vero, quum jam ante vix tolerabilis fuisset secundis rebus ac favore vulgi, tum utique inmodice inmodesteque, non Hannibale magis victo ab se, quam Q. Fabio, gloriari: *Illum in rebus asperis unicum ducem ac parem quæsitum Hannibali, majorem minori, dictatorem magistro equitum, quod nulla memoria habeat annalium, jussu populi æquatam in eadem civitate, in qua magistri equitum virgas ac secures dictatoris tremere atque horrere soliti sint. In tantum suam felicitatem virtutemque enituisse. Ergo secuturum se fortunam suam, si dictator in cunctatione ac segnitie, Deorum hominumque judicio damnata, perstaret.* Itaque, quo die primum congressus

est cum Q. Fabio, *statuendum omnium primum*, ait, U. C. 535.
esse, quemadmodum imperio æquato utantur. Se op- A. C. 217.
timum ducere, aut diebus alternis, aut, si majora in-
tervalla placerent, partitis temporibus, alterius sum-
munus jus imperiumque esse: ut par hosti non solum
consilio, sed viribus etiam esset, si quam occasionem
rei gerendæ habuisset. Q. Fabio haudquaquam id pla-
cere: omnia enim fortunam habituram, quæcumque
temeritas collegæ habuisset. Sibi communieatum cum
illo, non ademptum, imperium esse. Itaque se numquam
volentem parte, qua posset, rerum consilio gerendarum
cessurum: nec se tempora aut dies imperii cum eo, ex-
ercitus divisurum, suisque consiliis, quoniam omnia non
liceret, quæ posset, servaturum. Ita obtinuit, uti le-
 giones, sicut consulibus mos esset, inter se divide-
 rent: prima et quarta Minucio, secunda et tertia Fa-
 bio evenerunt. Item equites pari numero, socium-
 que et Latini nominis auxilia diviserunt: castris se
 quoque separari magister equitum valuit.

Exercitus
inter eos
dividuntur.

XXVIII. Duplex inde Hannibali gaudium fuit:
 neque enim quidquam eorum, quæ apud hostes age-
 rentur, eum fallebat, et perfugis multa indicantibus,
 et per suos explorantem: nam et liberam Minucii
 temeritatem se suo modo captaturum, et solertiæ
 Fabii dimidium virium decessisse. Tumulus erat
 inter castra Minucii Pœnorumque: eum qui occu-
 passet, haud dubie iniquiorem erat hosti locum fac-
 turus: eum non tam capere sine certamine volebat
 Hannibal, (quamquam id operæ pretium erat) quam
 causam certaminis cum Minucio, quem semper ob-
 cursurum ad obsistendum satis sciebat, contrahere.
 Ager omnis medius erat prima specie inutilis insi-
 diatori, quia non modo silvestre quidquam, sed ne

U. C. 535. *vepribus quidem vestitum habebat: re ipsa natus*

A. C. 217. *tegendis insidiis, eo magis quod in nuda valle nulla talis fraus timeri poterat: et erant in amfractibus cavæ rupes, ut quædam earum ducenos armatos possent capere. In has latebras, quot quemque locum apte insidere poterant, quinque millia conduntur peditum equitumque: necubi tamen aut motus alicujus temere egressi, aut fulgor armorum fraudem in valle tam aperta detegeret; missis paucis prima luce ad capiendum, quem ante diximus, tumultum, avertit oculos hostium.* Primo statim conspectu contempta paucitas: ac sibi quisque deposcere pellendos inde hostes: ad locum capiendum dux ipse inter stolidissimos ferocissimosque ad arma vocat; et vanis animis et minis increpat hostem. Principio levem armaturam dimittit, deinde conferto agmine mittit equites: postremo, quum hostibus quoque subsidia mitti videret, instructis legionibus procedit. Et*

Pugna inter Hannibalem et Minucium.

Hannibal, laborantibus suis alia atque alia, crescente certamine, mittens auxilia peditum equitumque, jam justam expleverat aciem, ac totis utrimque viribus certabatur. Prima levis armatura Romanorum, præoccupatum inferiore loco succedens tumultum, pulsa detrusaque terrorem in succedentem intulit equitem, et ad signa legionum refugit: peditum acies inter percussos inpavida sola erat, videbaturque, si justa aut si recta pugna esset, haudquam impar futura: tantum animorum fecerat prospere ante paucos dies res gesta. Sed exorti repente insidiatores eum tumultum terroremque, in latera utrimque ab tergoque incursantes, fecerunt, ut neque animus ad pugnam, neque ad fugam spes cuiquam superesset.

Laborat Minucius.

XXIX. Tunc Fabius, primo clamore paventium U. C. 535.
 audito, dein conspecta procul turbata acie, *Ita est,* A. C. 217.
 inquit, *non celerius, quam timui, apprehendit fortuna* A Fabio
temeritatem. Fabio æquatus imperio Hannibalem et servatur.
virtute et fortuna superiorem videt. Sed aliud jur-
gandi succensendique tempus erit: nunc signa extra
vallum proferte. Victoriam hosti extorqueamus, con-
fessionem erroris civibus. Jam magna ex parte cæsis
aliis, aliis circumspectantibus fugam, Fabiana se
acies repente, velut cœlo demissa, ad auxilium
ostendit. Itaque, priusquam ad conjectum teli ve-
niret, aut manum consereret, et suos a fuga effusa,
et ab nimis feroci pugna hostes continuit: qui so-
luti ordinibus vage dissipati erant, undique confu-
gerunt ad integram aciem; qui plures simul terga
dederant, conversi in hostem, volventesque orbem,
nunc sensim referre pedem, nunc conglobati restare:
ac jam prope una acies facta erat victi atque integri
exercitus, inferebantque signa in hostem; quum
Pœnus receptui cecinit, palam ferente Hannibale,
ab se Minucium, se a Fabio victum. Ita per variam
fortunam diei majore parte exacta, quum in castra
reditum esset, Minucius, convocatis militibus, Sæpe Minucius
ego, inquit, audiui, milites, eum primum esse virum, errorem
qui ipse consulat, quid in rem sit; secundum eum, suum ag-
qui bene monenti obediat: qui nec ipse consulere, nec
alteri parere sciat, eum extremi ingenii esse. Nobis quo-
niam prima animi ingenique negata sors est, secundam
ac mediam teneamus: et, dum imperare discimus, pa-
rere prudenti in animum inducamus. Castra cum Fabio
jungamus: ad prætorium ejus signa quum tulerimus, ubi
ego eum parentem adpellavero, quod beneficio ejus er-
ga nos ac majestate ejus dignum est; vos, milites, eos.

U. C. 535. *quorum vos modo arma dexteræque texerunt, patronos*
 A. C. 217. *salutabitis, et, si nihil aliud, gratorum certe nobis animorum gloriam dies hæc dederit.*

Sub imperium Fabii
 reddit.

XXX. Signo dato, conclamatur inde, ut conligantur vasa: profecti et agmine incedentes ad dictatoris castra in admirationem et ipsum, et omnes, qui circa erant, converterunt. Ut constituta sunt ante tribunal signa, progressus ante alios magister equitum, quum patrem Fabium adpellasset, circumfusosque militum ejus totum agmen patronos consalutasset, *Parentibus, inquit, meis, dictator, (quibus te modo nomine, quo fando possum, æquavi) vitam tantum debeo: tibi quum meam salutem, tum omnium horum. Itaque plebeiscitum, quo oneratus magis, quam honoratus sum, primus antiquo abrogoque: et, quod tibi mihi, quod exercitibusque his tuis, servato ac conservatori, sit felix, sub imperium auspiciumque tuum redeo, et signa hæc legionesque restituo. Tu, quæso, placatus me magisterium equitum, hos ordines suos quemque tenere jubeas.* Tum dextræ interjunctæ, militesque, concione dimissa, a notis ignotisque benigne atque hospitaliter invitati: lætusque dies, ex admodum tristi paullo ante ac prope execrabili, factus. Romæ, ut est perlata fama rei gestæ, dein literis non magis ipsorum imperatorum, quam vulgo militum ex utroque exercitu adfirmata, pro se quisque Maximum laudibus ad cælum ferre. Par gloria apud Hannibalem hostesque Pœnos erat: ac tum demum sentire, cum Romanis atque in Italia bellum esse. Nam biennio ante adeo et duces Romanos et milites spreverant, ut vix cum eadem gente bellum esse crederent, cujus terribilem eam famam a patribus acceperant. Hannibalem quoque ex acie rede-

untem dixisse ferunt, *tandem eam nubem, quæ sedere* U. C. 585.
in jugis montium solita sit, cum procella imbrem dedisse. A. C. 217.

XXXI. Dum hæc gerantur in Italia, Cn. Ser- Servilius
 vilius Geminus consul cum classe centum viginti^{cos. male}
 navium, circumvectus Sardinia et Corsica oram, et^{rem gerit}
 in Africa.

obsidibus utrimque acceptis, in Africam transmisit :

et, priusquam in continentem excensiones faceret,

Menige insula vastata, et ab incolentibus Cercinam,

ne et ipsorum ureretur diripereturque ager, decem

talentis argenti acceptis, ad litora Africae accessit,

copiasque exposuit. Inde ad populandum agrum

ducti milites, navalesque socii juxta effusi, ac si in-

sulis cultorum egentibus prædarentur : itaque in in-

sidias temere inlati, quum a frequentibus palantes,

ab locorum gnaris ignari circumvenirentur, cum

multa cæde ac fœda fuga retro ad naves compulsi

sunt. Ad mille hominum, cum his Sempronio Blæso

quæstore, amissum : classis, a litoribus hostium ple-

nis trepide soluta, in Siciliam cursum tenuit : tradi-

taque Lilybæi T. Otacilio prætori, ut ab legato ejus

P. Sura Romam reduceretur : ipse, per Siciliam pe-

diibus profectus, freto in Italiam trajecit, literis Q.

Fabii adcitatus et ipse, et collega ejus M. Atilius, ut

exercitus ab se, exacto jam prope semestri imperio,

acciperent. Omnium prope annales Fabium dicta-

torem adversus Hannibalem rem gessisse tradunt.

Cœlius etiam eum primum a populo creatum dicta-

torem scribit. Sed et Cœlium et ceteros fugit, uni

consuli Cn. Servilio, qui tum procul in Gallia pro-

vincia aberat, jus fuisse dicendi dictatoris : quam

moram quia exspectare territa jam clade civitas non

poterat, eo decursum esse, ut a populo crearetur,

qui pro dictatore esset : res inde gestas gloriamque

U. C. 535. insignem ducis et augentes titulum imaginis poste-
 A. C. 217. ros, ut, qui pro dictatore, dictator diceretur, facile
 obtinuisse.

Coss. arti-
 bus Fabii
 bellum
 gerunt.

XXXII. Consules, Atilius Fabiano, Geminus
 Servilius Minuciano exercitu accepto, hibernaculis
 mature communitis, (extremum autumnus erat) Fabii
 artibus cum summa inter se concordia bellum ges-
 serunt. Frumentatum exeunti Hannibali diversis lo-
 cis opportuni aderant, carpentes agmen, palatosque
 excipientes: in casum universæ dimicationis, quam
 omnibus artibus petebat hostis, non veniebant: ad-
 eoque inopia est coactus Hannibal, ut, nisi tum fu-
 gæ speciem abeundo timuisset, Galliam repetiturus
 fuerit, nulla relictâ spe alendi exercitus in eis locis,
 si insequentes consules eisdem artibus bellum gere-
 rent. Quum ad Geronium jam hieme impediante
 constitisset bellum, Neapolitani legati Romam ve-
 nere: ab iis quadraginta pateræ aureæ magni pon-
 deris in curiam inlatæ, atque ita verba facta, ut di-

Neapolita-
 ni aurum
 obferunt
 Romanis.

cerent: *Scire sese, Romani populi ærarium bello ex-
 hauriri: et, quum juxta pro urbibus agrisque sociorum,
 ac pro capite atque arce Italiæ, urbe Romana atque
 imperio geratur, æquum censuisse Neapolitanos, quod
 auri sibi quum ad templorum ornatum, tum ad subsi-
 dium fortunæ a majoribus relictum foret, eo jurare po-
 pulum Romanum. Si quam opem in sese crederent,
 eodem studio fuisse oblaturus: gratum sibi Patres Ro-
 manos populumque facturum, si omnes res Neapolita-
 norum suas duxissent; dignosque judicaverint, ab qui-
 bus donum, animo ac voluntate eorum, qui libentes da-
 rent, quam re, majus ampliusque, acciperent. Legatis
 gratiæ actæ pro munificentia curaque: patera, quæ
 ponderis minimi fuit, accepta.*

XXXIII. Per eosdem dies speculator Karthagi-
 niensis, qui per biennium fefellerat, Romæ depre-
 hensus, præcisisque manibus dimissus : et servi quin-
 que et viginti in crucem acti, quod in Campo Martio
 conjurassent : indici data libertas et æris gravis vi-
 ginti millia. Legati et ad Philippum Macedonum
 regem missi ad deprecandum Demetrium Pharium,
 qui, bello victus, ad eum fugisset : et alii in Ligures
 ad exostulandum, quod Pœnum opibus auxiliisque
 suis juvissent : simul ad visendum ex propinquo, quæ
 in Boiis atque Insubribus gererentur. Ad Pineum
 quoque regem in Illyrios legati missi ad stipendium,
 cujus dies exierat, poscendum ; aut, si diem proferre
 vellet, obsides accipiendos : adeo, etsi bellum ingens
 in cervicibus erat, nullius usquam terrarum rei cura
 Romanos, ne longinqua quidem, effugiebat. In re-
 ligionem etiam venit, ædem Concordiæ, quam per
 seditionem militarem biennio ante L. Manlius præ-
 tor in Gallia vovisset, locatam ad id tempus non
 esse : Itaque duumviri ad eam rem creati a M. Æmi-
 lio prætore urbis, Cn. Pupius et K. Quinctius Flami-
 ninus, ædem in arce faciendam locaverunt. Ab eo-
 dem prætore ex senatusconsulto literæ ad consules
 missæ, ut, si iis videretur, alter eorum ad consules
 creandos Romam veniret : se in eam diem, quam
 jussissent, comitia edicturum. Ad hæc a consulibus
 rescriptum, *Sine detrimento reipublicæ abscedi non
 posse ab hoste : itaque per interregem comitia habenda
 esse potius, quam consulum alter a bello avocaretur.*
 Patribus rectius visum est, dictatorem a consule dici
 comitiorum habendorum causa : dictus L. Veturius
 Philo, M. Pomponium Mathonem magistrum equi-
 tum dixit. His vitio creatis, jussisque die quarto-

U. C. 535.
 A. C. 217.
 Speculator
 Pœnus.

Legati in
 varia loca
 missi.

decimo se magistratu abdicare, ad interregnum res rediit.

U. C. 536.
A. C. 216.
Interreges.

C. Terentius Varro
consulatus candidatus.

XXXIV. Consulibus prorogatum in annum imperium: interreges prodi a Patribus C. Claudius, Ap. filius, Centho, inde P. Cornelius Asina. In ejus interregno comitia habita magno certamine Patrum ac plebis. C. Terentio Varroni, quem, sui generis hominem, plebei insectatione principum popularibusque artibus conciliatum, ab Q. Fabii opibus et dictatorio imperio concussis aliena invidia splendentem, vulgus et extrahere ad consulatum nitebatur, Patres summa ope obstabant, ne se insectando sibi æquari adsuescerent homines. Q. Bæbius Herennius tribunus plebis, cognatus C. Terentii, criminando non senatum modo, sed etiam augures, quod dictatorem prohibuissent comitia perficere, per invidiam eorum favorem candidato suo conciliabat.

Bæbii trib.
pl. oratio
in nobiles.

Ab hominibus nobiles, per multos annos bellum quærentibus, Hannibalem in Italiam adductum: ab iisdem, quum debellari possit, fraude id bellum trahi: cum quatuor militum legionibus universis pugnari posse adparuisse eo, quod M. Minucius, absente Fabio, prospere pugnasset; duas legiones hosti ad cædem objectas, deinde ex ipsa cæde ereptas, ut pater patronusque adpellaretur, qui prius vincere prohibuisset Romanos, quam vinci. Consules deinde Fabianis artibus, quum debellare possent, bellum traxisse. Id fœdus inter omnes nobiles ictum: nec finem ante belli habituros, quam consulem vere plebeium, id est, hominem novum, fecissent: nam plebeios nobiles jam eisdem initiatos esse sacris, et contemnere plebem, ex quo contemni desierint a Patribus, cæpisse. Cui non id adparere, id actum et quæsitum esse, ut interregnum iniretur, ut in Patrum

potestate comitia essent? Id consules ambos ad exerci- U. C. 536.
tum morando quæsisse: id postea, quia invitis iis dic- A. C. 216.
tator esset dictus comitiorum caussa, expugnatum esse,
ut vitiosus dictator per augures fieret. Habere igitur
interregnum eos: consulatum unum certe plebis Ro-
manæ esse: populum liberum habiturum ac daturum
ei, qui magis vere vincere, quam diu imperare, malit.

XXXV. Quum his orationibus accensa plebs es-
 set, tribus patriciis petentibus, P. Cornelio Merenda,
 L. Manlio Vulsone, M. Æmilio Lepido, duobus no-
 bilibus jam familiarum plebei, C. Atilio Serrano et
 Q. Ælio Pæto, quorum alter pontifex, alter augur
 erat, C. Terentius consul unus creatur, ut in manu
 ejus essent comitia rogando collegæ. Tum experta
 nobilitas, parum fuisse virium in competitoribus, L.
 Æmiliū Paullum, qui cum M. Livio consul fuerat,
 et damnatione collegæ, et sua prope, ambustus eva-
 serat, infestum plebei, diu ac multum recusantem,
 ad petitionem compellit: is proximo comitali die,
 concedentibus omnibus, qui cum Varrone certave-
 rant, par magis in adversandum, quam collega, da-
 tur consuli. Inde prætoria comitia habita. Creati
 M. Pomponius Matho et P. Furius Philus. Romæ
 juri dicundo urbana sors Pomponio, inter cives Ro-
 manos et peregrinos P. Furio Philo evenit. Additi
 duo prætores, M. Claudius Marcellus in Siciliam, L. Prætores.
 Postumius Albinus in Galliam. Omnes absentes
 creati sunt; nec cuiquam eorum, præter Terentium
 consulem, mandatus honos, quem jam non antea
 gessisset, præteritis aliquot fortibus ac strenuis vi-
 ris; quia in tali tempore nulli novus magistratus vi-
 debatur mandandus.

XXXVI. Exercitus quoque multiplicati sunt.

U. C. 536. A. C. 216. **Quantæ autem peditum equitumque additæ sint copiarum, adeo et numero et genere copiarum variant auctores, ut vix quidquam satis certum adfirmare ausim. Decem millia novorum militum alii scripta in supplementum; alii novas quatuor legiones, ut octo legionibus rem gererent: numero quoque peditum equitumque legiones auctas, millibus peditum et centenis equitibus in singulas adjectis; ut quina millia peditum, treceni equites essent; socii duplicem numerum equitum darent, pedites æquarent. Septem et octoginta millia armatorum et ducentos in castris Romanis, quum pugnatum ad Cannas est, quidam auctores sunt. Illud haudquaquam discrepat, majore conatu atque inpetu rem actam, quam prioribus annis; quia spem, posse vinci hostem, dictator præbuerat. Ceterum, priusquam signa ab urbe novæ legiones moverent, decemviri libros adire atque inspicere jussi propter territos vulgo homines novis prodigiis: nam, et Romæ in Aventino et Aricia, nunciatum erat, sub idem tempus lapidibus pluisse: et multo cruore signa in Sabinis cædis, aquas e fonte calidas manasse. Id quidem etiam, quod sæpius acciderat, magis terrebat: et in via Fornicata, quæ ad Campum erat, aliquot homines de cælo tacti exanimatique fuerant. Ea prodigia ex libris procurata. Legati a Pæsto pateras aureas Romam adtulerunt: iis, sicut Neapolitanis, gratiæ actæ, aurum non acceptum.**

Legati cum donis ab Hierone Romam missi.

XXXVII. Per eosdem dies ab Hierone classis Ostiam cum magno commeatu accessit. Legati Syracusani in senatum introducti nunciarunt: *Cædem C. Flamini consulis exercitusque adlatam adeo ægre tulisse regem Hieronem, ut nulla sua propria regnique*

sui clade moveri magis potuerit. Itaque, quamquam U. C. 536.
A. C. 216.
probe sciat, magnitudinem populi Romani admirabili-
orem prope adversis rebus, quam secundis, esse; tamen
se omnia, quibus a bonis fidelibusque sociis bella juvari
soleant, misisse: quæ ne accipere abnuant, magno opere
se Patres conscriptos orare. Jam omnium primum omni-
nis caussa Victoriam auream pondo trecentum viginti
adferre sese: acciperent eam, tenerentque, et haberent
propriam et perpetuam. Advexisse etiam trecenta mil-
lia modium tritici, ducenta hordei, ne commeatus dees-
sent: et, quantum præterea opus esset, quo jussissent,
subvecturos. Milite atque equite scire, nisi Romano
Latinique nominis, non uti populum Romanum: le-
vium armatorum auxilia etiam externa vidisse in ca-
stris Romanis. Itaque misisse mille sagittariorum ac
funditorum, aptam manum adversus Baliares ac Mau-
ros, pugnacesque alias missili telo gentes. Ad ea dona
consilium quoque addebant, Ut prætor, cui provincia
Sicilia evenisset, classem in Africam trajiceret; ut et
hostes in terra sua bellum haberent, minusque laxamenti
daretur iis ad auxilia Hannibali submittenda. Ab se-
natu ita responsum regi est: Virum bonum egregi-
umque socium Hieronem esse, atque uno tenore, ex quo
in amicitiam populi Romani venerit, fidem coluisse, ac
rem Romanam omni tempore ac loco munifice adjuvis-
se: id, perinde ac deberet, gratum populo Romano esse.
Aurum et a civitatibus quibusdam adlatum, gratia rei
accepta, non accepisse populum Romanum. Victoriam
omenque accipere; sedemque ei se Divæ dare, dicare
Capitolium, templum Jovis Optimi Maximi: in ea arce
urbis Romanæ sacratam, volentem propitiamque, fir-
mam ac stabilem fore populo Romano. Funditores,
sagittariiique, et frumentum traditum consulibus.

U. C. 536. Quinqueremes ad navium classem, quæ cum T. Otacilio proprætore in Sicilia erant, quinque et viginti additæ, permissumque est, ut, si e republica censeret esse, in Africam trajiceret.

XXXVIII. Delectu perfecto, consules paucos morati dies, dum socii ab nomine Latino venirent. Milites tunc, quod numquam antea factum erat, *ju-rejurando* ab tribunis militum adacti, jussu consulum conventuros, neque injussu abituros: nam ad eam diem nihil præter sacramentum fuerat; et, ubi ad decuriatum aut centuriatum convenissent, sua voluntate ipsi inter se equites decuriati, centuriati pedites conjurabant, sese fugæ atque formidinis ergo non abituros, neque ex ordine recessuros, nisi teli sumendi, aut petendi, et aut hostis ferendi, aut civis servandi causa: id ex voluntario inter ipsos fœdere a tribunis ad legitimam jurisjurandi adactionem translatum. Conciones, priusquam ab urbe signa moverentur, consulis Varronis multæ ac feroces fuere, denunciantes, bellum arcessitum in Italiam ab nobilibus, mansurumque in visceribus reipublicæ, si plures Fabios imperatores haberet; se, quo die hostem vidisset, perfecturum. Collegæ ejus Paulli una, pridie quam ex urbe profiscerentur, concio fuit verior, quam gratior populo, qua nihil inclementer in Varronem dictum, nisi id modo; *Mirari se, quomodo quis dux, priusquam aut suum, aut hostium exercitum, locorum situm, naturam regionis nosset, jam nunc locatus in urbe sciret, quæ sibi agenda armato forent; et diem quoque prædicere posset, quæ cum hoste signis conlatis esset dimicaturus. Se, quæ consilia magis res dent hominibus, quam homines rebus, ea ante tempus immatura non præcepturum: optare,*

ut, quæ caute atque consulte gesta essent, satis prospere evenirent. Temeritatem, præterquam quod stulta sit, infelicem etiam ad id locorum fuisse. Id sua sponte adparebat, tuta celeribus consiliis præpositurum : et, quo id constantius perseveraret, Q. Fabius Maximus sic eum proficiscentem adlocutus fertur.

XXXIX. Si aut collegam (id quod mallet) tui similem, L. Æmili, haberes, aut tu collegæ tui similis esses, supervacanea esset oratio mea : nam et duo boni consules, etiam me indicente, omnia e republica fide vestra faceretis : et mali nec mea verba auribus vestris, nec consilia animis acciperetis. Nunc et collegam tuum et te talem virum intuenti mihi tecum omnis oratio est : quem video nequidquam et virum bonum et civem fore, si altera parte claudicet respublica : malis consiliis idem ac bonis juris et potestatis erit. Erras enim, L. Paulte, si tibi minus certaminis cum C. Terentio, quam cum Hannibale, futurum censes : nescio, an infestior hic adversarius, quam ille hostis maneat : cum illo in acie tantum, cum hoc omnibus locis ac temporibus certaturus es : et adversus Hannibalem legionesque ejus tuis equitibus ac peditibus pugnandum tibi est : Varro dux tuis militibus te est obpugnaturus. Ominis etiam tibi caussa absit C. Flamini memoria : tamen ille consul demum, et in provincia, et ad exercitum, cæpit furere. Hic, priusquam peteret consulatum, deinde in petendo consulatu ; nunc quoque consul, priusquam castra videat aut hostem, insanit : et, qui tantas jam nunc procellas, prælia atque acies jactando, inter togatos ciet, quid inter armatam juventutem censes facturum, et ubi extemplo verba res sequitur ? Atqui si hic, quod facturum se denunciat, extemplo pugnaverit ; aut ego rem militarem, belli hoc genus, hostem hunc ignoro, aut no-

U. C. 536.
A. C. 216.

Monet Fabius Paulum.

U. C. 536. *biliior alius Trasimeno locus nostris cladibus erit. Nec*
 A. C. 216. *gloriandi tempus adversus unum est; ut ego, contem-*
nendo potius, quam adpetendo, gloriam, modum ex-
cesserim. Sed ita res habet: una ratio belli gerendi
adversus Hannibalem est, qua ego gessi: nec eventus
modo hoc docet, (stultorum iste magister est) sed eadem
ratio, quæ fuit, futuraque, donec res eadem manebunt,
inmutabilis est. In Italia bellum gerimus, in sede ac
solo nostro: omnia circa plena civium ac sociorum
sunt: armis, viris, equis, commeatibus juvant, juva-
buntque: id jam fidei documentum in adversis rebus
nostris dederunt: meliores, prudentiores, constantiores
nos tempus diesque facit. Hannibal contra in aliena,
in hostili est terra, inter omnia inimica infestaque, pro-
cul ab domo, procul ab patria: neque illi terra, neque
mari est pax: nullæ eum urbes accipiunt, nulla mæ-
nia: nihil usquam sui videt: in diem rapto vivit. Par-
tem vix tertiam exercitus ejus habet, quem Iberum am-
nem trajecit: plures fames, quam ferrum, absumsit;
nec his paucis jam victus subpeditat. Dubitas ergo,
quin sedendo superaturi simus eum, qui senescat in
dies? non commeatus, non subplementum, non pecu-
niam habeat? Quamdiu pro Geronii, castelli Apuliæ
inopis, tamquam pro Karthaginis mœnibus? Sed ne
adversus te quidem ego gloriabor. Cn. Servilius atque
Atilius, proximi consules, vide, quemadmodum eum lu-
dificati sint. Hæc una salutis est via, L. Paulle, quam
difficilem infestamque cives sibi magis, quam hostes, fa-
cient. Idem enim tui, quod hostium milites, volent;
idem Varro, consul Romanus, quod Hannibal, Pœnus
imperator, cupiet: duobus ducibus unus resistas, opor-
tet: resistes autem, adversus famam rumoresque homi-
num si satis firmus steteris: si te neque collegæ vana

gloria, neque tua falsa infamia moverit. Veritatem laborare nimis sæpe, aiunt, exstingui numquam. Gloriam qui spreverit, veram habebit. Sine, timidum pro cauto, tardum pro considerato, inbellem pro perito belli vocent: malo te sapiens hostis metuat, quam stulti cives laudent. Omnia audentem contemnet Hannibal; nil temere agentem metuet. Nec ego, ut nihil agatur, moneo; sed ut agentem te ratio ducat, non fortuna: tuæ potestatis semper, tuaque omnia sint: armatus intentusque sis, neque occasione tuæ desis, neque suam occasionem hosti des. Omnia non properanti clara certaque erunt: festinatio improvida est et cæca.

XL. Adversus ea oratio consulis haud sane læta fuit, magis fatentis, ea, quæ diceret, vera, quam facilia factu, esse. Dictatori magistrum equitum intollerabilem fuisse; quid consuli adversus collegam seditionis ac temerarium virium atque auctoritatis fore? *Se populare incendium priore consulatu semiustum effugisse: optare, ut omnia prospere evenirent: at, si quid adversi caderet, hostium se telis potius, quam suffragiis iratorum civium, caput objecturum.* Ab hoc sermone profectum Paullum tradunt, prosequentibus primoribus Patrum. Plebeium consulem sua plebes prosecuta, turba, quam dignitate, conspectior. Ut in castra venerunt, permixto novo exercitu ac vetere, castris bifariam factis, ut nova minora essent propius Hannibalem, in veteribus major pars et omne robur virium esset; tum consulum anni prioris M. Atilium, ætatem excusantem, Romam miserunt; Geminum Servilium in minoribus castris legioni Romanæ et socium peditum equitumque duobus millibus præficiunt. Hannibal, quamquam parte dimidia auctas hostium copias cernebat, tamen

U. C. 536.
A. C. 216.

Paulli re-
sponsum.

Hannibalis
angustia.

U. C. 536. adventu consulum mire gaudere : non solum enim
 A. C. 216. nihil ex raptis in diem commeatibus superabat, sed
 ne, unde raperet, quidem quidquam reliqui erat, om-
 ni undique frumento, postquam ager parum tutus
 erat, in urbes munitas convecto : ut vix decem die-
 rum (quod compertum postea est) frumentum super-
 esset, Hispanorumque ob inopiam transitio parata
 fuerit, si maturitas temporum expectata foret.

Pabulato-
 res Pœnos
 cædunt
 Romani.

XLI. Ceterum temeritati consulis ac præproprio
 ingenio materiam etiam fortuna dedit : quod in pro-
 hibendis prædatoribus tumultuario proelio, ac pro-
 cursu magis militum, quam ex præparato aut jussu
 imperatorum, orto, haudquaquam par Pœnis dimi-
 catio fuit : ad mille et septingenti cæsi, non plus
 centum Romanorum sociorumque occisis : ceterum
 victoribus effuse sequentibus metu insidiarum obsti-
 tit Paullus consul ; cujus eo die (nam alternis im-
 peritabant) imperium erat, Varrone indignante ac
 vociferante, emissum hostem e manibus ; debellari-
 que, ni cessatum foret, potuisse. Hannibal id dam-
 num haud ægerrime pati : quin potius credere, vel-
 ut inescatam temeritatem ferocioris consulis ac no-
 vorum maxime militum esse : et omnia ei hostium,
 haud secus quam sua, nota erant : dissimiles discor-
 desque imperitare, duas prope partes tironum mili-
 tum in exercitu esse. Itaque, locum et tempus in-
 sidiis aptum se habere ratus, nocte proxima nihil
 præter arma ferentes secum milites ducens, castra
 plena omnis fortunæ publicæ privatæque relinquit ;
 transque proximos montes læva pedites instructos
 condit, dextra equites, impedimenta per convallem,
 medium agmen, traducit : ut diripiendis velut de-
 sertis fuga dominorum castris occupatum inpedi-

Hanni-
 balis in-
 sidiæ.

tumque hostem obrprimeret. Crebri relictī in castris U. C. 536.
 ignes, ut fides fieret, dum ipse longius spatium fuga A. C. 216.
 præciperet, falsa imagine castrorum (sicut Fabium
 priore anno frustratus esset) tenere in locis consules
 voluisse.

XLII. Ubi inluxit, subductæ primo stationes, de-
 inde propius adeuntibus insolitum silentium admira-
 tionem fecit. Jam satis comperta solitudine, in cas-
 tris concursus fit ad prætoria consulum, nunciantium
 fugam hostium adeo trepidam, ut, tabernaculis stan-
 tibus, castra reliquerint: quoque fuga obscurior es-
 set, crebros etiam relictos ignes. Clamor inde ortus,
 ut signa proferri juberent, ducerentque ad perse-
 quendos hostes, ac protinus castra diripienda. Et
 consul alter velut unus turbæ militaris erat. Paul-
 lus etiam atque etiam dicere, providendum præca-
 vendumque esse: postremo, quum aliter neque sedi-
 tionem neque ducem seditionis sustinere posset, Ma-
 rium Statilium præfectum cum turma Lucana explo-
 ratum mittit: qui, ubi adequitavit portis, subsistere
 extra munimenta ceteris jussis, ipse cum duobus
 equitibus vallum intravit: speculatusque omnia cum
 cura renunciat, insidias profecto esse: ignes in parte
 castrorum, quæ vergat in hostem, relictos: taberna-
 cula aperta, et omnia cara in promptu relictæ: argen-
 tum quibusdam locis temere per vias, velut objectum
 ad prædam, vidisse. Quæ ad deterrendos a cupiditate
 animos nunciata erant, ea accenderunt; et, clamo-
 re orto a militibus, *ni signum detur, sine ducibus*
ituros, haudquaquam dux defuit: nam extemplo Var-
 ro signum dedit proficiscendi. Paullus, quum ei sua
 sponte cunctanti pulli quoque auspicio non addixis-
 sent, obnunciari jam efferenti porta signa collegæ jus-

U. C. 536. sit: quod quamquam Varro ægre est passus, Flami-
 A. C. 216. nii tamen recens casus, Claudiique consulis primo
 Punico bello memorata navalis clades, religionem
 animo incussit. Dii prope ipsi eo die magis distu-
 lere, quam prohibuere, imminentem pestem Roma-
 nis: nam forte ita evenit, ut, quum referri signa in
 castra jubenti consuli milites non parerent, servi
 duo, Formiani unus, alter Sidicini equitis, qui, Ser-
 vilio atque Atilio consulibus, inter pabulatores ex-
 cepti a Numidis fuerant, profugerent eo die ad do-
 minos: qui deducti ad consules nunciant, omnem ex-
 ercitus Hannibalis trans proximos montes sedere in
 insidiis. Horum opportunus adventus consules im-
 perii potentes fecit, quum ambitio alterius suam pri-
 mum apud eos prava indulgentia majestatem solvis-
 set.

Depre-
 hendun-
 tur.

Hanniba-
 lis inopia
 et anxie-
 tas.

Castra
 movet.

XLIII. Hannibal, postquam motos magis incon-
 sulte Romanos, quam ad ultimum temere evectos,
 vidit; nequidquam, detecta fraude, in castra rediit.
 Ibi plures dies propter inopiam frumenti manere ne-
 quibat; novaque consilia in dies non apud milites
 solum, mixtos ex conlutione omnium gentium, sed
 etiam apud ipsum ducem, oriebantur: nam quum
 initio fremitus, deinde aperta vociferatio fuisset ex-
 poscentium stipendium debitum, querentiumque an-
 nonam primo, postremo famem; et mercenarios mi-
 lites, maxime Hispani generis, de transitione cepisse
 consilium fama esset: ipse etiam interdum Hanni-
 bal de fuga in Galliam dicitur agitasse, ita ut, relicto
 peditatu omni, cum equitibus se proriperet. Quum
 hæc consilia atque hic habitus animorum esset in
 castris, movere inde statuit, in calidiora atque eo
 maturiora messibus Apuliæ loca: simul ut, quo lon-

gius ab hoste recessisset, transfugia inpeditiona levi- U. C. 536.
 bus ingeniis essent. Profectus est nocte, ignibus si- A. C. 216.
 militer factis, tabernaculisque paucis in speciem re-
 lictis, ut insidiarum par priori metus contineret Ro-
 manos. Sed, per eundem Lucanum Statilium, omni-
 bus ultra castra transque montes exploratis, quum
 relatum esset, visum procul hostium agmen; tum
 de insequendo eo consilia agitari cœpta. Quum
 utriusque consulis eadem, quæ semper ante, fuisset
 sententia; ceterum Varroni fere omnes, Paulo ne-
 mo, præter Servilium prioris anni consulem, adsen-
 tiretur; majoris partis sententia ad nobilitandas cla-
 de Romana Cannas, urgente fato, profecti sunt. Ad Cannas
 Prope eum vicum Hannibal castra posuerat aversa a castra po-
 Vulturno vento, qui campis torridis siccitate nubes nit.
 pulveris vehit: id quum ipsis castris percommodum
 fuit, tum salutare præcipue futurum erat, quum
 aciem dirigerent, ipsi aversi, terga tantum adflante
 vento, in obcæcatum pulvere effuso hostem pugna-
 turi.

XLIV. Consules, satis exploratis itineribus, se- Romani
 quentes Pœnum, ut ventum ad Cannas est, ubi in bina castra
 conspectu Pœnum habebant, bina castra communi- muniunt.
 unt, eodem ferme intervallo, quo ad Geronium, sic-
 ut ante, copiis divisis. Aufidus amnis, utrisque cas-
 tris adfluens, aditum aquatoribus ex sua cujusque
 opportunitate haud sine certamine dabat: ex mino-
 ribus tamen castris, quæ posita trans Aufidum erant,
 liberius aquabantur Romani, quia ripa ulterior nul-
 lum habebat hostium præsidium. Hannibal spem
 nactus, locis natis ad equestrem pugnam, qua parte
 virium invictus erat, facturos copiam pugnandi con-
 sules, dirigit aciem, lacessitque Numidarum procur-

U. C. 536. satione hostes. Inde rursus sollicitari seditione mi-
 A. C. 216. litari ac discordia consulum Romana castra: quum
 Discordia Paullus Semproniique et Flamini temeritatem Var-
 coss. roni, Varro speciosum timidis ac segnibus ducibus
 exemplum Fabium objiceret: testareturque Deos
 hominesque hic, *nullam penes se culpam esse, quod
 Hannibal jam velut usucepisset Italiam: se constrictum
 a collega teneri; ferrum atque arma iratis et pugnare
 cupientibus adimi militibus; ille, si quid projectis ac
 proditis ad inconsultam atque improvidam pugnam legi-
 onibus accideret, se omnis culpæ exsortem, omnis even-
 tus participem fore diceret: videret, ut, quibus lingua
 tam prompta ac temeraria, æque in pugna vigerent ma-
 nus.*

XLV. Dum altercationibus magis, quam consi-
 liis, tempus teritur, Hannibal ex acie, quam ad
 multum diei tenuerat instructam, quum in castra ce-
 teras reciperet copias, Numidas ad invadendos ex
 minoribus castris Romanorum aquatores trans flu-
 men mittit: quam inconditam turbam quum vixdum
 in ripam egressi clamore ac tumultu fugassent, in
 stationem quoque pro vallo locatam atque ipsas pro-
 pe portas evecti sunt. Id vero indignum visum, ab
 tumultuario auxilio jam etiam castra Romana ter-
 reri: ut ea modo una caussa, ne extemplo transi-
 rent flumen, dirigerentque aciem, tenuerit Romanos,
 quod summa imperii eo die penes Paullum fuerit.
 Itaque Varro postero die, cui sors ejus diei imperii
 erat, nihil consulto collega, signum pugnae propo-
 suit, instructasque copias flumen traduxit, sequente
 Paulo; quia magis non probare, quam non adju-
 vare, consilium poterat. Transgressi flumen eas
 quoque, quas in castris minoribus habuerant, copias

Varro sig-
 num pug-
 nae pro-
 ponit.

Instruit
 aciem.

suis adjungunt : atque ita instructa acie, in dextro cornu (id erat flumini propius) Romanos equites locant, deinde pedites : lævum cornu extremi equites sociorum, intra pedites, ad medium juncti legionibus Romanis tenuerunt jaculatores : ex ceteris levium armorum auxiliis prima acies facta. Consules cornua tenuerunt ; Terentius lævum, Æmilius dextrum. Gemino Servilio media pugna tuenda data.

U.C. 536.
A.C. 216.

XLVI. Hannibal luce prima, Baliaribus levique alia armatura præmissa, transgressus flumen, ut quosque traduxerat, ita in acie locabat. Gallos Hispanosque equites prope ripam lævo in cornu adversus Romanum equitatum : dextrum cornu Numidis equitibus datum, media acie peditibus firmata ; ita, ut Afrorum utraque cornua essent, interponerentur his medii Galli atque Hispani. Afros Romanam magna ex parte crederes aciem : ita armati erant, armis et ad Trebiam, ceterum magna ex parte ad Trasimenum captis. Gallis Hispanisque scuta ejusdem formæ fere erant : dispares ac dissimiles gladii : Gallis prælongi ac sine mucronibus : Hispano, punctim magis, quam cæsim, adsueto petere hostem, brevitate habiles et cum mucronibus : ante ceteros habitus gentium harum tum magnitudine corporum, tum specie terribilis erat. Galli super umbilicum erant nudi : Hispani linteis prætextis purpura tunicis, candore miro fulgentibus, constiterant. Numerus omnium peditum, qui tum steterunt in acie, millium fuit quadraginta, decem equitum. Duces cornibus præerant : sinistro Hasdrubal, dextro Maharbal : mediam aciem Hannibal ipse cum fratre Magone tenuit. Sol, seu de industria ita locatis, seu quod forte ita starent, peropportune

Hannibal
aciem in-
struit.

U. C. 536. utrique parti obliquus erat, Romanis in meridiem,

A. C. 216. Pœnis in septentrionem versis : ventus, (Vulturnum incolæ regionis vocant) adversus Romanis coortus, multo pulvere in ipsa ora volvendo prospectum ademit.

Prælium
ad Can-
nas.

XLVII. Clamore sublato, procursum ab auxiliis, et pugna levibus primum armis commissa : deinde equitum Gallorum Hispanorumque lævum cornu cum dextro Romano concurrit, minime equestris more pugnæ : frontibus enim adversis concurrendum erat, quia, nullo circa ad evagandum relicto spatio, hinc annis, hinc peditum acies claudebant in directum utrimque nitentes. Stantibus ac confertis postremo turba equis, vir virum amplexus detrahebat equo : pedestre magna jam ex parte certamen factum erat : acrius tamen, quam diutius, pugnatum est ; pulsique Romani equites terga vertunt. Sub equestris finem certaminis coorta est peditum pugna : primo et viribus et animis pares constabant ordines Gallis Hispanisque : tandem Romani, diu ac sæpe connisi, æqua fronte acieque densa inpulere hostium cuneum nimis tenuem, eoque parum validum, a cetera prominentem acie : impulsis deinde ac trepide referentibus pedem insistere : ac tenore uno per præceps pavore fugientium agmen in mediam primum aciem inlati, postremo, nullo resistente, ad subsidia Afrorum pervenerunt ; qui utrimque reductis alis constiterant, media, qua Galli Hispanique steterant, aliquantum prominente acie : qui cuneus ut pulsus æquavit frontem primum, deinde nitendo etiam sinum in medio dedit, Afri circa jam cornua fecerant ; inruentibusque incaute in medium Romanis, circumdedere alas : mox, cornua extendendo,

clausere et ab tergo hostes. Hinc Romani, defuncti U. C. 536.
nequidquam prælio uno, omissis Gallis Hispanisque, A. C. 216.
quorum terga ceciderant, etiam adversus Afros integram pugnam ineunt, non tantum eo iniquam, quod inclusi adversus circumfusus, sed etiam quod fessi cum recentibus ac vegetis pugnabant.

XLVIII. Jam et in sinistro cornu Romano, ubi sociorum equites adversus Numidas steterant, consertum prælium erat, segne primo, et a Punica cœptum fraude. Quingenti ferme Numidæ, præter solita arma telaque, gladios occultos sub loriceis habentes, specie transfugarum quum ab suis, parmas post terga habentes, adequitassent, repente ex equis desiliunt; parmisque et jaculis ante pedes hostium projectis, in mediam aciem accepti, ductique ad ultimos, considerare ab tergo jubentur; ac, dum prælium ab omni parte conseritur, quieti manserunt: postquam omnium animos oculosque occupaverat certamen, tum, adreptis scutis, quæ passim inter acervos cæsorū corporum strata erant, aversam adoriuntur Romanam aciem; tergaque ferientes, ac poplites cædentes, stragem ingentem, ac majorem aliquanto pavorem ac tumultum, fecerunt. Quum alibi terror ac fuga, alibi pertinax in mala jam spe prælium esset; Hasdrubal, qui ea parte præerat, subductos ex media acie Numidas, quia segnis eorum cum adversis pugna erat, ad persequendos passim fugientes mittit: Hispanos et Gallos pedites, jam Afris prope fessis, cæde magis quam pugna, adjungit.

XLIX. Parte altera pugnæ Paullus, quamquam primo statim prælio funda graviter ictus fuerat, tamen et obcurrit sæpe cum confertis Hannibali, et

U. C. 536. aliquot locis prælium restituit, protegentibus eum
 A. C. 216. equitibus Romanis; omissis postremo equis, quia
 consulem et ad regendum equum vires deficiebant:
 tum denunciante cuidam, jussisse consulem ad pedes
 descendere equites, dixisse Hannibalem ferunt:

Vincit
 Hannibal. *Quam mallet, victos mihi traderet!* Equitum pedes-
 tre prælium, quale jam haud dubia hostium victoria,
 fuit; quum victi mori in vestigio mallent, quam fu-
 gere; victores, morantibus victoriam irati, trucidar-
 ent, quos pellere non poterant: pepulerunt tamen
 jam paucos superantes, et labore ac vulneribus fes-
 sos. Inde dissipati omnes sunt, equosque ad fugam,
 qui poterant, repetebant. Cn. Lentulus tribunus
 militum, quum, prætervehens equo, sedentem in saxo

L. Æmilii
 cos. mors. *cruore oppletum consulem vidisset: L. Æmili, in-
 quit, quem unum insontem culpæ cladis hodiernæ Dii
 respicere debent, cape hunc equum: dum et tibi virium
 aliquid superest, comes ego te tollere possum ac prote-
 gere: ne funestam hanc pugnam morte consulis feceris.
 Etiam sine hoc lacrimarum satis luctusque est. Ad ea
 consul: Tu quidem, Cn. Corneli, macte virtute esto!
 Sed cave, frustra miserando exiguum tempus e manibus
 hostium evadendi absumas. Abi, nuncia publice Pa-
 tribus, urbem Romanam muniant, ac prius, quam hos-
 tis victor adveniat, præsidiis firment: privatimque Q.
 Fabio, L. Æmilium præceptorum ejus memorem et vix-
 isse, et adhuc mori. Me in hac strage militum meo-
 rum patere expirare, ne aut reus iterum e consulatu
 sim, aut accusator collegæ existam, ut alieno crimine
 innocentiam meam protegam. Hæc exigentes prius
 turba fugientium civium, deinde hostes, obpressere:
 consulem, ignorantes quis esset, obruere telis:
 Lentulum inter tumultum abripuit equus: tum*

inde effuse fugiunt. Septem millia hominum in U. C. 536.
 minora castra, decem in majora, duo ferme in vicum A. C. 216.
 ipsum Cannas perfugerunt: qui extemplo a Karthalone atque equitibus, nullo munimento tegente vicum, circumventi sunt. Consul alter, seu forte, seu consilio, nulli fugientium infestus agmini, cum septuaginta fere equitibus Venusiam perfugit. Quadraginta millia peditum, duo millia septingenti equites, et tanta prope civium sociorumque pars, cæsi dicuntur; in his ambo consulum quæstores L. Atilius et L. Furius Bibaculus: unus et viginti tribuni militum; consulares quidam prætorique et ædilicii: inter eos Cn. Servilium Geminum et M. Minucium numerant, qui magister equitum priore anno, aliquot ante consul fuerat: octoginta præterea aut senatores, aut qui eos magistratus gessissent, unde in senatum legi deberent, quum sua voluntate milites in legionibus facti essent. Capta eo prælio tria millia peditum et equites trecenti dicuntur.

Clades
 quanta
 fuerit.

L. Hæc est pugna Cannensis, Alliensi cladi nobilitate par: ceterum ut illis, quæ post pugnam accidere, levior, quia ab hoste cessatum est; sic strage exercitus gravior fœdiorque: fuga namque ad Alliam sicut urbem prodidit, ita exercitum servavit: ad Cannas fugientem consulem vix septuaginta secuti sunt: alterius morientis prope totus exercitus fuit. Binis in castris quum multitudo semiermis sine ducibus esset, nuncium, qui in majoribus erant, mittunt; *dum prælio, deinde ex lætitia epulis fatigato, quies nocturna hostes premeret, ut ad se transirent: uno agmine Canusium abituros esse.* Eam sententiam alii Canusium
 totam adspernari: *Cur enim illos, qui se arcessant,* multi Romanorum
ipsos non venire, quum æque conjungi possent: quia fugiunt.

U. C. 536. *videlicet plena hostium omnia in medio essent : et alio-*
 A. C. 216. *rum, quam sua, corpora tanto periculo mallent obicere.*
 Aliis non tam sententia displicere, quam animus de-
 esse. P. Sempronius Tuditanus tribunus militum,
Capi ergo mavultis, inquit, ab avarissimo et crudelis-
simo hoste, æstimarique capita vestra, et exquiri pretia
ab interrogantibus, Romanus civis sis, an Latinus so-
cius, ut ex tua contumelia et miseria alteri honos quæ-
ratur? Non tu: si quidem L. Æmilii consulis, qui se
bene mori, quam turpiter vivere, maluit, et tot fortis-
simorum virorum, qui circa eum cumulati jacent, cives
estis. Sed ante, quam obprimit lux, majoraque hostium
agmina obsepiunt iter, per hos, qui inordinati atque in-
compositi obstrepunt portis, erumpamus. Ferro atque
audacia via fit, quamvis per confertos hostes: cuneo
quidem hoc laxum atque solutum agmen, ut si nihil
obstet, transibimus. Itaque ite mecum, qui et vosmet-
ipsos et rempublicam salvam vultis. Hæc ubi dicta
dedit, stringit gladium, cuneoque facto per me-
dios vadit hostes: et, quum in latus dextrum, quod
patebat, Numidæ jacularentur, translatis in dextrum
scutis, in majora castra ad sexcentos evaserunt: at-
que inde protinus, alio magno agmine adjuncto,
Canusium incolumes perveniunt. Hæc apud victos
magis inpetu animorum, quod ingenium suum cui-
que aut fors dabat, quam ex consilio ipsorum, aut
imperio cujusquam, agebantur.

Hannibal
 victoria
 uti nescit.

LI. Hannibali victori quum ceteri circumfusi gra-
 tulentur, suaderentque, ut, tanto perfunctus bello,
 diei quod reliquum esset, noctisque insequentis, quie-
 tem et ipse sibi sumeret, et fessis daret militibus;
 Maharbal, præfectus equitum, minime cessandum
 ratus, *Immo, ut, quid hac pugna sit actum, scias, die*

quinto, inquit, victor in Capitolio epulaberis. *Sequere*: U. C. 536. cum equite, ut prius venisse, quam venturum, sciant, A. C. 216. præcedam. Hannibali nimis læta res est visa, majorque, quam ut eam statim capere animo posset. Itaque, voluntatem se laudare Maharbalis, ait: ad consilium pensandum temporis opus esse. Tum Maharbal, Non omnia, nimirum, eidem Dii dedere: vincere scis, Hannibal; victoria uti nescis. Mora ejus diei satis creditur saluti fuisse urbi atque imperio. Postero die ubi primum inluxit, ad spolia legenda fœdamque etiam hostibus spectandam stragem insistent. Jacebant tot Romanorum millia, pedites Strages passim equitesque, ut quem cuique fors aut pugna etiam junxerat aut fuga: adsurgentes quidam ex strage hostibus media cruenti, quos stricta matutino frigore excita- miserabilis. verant vulnera, ab hoste obpressi sunt. Quosdam et jacentes vivos succisis feminibus poplitibusque invenerunt, nudantes cervicem jugulumque, et reliquum sanguinem jubentes haurire. Inventi sunt quidam mersis in effossam terram capitibus, quos sibi ipsos fecisse foveas, obruentesque ora superjecta humo interclusisse spiritum adparebat. Præcipue convertit omnes substratus Numida mortuo superincubanti Romano vivus, naso auribusque laceratis: quum, manibus ad capiendum telum inutilibus, in rabiem ira versus, laniando dentibus hostem exspirasset.

LII. Spoliis ad multum diei lectis, Hannibal ad Bina Ro- minora ducit castra obpugnanda, et omnium pri- manorum castra se mum, brachio objecto, flumine eos excludit. Cete- dedunt rum ab omnibus, labore, vigiliis, vulneribus etiam victori. fessis, maturior ipsius spe deditio est facta: pacti, ut arma atque equos traderent, in capita Romana

U. C. 536. trecentis nummis quadrigatis, in socios ducenis, in
 A. C. 216. servos centenis, et ut, eo pretio persoluto, cum singulis abirent vestimentis, in castra hostes acceperunt; traditique in custodiam omnes sunt, seorsum cives sociique. Dum ibi tempus teritur, interea quum ex majoribus castris, quibus satis virium aut animi fuit, ad quatuor millia hominum et ducenti equites, alii agmine, alii palati passim per agros, quod haud minus tutum erat, Canusium perfugissent, castra ipsa ab sauciis timidisque eadem conditione, qua altera, tradita hosti. Præda ingens parta est: et, præter equos virosque, et si quid argenti, (quod plurimum in phaleris equorum erat; nam ad vescendum facto perexiguo, utique milites, utebantur) omnis cetera præda diripienda data est. Tum sepeliendi causa conferri in unum corpora suorum jussit. Ad octo millia fuisse dicuntur fortissimorum virorum. Consulem quoque Romanum conquistum sepultumque, quidam auctores sunt. Eos, qui Canusium perfugerant, mulier Apula, nomine Busa, genere clara ac divitiis, mœnibus tantum tectisque a Canusinis acceptos, frumento, veste, viatico etiam juvit; pro qua ei munificentia postea, bello perfecto, ab senatu honores habiti sunt.

Pœnorum
 ad octo
 millia in
 acie cæsi.

LIII. Ceterum, quum ibi tribuni militum quatuor essent, Fabius Maximus de legione prima, cujus pater priore anno dictator fuerat, et de legione secunda L. Publicius Bibulus et P. Cornelius Scipio, et de legione tertia Ap. Claudius Pulcher, qui proxime ædilis fuerat; omnium consensu ad P. Scipionem, admodum adolescentem, et ad Ap. Claudium summa imperii delata est: quibus consultantibus inter paucos de summa rerum nunciat P. Furius Philus, con-

sularis viri filius, *Nequidquam eos perditam spem fore: desperatam comploratamque rem esse publicam. Nobiles juvenes quosdam, quorum principem L. Cæcilium Metellum, mare ac naves spectare, ut, deserta Italia, ad regem aliquem transfugiant. Quod malum, præterquam atrox, super tot clades etiam novum, quum stupore ac miraculo torpidos defixisset, et, qui aderant, consilium advocandum de eo censerent; negat consilii rem esse Scipio juvenis, fatalis dux hujusce belli. Audendum atque agendum, non consultandum, ait, in tanto malo esse. Irent secum ex templo armati, qui rempublicam salvam vellent: nullo verius, quam ubi ea cogitentur, hostium castra esse. Pergit ire, sequentibus paucis, in hospitium Metelli: et, quum concilium ibi juvenum, de quibus adlatum erat, invenisset, stricto super capita consultantium gladio, *Ex mei animi sententia, inquit, ut ego rempublicam populi Romani non deseram, neque alium civem Romanum deserere patiar. Si sciens fallo, tum me, Jupiter optime maxime, domum, familiam, remque meam pessimo leto adficias! In hæc verba, L. Cæcili, jures, postulo, ceterique, qui adestis: qui non juraverit, in se hunc gladium strictum esse sciat. Haud secus pavidum, quam si victorem Hannibalem cerneant, jurant omnes: custodiendosque semet ipsos Scipioni tradunt.**

U. C. 536.
A. C. 216.

Conjunctio desiderandæ Italiæ causa.

A Scipione obprimitur.

LIV. Eo tempore, quo hæc Canusii agebantur, Venusiam ad consulem ad quatuor millia peditum equitumque, qui sparsi fuga per agros fuerant, pervenere. Eos omnes Venusini per familias benigne accipiendos curandosque quum divisissent, in singulos equites togas et tunicas et quadrigatos nummos quinos vicenos, et peditibus denos, et arma, quibus

Venusiam ex fuga coeunt ad quatuor millia.

U. C. 536. deerant, dederunt: ceteraque publice ac privatim
 A. C. 216. hospitaliter facta: certatumque, ne a muliere Canusina populus Venusinus officiis vinceretur. Sed gravius onus Busæ multitudo faciebat, et jam ad decem millia hominum erant. Appiusque et Scipio, postquam incolumem esse alterum consulem acceperunt, nuncium extemplo mittunt, quantæ secum peditum equitumque copiæ essent: sciscitatumque simul, utrum Venusiam adduci exercitum, an manere juberet Canusii? Varro ipse Canusium copias traduxit: et jam aliqua species consularis exercitus erat; mœnibusque se certe, si non armis, ab hoste videbantur defensuri. Romam, ne has quidem reliquias superesse civium sociorumque, sed occidione occisos cum duobus exercitibus consules, deletasque omnes copias, adlatum fuerat. Numquam, salva urbe, tantum pavoris tumultusque intra mœnia Romana fuit: itaque subcumbam oneri, neque adgreddiar narrare, quæ edissertando minora vero fecero. Consule exercituque ad Trasimenum priore anno amisso, non vulnus super vulnus, sed multiplex clades, cum duobus consulibus duo consulares exercitus amissi nunciabantur: nec ulla jam castra Romana, nec ducem, nec militem esse: Hannibalis Apuliam, Sannium, ac jam prope totam Italiam factam. Nulla profecto alia gens tanta mole cladis non obruta esset. Comparem cladem ad Ægates insulas Karthaginensium prælio navali acceptam, qua fracti Sicilia ac Sardinia cessere, hinc vectigales ac stipendiarios fieri se passi sunt? aut pugnam adversam in Africa, cui postea hic ipse Hannibal subcubuit? nulla ex parte comparandæ sunt, nisi quod minore animo latæ sunt.

Pavor Romæ maximus.

LV. P. Furius Philus et M. Pomponius prætores U. C. 536.
 senatum in curiam Hostiliam vocaverunt, ut de ur- A. C. 216.
 bis custodia consulerent: neque enim dubitabant, Senatus
 deletis exercitibus, hostem ad obpugnandam Ro- consulitur
 mam, quod unum opus belli restaret, venturum. de urbis
 Quum in malis, sicut ingentibus, ita ignotis, ne custodia.
 consilium quidem satis expedirent, obstreperetque
 clamor lamentantium mulierum, et, nondum palam
 facto, vivi mortuique per omnes pene domos pro-
 miscue complorarentur; tum Q. Fabius Maximus Sententia
 censuit, *equites expeditos et Appia et Latina via mit-* Fabii Max.
tendos, qui, obvios percunctando aliquos profectos ex
fuga, passim dissipatos, forte referant, quæ fortuna
consulum atque exercituum sit; et si quid Dii immor-
tales, miseriti imperii, reliquum Romano nomini fece-
rint: ubi eæ copiæ sint: quo se Hannibal post prælium
contulerit: quid paret, quid agat, acturusque sit. Hæc
exploranda noscendaque per inpigros juvenes esse: il-
lud per Patres ipsos agendum, quoniam magistratuum
parum sit, ut tumultum ac trepidationem in urbe tol-
lant, matronas publico arceant, continerique intra suum
quamque limen cogant: comploratus familiarum coër-
ceant: silentium per urbem faciant: nuncios rerum
omnium ad prætores deducendos curent: suæ quisque
fortunæ domi auctorem expectent, custodesque præterea
ad portas ponant, qui prohibeant, quemquam egredi
urbem; cogantque homines nullam, nisi urbe ac mani-
bus salvis, salutem sperare. Ubi conticuerit tumultus,
recte tum in curiam Patres revocandos, consulendumque
de urbis custodia esse.

LVI. Quum in hanc sententiam pedibus omnes
 issent, submotaque foro per magistratus turba, Pa-
 tres diversi ad sedandos tumultus discessissent; tum

U. C. 536. demum literæ a Terentio consule adlatæ sunt; L.

A. C. 216. *Æmilium consulem exercitumque cæsum; sese Canusii esse, reliquias tantæ cladis velut ex naufragio conligentem: ad decem millia militum ferme esse incompressorum inordinatorumque. Pænum sedere ad Cannas, in captivorum pretiis prædaque alia, nec victoris animo, nec magni ducis more, nundinantem. Tum privatæ quoque per domos clades vulgatæ sunt; adeoque totam urbem opplevit luctus, ut sacrum anniversarium Cereris intermissum sit; quia nec lugentibus id facere est fas, nec ulla in illa tempestate matrona expers luctus fuerat. Itaque, ne ob eandem causam alia quoque sacra publica aut privata desererentur, senatusconsulto diebus triginta luctus est finitus. Ceterum quum sedato urbis tumultu, revocati in curiam Patres essent, aliæ insuper ex Sicilia literæ adlatæ sunt ab T. Otacilio pro prætore, Regnum Hieronis classe Punica vastari: cui quum opem inploranti ferre vellet, nunciatum sibi esse, aliam classem ad Ægates insulas stare, paratam instructamque; ut, ubi se versum ad tuendam Syracusanam oram Pæni sensissent, Lilybæum extemplo provinciamque aliam Romanam adgrederentur: itaque classe opus esse, si regem socium Siciliamque tueri vellent.*

Cereris sacrum intermissum.

Vestales stupri compertæ.

LVII. Literis consulis proprætorisque lectis, M. Claudium, qui classi ad Ostiam stanti præesset, Canusium ad exercitum mittendum, scribendumque consuli, ut, quum prætori exercitum tradidisset, primo quoque tempore, quantum per commodum reipublicæ fieri posset, Romam veniret. Territi etiam super tantas clades, quum ceteris prodigiis, tum quod duæ Vestales eo anno, Opimia atque Floronia, stupri compertæ, et altera sub terra, ut mos

est, ad portam Collinam necata fuerat, altera sibi-
 met ipsa mortem consciverat. L Cantilius, scriba
 pontificis, quos nunc minores pontifices adpellant,
 qui cum Flornia stuprum fecerat, a pontifice maxi-
 mo eo usque virgis in comitio cæsus erat, ut inter
 verbera exspiraret. Hoc nefas quum inter tot, ut
 fit, clades in prodigium versum esset, decemviri li-
 bros adire jussi sunt. Et Q. Fabius Pictor Delphos
 ad oraculum missus est sciscitatum, quibus precibus
 suppliciisque Deos possent placare, et quænam futu-
 ra finis tantis cladibus foret. Interim ex fatalibus
 libris sacrificia aliquot extraordinaria facta; inter
 quæ Gallus et Galla, Græcus et Græca, in foro bo-
 ario sub terra vivi demissi sunt in locum saxo con-
 ceptum, jam ante hostiis humanis, minime Romano
 sacro, inbutum. Placatis satis, ut rebantur, Deis,
 M. Claudius Marcellus ab Ostia mille et quingentos
 milites, quos in classem scriptos habebat, Romam,
 ut urbi præsidio essent, mittit; ipse, legione classis
 (ea tertia legio erat) cum tribunis militum Teanum
 Sidicinum præmissa, classe tradita P. Furio Philo
 collegæ, paucos post dies Canusium magnis itineri-
 bus contendit. Dictator ex auctoritate Patrum dictus
 M. Junius, et Ti. Sempronius magister equitum, de-
 lectu edicto, juniores ab annis septemdecim, et quos-
 dam prætextatos, scribunt: quatuor ex his legiones
 et mille equites effecti. Item ad socios Latinumque
 nomen, ad milites ex formula accipiendos, mittunt:
 arma, tela, alia parari jubent: et vetera hostium
 spolia detrahunt templis porticibusque. Et aliam
 formam novi delectus inopia liberorum capitum ac
 necessitas dedit: octo millia juvenum validorum ex
 servitiis, prius sciscitantes singulos, vellente mili-

U. C. 536.
 A. C. 216.

Hostiæ hu-
 manæ in-
 molatæ.

Octo millia
 servorum
 armantur.

U. C. 536. tare, emta publice armaverunt. Hic miles magis
 A. C. 216. placuit, quum pretio minore redimendi captivos
 copia fieret.

LVIII. Namque Hannibal, secundum tam prosperam ad Cannas pugnam, victoris magis, quam bellum gerentis, intentus curis, quum, captivis productis segregatisque, socios, sicut ante ad Trebiam Trasimenumque lacum, benigne adlocutus; sine pretio dimisisset; Romanos quoque vocatos (quod nunquam alias antea) satis miti sermone adloquitur:

Hannibalis oratio ad captivos Rom. *Non internecinum sibi esse cum Romanis bellum: de dignitate atque imperio certare. Et patres virtuti Romanæ cecidisse: et se id adniti, ut suæ in vicem simul felicitati et virtuti cedatur. Itaque redimendi se captivis copiam facere: pretium fore in capita, equiti quingenos quadrigatos nummos, trecenos pediti, servo centum. Quamquam aliquantum adjiciebatur equitibus ad id pretium, quod pepigerant dedentes se; læti tamen quamcumque conditionem paciscendi acceperunt. Placuit suffragio ipsorum decem deligi, qui Romam ad senatum irent: nec pignus aliud fidei, quam ut jurarent se redituros, acceptum. Missus cum his Karthalo nobilis Karthaginensis: qui, si forte ad pacem inclinarent animos, condiciones ferret. Quum egressi castris essent, unus ex iis, minime Romani ingenii homo, velut aliquid oblitus, jurisjurandi solvendi caussa quum in castra redisset, ante noctem comites adsequitur. Ubi eos Romani venire nunciatum est, Karthaloni obviam lictor missus, qui dictatoris verbis nunciaret, ut ante noctem excederet finibus Romanis.*

Legati captivorum.

Eorum principis oratio in senatu. LIX. Legatis captivorum senatus ab dictatore datus est. Quorum princeps M. Junius, *Patres con-*

scripti, inquit, nemo nostrum ignorat, nulli umquam U. C. 536.
 civitati viliores fuisse captivos, quam nostrae. Cete- A. C. 216.
 rum, nisi nobis plus justo nostra placet caussa, non alii
 umquam minus negligendi vobis, quam nos, in hostium
 potestatem venerunt: non enim in acie per timorem ar-
 ma tradidimus; sed, quum prope ad noctem super-
 stantes cumulis caesorum corporum praelium extraxisse-
 mus, in castra recepimus nos. Diei reliquum ac noctem
 insequentem, fessi labore ac vulneribus, vallum sumus
 tutati. Postero die, quum circumsessi ab exercitu vic-
 tore aqua arceremur, nec ulla jam per confertos hostes
 erumpendi spes esset, nec esse nefas duceremus, quin-
 quaginta millibus hominum ex acie nostra trucidatis,
 aliquem ex Cannensi pugna Romanum militem restare;
 tum denum pacti sumus pretium, quo redempti dimitte-
 remur: arma, in quibus nihil jam auxilii erat, hosti
 tradidimus. Majores quoque acceperamus se a Gallis
 auro redemisse: et patres vestros, asperrimos illos ad
 conditionem pacis, legatos tamen captivorum redimen-
 dorum gratia Tarentum misisse: atqui, et ad Alliam
 cum Gallis, et ad Heracleam cum Pyrrho, utraque non
 tam clade infamis, quam pavore ac fuga, pugna fuit.
 Cannenses campos acervi Romanorum corporum tegunt:
 nec supersumus pugnae, nisi in quibus trucidandis et fer-
 rum et vires hostem defecerunt. Sunt etiam de nostris
 quidam, qui ne in acie quidem refugerunt: sed, praesi-
 dio castris relictis, quum castra traderentur, in potesta-
 tem hostium venerunt. Haud equidem ullius civis et
 commilitonis fortunae aut conditioni invideo, nec pre-
 mendo alium me extulisse velim: ne illi quidem, (nisi
 pernicitatis pedum et cursus aliquod praemium est) qui
 plerique inermes ex acie fugientes non prius, quam Ve-
 nusiae aut Canusii, constiterunt, se nobis merito prae-
 tu-

U. C. 536. *lerint, gloriatique sint, in se plus, quam in nobis, præ-*
 A. C. 216. *sidii reipublicæ esse. Sed illis et bonis ac fortibus mi-*
litibus utemini : et nobis etiam promptioribus pro patria,
quod beneficio vestro redempti atque in patriam restituti
fuerimus. Delectum ex omni ætate et fortuna habetis :
octo millia servorum audio armari : non minor nume-
rus noster est, nec majore pretio redimi possumus, quam
hi emuntur : nam si conferam nos cum illis, injuriam
nomini Romano faciam. Illud etiam in tali consilio
animadvertendum vobis censeam, Patres conscripti, (si
tamen duriores esse velitis, quod nullo nostro merito fa-
ciatis) cui nos hosti relicturi sitis. Pyrrho videlicet,
qui nos hospitum numero habuit captivos, an barbaro
ac Pæno ; qui utrum avarior, an crudelior, sit, vix ex-
istimari potest. Si videatis catenas, squalorem, defor-
mitatem civium vestrorum, non minus profecto vos ea
species moveat, quam si ex altera parte cernatis stratas
Cannensibus campis legiones vestras. Intueri potestis
sollicitudinem et lacrimas in vestibulo curiæ stantium
cognatorum nostrorum, expectantiumque responsum ve-
strum : quum ii pro nobis proque iis, qui absunt, ita
suspensi ac solliciti sint ; quem censetis animum ipso-
rum esse, quorum in discrimine vita libertasque est ? Si,
me Dius fidius, ipse in nos mitis Hannibal contra na-
turam suam esse velit, nihil tamen nobis vita opus esse
censeamus, quum indigni, ut a vobis redimeremur, visi
sumus. Rediere Romam quondam remissi a Pyrrho
sine pretio capti : sed rediere cum legatis, primoribus
civitatis, ad redimendos sese missis. Redeam ego in
patriam, trecentis nummis non æstimatus civis ? Suum
quisque habet animum, Patres conscripti. Scio in dis-
crimine esse vitam corpusque meum. Magis me famæ
periculum movet, ne a vobis damnati ac repulsi abea-

mus: neque enim vos pretio pepercisse homines cre- U. C. 536.
A. C. 216.
dent.

LX. Ubi is finem fecit, extemplo ab ea turba, quæ in comitio erat, clamor flebilis est sublatus, manusque ad curiam tendebant orantes, ut sibi liberos, fratres, cognatos redderent. Feminas quoque metus ac necessitas in foro turbæ huic virorum immiscuerat. Senatus, submotis arbitris, consuli cœptus. Ibi quum sententiis variaretur, et alii redimendos de publico, alii nullam publice inpensam faciendam, nec prohibendos ex privato redimi; si quibus argentum in præsentia deesset, dandam ex ærario pecuniam mutuam, prædibusque ac prædiis cavendum populo, censerent; tum T. Manlius Tor- Manlius
suadet ne
captivi re-
dimantur.
quatus, priscæ ac nimis duræ, ut plerisque videbatur, severitatis, interrogatus sententiam, ita locutus fertur: *Si tantummodo postulassent legati pro iis, qui in hostium potestate sunt, ut redimerentur, sine ullius insectatione eorum, brevi sententiam peregissem. Quid enim aliud quam admonendi essetis, ut morem traditum a patribus, necessario ad rem militarem exemplo, servaretis? Nunc autem quum prope gloriati sint, quod se hostibus dediderint, præferrique non captis modo in acie ab hostibus, sed etiam iis, qui Venusiam Canusiumque pervenerunt, atque ipsi C. Terentio consuli, æquum censuerint; nihil vos eorum, Patres conscripti, quæ illic acta sunt, ignorare patiar. Atque utinam hæc, quæ apud vos acturus sum, Canusii apud ipsum exercitum agerem, optimum testem ignaviæ cujusque et virtutis: aut unus hic saltem adesset P. Sempronius, quem si isti ducem secuti essent, milites hodie in castris Romanis, non captivi in hostium potestate essent? Sed quum, fessis pugnando hostibus, tum victoria lætis, et*

U. C. 536. *ipsis plerisque regressis in castra sua, noctem ad erum-*
 A. C. 216. *pendum liberam habuissent, et septem armatorum ho-*
minum millia perrumpere etiam confertos hostes po-
tuissent; neque per se ipsi id facere conati sunt, neque
aliud sequi voluerunt. Nocte prope tota P. Sempro-
nus Tuditanus non destitit monere, adhortari eos, dum
paucitas hostium circa castra, dum quies ac silentium
esset, dum nox inceptum tegeret, se ducem sequerentur:
ante lucem pervenire in tuta loca, in sociorum urbes
posse. Sicut avorum memoria P. Decius tribunus mi-
litum in Samnio; sicut, nobis adolescentibus, priore
Punico bello Calpurnius Flamma trecentis voluntariis,
quum ad tumultum eos capiendum situm inter medios
hostes, duceret, dixit: Moriamur, milites, et morte
nostra eripiamus ex obsidione circumventas legio-
nes. Si hoc P. Sempronius diceret; nec viros quidem,
nec Romanos vos duceret, si nemo tantæ virtutis existi-
tisset comes. Viam non ad gloriam magis, quam ad
salutem, ferentem demonstrat; reduces in patriam, ad
parentes, ad conjuges ac liberos facit. Ut servemini,
deest vobis animus? quid, si moriendum pro patria
esset, faceretis? Quinquaginta millia civium sociorum-
que circa vos eo ipso die cæsa jacent: si tot exempla
virtutis non movent, nihil umquam movebit: si tanta
clades vilem vitam non fecit, nulla faciet. Liberi at-
que incolumes desiderate patriam: immo desiderate,
dum patria est, dum cives ejus estis: sero nunc deside-
ratis, deminuti capite, abalienati jure civium, servi
Karthaginiensium facti. Pretio redituri estis eo, unde
ignavia ac nequitia abistis? P. Sempronium, civem re-
strum, non audistis, arma capere ac sequi se jubentem:
Hannibalem post paullo audistis, castra prodi et arma
tradi jubentem. Quam ego ignaviam istorum accuso,

quum scelus possim accusare? Non enim modo sequi U. C. 536.
 recusarunt bene monentem, sed obsistere ac retinere co- A. C. 216.
 nati sunt, ni strictis gladiis viri fortissimi inertes sub-
 movissent: prius, inquam, P. Sempronio per civium
 agmen, quam per hostium, fuit erumpendum. Hos
 cives patria desideret? quorum si ceteri similes fuis-
 sent, neminem hodie ex iis, qui ad Cannas pugnave-
 runt, civem haberet. Ex millibus septem armatorum
 sexcenti exstiterunt, qui erumpere auderent, qui in pa-
 triam liberi atque armati redirent: neque iis quadra-
 ginta millia hostium obstitere. Quam tutum iter dua-
 rum prope legionum agmini futurum censetis fuisse?
 Haberetis hodie viginti millia armatorum Canusii, for-
 tia, fidelia, Patres conscripti: nunc autem quemadmo-
 dum hi boni fidelesque (nam fortes ne ipsi quidem dire-
 rint) cives esse possunt? nisi quis credere potest fuisse,
 ut erumpentibus, quin erumperent, obsistere conati
 sunt: aut non invidere eos, quum incolumitati, tum
 gloriæ illorum per virtutem partæ, quum sibi timorem
 ignaviamque servitutis ignominiosæ caussam esse sciant.
 Maluerunt in tentoriis latentes simul lucem atque ho-
 stem expectare, quum silentio noctis erumpendi occasio
 esset. At enim ad erumpendum e castris defuit animus;
 ad tutanda fortiter castra animum habuerunt. Dies
 noctesque aliquot obsessi, vallum armis, se ipsi tutati
 vallo sunt: tandem ultima ausi passique, quum omnia
 subsidia vitæ abessent, adfectisque fame viribus, arma
 jam sustinere nequirent, necessitatibus magis humanis,
 quam armis, victi sunt. Orto sole hostis ad vallum
 accessit: ante secundam horam, nullam fortunam cer-
 tamini experti, tradiderunt arma ac se ipsos. Hæc
 vobis ipsorum per biduum militia fuit: quum in acie
 stare ac pugnare decuerat, tum in castra refugerunt:

U. C. 536. *quum pro vallo pugnandum erat, castra tradiderunt,*
 A. C. 216. *neque in acie neque in castris utiles. Vos redimam?*
quum erumpere castris oportet, cunctamini ac manetis :
quum manere, castra tutari armis necesse est ; et castra
et arma et vos ipsos traditis hosti. Ego non magis istos
redimendos, Patres conscripti, censeo, quam illos de-
dendos Hannibali, qui per medios hostes e castris eru-
perunt, ac per summam virtutem se patriæ restitu-
erunt.

Senatus
 censet
 captivos
 non esse
 redimen-
 dos.

LXI. Postquam Maullius dixit, quamquam Pa-
 trum quoque plerosque captivi cognatione adtinge-
 bant, præter exemplum civitatis minime in captivos
 jam inde antiquitus indulgentis, pecuniæ quoque
 summa homines movit : quia nec ærarium exhauri-
 re, magna jam summa erogata in servos ad militiam
 emendos armandosque, nec Hannibalem maxime hu-
 jusce rei, ut fama erat, egentem locupletari vole-
 bant. Quum triste responsum, *non redimi captivos,*
 redditum esset, novusque super veterem luctus tot
 jactura civium adjectus esset, cum magnis fletibus
 questibusque legatos ad portam prosecuti sunt. Unus
 ex iis domum abiit, quod fallaci reditu in castra ju-
 rejurando se exsolvisset. Quod ubi innotuit, rela-
 tumque ad senatum est, omnes censuerunt, compre-
 hendendum et custodibus publice datis deducendum
 ad Hannibalem esse. Est et alia de captivis fama,
 decem primos venisse : de eis quum dubitatum in
 senatu esset, admitterentur in urbem, nec ne ; ita
 admissos esse, ne tamen iis senatus daretur. Mo-
 rantibus deinde longius omnium spe, alios tres insu-
 per legatos venisse, L. Scribonium, et C. Calpur-
 nium, et L. Manlium : tum demum ab cognato Scri-
 bonii tribuno plebis de redimendis captivis relatum

Nimis cal-
 lida juris-
 jurandi
 interpreta-
 tio.

esse, nec censuisse redimendos senatum: et novos U. C. 536.
legatos tres ad Hannibalem revertisse, decem vete- A. C. 216.
res remansisse; quod, per causam recognoscendi
nomina captivorum ad Hannibalem ex itinere re-
gressi, religione sese exsolvisent: de iis dedendis
magna contentione actum in senatu esse: victosque
paucis sententiis, qui dedendos censuerint: ceterum
proximis censoribus adeo omnibus notis ignomini-
isque confectos esse, ut quidam eorum mortem sibi
ipsi extemplo consciverint: ceteri non foro solum
omni deinde vita, sed prope luce ac publico, carue-
rint. Mirari magis, adeo discrepare inter auctores,
quam, quid veri sit, discernere queas. Quanto au-
tem major ea clades superioribus cladibus fuerit, vel
ea res indicio est, quod, qui sociorum ad eam diem
firmi steterant, tum labare cœperunt, nulla profecto
alia de re, quam quod desperaverant de imperio.
Defecere autem ad Pœnos hi populi: Atellani, Ca- Defectio so-
latini, Hirpini, Apulorum pars, Samnites præter ciorum.
Pentros, Bruttii omnes, Lucani: præter hos Surren-
tini, et Græcorum omnis ferme ora, Tarentini, Me-
tapontini, Crotonienses, Locrique, et Cisalpini om-
nes Galli. Nec tamen hæ clades defectionesque so-
ciorum moverunt, ut pacis umquam mentio apud Pacis ta-
Romanos fieret; neque ante consulis Romam ad- men men-
ventum, nec postquam is rediit, renovavitque me- tio nulla.
moriâ acceptæ cladis: quo in tempore ipso adeo
magno animo civitas fuit, ut consuli, ex tanta clade,
cujus ipse causa maxima fuisset, redeunti, et obviam Varroni ob-
itum frequenter ab omnibus ordinibus sit, et gratiæ viam itum,
actæ, quod de republica non desperasset: cui, si et gratiæ
Karthaginiensium ductor fuisset, nihil recusandum actæ.
supplicii foret.

EPITOME LIBRI XXIII.

C*CAMPANI ad Hannibalem defecerunt. Nuncius Cannensis victoriae Mago Karthaginem missus annulos aureos, a digitis occisorum Romanorum detractos, in vestibulo curiae effudit: quos excessisse modii mensuram traditur. Post quem nuncium Hanno, vir ex Pænis nobilissimus, suadebat senatui Karthaginensium, ut pacem a populo Romano peterent: nec tenuit, obstrepente Barcina factione. Claudius Marcellus prætor ad Nobilium, eruptione adversus Hannibalem ex oppido facta, prospere pugnavit. Exercitus Hannibalis per hiberna Capuæ ita luxuriatus est, ut corporum viribus atque animorum enervaretur. Casilinum, a Pænis obsessum, ita fame veratum est, ut lora et pelles scutis detractas, item mures, essent; et nucibus, per Vulturum annem a Romanis missis, vixerint. Senatus ex equestri ordine hominibus centum nonaginta septem suppletus est. L. Postumius prætor a Gallis cum exercitu cæsus est. Cn. et P. Scipiones in Hispania Hasdrubalem vicerunt, et Hispaniam suam fecerunt. Reliquiae Cannensis exercitus in Siciliam relegate sunt; ne recederent inde, nisi finito bello. Inter Philippum Macedonum regem et Hannibalem societas juncta est. Sempronius Gracchus consul Campanos cecidit. Præterea in Sardinia feliciter a T. Manlio prætore adversus Pænos Sardosque res gestas continet: a quo Hasdrubal*

dux, et Mago, et Hanno capti. Claudius Marcellus prætor Hannibalis exercitum ad Nolam prælio fudit et vicit: primusque tot cladibus fessis Romanis meliorem spem belli dedit.

T. LIVII PATAVINI

LIBER XXIII.

U. C. 536.
A. C. 216.
Hannibal
in Sam-
nium mo-
vet.

HANNIBAL, post Cannensem pugnam, castra capta ac direpta, confestim ex Apulia in Samnium moverat: aditus in Hirpinos a Statio, pollicente se Compsam traditurum. Compsanus erat Trebius nobilis inter suos: sed premebat eum Mopsiorum factio, familiæ per gratiam Romanorum potentis. Post famam Cannensis pugnæ, vulgatumque Trebii sermonibus adventum Hannibalis, quum Mopsiani urbem excessissent; sine certamine tradita urbs Pœno, præsidiumque acceptum est. Ibi præda omni atque impedimentis relictis, exercitu partito, Magonem regionis ejus urbes, aut deficientes ab Romanis accipere, aut detractantes cogere ad defectionem jubet: ipse per agrum Campanum mare inferum petit, obpugnaturus Neapolim, ut urbem maritimam haberet. Ubi fines Neapolitanorum intravit, Numidas partim in insidiis, (et pleræque cavæ sunt viæ, sinusque occulti) quacumque apte poterat, disposuit: alios, præ se actam prædam ex agris ostentantes, obequitare portis jussit: in quos, quia nec multi, et incompositi videbantur, quum turma equitum erupisset, ab cedentibus consulto tracta in insidias, circumventa est: nec evasisset quisquam, ni mare propinquum, et haud procul li-

Tum in
Campaniam.

tore naves piscatoriæ pleræque conspectæ peritis U. C. 536.
 nandi dedissent effugium. Aliquot tamen eo prælio A. C. 216.
 nobiles juvenes capti cæsique sunt: inter quos et
 Hegeas præfectus equitum, intemperantius cedentes
 secutus, cecidit. Ab urbe obpugnanda Pœnum abs-
 terruere conspecta mœnia, haudquaquam prompta
 obpugnanti.

II. Inde Capuam flectit iter, luxuriantem longe
 felicitate atque indulgentia fortunæ, maxime tamen,
 inter corrupta omnia, licentia plebis sine modo li-
 bertatem exercentis. Senatum et sibi et plebi ob-
 noxium Pacuvius Calavius fecerat; nobilis idem ac
 popularis homo, ceterum malis artibus nactus opes:
 is quum eo forte anno, quo res male gesta ad Tra-
 simenum est, in summo magistratu esset, jam diu
 infestam senatui plebem, ratus, per occasionem no-
 vandi res, magnum ausuram facinus, ut, si in ea lo-
 ca Hannibal cum victore exercitu venisset, trucidato
 senatu traderet Capuam Pœnis; improbus homo, sed
 non ad extremum perditus, quum mallet incolumi,
 quam eversa, republica dominari; nullam autem in-
 columem esse orbatam publico consilio crederet, ra-
 tionem iniit, qua et senatum servaret, et obnoxium
 sibi ac plebi faceret. Vocato senatu, quum, sibi de-
 fectionis ab Romanis consilium placitum nullo
 modo, nisi necessarium fuisset, præfatus esset; *quip-
 pe qui liberos ex Ap. Claudii filia haberet, filiamque
 Romam nuptum Livio dedisset; ceterum majorem mul-
 to rem magisque timendam instare. Non enim per de-
 fectionem ad tollendum ex civitate senatum plebem
 spectare, sed per cædem senatus vacuum rempublicam
 tradere Hannibali ac Pœnis velle. Eo se periculo posse
 liberare eos, si se permittant sibi, et, certaminum in re-*

Pacuvius
 Calavius
 senatum
 Campa-
 num sibi
 obnoxium
 facit.

U. C. 536. *publica obliti, credant. Quum omnes victi metu per-*
 A. C. 216. *mitterent; Claudam in curia vos, inquit, et tamquam*
et ipse cogitati facinoris particeps, adprobando consilia,
quibus nequidquam adversarer, viam salutis vestræ in-
veniam. In hoc fidem, quam vultis ipsi, accipite. Fide
data egressus, claudi curiam jubet, præsidiumque in
vestibulo reliquit; ne quis adire curiam injussu suo,
neve inde egredi possit.

III. Tunc vocato ad concionem populo, *Quod*
sæpe, inquit, optastis, Campani, ut supplicii sumendi
vobis ex improbo ac detestabili senatu potestas esset; eam
nunc, non per tumultum expugnantes domos singulo-
rum, quas præsidiiis clientium servorumque tuentur,
cum summo vestro periculo, sed tutam habetis ac libe-
ram. Clausos omnes in curiam accipite, solos, iner-
mes: nec quidquam raptim, aut forte temere egeritis:
de singulorum capite vobis jus sententiæ dicendæ fa-
ciam, ut, quas quisque meritus est, pœnas pendat. Sed
ante omnia ita vos iræ indulgere oportet, ut potio-rem
ira salutem atque utilitatem vestram habeatis: etenim
hos (ut opinor) odistis senatores; non senatum omnino
habere non vultis: quippe aut rex, (quod abominan-
dum) aut, quod unum liberæ civitatis consilium est, se-
natus habendus est. Itaque duæ res simul agendæ sunt
vobis, ut et veterem senatum tollatis, et novum coopte-
tis. Citari singulos senatores jubebo, de quorum capite
vos consulam; quod de quoque censueritis, fiet. Sed
prius in ejus locum virum fortem ac strenuum novum
senatorem cooptabitis, quam de noxio supplicium su-
matur. Inde consedit, et, nominibus in urnam con-
jectis, citari, quod primum sorte nomen excidit, ip-
sumque e curia produci jussit. Ubi auditum est no-
men, malum et improbum pro se quisque clamare, et

supplicio dignum. Tum Pacuvius, *Video, quæ de hoc sententia sit data. Eligite pro malo atque inprobo bonum senatorem et justum.* Primo silentium erat inopia potioris subjiciundi; deinde, quum aliquis, omissa verecundia, quempiam nominasset, multo major extemplo clamor oriebatur, quum alii negarent nosse; alii nunc probra, nunc humilitatem sordidamque inopiam, et pudendæ artis aut quæstus genus, objicerent. Hoc multo magis in secundo ac tertio citato senatore est factum: ut ipsius pœnitere homines adpareret; quem autem in ejus substituerent locum, deesse: quia nec eosdem nominari adtinebat, nihil aliud quam ad audienda probra nominatos, et multo humiliores obscurioresque ceteri erant eis, qui primi memoriæ obcurrerant. Ita dilabi homines, nōtissimum quodque malum maxime tolerabile dicentes esse, jubentesque senatum ex custodia dimitti.

IV. Hoc modo Pacuvius quum obnoxium vitæ beneficio senatum multo sibi magis, quam plebi, fecisset, sine armis, jam omnibus concedentibus, dominabatur. Hinc senatores, omissa dignitatis libertatisque memoria, plebem adulari, salutare, benigne invitare, adparatis accipere epulis, eas causas suscipere, ei semper parti adesse, secundum eam licentiam judices dare, quæ magis popularis aptiorque in vulgus favori conciliando esset. Jam vero nihil in senatu actum aliter, quam si plebis ibi esset concilium. Prona semper civitas in luxuriam, non ingeniorum modo vitio, sed adfluenti copia voluptatum, et inlecebris omnis amœnitatis maritimæ terrestrique; tum vero ita obsequio principum et licentia plebei lascivire, ut nec libidini nec sumtibus modus

U. C. 536.
A. C. 216.

U. C. 596. esset : ad contemptum legum, magistratuum, senatus,
 A. C. 216. accessit tum, post Cannensem cladem, ut, cujus aliqua erat verecundia, Romanum quoque imperium spernerent : id modo erat in mora, ne extemplo deficerent, quod connubium vetustum multas familias claras ac potentes Romanis miscuerat : et quod, quum militarent aliquot apud Romanos, maximum vinculum erant trecenti equites, nobilissimus quisque Campanorum, in præsidia Sicularum urbium delecti ab Romanis ac missi.

Legati
 Campanorum
 ad cos.
 Rom.

V. Horum parentes cognatique ægre pervicerunt, ut legati ad consulem Romanum mitterentur. Ii, nondum Canusium profectum, sed Venusiæ cum paucis ac semiermibus consulem invenerunt, quam poterat maxime miserabilem bonis sociis ; superbis atque infidelibus, ut erant Campani, spernendum. Et auxit rerum suarum sui que contemptum consul nimis detegendo cladem nudandoque. Nam quum legati, ægre ferre senatum populumque Campanum, adversi quidquam evenisse Romanis, nunciassent, pollicerenturque omnia, quæ ad bellum opus essent ; *Morem magis, inquit, loquendi cum sociis servastis, Campani, jubentes, quæ opus essent ad bellum, imperare, quam convenienter ad præsentem fortunæ nostræ statum locuti estis. Quid enim nobis ad Cannas relictum est, ut, quasi aliquid habeamus, id, quod deest, expleri ab sociis velimus ? Pedites vobis imperemus, tamquam equites habeamus ? pecuniam deesse dicamus, tamquam ea tantum desit ? Nihil, ne quod supereremus quidem, nobis reliquit fortuna : legiones, equitatus, arma, signa, equi virique, pecunia, commeatus, aut in acie, aut binis postero die amissis castris perierunt. Itaque non juvenis nos in bello oportet, Campani, sed pene bellum pro*

Respon-
 sum con-
 sulis.

nobis suscipiatis. Veniat in mentem, ut trepidos quon- U. C. 536.
dam majores vestros intra mœnia compulsos, nec Sam- A. C. 216.
nitum modo hostem, sed etiam Sidicinum paventes, re-
ceptos in fidem apud Saticulam defenderimus, cæptum-
que propter vos cum Samnitibus bellum per centum
prope annos, variante fortuna eventum, tulerimus. Ad-
jicite ad hæc, quod fœdus æquum deditis, quod leges
vestras, quod ad extremum (id quod ante Cannensem
certe cladem maximum fuit) civitatem nostram magnæ
parti vestrûm dedimus, communicavimusque vobiscum.
Itaque communem vos hanc cladem, quæ accepta est,
credere, Campani, oportet, communem patriam tuen-
dam arbitrari esse. Non cum Samnite aut Etrusco res
est, ut, quod a nobis ablatum sit, in Italia tamen im-
perium maneat. Parus hostis, ne Africæ quidem in-
digenam, ab ultimis terrarum oris, freto Oceani Her-
culisque columnis, expertem omnis juris et conditionis
et linguæ prope humanæ, militem trahit. Hunc, na-
tura et moribus inmitem ferumque, insuper dux ipse
effervit, pontibus ac molibus ex humanorum corporum
strue faciendis, et (quod proloqui etiam piget) vesci hu-
manis corporibus docendo. Hos, infandis pastos epulis,
quos contingere etiam nefas sit, videre atque habere do-
minos, et ex Africa et a Karthagine jura petere, et Ita-
liam Numidarum ac Maurorum pati provinciam esse,
cui non, genito modo in Italia, detestabile sit? Pul-
chrum erit, Campani, prolapsam clade Romanum im-
perium vestra fide, vestris viribus retentum ac recupe-
ratum esse. Triginta millia peditum, quatuor equitum
arbitror ex Campania scribi posse: jam pecuniæ adfa-
tim est frumentique. Si parem fortunæ vestræ fidem
habetis, nec Hannibal se vicisse sentiet, nec Romani
victos esse.

U. C. 536. VI. Hac oratione consulis dimissis redeuntibusque
 A. C. 216. domum legatis, unus ex iis, Vibius Virrius, *Tempus*
venisse, ait, quo Campani non agrum solum, ab Roma-
nis quondam per injuriam ademptum, recuperare, sed im-
perio etiam Italiae potiri possint. Fœdus enim cum Han-
nibale, quibus velint legibus, facturos: neque contro-
versiam fore, quin, quum ipse confecto bello Hannibal
victor in Africam decedat, exercitumque deportet, Ita-
liae imperium Campanis relinquatur. Hæc Virrio lo-
 quenti adsensi omnes, ita renunciant legationem, uti
 deletum omnibus videretur nomen Romanum. Ex-
 templo plebes ad defectionem ac pars major senatus
 spectare: extracta tamen, auctoritatibus seniorum,
 per paucos dies est res: postremo vicit sententia
 plurium, ut iidem legati, qui ad consulem Romanum
 ierant, ad Hannibalem mitterentur. Quo priusquam
 iretur, certumque defectionis consilium esset, Ro-
 mam legatos missos a Campanis, in quibusdam an-
 nalibus invenio, postulantes, ut alter consul Campa-
 nus fieret, si rem Romanam adjuvari vellent: indig-
 natione orta, submoveri a curia jussos esse: mis-
 sumque lictorem, qui ex urbe educeret eos, atque eo
 die manere extra fines Romanos juberet. Quia ni-
 mis compar Latinorum quondam postulatio erat,
 Coeliusque et alii id haud sine causa prætermise-
 rant scriptores, ponere pro certo sum veritus.

Campani
 deficiunt
 ad Hanni-
 balem.

VII. Legati ad Hannibalem venerunt, pacemque
 cum eo conditionibus fecerunt: *Ne quis imperator*
magistratusve Pœnorum jus ullum in civem Campanum
haberet, neve civis Campanus invitus militaret, munus-
ve faceret: ut suæ leges, sui magistratus Capuæ essent:
ut trecentos ex Romanis captivis Pœnus daret Campa-
nis, quos ipsi elegissent; cum quibus equitum Campa-

rorum, qui in Sicilia stipendia facerent, permutatio fieret. Hæc pacta: illa insuper, quam quæ pacta erant, facinora Campani ediderunt: nam præfectos sociûm civesque Romanos alios, partim aliquo militiæ munere occupatos, partim privatis negotiis implicitos, plebs repente omnes comprehensos, velut custodiæ caussa, balneis includi jussit: ubi, fervore atque æstu anima interclusa, fœdum in modum exspirarent. Ea ne fierent, neu legatio mitteretur ad Pœnum, summa ope Decius Magius, vir cui ad summam auctoritatem nihil, præter sanam civium mentem, defuit, restiterat: ut vero præsidium mitti ab Hannibale audivit, Pyrrhi superbam dominationem, miserabilemque Tarentinorum servitutem, exempla referens, primo, ne reciperetur præsidium, palam vociferatus est: deinde, ut receptum aut ejiceretur, aut, si malum facinus, quod a vetustissimis sociis consanguineisque defecissent, forti ac memorabili facinore purgare vellent, ut, interfecto Punico præsidio, restituerent se Romanis. Hæc (neque enim occulte agebantur) quum relata Hannibali essent, primo misit, qui vocarent Magium ad sese in castra: deinde, quum is ferociter negasset se iturum, (nec enim Hannibali jus esse in civem Campanum) concitatus ira Pœnus, comprehendi hominem, vinctumque adtrahi ad se jussit: veritus deinde, ne quid inter vim tumultus, atque ex concitatione animorum inconsulti certaminis oriretur, ipse, præmisso nuncio ad Marium Blosium prætorem Campanum, postero die se Capuæ futurum, proficiscitur e castris cum modico præsidio. Marius concione advocata edicit, ut frequentes cum conjugibus ac liberis obviam irent Hannibali. Ab universis id non

U.C. 536.

A. C. 216.

Decius Magius adversatur Pœnis.

U. C. 536. obedienter modo, sed enise, favore etiam vulgi, et
 A. C. 216. studio visendi tot jam victoriis clarum imperatorem,
 Ejus constantia. factum est. Decius Magius nec obviam egressus
 est, nec, quo timorem aliquem ex conscientia significare posset, privatim se tenuit: in foro cum filio clientibusque paucis otiose inambulavit, trepidante tota civitate ad excipiendum Pœnum visendumque. Hannibal, ingressus urbem, senatum extemplo postulat, precantibusque inde primoribus Campanorum, ne quid eo die seriæ rei gereret, diemque ut ipse adventu suo festum lætus ac libens celebraret; quamquam præceps ingenio in iram erat, tamen, ne quid in principio negaret, visenda urbe magnam diei partem consumsit.

VIII. Deversatus est apud Ninnios Celeres, Stenium Pacuviumque, inclitos nobilitate ac divitiis. Eo Pacuvius Calavius, de quo ante dictum est, princeps factionis ejus, quæ traxerat rem ad Pœnos, filium juvenem adduxit, abstractum abs Decii Magii latere, cum quo ferocissime pro Romana societate adversus Punicum fœdus steterat; nec eum aut inclinata in partem alteram civitas, aut patria majestas sententia depulerat. Huic tum pater juveni Hannibalem deprecando magis, quam purgando, placavit, victusque patris precibus lacrimisque etiam ad cœnam eum cum patre vocari jussit: cui convivio neminem Campanum, præterquam hospites, Jubelliumque Tauream, insignem bello virum, adhibiturus erat. Cœperunt epulari de die, et convivium non ex more Punico, aut militari disciplina esse; sed, ut in civitate atque etiam domo luxuriosa, omnibus voluptatum inlecebris instructum. Unus nec dominorum invitatione, nec ipsius interdum Hanni-

Pacuvius
 veniam in-
 petrat filio
 suo Pe-
 rollæ.

balis, Calavii filius Perolla vinci potuit; ipse valetudinem excusans, patre animi quoque ejus haud mirabilem interturbationem caussante. Solis ferme occasu patrem Calavium, ex convivio egressum, secutus filius, ubi in secretum (hortus erat posticis ædium partibus) pervenerunt, *Consilium*, inquit, *adfero, pater, quo non veniam solum peccati, quod defecimus ad Hannibalem, inpetraturi ab Romanis, sed in multo majore dignitate et gratia simus Campani, quam umquam fuimus.* Quum mirabundus pater, *quidnam id esset consilii, quæreret*; toga rejecta ab humero, latus subcinctum gladio nudat: *Jam ego, inquit, sanguine Hannibalis sanciam Romanum fœdus: te id prius scire volui, si forte abesse, dum facinus patratur, malles.*

U. C. 596.
A. C. 216.

Perolla occisurus Hannibalem, rem significat patri.

IX. Quæ ubi vidit audivitque senex, velut si jam agendis, quæ audiebat, interesset, amens metu, *Per ego te, inquit, fili, quæcumque jura liberos jungunt parentibus, precor quæsoque, ne ante oculos patris facere et pati omnia infanda velis.* Pauca horæ sunt, intra quas jurantes per quidquid Deorum est, dextræ dextras jungentes, fidem obstrinximus, ut sacratas fide manus, digressi ab conloquio, extemplo in eum armaremus? Ab hospitali mensa surgis, ad quam tertius Campanorum adhibitus es ab Hannibale, ut eam ipsam mensam cruentares hospitis sanguine? Hannibalem pater filio meo potui placare, filium Hannibali non possum? Sed sit nihil sancti, non fides, non religio, non pietas: audeantur infanda, si non perniciem nobis cum scelere adferunt. Unus adgressurus es Hannibalem? quid illa turba tot liberorum servorumque? quid in unum intenti omnium oculi? quid tot dextræ? torpescentne in amentia illa? Vultum ipsius Hannibalis, quem ar-

Dehortatur eum pater.

U. C. 536. *mati exercitus sustinere nequeunt, quem horret populus*

A. C. 216. *Romanus, tu sustinebis? et, alia auxilia desint, me ipsum ferire, corpus meum obponentem pro corpore Hannibalis, sustinebis? Atqui per meum pectus petendus ille tibi transfigendusque est: deterreri hic sine te*

Patri cedit Perolla. *potius, quam illic vinci. Valeant preces apud te meæ, sicut pro te hodie valuerunt. Lacrimantem inde juvenem cernens, medium complectitur, atque, osculo hærens, non ante precibus abstitit, quam pervicit, ut gladium poneret, fidemque daret, nihil facturum tale. Tum juvenis, Ego quidem, inquit, quam patriæ debeo, pietatem exsolvam patri: tuam doleo vicem, cui ter proditæ patriæ sustinendum est crimen; semel, quum defectionis ab Romanis; iterum, quum pacis cum Hannibule fuisti auctor; tertio hodie, quum restituendæ Romanis Capuæ mora atque impedimentum es. Tu, patria, ferrum, quo pro te armatus hanc arcem defendere volebam, hosti minime parcens, quando parens extorquet, recipe. Hæc quum dixisset, gladium in publicum trans maceriam horti abjecit: et quo minus res suspecta esset, se ipse convivio reddidit.*

Hannibal Dec. Magi-
um sibi
dedi postu-
lat. X. Postero die senatus frequens datus Hannibali: ubi prima ejus oratio perblanda ac benigna fuit, qua gratias egit Campanis, quod amicitiam suam Romanæ societati præposuissent: et inter cetera magnifica promissa pollicitus, brevi caput Italiæ omni Capuam fore, juraque inde cum ceteris populis Romanum etiam petiturum. Unum esse exsortem Punicæ amicitiae fœderisque secum facti, quem neque esse Campanum, neque dici debere, Magium Decium: eum postulare, ut sibi dedatur, ac se præsentem de eo referatur, senatusque consultum fiat. Omnes in eam sententiam ierunt: quamquam ma-

gnæ parti et vir indignus ea calamitate, et haud U. C. 536.
 parvo initio minui videbatur jus libertatis. Egres- A. C. 216.
 sus curia, in templo magistratus consedit; compre-
 hendique Decium Magium, atque ante pedes destitu-
 tum caussam dicere jussit. Qui quum, manente fe-
 rocia animi, negaret lege fœderis id cogi posse, tum
 injectæ catenæ, ducique ante lictorem in castra est
 jussus. Quoad capite aperto est ductus, conciona- Magius ab-
 bundus incessit, ad circumfusam undique multitudi- ducitur in
 nem vociferans: *Habetis libertatem, Campani, quam* castra Han-
petistis: foro medio, luce clara, videntibus vobis, nulli
Campanorum secundus, vinctus ad mortem raptor. Quid
violentius Capua capta fieret? Ite obviam Hannibali,
exornate urbem, diemque adventus ejus consecrate, ut
hunc triumphum de cive vestro spectetis. Hæc vociferanti, quum moveri vulgus videretur, obvolutum caput est, ociusque rapi extra portam jussus: ita in castra perducitur: extemploque inpositus in navim, et Karthaginem missus; ne, motu aliquo Capuæ ex indignitate rei orto, senatum quoque pœniteret dediti principis: et, legatione missa ad repetendum eum, ne aut negando rem, quam primum peterent, obfendendi sibi novi socii; aut tribuendo, habendus Capuæ esset seditionis ac turbarum auctor. Navem Cyrenas
 Cyrenas detulit tempestas, quæ tum in ditione regum adpulsus
 erant: ibi quum Magius ad statuam Ptolemæi regis confugit
 confugisset, deportatus a custodibus Alexandriam ad ad statuam re-
 Ptolemæum, quum eum docuisset, contra jus fœderis gis.
 vinctum se ab Hannibale esse, vinculis liberatur;
 permissumque, ut rediret, seu Romam, seu Capuam
 mallet. *Nec Magius Capuam sibi tutam dicere; et*
Romam eo tempore, quo inter Romanos Campanosque
bellum sit, transfugæ magis, quam hospitis, fore domi-

U. C. 536. *cilium : nusquam malle, quam in regno ejus, vivere,*
 A. C. 216. *quem vindicem atque auctorem habeat libertatis.*

Redit a
 Delphis
 legatus
 Roma-
 nus.

XI. Dum hæc geruntur, Q. Fabius Pictor legatus a Delphis Romam rediit, responsumque ex scripto recitavit : Divi quoque in eo erant, quibus quoque modo supplicaretur : tum, *Si ita faxitis, Romani, vestra res meliores facilioresque erunt : magisque ex sententia respublica vestra vobis procedet, victoriaque duelli populi Romani erit. Pythio Apollini, respublica vestra bene gesta servataque, lucris meritis donum mittitote, deque præda, manubiis, spoliisque honorem habetote, lasciviam a vobis prohibetote.* Hæc ubi ex Græco carmine interpretata recitavit, tum dixit, se oraculo egressum extemplo his omnibus Divis rem divinam ture ac vino fecisse : jussumque ab templi antistite, sicut coronatus laurea corona et oraculum adisset, et rem divinam fecisset ; ita coronatum navim adscendere, nec ante deponere eam, quam Romam pervenisset. Se, quæcumque imperata sint, cum summa religione ac diligentia exsecutum ; coronam Romæ in aram Apollinis deposuisse. Senatus decrevit, ut eæ res divinæ supplicationesque primo quoque tempore

Mago Car-
 thaginem a
 fratre mis-
 sus.

cum cura fierent. Dum hæc Romæ atque in Italia geruntur, nuncius victoriæ ad Cannas Karthaginem venerat Mago Hamilcaris filius : non ex ipsa acie a fratre missus, sed retentus aliquot dies in recipiendis civitatibus Bruttiorum, quæque deficiebant. Is, quum ei senatus datus esset, res gestas in Italia a fratre

Exponit res
 gestas Han-
 nibalis.

exponit : *Cum sex imperatoribus eum, quorum quatuor consules, duo dictator ac magister equitum fuerint, cum sex consularibus exercitibus acie conflixisse : occidis-
 supra ducenta millia hostium : supra quinquaginta
 millia cepisse. Ex quatuor consulibus duos occidis-
 se ;*

ex duobus saucium alterum, alterum toto exercitu amis- U. C. 536.
so, vix cum quinquaginta hominibus effugisse. Magis- A. C. 216.
trum equitum, quæ consularis potestas sit, fusum fuga-
tumque: dictatorem, quia se in aciem numquam com-
miserit, unicum haberi imperatorem. Bruttios Apulos-
que, partim Samnitium ac Lucanorum defecisse ad Pæ-
nos. Capuam, quod caput, non Campaniæ modo, sed,
post adflictam rem Romanam Cannensi pugna, Italiæ
sit, Hannibali se tradidisse. Pro his tantis totque victo-
riis, verum esse, grates Deis immortalibus agi haberique.

XII. Ad fidem deinde tam lætarum rerum, effun- Annuli au-
di in vestibulo curiæ jussit annulos aureos, qui tan- rei ad modii
tus acervus fuit, ut, metientibus dimidium super tres mensuram.
modios explesse, sint quidam auctores. Fama tenuit,
quæ propior vero est, haud plus fuisse modio. Ad-
jecit deinde verbis, quo majoris cladis indicium esset,
neminem, nisi equitem, atque eorum ipsorum pri-
mores, id gerere insigne. Summa fuit orationis, *Quo*
propius spem belli perficiendi sit, eo magis omni ope
juvandum Hannibalem esse: procul enim ab domo mi-
litiæ esse, in media hostium terra: magnam vim fru-
menti, pecuniæ, absumi: et tot acies, ut hostium exer-
citus delesse, ita victoris etiam copias parte aliqua mi-
nuisse. Mittendum igitur supplementum esse, mitten-
dam in stipendium pecuniam frumentumque tam bene
meritis de nomine Punico militibus. Secundum hæc Hanno-
dicta Magonis lætis omnibus, Himilco, vir factionis nem in-
Barcinæ, locum Hannonis increpandi esse ratus, Quid crepat Hi-
est, Hanno? inquit: *etiam nunc pœnitet belli suscepti* milco.
adversus Romanos? Jube dedi Hannibalem: veta in
tam prosperis rebus grates Diis immortalibus agi: au-
diamus Romanum senatorem in Karthaginiensium curia.
Tum Hanno: *Tacuissem hodie, Patres conscripti, ne*

U. C. 536. *quid in communi omnium gaudio, minus lætum quod*
 A. C. 216. *esset vobis, loquerer : nunc interroganti senatori, pœni-*
 Oratio *teatne me adhuc suscepti adversus Romanos belli, si re-*
 Hanno- *ticeam, aut superbus, aut obnoxius videar : quorum al-*
 nis de *terum est hominis alienæ libertatis obliti ; alterum suæ.*
 Hanni- *Respondeam igitur Himilconi, non desisse pœnitere me*
 bale. *belli, neque desitutum ante invictum vestrum impera-*
torem incusare, quam finitum aliqua tolerabili condi-
tione bellum videro : nec mihi pacis antiquæ desiderium
ulla alia res, quam pax nova finiet. Itaque ista, quæ
modo Mago jactavit, Himilconi ceterisque Hannibalis
satellitibus jam lata sunt : mihi possunt lata esse, quia
res bello bene gestæ, si volumus fortuna uti, pacem no-
bis æquiores dabunt : nam si prætermittimus hoc tem-
pus, quo magis dare, quam accipere, possumus videri
pacem, vereor, ne hæc quoque lætitia luxuriet nobis, ac
rana evadat. Quæ tamen nunc quoque qualis est ? Oc-
cidi exercitus hostium : mittite milites mihi : quid aliud
rogares, si esses victus ? Hostium cepi bina castra,
prædæ videlicet plena et commeatum ; frumentum et
pecuniam date : quid aliud, si spoliatus, si exutus cas-
tris esses, peteres ? Et, ne omnia ipse mirer, (mihi quo-
que enim, quoniam respondi Himilconi, interrogare jus
fasque est) velim seu Himilco, seu Mago respondeat ;
quum ad internecionem Romani imperii pugnatum ad
Cannas sit, constetque in defectione totam Italiam esse ;
primum ecquis Latini nominis populus defecerit ad nos ?
deinde ecquis homo, ex quinque et triginta tribubus, ad
Hannibalem transfugerit ? Quum utrumque Mago ne-
gasset : Hostium quidem ergo, inquit, adhuc nimis
multum superest : sed, multitudo ea quid animorum,
quidve spei habeat, scire velim.

Discepta-
tio cum
Magone.

XIII. Quum, id nescire, Mago diceret ; Nihil fa-

cilius scitu est, inquit. *Ecquos legatos ad Hannibalem* U. C. 536.
A. C. 216.
Romani miserunt de pace? ecquam denique mentionem
pacis Romæ factam esse, adlatum ad vos est? Quum
id quoque negasset, Bellum igitur, inquit, tam inte-
grum habemus, quam habuimus, qua die Hannibal in
Italiam est transgressus. Quam varia victoria priore
Punico bello fuerit, plerique, qui meminimus, super-
sumus: numquam terra marique magis prosperæ res
nostræ visæ sunt, quam ante consules C. Lutatium et
A. Postumium fuerunt. Lutatio et Postumio consuli-
bus, devicti ad Ægates insulas sumus. Quod si (id
quod Diî omen avertant) nunc quoque fortuna aliquid
variaverit; tum pacem speratis, quum vincemur, quam
nunc, quum vincimus, dat nemo? Ego, si quis de pace
consulet, seu deferenda hostibus, seu accipienda, habeo,
quid sententiæ dicam: si de iis, quæ Mago postulat,
refertis, nec victoribus mitti adtinere puto, et frus-
trantibus nos falsa atque inani spe multo minus censeo
mittenda esse. Haud multos movit Hannonis oratio:
nam et simultas cum familia Barcina leviolem aucto-
rem faciebat, et occupati animi præsentis lætitiæ
nihil, quo vanius fieret gaudium suum, auribus ad-
mittebant: debellatumque mox fore, si adniti paul-
lulum voluissent, rebantur. Itaque ingenti consen-
su fit senatusconsultum, ut Hannibali quatuor Nu-
midarum millia in supplementum mitterentur, et qua-
draginta elephanti, et argenti multa talenta. Dicta-
torque cum Magone in Hispaniam præmissus est, ad
conducenda viginti millia peditum, quatuor equitum,
quibus exercitus, qui in Italia, quique in Hispania
erant, supplerentur.

XIV. Ceterum hæc, ut in secundis rebus, segni-
 ter otioseque gesta. Romanos, præter insitam in-

U. C. 536. dustriam animis, fortuna etiam cunctari prohibebat :
 A. C. 216. nam nec consul ulli rei, quæ per eum agenda esset,
 Romani in pigre bellum adparant. deerat : et dictator M. Junius Pera, rebus divinis perfectis, latoque, ut solet, ad populum, ut equum escendere liceret, præter duas urbanas legiones, quæ principio anni a consulibus conscriptæ fuerant, et servorum delectum, cohortesque ex agro Piceno et Gallico conlectas, ad ultimum prope desperatæ rei publicæ auxilium, quum honesta utilibus cedunt, descendit, edixitque : *Qui capitalem fraudem ausi, quique pecuniæ judicati in vinculis essent, qui eorum apud se milites fierent, eos noxa pecuniaque sese exsolvi jussurum.* Ea sex millia hominum Gallicis spoliis, quæ triumpho C. Flamini translatæ erant, armavit : itaque cum viginti quinque millibus armatorum ab urbe proficiscitur. Hannibal, Capua recepta, quum iterum Neapolitanorum animos, partim spe, partim metu, nequidquam tentasset, in agrum Nolanum exercitum traducit : et ut non hostiliter statim, quia non desperabat voluntariam deditionem ; ita, si morarentur spem, nihil eorum, quæ pati aut timere possent, prætermisurus. Senatus, ac maxime primores ejus, in societate Romana cum fide perstare ; plebs novarum, ut solet, rerum atque Hannibalis tota esse ; metumque agrorum populationis, et patienda in obsidione multa gravia indignaque proponere animo : neque auctores defectionis deerant. Itaque ubi senatum metus cepit, si propalam tenderent, resisti multitudini concitatæ non posse ; clam simulando dilationem mali inveniunt : placere enim sibi defectionem ad Hannibalem simulant : quibus autem conditionibus in foedus amicitiamque novam transceant, parum constare. Ita spatio sumto, legatos pro-

Nolæ dis-
 cordia.

pere ad prætorem Romanum Marcellum Claudium, U. C. 536.
A. C. 216.
 qui Casilini cum exercitu erat, mittunt, docentque,
 quanto in discrimine sit Nolana res, agrum Hanni- Senatus
Nolanus
vocat Mar-
cellum.
 balis esse et Pœnorum, urbem extemplo futuram, ni
 subveniatur: concedendo plebei senatum, ubi velint,
 defecturos se, ne deficere præfestinarent, effecisse.
 Marcellus, conlaudatis Nolanis, eadem simulatione
 extrahi rem in suum adventum jussit: interim celari,
 quæ secum acta essent, spemque omnem auxilii Ro-
 mani. Ipse a Casilino Calatiam petit: atque inde,
 Vulturno amni trajecto, perque agrum Saticulanum
 Trebulanumque super Suessulam per montes Nola
 pervenit.

XV. Sub adventum prætoris Romani Pœnus agro
 Nolano excessit, et ad mare proxime Neapolim de-
 scendit, cupidus maritimi oppidi potiundi, quo cur-
 sus navibus tutus ex Africa esset. Ceterum, post-
 quam Neapolim a præfecto Romano teneri accepit,
 (M. Junius Silanus erat, ab ipsis Neapolitanis adci-
 tus) Neapoli quoque, sicut Nola, omissa, petit Nu- Hannibal
Nuceriam
capit.
 ceriam: eam quum aliquamdiu circumsedisset, sæpe
 vi, sæpe sollicitandis nequidquam nunc plebe nunc
 principibus, fame demum in deditionem accepit,
 pactus, ut inernaes cum singulis abirent vestimentis:
 deinde, ut qui a principio mitis omnibus Italicis,
 præter Romanos, videri vellet, præmia atque hono-
 res, qui remanerent, ac militare secum voluissent,
 proposuit. Nec ea spe quemquam tenuit: dilapsi
 omnes, quocumque hospitia aut fortuitus animi in-
 petus tulit, per Campaniæ urbes, maxime Nola
 Neapolimque. Quum ferme triginta senatores, ac
 forte primus quisque, Capuam petissent, exclusi
 inde, quod portas Hannibali clausissent, Cumas se

U. C. 536. contulerunt. Nuceriæ præda militi data est, urbs
 A. C. 216. direpta atque incensa. Nola Marcellus non sui
 magis fiducia præsidii, quam voluntate principum,
 habebat: plebes timebatur, et ante omnes L. Banti-
 um, quem consensus adtentatæ defectionis, ac metus
 a prætore Romano, nunc ad prodicionem patriæ,
 nunc, si ad id fortuna defuisset, ad transfugiendum
 stimulabat. Erat juvenis acer, et sociorum ea tem-
 pestate prope nobilissimus eques, seminecem eum
 ad Cannas in acervo cæsorū corporum inventum,
 curatumque benigne, etiam cum donis Hannibal do-
 mum remiserat: ob ejus gratiam meriti rem Nola-
 nam in jus ditionemque dare voluerat Pæno: anxi-
 umque eum et sollicitum cura novandi res prætor
 cernebat. Ceterum, quum aut pœna cohibendus es-
 set, aut beneficio conciliandus, sibi adsumsisse, quam
 hosti ademisse, fortem ac strenuum maluit socium,
 adcitumque ad se benigne adpellat: *Multos eum in-
 vidios inter populares habere, inde existimatu facile esse,
 quod nemo civis Nolanus sibi indicaverit, quam multa
 ejus egregia facinora militaria essent. Sed, qui in Ro-
 manis militaverit castris, non posse obscuram ejus vir-
 tutem esse: multos sibi, qui cum eo stipendia fecerint,
 referre, qui vir esset ille, quæque et quoties pericula
 pro salute ac dignitate populi Romani adisset: utique
 Cannensi prælio non prius pugna abstiterit, quam prope
 exsanguis ruina superincidentium virorum, equorum,
 armorumque sit oppressus. Itaque macte virtute esto,*
 inquit: *apud me tibi omnis honos atque omne præmium
 erit: et, quo frequentior mecum fueris, senties eam
 rem tibi dignitati atque emolumento esse: lætoque ju-
 veni promissis equum eximium dono dat, bigatos-
 que quingentos quæstorem numerare jubet: licto-*

Bantium
 Marcellus
 Romanis
 conciliat.

ribus imperat, ut eum se adire, quoties velit, p-
tiantur. U. C. 536.
A. C. 216.

XVI. Hac comitate Marcelli ferocis juvenis animus adeo est mollitus, ut nemo inde sociorum rem Romanam fortius ac fidelius juverit. Quum Han-
nibal ad portas esset, (Nolam enim rursus a Nuce-
ria moverat castra) plebesque Nolana de integro ad defectionem spectaret, Marcellus sub adventum hostium intra muros se recepit; non castris metuens, sed ne prodendæ urbis occasionem nimis multis in eam imminentibus daret. Instrui deinde utrimque acies cœptæ, Romanorum pro mœnibus Nolæ, Pœnorum ante castra sua: prælia hinc parva inter urbem castraque, et vario eventu fiebant: quia duces nec prohibere paucos temere provocantes, nec dare signum universæ pugnæ volebant. In hac cotidiana duorum exercituum statione principes Nolanorum nunciant Marcello, *Nocturna colloquia inter plebem ac Pœnos fieri; statutumque esse, ut, quum Romana acies egressa portis iret, impedimenta eorum ac sarcinas diriperent, clauderent deinde portas, murosque occuparent, ut, potentes rerum suarum atque urbis, Pœnum inde pro Romano acciperent.* Hæc ubi nunciata sunt Marcello, conlaudatis senatoribus Nolanis, prius-
quam aliquis motus intus oriretur, fortunam pugnæ vincit.

Ad tres portas in hostes versas tripartito exercitum instruxit: impedimenta subsequi jussit; calones lixasque et invalidos milites vallum ferre: media porta robora legionum et Romanos equites, duabus circa portis novos milites levemque armaturam ac sociorum equites statuit. Nolani muros portasque adire vetiti; subsidiaque destinata impedimentis data, ne, occupatis prælio legionibus, in

U. C. 536. ea inpetus fieret : ita instructi intra portas stabant.

A. C. 216. Hannibali, sub signis (id quod per aliquot dies fecerat) ad multum diei in acie stanti, primo miraculo esse, quod nec exercitus Romanus porta egrederetur, nec armatus quisquam in muris esset : ratus deinde prodita conloquia esse, metuque residues factos, partem militum in castra remittit, jussos propere adparatum omnem obpugnandæ urbis in primam aciem adferre ; satis fidens, si cunctantibus instaret, tumultum aliquem in urbe plebem moturam. Dum in sua quisque ministeria discursu trepidat ad prima signa, succeditque ad muros acies, patefacta repente porta, Marcellus signa canere, clamoremque tolli, ac pedites primum, deinde equites, quanto maximo possent inpetu, in hostem erumpere jubet. Satis terroris tumultusque in aciem mediam intulerant, quum duabus circa portis P. Valerius Flaccus et C. Aurelius legati in cornua hostium erupere. Addidère clamorem lixæ calonesque, et alia turba custodiæ impedimentorum adposita, ut paucitatem maxime spernentibus Pœnis ingentis repente exercitus speciem fecerint. Vix equidem ausim adfirmare, quod quidam auctores sunt, duo millia et octingentos hostium cæsos ; non plus quingentos Romanum amisisse. Sive tanta, sive minor victoria fuit, ingens eo die res, ac nescio, an maxima illo bello gesta sit : non vinci enim ab Hannibale vincentibus difficilior fuit, quam postea vincere.

XVII. Hannibal, spe potiundæ Nolæ adempta, quum Acerras recessisset, Marcellus extemplo, clausis portis custodibusque dispositis, ne quis egrederetur, quæstionem in foro de iis, qui clam in conloquiis hostium fuerant, habuit : supra septuaginta

damnatos proditionis securi percussit, bonaque eorum jussit publica populi Romani esse: et, summa rerum senatui tradita, cum exercitu omni profectus, supra Suessulam castris positus consedit. Pœnus, Acerras primum ad voluntariam deditionem conatus perlicere, postquam obstinatos vidit, obsidere inde atque obpugnare parat: ceterum Acerranis plus animi, quam virium, erat: itaque, desperata tutela urbis, ut circumvallari mœnia viderunt, priusquam continuarentur hostium opera, per intermissa munimenta neglectasque custodias silentio noctis dilapsi, per vias inviaque, qua quemque aut consilium aut error tulit, in urbes Campaniæ, quas satis certum erat non mutasse fidem, perfugerunt. Hannibal, Acerris direptis atque incensis, quum a Casilino dictatorem Romanum legionesque novas adcirci nunciassent, ne quis tam propinquis hostium castris Capuam quoque recurrat, exercitum ad Casilinum ducit. Casilinum eo tempore quingenti Prænestini habebant, cum paucis Romanis Latinique nominis, quos eodem audita Cannensis clades contulerat: hi, non confecto Præneste ad diem delectu, serius profecti domo, quum Casilinum ante adversæ pugnae famam venissent, et aliis adgregarent sese Romanis sociisque, profecti a Casilino cum satis magno agmine irent; avertit eos retro Casilinum nuncius Cannensis pugnae: ibi quum dies aliquot, suspecti Campanis timentesque, cavendis ac struendis in vicem insidiis traduxissent, jamque de Capuæ defectione agi, accipique Hannibalem satis pro certo habuere, interfectis nocte oppidanis, partem urbis, quæ cis Vulturum est, (eo enim dividitur amni) occupavere: idque præsidium Casilini habebant Romani. Addi-

U. C. 536.

A. C. 216.

Acerras capit Pœnus.

U. C. 536. tur et Perusina cohors, homines quadringenti sex-
 A. C. 216. aginta, eodem nuncio, quo Prænestini paucos ante
 dies, Casilinum compulsi : et satis ferme armato-
 rum ad tam exigua mœnia, et flumine altera parte
 cincta, tuenda erat : penuria frumenti, nimium et-
 iam ut videretur hominum, efficiebat.

Casilinum
 Hannibal
 obpugnat.

XVIII. Hannibal quum jam inde haud procul
 esset, Gætulos cum præfecto, nomine Isalca, præ-
 mittit : ac primo, si fiat conloquii copia, verbis be-
 nignis ad portas aperiendas præsidiumque accipien-
 dum perlicere jubet : si in pertinacia perstent, rem
 gerere ac tentare, si qua parte invadere urbem pos-
 sit. Ubi ad mœnia accessere, quia silentium erat,
 solitudo visa ; metuque concessum barbarus ratus,
 moliri portas et claustra refringere parat : quum,
 patefactis repente portis, cohortes duæ, ad id ipsum
 instructæ intus, ingenti cum tumultu erumpunt,
 stragemque hostium faciunt. Ita primis repulsis,
 Maharbal, cum majore robore virorum missus, nec
 ipse eruptionem cohortium sustinuit : postremo
 Hannibal, castris ante ipsa mœnia obpositis, par-
 vam urbem parvumque præsidium summa vi atque
 omnibus copiis obpugnare parat : ac, dum instat la-
 cessitque, corona undique circumdatis mœnibus,
 aliquot milites et promptissimum quemque, e muro
 turribusque ictos, amisit. Semel ultro erumpentes
 agmine elephantorum obposito prope intercludit,
 trepidosque compulit in urbem, satis multis, ut ex
 tanta paucitate, interfectis : plures cecidissent, ni
 nox prælio intervenisset. Postero die omnium ani-
 mi ad obpugnandum accenduntur ; utique postquam
 corona aurea muralis proposita est, atque ipse dux
 castelli, plano loco positi, segnem obpugnationem

Sagunti expugnatoribus exprobrabat, Cannarum Tra- U. C. 536.
 *simenique et Trebiæ singulos admonens universos- A. C. 216.
 que. Inde vineæ quoque cœptæ agi cuniculique : nec
 ad varios conatus hostium aut vis ulla, aut ars deerat.
 Socii Romanorum propugnacula adversus vineas sta-
 tuere, transversis cuniculis hostium cuniculos ex-
 cipere, et palam et clam cœptis obviam ire ; donec
 pudor etiam Hannibalem ab incepto avertit : cas- Hannibal
 trisque communitis, ac præsidio modico inposito, ne it Capuam
 omissa res videretur, in hiberna Capuam concessit. in hiberna.
 Ibi partem majorem hiemis exercitum in tectis
 habuit, adversus omnia humana mala sæpe ac diu
 duratum, bonis inexpertum atque insuetum : itaque,
 quos nulla mali vicerat vis, perdidere nimia bona Conrum-
 ac voluptates inmodicæ ; et eo inpensius, quo avi- pitur illic
 dius ex insolentia in eas se merserant. Somnus ejus exer-
 citus.
 enim, et vinum, et epulæ, et scorta, balineaque, et
 otium, consuetudine in dies blandius, ita enervave-
 runt corpora animosque, ut magis deinde præteritæ
 victoriæ eos, quam præsentis tutarentur vires ; ma-
 jusque id peccatum ducis apud peritos artium milita-
 rium haberetur, quam quod non ex Cannensi acie
 protinus ad urbem Romanam duxisset : illa enim
 cunctatio distulisse modo victoriam videri potuit ;
 hic error vires ademisse ad vincendum. Itaque,
 Hercule, velut si cum alio exercitu a Capua exiret,
 nihil usquam pristinæ disciplinæ tenuit : nam et re-
 dierunt plerique scortis impliciti : et, ubi primum
 sub pellibus haberi cœpti sunt, viaque et alius mili-
 taris labor excepit, tironum modo corporibus ani-
 misque deficiebant : et deinde per omne æstivorum
 tempus magna pars sine comœdiis ab signis dila-

U.C. 536. bebantur : neque aliæ latebræ, quam Capua, deser-
A.C. 216. toribus erant.

XIX. Ceterum, mitescente jam hieme, educto ex hibernis milite, Casilinum redit : ubi, quamquam ab obpugnatione cessatum erat, obsidio tamen continuata oppidanos præsidiumque ad ultimum inopiæ adduxerat. Castris Romanis Ti. Sempronius præerat, dictatore auspiciorum repetendorum causa profecto Romam. Marcellum, et ipsum cupientem ferre auxilium obsessis, et Vulturnus amnis inflatus aquis, et preces Nolanorum atque Acerranorum, tenebant, Campanos timentium, si præsidium Romanum accessisset. Gracchus, adsidens tantum Casilino, quia prædictum erat dictatoris, ne quid absente eo rei gereret, nihil movebat : quamquam, quæ facile omnem patientiam vincerent, nunciabantur a Casilino : nam et, præcipitasse se quosdam non tolerantes famem, constabat ; et stare inermes in muris, nuda corpora ad missilium telorum ictus præbentes. Ea ægre patiens Gracchus, quum neque pugnam conserere dictatoris injussu auderet, (pugnandum autem esse, si palam frumentum inportaret, videbat) neque clam inportandi spes esset, farre, ex agris circa undique convecto, quum complura dolia complexset, nuncium ad magistratum Casilinum misit, ut exciperent dolia, quæ amnis deferret. Insequenti nocte, intentis omnibus in flumen ac spem ab nuncio Romano factam, dolia medio missa amni defluerunt : æqualiter inter omnes frumentum divisum. Id postero quoque die ac tertio factum est ; nocte et mittebantur et perveniebant : eo custodias hostium fallebant. Imbribus deinde continuis citior solito amnis, transverso

Casilinum
in doliis per
amnem
frumen-
tum mit-
titur.

vortice dolia inpulit ad ripam, quam hostes servabant: ibi hærentia inter obnata ripis salicta conspiciuntur: nunciatumque Hannibali est, et deinde intentiore custodia cautum, ne quid falleret Vulturno ad urbem missum. Nuces tamen fusæ ab Romanis castris, quum medio amni ad Casilinum defluerent, cratibus excipiebantur. Postremo ad id ventum inopia est, ut lora detractasque scutis pelles, ubi fervida mollissent aqua, mandere conarentur: nec muribus aliove animali abstinerent, et omne herbarum radicisque genus aggeribus infimis muri eruerent; et, quum hostes obarassent, quidquid herbidi terreni extra murum erat, raporum semen injecerunt, ut Hannibal, *Eone usque, dum ea nascantur, ad Casilinum sessurus sum?* exclamaret: et, qui nullam antea pactionem auribus admiserat, tum demum agi secum est passus de redemptione liberorum capitum. Septunces auri in singulos pretium convenit. Fide accepta, sese tradiderunt: donec omne aurum persolutum est, in vinculis habiti: tum remissi Cumas cum fide. Id verius est, quam ab equite in abeuntes inmisso interfectos. Prænestini maxima pars fuere: ex quingentis septuaginta, qui in præsidio fuerunt, minus dimidium ferrum famesque absumsit: ceteri incolumes Præneste cum prætore suo Manicio (scriba is antea fuerat) redierunt. Statua ejus indicio fuit, Præneste in foro statuta, loricata, amicta toga, velato capite; et tria signa cum titulo laminae æneæ inscripto, *Manicium pro militibus, qui Casilini in præsidio fuerint, votum votisse.* Idem titulus tribus signis in æde Fortunæ positus fuit subjectus.

XX. Casilinum oppidum redditum Campanis est, firmatum septingentorum militum de exercitu Hau-

U. C. 536.
A. C. 216.

Nuces mit-
tuntur.

Casilini lo-
ra pelles-
que man-
duntur.

Hannibali
deditur Ca-
silinum.

U. C. 596. nibalis præsidio; ne, ubi Pœnus inde abcessisset,
 A. C. 216. Romani obpugnarent. Prænестinis militibus senatus Romanus duplex stipendium et quinquennii militiæ vacationem decrevit: civitate quum donarentur ob virtutem, non mutaverunt. Perusinorum casus obscurior fama est; quia nec ipsorum monumento ullo est inlustratus, nec decreto Romanorum. Eodem tempore Petelinos, qui uni ex Bruttiiis manserant in amicitia Romana, non Karthaginienses modo, qui regionem obtinebant, sed Bruttii quoque ceteri, ob separata ab se consilia, obpugnabant. Quibus quum obsistere malis nequirent Petelini, legatos Romam ad præsidium petendum miserunt: quorum preces lacrimæque (in questus enim flebiles, quum sibimet ipsi consulere jussi sunt, sese in vestibulo curiæ profuderunt) ingentem misericordiam Patribus ac populo moverunt: consultique iterum a M. Pomponio prætore Patres, circumspectis omnibus imperii viribus, fateri coacti, nihil jam longinquis sociis in se præsidii esse, redire domum, fideque ad ultimum expleta, consulere sibimet ipsos in reliquum præsentī fortuna jusserunt. Hæc postquam renunciata legatio Petelinis est, tantus repente mœror pavorque senatum eorum cepit, ut pars profugiendi, qua quisque posset, ac deserendæ urbis auctores essent; pars, quando deserti a veteribus sociis essent, adjungendi se ceteris Bruttiiis, ac per eos dedendi Hannibali. Vicit tamen ea pars, quæ nihil raptim nec temere agendum, consulendumque de integro censuit. Re laxata postero die per minorem trepidationem tenuerunt optimates, ut, convectis omnibus ex agris, urbem ac muros firmarent.

XXI. Per idem fere tempus literæ ex Sicilia Sar-

Petelini
 Romanis
 fidi.

diniaeque Romam adlatæ. Priores ex Sicilia T. Otacilii proprætoris in senatu recitatæ sunt: *L. Furium prætorem cum classe ex Africa Lilybæum venisse: ipsum graviter saucium in discrimine ultimo vitæ esse: militi et navalibus sociis neque stipendium, neque frumentum ad diem dari; neque, unde detur, esse. Magnopere suadere, ut quam primum ea mittantur; sibi-que, si ita videatur, ex novis prætoribus successorem mittant.* Eademque ferme de stipendio frumentoque ab A. Cornelio Mammula proprætor ex Sardinia scripta. Responsum utrisque, non esse, unde mitteretur: jussique ipsi classibus atque exercitibus suis consulere. T. Otacilius, ad unicum subsidium populi Romani Hieronem legatos quum misisset, in stipendium, quanti argenti opus fuit, et sex mensium frumentum accepit. Cornelio in Sardinia civitates sociæ benigne contulerunt. Et Romæ quoque propter penuriam argenti triumviri mensarii, rogatione M. Minucii tribuni plebis, facti, L. Æmilius Papus, qui consul censorque fuerat, et M. Atilius Regulus, qui bis consul fuerat, et L. Scribonius Libo, qui tum tribunus plebis erat. Et duumviri creati, M. et C. Atilii, ædem Concordiæ, quam L. Manlius prætor voverat, dedicaverunt. Et tres pontifices creati, Q. Cæcilius Metellus, et Q. Fabius Maximus, et Q. Fulvius Flaccus, in locum P. Scantini demortui, et L. Æmilii Paulli consulis, et Q. Ælii Pæti, qui ceciderant pugna Cannensi.

U. C. 536.
A. C. 216.
Status rerum in Sicilia.

Hiero adjuvat Romanos.

Triumviri mensarii.

XXII. Quum cetera, quæ continuis cladibus fortuna minuerat, quantum consiliis humanis adsequi poterant, Patres explessent; tandem se quoque et solitudinem curiæ, paucitatemque convenientium ad publicum consilium respexerunt: neque enim post

U. C. 536. L. Æmiliū et C. Flaminiū censores senatus lectus
 A. C. 216. fuerat, quum tantum senatorum adversæ pugnæ, ad
 hoc sui quemque casus per quinquennium absumsis-
 sent. Quum de ea re M'. Pomponius prætor, dicta-
 tore post Casilinum amissum profecto jam ad exerci-
 tum, exposcentibus cunctis retulisset; tum Sp. Car-
 vilius, quum longa oratione non solum inopiam, sed
 paucitatem etiam civium, e quibus in Patres lege-
 rentur, conquestus esset, explendi senatus caussa,
 et jungendi artius Latini nominis, pro magna re se
 suadere dixit, ut ex singulis populis Latinorum, bi-
 nis senatoribus, si Patres Romani censuissent, civi-
 tas daretur, atque in demortuorum locum in senatum
 legerentur. Eam sententiam haud æquioribus ani-
 mis, quam ipsorum quondam postulatum Latinorum,
 Patres audierunt: et, quum fremitus indignantium
 tota curia esset, et præcipue Manlius, *esse etiam nunc
 stirpis ejus virum, diceret, ex qua quondam in Capi-
 tolio consul minatus esset, quem Latinum in curia vi-
 disset, eum sua manu se interfectorum; Q. Fabius
 Maximus, Numquam rei ullius alieniore tempore men-
 tionem factam in senatu, dixit, quam inter tam sus-
 pensos sociorum animos incertamque fidem id tactum,
 quod insuper sollicitaret eos: eam unius hominis teme-
 rariam vocem silentio omnium extinguendam esse; et,
 si quid unquam arcani sanctive ad silendum in curia
 fuerit, id omnium maxime tegendum, occulendum, obli-
 viscendum, pro non dicto habendum esse: ita ejus rei
 obpressa mentio est. Dictatorem, qui censor ante
 fuisset, vetustissimusque ex eis, qui viverent, censo-
 riis esset, creari placuit, qui senatum legeret: adci-
 rique C. Terentium consulem ad dictatorem dicen-
 dum jusserunt: qui, quum ex Apulia, relicto ibi*

Delibera-
tur de ex-
plendo se-
natu.

Fabius
Buteo
dictator
legendi
senatus
caussa.

præsidio, magnis itineribus Romam redisset, nocte U. C. 536.
proxima, ut mos erat, M. Fabium Buteonem ex se- A. C. 216.
natusconsulto sine magistro equitum dictatorem in
sex menses dixit.

XXIII. Is ubi cum lictoribus in Rostra ascendit, Dictatoris
neque duos dictatores tempore uno, quod numquam moderatio.
antea factum esset, probare se, dixit: neque dictato-
rem se sine magistro equitum: nec censoriam vim uni
permissam, et eidem iterum: nec dictatori, nisi rei ge-
rendæ causa creato, in sex menses datum imperium.
Quæ inmoderata fors, tempus ac necessitas fecerint, iis
se modum inpositurum: nam neque senatu quemquam
moturum ex iis, quos C. Flaminius, L. Æmilius censo-
res in senatum legissent: transcribi tantum recitarique
eos iussurum; ne penes unum hominem iudicium arbi-
triumque de fama ac moribus senatoris fuerit; et ita
in demortuorum locum sublecturam, ut crdo ordini,
non homo homini prælatus videretur. Recitato vetere
senatu, inde primos in demortuorum locum legit,
qui post L. Æmilium et C. Flaminium censores cu-
rulem magistratum cepissent, nequam in senatum
lecti essent; ut quisque eorum primus creatus erat:
tum legit, qui ædiles, tribuni plebei, questoresve fu-
erant: tum ex iis, qui magistratus non cepissent,
qui spolia ex hoste fixa domi haberent, aut civicam
coronam acceperant. Ita, centum septuaginta sep-
tem cum ingenti adprobatione hominum in senatum
lectis, extemplo se magistratu abdicavit, privatus-
que de Rostris descendit, lictoribus abire iussis: tur-
bæque se inmiscuit privatas agentium res, tempus
hoc sedulo terens, ne deducendi sui causa populum
de foro abduceret: neque tamen elanguit cura ho-
minum ea mora, frequentesque eum domum deduxe-

U. C. 536. runt. Consul nocte insequenti ad exercitum rediit,
 A. C. 216. non facto certiore senatu, ne comitiorum caussa in
 urbe retineretur.

XXIV. Postero die consultus a M'. Pomponio
 prætore senatus decrevit, dictatori scribendum, uti,
 si e republica censeret esse, ad consules subrogandos
 veniret cum magistro equitum et prætore M. Marcel-
 lo, ut ex iis præsentibus noscere Patres possent, quo
 statu respublica esset, consiliaque ex rebus caperent.
 Qui aditi erant, omnes venerunt, relictis legatis,
 qui legionibus præessent. Dictator, de se pauca ac
 modice locutus, in magistrum equitum, Ti. Sempro-
 nium Gracchum, magnam partem gloriæ vertit; co-
 mitiaque edixit, quibus L. Postumius tertium absens,
 qui tum Galliam provinciam obtinebat, et Ti. Sem-
 pronius Gracchus, qui tum magister equitum et ædi-
 lis curulis erat, consules crearentur. Prætores inde
 creati, M. Valerius Lævinus, Ap. Claudius Pulcher,
 Q. Fulvius Flaccus, Q. Mucius Scævola. Dictator,
 creatis magistratibus, Teanum in hiberna ad exerci-
 tum rediit, relicto magistro equitum Romæ: qui,
 quum post paucos dies magistratum initurus esset,
 de exercitibus scribendis comparandisque in annum
 Patres consuleret. Quum eæ res maxime agerentur,
 nova clades nunciata, aliam super aliam cumulate
 in eum annum fortuna; L. Postumium, consulem
 designatum, in Gallia ipsum atque exercitum dele-
 tos. Silva erat vasta, (Litanam Galli vocabant) qua
 exercitum traducturus erat: ejus silvæ dextra læva-
 que circa viam Galli arbores ita inciderant, ut in-
 motæ starent, momento levi impulsæ occiderent. Le-
 giones duas Romanas habebat Postumius, sociûm-
 que ab supero mari tantum conscripserat, ut viginti

L. Postu-
 mius cos.
 des. in
 Gallia
 cum ex-
 exercitu de-
 letus.

quinque millia armatorum in agros hostium induxe- U. C. 536.
 rit. Galli oram extremæ silvæ quum circumsedis- A. C. 216.
 sent, ubi intravit agmen saltum, tum extremas ar-
 borum succisarum inpellunt : quæ, alia in aliam, in-
 stabilem per se ac male hærentem, incidentes, anci-
 piti strage arma, viros, equos obruerunt, ut vix de-
 cem homines effugerent. Nam quum exanimati ple-
 rique essent arborum truncis fragmentisque ramo-
 rum, ceteram quoque multitudinem, inopinato malo
 trepidam, Galli, saltum omnem armati circumseden-
 tes, interfecerunt; paucis e tanto numero captis,
 qui, fluminis pontem petentes, obsesso ante ab hos-
 tibus ponte interclusi sunt. Ibi Postumius omni vi,
 ne caperetur, dimicans, obcubuit : spolia corporis
 caputque ducis præcisum Boii ovantes templo, quod
 sanctissimum est apud eos, intulere : purgato inde
 capite, ut mos iis est, calvam auro cælavere : idque
 sacrum vas iis erat, quo sollemnibus libarent : po-
 culumque idem sacerdoti esse, ac templi antistitibus.
 Præda quoque haud minor Gallis, quam victoria,
 fuit : nam etsi magna pars animalium strage silvæ
 obpressa erat, tamen ceteræ res, quia nihil dissipa-
 tum fuga est, stratæ per omnem jacentis agminis
 ordinem inventæ sunt.

XXV. Hac nunciata clade, quum per dies multos
 in tanto pavore fuisset civitas, ut, tabernis clausis,
 velut nocturna solitudine per urbem acta, senatus
 ædilibus negotium daret, ut urbem circumirent, ape-
 ririque tabernas, et mœstitiæ publicæ speciem urbi
 demi juberent; tum Ti. Sempronius senatum habuit,
 consolatusque Patres est, et adhortatus, *ne, qui Can-*
nensi ruinæ non subcubuissent, ad minores calamitates
animos submitterent : quod ad Karthaginienses hostes

U. C. 536. *Hannibalemque adtinet, prospera modo essent, sicut*
 A. C. 216. *speraret futura, Gallicum bellum et omitti tuto et dif-*
ferri posse: ultionemque eam fraudis in Deorum ac
populi Romani potestate fore. De hoste Pæno exerci-
tibusque, per quos id bellum gereretur, consultandum
atque agitandum. Ipse primum, quid peditum equi-
 tumque, quid civium, quid sociorum in exercitu es-
 set dictatoris, disseruit. Tum Marcellus suarum co-
 piarum summam exposuit. Quid in Apulia cum C.
 Terentio consule esset, a peritis quæsitum est: nec,
 unde consulares exercitus satis firmi ad tantum bel-
 lum efficerentur, inibatur ratio: itaque Galliam,
 quamquam stimulabat justa ira, omitti eo anno pla-
 cuit. Exercitus dictatoris consuli decretus est. De
 exercitu Marcelli, qui eorum ex fuga Cannensi es-
 sent, in Siciliam eos traduci, atque ibi militare, do-
 nec in Italia bellum esset, placuit: eodem ex dicta-
 toris legionibus rejici militem minimi quemque robo-
 ris, nullo præstituto militiæ tempore, nisi qui stipen-
 diorum legitimorum esset. Duæ legiones urbanæ al-
 teri consuli, qui in locum L. Postumii subfectus es-
 set, decretæ sunt: eumque, quum primum salvis
 auspiciis posset, creari placuit: legiones præterea
 duas primo quoque tempore ex Sicilia adciri: atque
 inde consul, cui legiones urbanæ evenissent, militum
 sumeret quantum opus esset. C. Terentio consuli
 propagari in annum imperium: neque de eo exer-
 citu, quem ad præsidium Apuliæ haberet, quidquam
 minui.

Res gestæ
 in Hispania.

XXVI. Dum hæc in Italia geruntur adparantur-
 que, nihilo segnius in Hispania bellum erat: sed ad
 eam diem magis prosperum Romanis. P. et Cn. Sci-
 pionibus inter se partitis copias, ut Cnæus terra,

Publius navibus rem gereret; Hasdrubal Pœnorum U. C. 536.
 imperator, neutri parti virium satis fidens, procul ab A. C. 216.
 hoste, intervallo ac locis tutus, tenebat se: quoad
 multum ac diu obtestanti quatuor millia peditum, et
 quingenti equites in supplementum missi ex Africa
 sunt. Tum, resecta tandem spe, castra propius hos-
 tem movit: classemque et ipse instrui pararique ju-
 bet, ad insulas maritimamque oram tutandam. In
 ipso inpetu movendarum de integro rerum, perculit
 eum præfectorum navium transitio: qui, post clas-
 sem ad Iberum per pavorem desertam graviter in-
 crepiti, numquam deinde satis fidi aut duci, aut Kar-
 thaginiensium rebus fuerant. Fecerant hi trans-
 fugæ motum in Carpesiorum gente, desciverantque
 iis auctoribus urbes aliquot: una etiam ab ipsis vi
 capta fuerat. In eam gentem versum ab Romanis
 bellum est: infestoque exercitu Hasdrubal ingressus
 agrum hostium, pro captæ ante dies paucos urbis
 mœnibus, Galbum, nobilem Carpesiorum ducem,
 cum valido exercitu castris sese tenentem, adgredi
 statuit. Præmissa igitur levi armatura, quæ eliceret
 hostes ad certamen, peditum partem ad depopulan-
 dum per agros passim dimisit, ut palantes excipe-
 rent. Simul et ad castra tumultus erat, et per agros
 fugaque et cædes; deinde undique diversis itineribus
 quum in castra se recepissent, adeo repente decessit
 animis pavor, ut non ad munimenta modo defenden-
 da satis animorum esset, sed etiam ad lacessendum
 hostem prælio. Erumpunt igitur agmine e castris,
 tripudiantes more suo; repentinaque eorum audacia
 terrorem hosti, paullo ante ultro lacessenti, incus-
 sit: itaque et ipse Hasdrubal in collem satis arduum,
 tutum flumine etiam objecto, tum copias subducit,

U. C. 536. et præmissam levem armaturam equitesque palatos
A. C. 216. eodem recipit : nec aut colli aut flumini satis fidens,
vallo castra permunit. In hoc alterno pavore certamina aliquot sunt contracta : nec Numida Hispano eques par fuit ; nec jaculator Maurus cætrato, velocitate pari, robore animi viriumque aliquantum præstanti.

XXVII. Postquam neque elicere Pœnum ad certamen obversati castris poterant, neque castrorum obpugnatio facilis erat ; urbem Ascuam, quo fines hostium ingrediens, Hasdrubal frumentum commeatusque alios convexerat, vi capiunt, omnique circa agro potiuntur : nec jam, aut in agmine, aut in castris, ullo imperio contineri. Quam ubi negligentiam ex re (ut fit) bene gesta oriri senserat Hasdrubal, cohortatus milites, ut palatos sine signis hostes adgrederentur, degressus colle, pergit ire acie instructa ad castra : quem ut adesse tumultuose nunciavere fugientes ex speculis stationibusque, ad arma conclamatum est. Ut quisque arma ceperat, sine imperio, sine signo, incompressi, inordinati in prælium ruunt. Jam primi conseruerant manus, quum alii catervatim currerent, alii nondum e castris exissent : tamen primo ipsa audacia terruere hostem : deinde, rari in confertos inlati, quum paucitas parum tuta esset, respicere alii alios, et undique pulsati coire in orbem ; et dum corporibus adplicantur, armaque armis jungunt, in artum compulsi, quum vix movendis armis satis spatii esset, corona hostium cincti, ad multum diei cæduntur. Exigua pars, eruptione facta, silvas ac montes petit : parique terrore et castra sunt deserta, et universa gens postero die in deditionem venit. Nec diu in pacato mansit : nam sub-

inde ab Karthagine adlatum est, ut Hasdrubal primo quoque tempore in Italiam exercitum duceret: quæ vulgata res per Hispaniam omnium ferme animos ad Romanos avertit. Itaque Hasdrubal exemplo literas Karthaginem mittit, indicans, quanto fama profectionis suæ damno fuisset. *Si vero inde pergeret, priusquam Iberum transiret, Romanorum Hispaniam fore. Nam, præterquam quod nec præsidium, nec ducem haberet, quem relinqueret pro se; eos imperatores esse Romanos, quibus vix æquis viribus resisti possit. Itaque si ulla Hispaniæ cura esset, successorem sibi cum valido exercitu mitterent: cui, ut omnia prospere evenirent, non tamen otiosam provinciam fore.*

U. C. 536.
A. C. 216.
Hasdrubal
jubetur du-
cere exerci-
tum in Ita-
liam.

XXVIII. Hæ literæ quamquam primo admodum moverunt senatum; tamen, quia Italiæ cura prior potiorque erat, nihil de Hasdrubale, neque de copiis ejus mutatum est. Himilco, cum exercitu justo et aucta classe, ad retinendam terra marique ac tuendam Hispaniam, est missus; qui, ut pedestres navalesque copias trajecit, castris communitis, navibusque subductis et vallo circumdatis, cum equitibus delectis ipse, quantum maxime adcelerare poterat, per dubios infestosque populos juxta intentus ad Hasdrubalem pervenit. Quum decreta senatus mandataque exposuisset, atque edidicisset ipse in vicem, quemadmodum tractandum bellum in Hispania foret, retro in sua castra rediit; nulla re, quam celeritate, tutior, quod undique abierat, antequam consentirent. Hasdrubal, priusquam moveret castra, pecunias imperat populis omnibus suæ ditio- nis, satis gnarus, Hannibalem transitus quosdam pretio mercatum: nec auxilia Gallica aliter, quam

Himilco
mittitur in
Hispaniam.

Hasdrubal
in Italiam
ire parat.

U. C. 536. **conducta, habuisse ; inopem, tantum iter ingressum,**
 A. C. 216. **vix penetraturum ad Alpes fuisse : pecuniis igitur**
raptim exactis, ad Iberum descendit. Decreta Kar-
thaginiensium et Hasdrubalis iter ubi ad Romanos
sunt perlata, omnibus omissis rebus, ambo duces,
junctis copiis, ire obviam cœptis atque obsistere pa-
rânt ; rati si Hannibali, vix per se ipsi tolerando
Italiæ hosti, Hasdrubal dux atque Hispaniensis ex-
ercitus esset junctus, illum Romani finem imperii
fore. His anxii curis ad Iberum contrahunt copias ;
et, transito amne, quum diu consultassent, utrum
castra castris conferrent, an satis haberent, sociis
Karthaginiensium obpugnandis, morari ab itinere
proposito hostem, urbem a propinquo flumine Ibe-
ram adpellatam, opulentissimam ea tempestate re-
gionis ejus, obpugnare parant : quod ubi sensit
Hasdrubal, pro ope ferenda sociis, pergit ipse ire ad
urbem, deditam nuper in fidem Romanorum, obpug-
namdam : ita jam cœpta obsidio omissa ab Romanis
est, et in ipsum Hasdrubalem versum bellum.

Scipiones
ei obviam
eunt.

XXIX. Quinque millium intervallo castra distan-
 tia habuere paucos dies : nec sine levibus præliis,
 nec ut in aciem exirent : tandem uno eodemque die
 velut ex composito utrimque signum pugnae propo-
 situm est, atque omnibus copiis in campum descen-
 sum. Triplex stetit Romana acies : velitum pars
 inter antesignanos locata, pars post signa accepta,
 equites cornua cinxere. Hasdrubal mediam aciem
 Hispanis firmat : in cornibus, dextro Pœnos locat,
 lævo Afros mercenariorumque auxilia : equitum Nu-
 midas Pœnorum peditibus, ceteros Afris pro corni-
 bus obponit : nec omnes Numidæ in dextro locati
 cornu, sed quibus, desultorum in modum, binos tra-

Pugna in-
ter Scipio-
nes et
Hasdru-
balem.

hentibus equos inter acerrimam sæpe pugnam in re- U. C. 536.
centem equum ex fesso armatis transsultare mos A. C. 216.
erat: tanta velocitas ipsis, tamque docile equorum
genus est. Quum hoc modo instructi starent, im-
peratorum utriusque partis haud ferme dispares spes
erant: nam ne multum quidem, aut numero, aut
genere militum, hi aut illi præstabant. Militibus
longe dispar animus erat. Romanis enim, quam-
quam procul a patria pugnarent, facile persuaserant
duces, pro Italia atque urbe Romana eos pugnare:
itaque, velut quibus reditus in patriam eo discrimine
pugnæ verteretur, obstinaverant animis, vincere aut
mori. Minus pertinaces viros habebat altera acies:
nam maxima pars Hispani erant: qui vinci in His-
pania, quam victores in Italiam trahi, malebant.
Primo igitur concursu, quum vix pila coniecta es-
sent, retulit pedem media acies, inferentibusque sese
magno inpetu Romanis terga vertit. Nihilo segnius
in cornibus prælium fuit: hinc Pœnus, hinc Afer
urget: et velut in circumventos prælio ancipiti pug-
nant. Sed quum in medium tota jam coisset Ro-
mana acies, satis virium ad dimovenda hostium cor-
nua habuit: itaque duo diversa prælia erant: utro-
que Romani, ut qui, pulsus tandem mediis, et numero ^{Vincunt}
et robore virorum præstarent, haud dubie supera- ^{Romani.}
runt. Magna vis hominum ibi occisa: et, nisi His-
pani vixdum conserto prælio tam effuse fugissent,
perpauci ex tota superfuissent acie. Equestris pug-
na nulla admodum fuit: quia, simul inclinatam me-
diam aciem Mauri Numidæque viderunt, extemplo
fuga effusa nuda cornua, elephantis quoque præ se
actis, deseruere. Et Hasdrubal, usque ad ultimum
eventum pugnæ moratus, e media cæde cum paucis

U. C. 536. effugit. Castra Romani cepere, atque diripuerunt. Ea
 A. C. 216. pugna, si qua dubia in Hispania erant, Romanis ad-
 junxit: Hasdrubalique non modo in Italiam tradu-
 cendi exercitus, sed ne manendi quidem satis tuto
 in Hispania, spem reliquit. Quæ postquam literis
 Scipionum Romæ vulgata sunt, non tam victoria,
 quam prohibito Hasdrubalis in Italiam transitu, læ-
 tabantur.

Petelia in XXX. Dum hæc in Hispania geruntur, Petelia
 Bruttii ab in Bruttii, aliquot post mensibus, quam cœpta ob-
 Himilcone pugnari erat, ab Himilcone, præfecto Hannibalis,
 capta. expugnata est. Multo sanguine ac vulneribus ea
 Pœnis victoria stetit: nec ulla magis vis obsessos,
 quam fames, expugnavit: absumentis enim frugum
 alimentis, carnisque omnis generis quadrupedum;
 sutrinæ postremo coriis, herbisque et radicibus, et
 corticibus teneris, strictisque rubis vivere; nec, an-
 tequam vires ad standum in muris ferendaque arma
 deerant, expugnati sunt. Recepta Petelia, Pœnus
 ad Consentiam copias traducit: quam, minus per-
 tinaciter defensam, intra paucos dies in deditionem
 accepit. Iisdem ferme diebus et Bruttiorum exer-
 citus Crotonem, Græcam urbem, circumscedit, opu-
 lentam quondam armis virisque, tum jam adeo mul-
 tis magnisque cladibus afflictam, ut omnis ætatis
 minus viginti millia civium superessent: itaque urbe
 a defensoribus vasta facile potiti sunt hostes: arx
 tantum retenta, in quam inter tumultum captæ ur-
 bis e media cæde quidam effugere. Et Locrenses
 descivere ad Bruttios Pœnosque, prodita multitu-
 dine a principibus. Rhegini tantummodo regionis
 ejus, et in fide erga Romanos, et potestatis suæ ad
 ultimum manserunt. In Siciliam quoque eadem in-

Croto ca-
 pitur a
 Bruttiiis.

clinatio animorum pervenit: et ne domus quidem Hieronis tota ab defectione abstinuit: namque Gelo maximus stirpis, contempta simul senectute patris, simul post Cannensem cladem Romana societate, ad Pœnos defecit: movissetque in Sicilia res, nisi mors adeo opportuna, ut patrem quoque suspicione adspergeret, armantem eum multitudinem, sollicitantemque socios absumsisset. Hæc eo anno in Italia, in Africa, in Sicilia, in Hispania vario eventu acta. Exitu anni Q. Fabius Maximus a senatu postulavit, ut ædem Veneris Erycinæ, quam dictator vovisset, dedicare liceret. Senatus decrevit, ut Ti. Sempronius consul designatus, quum primum honorem inisset, ad populum ferret, ut Q. Fabium duumvirum esse juberent ædis dedicandæ caussa. Et M. Æmilio Lepido, qui bis consul augurque fuerat, filii tres, Lucius, Marcus, Quintus, ludos funebres per triduum, et gladiatorum paria duo et viginti per triduum in foro dederunt. Ædiles curules C. Lætorius, et Ti. Sempronius Gracchus, consul designatus, qui in ædilitate magister equitum fuerat, ludos Romanos fecerunt, qui per triduum instaurati sunt. Plebei ludi ædilium M. Aurelii Cottæ et M. Claudii Marcelli ter instaurati. Circumacto tertio anno Punici belli, Ti. Sempronius consul Idibus Martiis magistratum iniit. Prætores Q. Fulvius Flaccus, qui antea consul censorque fuerat, urbanam; M. Valerius Lævinus peregrinam sortem in jurisdictione habuit. Ap. Claudius Pulcher Siciliam, Q. Mucius Scævola Sardiniam sortiti sunt. M. Marcello pro consule imperium esse populus jussit, quod post Cannensem cladem unus Romanorum imperatorum in Italia prospere rem gessisset.

U. C. 536.

A. C. 216.

Gelo filius

Hieronis

deficit ad

Pœnos.

Moritur.

M. Æmilii

ludi funebres.

U. C. 537.

A. C. 215.

U. C. 537. XXXI. Senatus, quo die primum est in Capitolio
 A. C. 215. consultus, decrevit, ut, quo eo anno duplex tributum
 Duplex tributum imperaretur, simplex confestim exigeretur, ex quo
 imperatum. stipendium præsens omnibus militibus daretur, præ-
 terquam qui milites ad Cannas fuissent. De exerci-
 tibus ita decreverunt, ut duabus legionibus urbanis
 Ti. Sempronius consul Cales ad conveniendum diem
 ediceret : inde sex legiones in castra Claudiana su-
 pra Suessulam deducerentur : quæ ibi legiones essent,
 (erant autem Cannensis maxime exercitus) eas Ap.
 Decreta de exerci- Claudius Pulcher prætor in Siciliam trajiceret ; quæ-
 tibus. que in Sicilia essent, Romam deportarentur. Ad
 exercitum, cui ad conveniendum Cales edicta dies
 erat, M. Claudius Marcellus missus : isque jussus
 in castra Claudiana deducere urbanas legiones. Ad
 veterem exercitum accipiendum deducendumque inde
 in Siciliam, T. Metilius Croto legatus ab Ap. Clau-
 dio est missus. Taciti primo exspectaverant homi-
 nes, uti consul comitia collegæ creando haberet :
 deinde, ubi ablegatum, velut de industria, M. Mar-
 cellum viderunt, quem maxime consulem in eum an-
 num ob egregie in prætura res gestas creari vole-
 bant, fremitus in curia est ortus. Quod ubi sensit
 consul, *Utrumque, inquit, e republica fuit, Patres*
conscripti, et M. Claudium ad permutandos exercitus
in Campaniam proficisci, et comitia non prius edici,
quam is inde, confecto, quod mandatum est, negotio,
revertisset ; ut vos consulem, quem tempus reipublicæ
postularet, quem maxime vultis, haberetis. Ita de
 comitiis, donec rediit Marcellus, silentium fuit. In-
 terea dumviri creati sunt Q. Fabius Maximus et T.
 Otacilius Crassus, ædibus dedicandis, Menti Otaci-
 lius, Fabius Veneri Erycinæ. Utraque in Capitolio

est, canali uno discretæ. Et de trecentis equitibus U. C. 537.
A. C. 215. Campanis, qui, in Sicilia cum fide stipendiis emeritis, Romam venerant, dein latum ad populum, ut cives Romani essent: item, uti municipes Cumani essent, pridie quam populus Campanus a populo Romano defecisset. Maxime, ut hoc ferretur, moverat, quod, quorum hominum essent, scire se ipsi negabant; vetere patria relicta, in eam, in quam redierant, nondum adsciti. Postquam Marcellus ab exercitu rediit, comitia uni consuli rogando in locum L. Postumii edicuntur. Creatur ingenti consensu Mar- Marcellus
in locum
Postumii
cos. crea-
tur. cellus, qui extemplo magistratum occiperet: cui ineunti consulatum quum tonuisset, vocati augures vitio creatum videri pronunciaverunt; vulgoque Patres ita fama ferebant, quod tum primum duo plebei Se abdicat. consules facti essent, id Deis cordi non esse. In locum Marcelli, ubi is se magistratu abdicavit, subfectus Fabius Maximus tertium. Mare arsit eo an- Ei subfi-
citur Fa-
bius Maxi-
mus ter-
tium. no: ad Sinuessam bos equuleum peperit: signa Lanuvii ad Junonis Sospitæ cruore manavere, lapidibusque circa id templum pluit: ob quem imbrem novemdiale, ut adsolet, sacrum fuit: ceteraque pro- Prodigia. digia cum cura expiata.

XXXII. Consules exercitus inter sese diviserunt. Fabio exercitus, cui M. Junius dictator præfuerat, evenit; Sempronio volones, qui fierent, et sociorum viginti quinque millia; M. Valerio prætori legiones, quæ ex Sicilia redissent, decretæ; M. Claudius proconsul ad eum exercitum, qui supra Suessulam Nolæ præsideret, missus. Prætores in Siciliam ac Sardiniam profecti. Consules edixerunt, quoties in senatum vocassent, uti senatores, quibusque in senatu dicere sententiam liceret, ad portam Capenam con-

U. C. 537. venirent. Prætores, quorum jurisdictio erat, tribu-
 A. C. 215. nalia ad Piscinam publicam posuerunt: eo vadimonia fieri jusserunt: ibique eo anno jus dictum est. Interim Karthaginem, unde Mago frater Hannibalis duodecim millia peditum, et mille quingentos equites, viginti elephantos, mille argenti talenta in Italiam transmissurus erat, cum præsidio sexaginta navium longarum, nuncius adfertur, in Hispania rem male gestam, omnesque ferme ejus provinciæ populos ad Romanos defecisse. Erant, qui Magonem cum classe ea copiisque, omissa Italia, in Hispaniam averterent; quum Sardinia recipiendæ repentina spes adfulsit. *Parvum ibi exercitum Romanum esse: veterem prætorem inde A. Cornelium provinciæ peritum decedere, novum expectari. Ad hoc, fessos jam animos Sardorum esse diuturnitate imperii: et proximo iis anno acerbe atque avare imperatum. Gravi tributo et conlatione iniqua frumenti pressos: nihil deesse aliud, quam auctorem, ad quem deficerent.* Hæc clandestina legatio per principes missa erat; maxime eam rem moliente Hampsicora, qui tum auctoritate atque opibus longe primus erat. His nunciis prope uno tempore turbati, erectique, Magonem cum classe sua copiisque in Hispaniam mittunt: in Sardiniam Hasdrubalem deligunt ducem: et tantum ferme copiarum, quantum Magoni, decernunt. Et Romæ consules, transactis rebus, quæ in urbe agendæ erant, movebant jam sese ad bellum. Ti. Sempronius militibus Sinuessam diem ad conveniendum edixit; et Q. Fabius, consulto prius senatu, ut frumenta omnes ex agris, ante Kalendas Junias primas, in urbes munias conveherent. *Qui non invexisset, ejus se agrum populaturum, servos sub hasta venditurum, villas in-*

Vocantur
 Poeni in
 Sardiniam
 ab Hamp-
 sicora.

censurum. Ne prætoribus quidem, qui ad jus dicen-
 dum creati erant, vacatio ab belli administratione
 data est. Valerium prætorem in Apuliam ire pla-
 cuit, ad exercitum a Terentio accipiendum: quum
 ex Sicilia legiones venissent, iis potissimum uti ad
 regionis ejus præsidium: Terentianum mitti cum
 aliquo legatorum. Et viginti quinque naves M. Va-
 lerio datæ sunt, quibus oram maritimam inter Brun-
 disium ac Tarentum tutari posset. Par navium nu-
 merus Q. Fulvio prætori urbano decretus ad subur-
 bana litora tutanda. C. Terentio proconsuli nego-
 tium datum, ut in Piceno agro conquisitionem mili-
 tum haberet, locisque iis præsidio esset. Et T. Ota-
 cilius Crassus, postquam ædem Mentis in Capitolio
 dedicavit, in Siciliam cum imperio, qui classi præ-
 esset, missus.

XXXIII. In hanc dimicationem duorum opulen-
 tissimorum in terris populorum omnes reges gentes-
 que animos intenderant: inter quos Philippus Ma-
 cedonum rex, eo magis, quod propior Italiæ, ac ma-
 ri tantum Ionio discretus erat. Is ubi primum fama
 accepit, Hannibalem Alpes transgressum, ut bello
 inter Romanos Pœnumque orto lætatus erat, ita,
 utrius populi mallet victoriam esse, incertis adhuc
 viribus, fluctuatus animo fuerat. Postquam tertia
 jam pugna, tertia victoria cum Pœnis erat, ad for-
 tunam inclinavit, legatosque ad Hannibalem misit:
 qui, vitantes portus Brundisium Tarentinumque,
 quia custodiis navium Romanarum tenebantur, ad
 Lacinia Junonis templum in terram egressi sunt.
 Inde per Apuliam petentes Capuam, media in præ-
 sidia Romana inlati sunt: deductique ad M. Vale-
 rium Lævinum prætorem, circa Nuceriam castra ha-

U. C. 537.
 A. C. 215.

Philippus
 rex Maced.
 legatos mit-
 tit ad Hun-
 nibalem.

U. C. 537. bentem. Ibi intrepide Xenophanes legationis prin-
 A. C. 215. ceps, a Philippo rege se missum, ait, ad amicitiam
 societatemque jungendam cum populo Romano;
 mandata habere ad consules ac senatum populumque
 Romanum. Inter defectiones veterum sociorum,
 Valerius, nova societate tam clari regis lætus admo-
 dum, hostes pro hospitibus comiter accepit: dat,
 qui prosequantur, itinera cum cura demonstrant,
 quæ loca, quosque saltus, aut Romanus, aut hostes
 teneant. Xenophanes per præsidia Romana in Cam-
 paniam, inde, qua proximum fuit, in castra Hanni-
 balis pervenit, fœdusque cum eo atque amicitiam
 junxit legibus his: *ut Philippus rex quam maxima
 classe (ducentas autem naves videbatur effecturus) in
 Italiam trajiceret, et vastaret maritimam oram: bel-
 lum pro parte sua terra marique gereret: ubi debella-
 tum esset, Italia omnis cum ipsa urbe Roma Kartha-
 giniensium atque Hannibalis esset, prædaque omnis
 Hannibali cederet. Perdomita Italia, navigarent in
 Græciam, bellumque, cum quibus regibus placeret,
 gererent: quæ civitates continentis, quæ insulæ ad
 Mædoniam vergunt, eæ Philippi regnique ejus es-
 sent.*

Legati
 Pœno-
 rum ad
 Philip-
 pum.

XXXIV. In has ferme leges inter Pœnum ducem
 legatosque Macedonum ictum fœdus, missique cum
 iis ad regis ipsius firmandam fidem legati, Gisgo, et
 Bostar, et Mago, eodem ad Junonis Laciniæ, ubi
 navis occulta in statione erat, perveniunt: inde pro-
 fecti, quum jam altum tenerent, conspecti a classe
 Romana sunt, quæ præsidio erat Calabriae litoribus.

Capiuntur
 a Roma-
 nis.

P. Valerius Flaccus cercuros ad persequendam retra-
 hendamque navem quum misisset, primo fugere
 regii conati: deinde, ubi celeritate vinci senserunt,

tradunt se Romanis, et ad præfectum classis ad-
 ducti: quum quæreret, *qui, et unde, et quo tenderent cursum?* Xenophanes primo, satis jam semel
 felix, mendacium struere, *a Philippo se ad Romanos*
missum, ad M. Valerium, ad quem unum iter tutum
fuerit, pervenisse. Campaniam superare nequisse, sep-
tam hostium præidiis. Deinde, ut Punicus cultus
 habitusque suspectos legatos fecit Hannibalis, in-
 terrogatosque sermo prodidit: tum comitibus eorum
 seductis, ac metu territis, literæ quoque ab Hanni-
 bale ad Philippum inventæ, et pacta inter regem
 Macedonum Pœnumque ducem. Quibus satis cog-
 nitis, optimum visum est, captivos comitesque eo-
 rum Romam ad senatum, aut ad consules, ubicum-
 que essent, quam primum deportare: ad id celerri-
 mæ quinque naves delectæ, ac L. Valerius Antias,
 qui præesset, missus: eique mandatum, ut in om-
 nes naves legatos separatim custodiendos divideret,
 daretque operam, ne quod iis colloquium inter se,
 neve quæ communicatio consilii esset. Per idem
 tempus Romæ quum A. Cornelius Mammula, ex
 Sardinia provincia decedens, retulisset, qui status
 rerum in insula esset, bellum ac defectionem omnes
 spectare; Q. Mucium, qui successisset sibi, gravitate
 cœli aquarumque advenientem exceptum, non tam
 in periculosum, quam longum, morbum implicitum,
 diu ad belli vim sustinendam inutilem fore, exerci-
 tumque ibi ut satis firmum pacatæ provinciæ præsi-
 dio esse, ita parum bello, quod motum iri videretur:
 decreverunt Patres, ut Q. Fulvius Flaccus quinque
 millia peditum, quadringentos equites scriberet, eam-
 que legionem primo quoque tempore in Sardiniam
 trajiciendam curaret, mitteretque cum imperio, quem

U. C. 537.

A. C. 215.

Sardinia
status.

U. C. 537. ipsi videretur, qui rem gereret, quoad Mucius con-
 A. C. 215. valuisset. Ad eam rem missus est T. Manlius Tor-
 quatus, qui bis consul censorque fuerat, subegerat-
 que in consulatu Sardos. Sub idem fere tempus et
 a Karthagine in Sardiniam classis missa, duce Has-
 drubale, cui Calvo cognomen erat, fœda tempestate
 vexata, ad Baliares insulas dejicitur : ibique (adeo
 non armamenta modo, sed etiam alvei navium quas-
 sati erant) subductæ naves dum reficiuntur, ali-
 quantum temporis triverunt.

Campanorum
 molitiones in
 Cumanos.

XXXV. In Italia quum post Cannensem pug-
 nam, fractis partis alterius viribus, alterius mollitis
 animis, segnius bellum esset : Campani per se adorti
 sunt rem Cumanam suæ ditionis facere ; primo sol-
 licitantes, ut ab Romanis deficerent : ubi id parum
 processit, dolum ad capiendos eos comparant. Cam-
 panis omnibus statum sacrificium ad Hannas : eo se-
 natum Campanum venturum certiores Cumanos fe-
 cerunt : petieruntque, ut et Cumanus eo senatus ve-
 niret ad consultandum communiter, ut eosdem uter-
 que populus socios hostesque haberet : præsidium
 ibi armatum sese habituros, ne quid ab Romano
 Pœnove periculi esset. Cumani (quamquam suspecta
 fraus erat) nihil abnuere ; ita tegi fallax consilium
 posse rati. Interim Ti. Sempronius consul Ro-
 manus Sinuessæ, quo ad conveniendum diem edix-
 erat, exercitu lustrato, transgressus Vulturnum flu-
 men, circa Linternum castra posuit. Ibi, quia otiosa
 stativa erant, crebro decurrere milites cogebat, ut
 tirones (ea maxima pars volonum erat) adsuescerent
 signa sequi, et in acie agnoscere ordines suos : inter
 quæ maxima inerat cura duci, itaque legatis tribu-
 nisque præceperat, *ne qua exprobratio cuiquam veteris*

fortuna discordiam inter ordines sereret: vetus miles U. C. 537.
tironi, liber voloni sese exæquari sineret: omnes satis A. C. 215.
honestos generososque ducerent, quibus arma sua signa-
que populus Romanus commisisset: quæ fortuna coegis-
set ita fieri, eamdem cogere tueri factum. Ea non ma-
jore cura præcepta ab ducibus sunt, quam a militi-
bus observata; brevique tanta concordia coaluerant
omnium animi, ut prope in oblivionem veniret, qua
ex conditione quisque esset miles factus. Hæc agenti
Graccho legati Cumanî nunciarunt, quæ a Campa-
nîs legatio paucos ante dies venisset, et quid iis ipsi
respondissent. Triduum post eum diem festum esse:
non senatum solum omnem ibi futurum, sed castra
etiam et exercitum Campanum. Gracchus, jussis
Cumanîs omnia ex agris in urbem convehere, et ma-
nere intra muros, ipse pridie, quam statum sacrifici-
um Campanis esset, Cumas movet castra. Hamæ
inde tria millia passuum absunt. Jam Campani eo
frequentes ex composito convenerant, nec procul
inde in occulto Marius Alfius Medixtuticus (sum-
mus magistratus erat Campanis) cum quatuordecim
millibus armatorum habebat castra; sacrificio ad-
parando, et inter id instruendæ fraudi aliquanto in-
tentior, quam muniendis castris, aut ulli militari
operi. Triduum sacrificatum ad Hamas. Noctur-
num erat sacrum, ita ut ante mediam noctem com-
pleretur. Huic Gracchus insidiandum tempori ra-
tus, custodibus ad portas positis, ne quis enunciare
posset cœpta, et ab decima diei hora coactis militi-
bus corpora curare, somnoque operam dare, ut pri-
mis tenebris convenire ad signum possent, vigilia
ferme prima tolli jussit signa; silentique profectus
agmine, quum ad Hamas media nocte pervenisset,

U. C. 537. castra Campana, ut in pervigilio neglecta, simul
 A. C. 215. omnibus portis invadit: alios somno stratos, alios
 Castra Campana perpetrato sacro inermes redeuntes obtruncat: ho-
 invadit minum eo tumultu nocturno cæsa plus duo millia,
 Grac- cum ipso duce Mario Alfo: capta sunt signa mili-
 chus. taria quatuor et triginta.

XXXVI. Gracchus, minus centum militum jactu-
 ra castris hostium potitus, Cumas se propere rece-
 pit, ab Hannibale metuens, qui super Capuam in
 Tifatis habebat castra. Nec eum provida futuri fe-
 fellit opinio: nam simul Capuam ea clades est nun-
 ciata, ratus Hannibal, ab re bene gesta insolenter
 lætum exercitum tironum, magna ex parte, servo-
 rumque, spoliante[m] victos, prædasque agentem, ad
 Hamas se inventurum; citatum agmen præter Ca-
 puam rapit, obviosque ex fuga Campanorum dato
 præsidio Capuam duci, saucios vehiculis portari ju-
 bet: ipse Hamis vacua ab hostibus castra, nec quid-
 quam præter recentis vestigia cædis, strataque pas-
 sim corpora sociorum invenit. Auctores erant qui-
 dam, ut protinus inde Cumas duceret, urbemque ob-
 pugnaret. Id quamquam haud modice Hannibal
 cupiebat, ut, quia Neapolim non potuerat, Cumas
 saltem, maritimam urbem, haberet; tamen, quia
 præter arma nihil secum miles, raptim acto agmine,
 extulerat, retro in castra supra Tifata se recepit:
 inde, fatigatus Campanorum precibus, sequenti die
 cum omni adparatu obpugnandæ urbis Cumas rediit:
 perpopulatoque agro Cumano, mille passus ab urbe
 castra locat; quum Gracchus magis verecundia in
 tali necessitate deserendi socios, inplorantes fidem
 suam populique Romani, substitisset, quam satis
 fidens exercitui. Nec alter consul Fabius, qui ad

Cales castra habebat, Vulturnum flumen traducere U. C. 537.
 audebat exercitum; occupatus primo auspiciis repe- A. C. 215.
 tendis, dein prodigiis, quæ alia super alia nuncia- Defendit
 bantur, expiantique ea haud facile litari aruspices Cumas
 respondebant. Gracchus.

XXXVII. Hæ caussæ quum Fabium tenerent,
 Sempronius in obsidione erat; et jam operibus ob-
 pugnabatur: adversus ligneam ingentem admotam
 urbi, aliam turrem ex ipso muro excitavit consul
 Romanus, aliquanto altiore: quia muro satis per
 se alto subjectis validis sublicis pro solo usus erat:
 inde primum saxis, sudibusque, et ceteris missilibus
 propugnatores mœnia atque urbem tuebantur: post-
 remo, ubi promovendo adjunctam muro viderunt
 turrem, facibus ardentibus plurimum simul ignem
 conjecerunt: quo incendio trepida armatorum mul-
 tudo quum de turre sese præcipitaret, eruptio ex Eruptio
 oppido simul duabus portis stationes hostium fudit, Gracchj.
 fugavitque in castra; ut eo die obsessio, quam obsi-
 denti, similior esset Pœnus. Ad mille trecenti Kar-
 thaginiensium cæsi, et undesexaginta vivi capti;
 qui, circa muros et in stationibus solute ac negli-
 genter agentes, quum nihil minus, quam eruptionem,
 timuissent, ex inproviso obpressi fuerant. Gracchus,
 priusquam se hostes ab repentino pavore conlige-
 rent, receptui signum dedit ac suos intra muros re-
 cepit. Postero die Hannibal, lætum secunda re Recedit a
 consulem justo prælio ratus certaturum, aciem inter Cumis
 castra atque urbem instruxit: ceterum postquam Hannibal.
 neminem moveri ab solita custodia urbis vidit, nec
 committi quidquam temerariæ spei, ad Tifata redit
 infecta re. Quibus diebus Cumæ liberatæ sunt ob-
 sidione, iisdem diebus et in Lucanis ad Grumentum

U. C. 537. A. C. 215. Ti. Sempronius, cui Longo cognomen erat, cum Hannone Pœno prospere pugnat. Supra duo milia hostium occidit, et ducentos octoginta milites amisit: signa militaria ad quadraginta unum cepit. Pulsus finibus Lucanis Hanno retro in Bruttios sese recepit. Et ex Hirpinis oppida tria, quæ a populo Romano defecerant, vi recepta per M. Valerium prætorem. Vercellius Siciliusque, auctores defectionis, securi percussi: supra mille captivorum sub hasta venierunt: præda alia militi concessa, exercitus Luceriam reductus.

XXXVIII. Dum hæc in Lucanis atque in Hirpinis geruntur, quinque naves, quæ Macedonum atque Pœnorum captos legatos Romam portabant, ab supero mari ad inferum circumvectæ prope omnem Italiæ oram, quum præter Cumas velis ferrentur, neque, hostium an sociorum essent, satis sciretur, Gracchus obviam ex classe sua naves misit. Quum percunctando in vicem cognitum esset, consulem Cumis esse; naves Cumas adpulsa, captivique ad consulem deducti, et literæ datæ. Consul, literis Philippi atque Hannibalis perlectis, consignata omnia ad senatum itinere terrestri misit: navibus de-
vehi legatos jussit. Quum eodem fere die literæ legatiquæ Romam venissent, et, percunctatione facta, dicta cum scriptis congruerent, primo gravis cura Patres incessit, cernentes, quanta vix tolerantibus Punicum bellum Macedonici belli moles instaret: cui tamen adeo non subcubuerunt, ut extemplo agitarietur, quemadmodum ultro inferendo bello averterent ab Italia hostem. Captivis in vincula conditis, comitibusque eorum sub hasta venditis, ad naves viginti quinque, quibus P. Valerius Flaccus

Legati
Philippi
et Hanni-
balis
Romam
ducuntur.

præfectus præerat, viginti paratas alias decernunt. U. C. 537.
 His comparatis deductisque, et additis quinque na- A. C. 215.
 vibus, quæ advexerant captivos legatos, triginta
 naves ab Ostia Tarentum profectæ: jussusque P.
 Valerius, militibus Varronianis, quibus L. Apustius
 legatus Tarenti præerat, in naves inpositis, quinquaginta navium classe non tueri modo Italiæ oram, sed
 explorare de Macedonico bello: si congruentia literis legatorumque indiciis Philippi consilia essent,
 ut M. Valerium prætorem literis certiolem faceret: isque, L. Apustio legato exercitui præposito, Tarentum ad classem profectus, primo quoque tempore in
 Macedoniam transmitteret: daretque operam, ut Philippum in regno contineret. Pecunia ad classem tuendam bellumque Macedonicum ea decreta
 est, quæ Ap. Claudio in Siciliam missa erat, ut redderetur Hieroni regi: ea per L. Apustium legatum
 Tarentum est devecta: simul ab Hierone missa ducenta millia modium tritici, et hordei centum.

XXXIX. Dum hæc Romani parant aguntque, ad Alteram legationem mittit Philippus ad Hannibalem.
 Philippum captiva navis, una ex iis, quæ Romam
 missæ erant, ex cursu refugit: inde scitum, legatos cum literis captos. Itaque ignarus de iis, quæ cum
 Hannibale legatis suis convenissent, quæque legati ejus ad se adlaturi fuissent, legationem aliam cum
 eisdem mandatis mittit. Legati ad Hannibalem missi, Heraclitus, cui Scotino cognomen erat, et
 Crito Berœæus, et Sositheus Magnes. Hi prospere tulerunt ac retulerunt mandata: sed prius se æstas
 circumegit, quam movere ac moliri quidquam rex posset: tantum navis una capta cum legatis momenti fecit, ad dilationem imminentis Romanis belli. Et circa Capuam, transgresso Vulturnum Fabio

U. C. 597. post expiata tandem prodigia, ambo consules rem
 A. C. 215. gerebant. Compulteriam, et Trebulam, et Saticulam, urbes, quæ ad Pœnum defecerant, Fabius cepit; præsidiaque in iis Hannibalis, Campanique permulti capti. Et Nolæ, sicut priore anno, senatus Romanorum, plebs Hannibalis erat: consiliaque occulta de cæde principum et proditione urbis inibantur. Quibus ne incepta procederent, inter Capuam castraque Hannibalis, quæ in Tifatis erant, traducto exercitu, Fabius super Vesuvium in castris Claudianis consedit; inde M. Marcellum proconsulem cum iis copiis, quas habebat, Nolam in præsidium misit.

Res in
 Sardinia
 gestæ.

XL. Et in Sardinia res per T. Manlium prætorem administrari cœptæ, quæ omissæ erant, postquam Q. Mucius prætor gravi morbo est implicitus. Manlius, navibus longis ad Carales subductis, navibusque sociis armatis, ut terra rem gereret, et a prætore exercitu accepto, duo et viginti millia peditum, mille et ducentos equites confecit. Cum his equitum peditumque copiis profectus in agrum hostium, haud procul ab Hampsicoræ castris castra posuit. Hampsicora tum forte profectus erat in Pellitos Sardos, ad juventutem armandam, qua copias augeret. Filius ejus, nomine Hiostus, castris præerat: is, adolescentia ferox, temere prælio inito fusus fugatusque: ad tria millia Sardorum eo prælio cæsa, octingenti ferme vivi capti. Alius exercitus primo per agros silvasque fuga palatus; dein, quo ducem fugisse fama erat, ad urbem nomine Cornum, caput ejus regionis, confugit: debellatumque eo prælio in Sardinia esset, ni classis Punica cum duce Hasdrubale, quæ tempestate dejecta ad Balia-

res erat, in tempore ad spem rebellandi advenisset. U. C. 537.
A. C. 215.

Manlius post famam adpulsaë Punicæ classis, Carales se recepit: ea occasio Hampsicoræ data Pœno se jungendi. Hasdrubal, copiis in terram expositis, et classe remissa Karthaginem, duce Hampsicora ad sociorum populi Romani agrum populandum profectus, Carales perventurus erat, ni Manlius obvio exercitu ab effusa eum populatione continuisset. Primo castra castris modico intervallo sunt objecta, deinde procursationes leviaeque certamina vario eventu inita: postremo descensum in aciem, signisque conlatis, justo prælio per quatuor horas pugnatum.

Diu pugnam ancipitem Pœni, Sardis facile vinci ad- Prælium
quo supe-
riores Ro-
mani.
suetis, fecerunt: postremo et ipsi, quum omnia cir-
ca strage ac fuga Sardorum repleta essent, fusi: ce-
terum terga dantes, circumducto cornu, quo pepu-
lerat Sardos, inclusit Romanus: cædes inde magis,
quam pugna, fuit. Duodecim millia hostium cæsa
Sardorum simul Pœnorumque, ferme tria millia et
septingenti capti, et signa militaria septem et vi-
ginti.

XLI. Ante omnia claram et memorabilem pugnam fecit Hasdrubal imperator captus, et Hanno, et Mago, nobiles Karthaginienses. Mago ex gente Barcina, propinqua cognatione Hannibali junctus: Hanno auctor rebellionis Sardis; bellicque ejus haud dubie concitor. Nec Sardorum duces minus nobilem eam pugnam cladibus suis fecerunt: nam et filius Hampsicoræ Hiostus in acie cecidit: et Hampsicora, cum paucis equitibus fugiens, ut super afflictas res necem quoque filii audivit, nocte, ne ejus interventus cœpta impediret, mortem sibi conscivit. Ceteris urbs Cornus eadem, quæ ante, fugæ

U. C. 537. receptaculum fuit: quam Manlius, victore exercitu
 A. C. 215. adgressus, intra paucos dies recepit. Deinde aliæ
 quoque civitates, quæ ad Hampsicoram Pœnosque
 defecerant, obsidibus datis, dediderunt sese: quibus
 stipendio frumentoque imperato, pro cuiusque aut
 viribus aut delicto, Carales exercitum reduxit. Ibi

Perdomita Sardinia. navibus longis deductis, inpositoque, quem secum
 advexerat, milite, Romam navigat, Sardiniamque
 perdomitam nunciat Patribus: et stipendium quæ-
 storibus, frumentum ædilibus, captivosque Fulvio
 prætori tradidit. Per idem tempus T. Otacilius præ-
 tor, quinquaginta navium ab Lilybæo classe in Afri-
 cam transvectus, depopulatusque agrum Karthagi-
 niensem, quum Sardiniam inde peteret, quo fama
 erat Hasdrubalem a Baliaribus nuper trajecisse, clas-
 si Africam repetenti obcurrit, levique certamine in
 alto commisso, septem inde naves cum sociis nava-
 libus cepit: ceteras metus haud secus, quam tem-
 pestas, passim disjecit. Per eosdem forte dies et
 Bomilcar cum militibus, ad supplementum Kartha-
 gine missis, elephantisque, et commeatu, Locros ac-
 cessit: quem ut incautum obprimeret Ap. Claudius,
 per simulationem provinciæ circumeundæ Messanam
 raptim exercitu ducto, æstu secundo Locros trajecit.
 Jam inde Bomilcar ad Hannonem in Bruttios pro-
 fectus erat, et Locrenses portas Romanis clausurunt.
 Appius magno conatu nulla re gesta, Messanam re-
 petit. Eadem æstate Marcellus ab Nola, quam
 præsidio obtinebat, crebras excursions in agrum
 Hirpinum et Samnites Caudinos fecit: adeoque om-
 nia ferro atque igni vastavit, ut antiquarum cladum
 Samnio memoriam renovaret.

XLII. Itaque extemplo legati, ad Hannibalem

missi simul ex utraque gente, ita Pœnum adlocuti sunt: *Hostes populi Romani, Hannibal, fuimus primum per nos ipsi, quoad nostra arma, nostræ vires nos tutari poterant: postquam iis parum fidebamus, Pyrrho regi nos adjunximus; a quo relictæ pacem necessariam accepimus, fuimusque in ea per annos prope quinquaginta, ad id tempus, quo in Italiam venisti. Tua nos non magis virtus fortunaque, quam unica comitas ac benignitas erga cives nostros, quos captos nobis remisisti, ita conciliarit tibi, ut, te salvo atque incolumi amico, non modo populum Romanum, sed ne Deos quidem iratos (si dici fas est) timeremus. At, Hercule, non solum incolumi et victore, sed præsentē te, (comploratum prope conjugum ac liberorum nostrorum exaudire, et flagrantia tecta posses conspicere) ita sumus aliquoties hac æstate devastati, ut M. Marcellus, non Hannibal, vicisse ad Cannas videatur; glorianturque Romani, te, ad unum modo ictum vigentem, velut aculeo emisso, torpere. Per centum prope annos cum populo Romano bellum gessimus, nullo externo adjuti nec duce, nec exercitu: nisi quod per biennium Pyrrhus nostro magis milite suas auxit vires, quam suis viribus nos defendit. Non ego secundis rebus nostris gloriabor, duos consules, ac duos consulares exercitus a nobis sub jugum missos, et si qua alia aut læta aut gloriosa nobis evenerunt: quæ aspera adversaque tunc acciderunt, minore indignatione referre possumus, quam quæ hodie eveniunt. Magni dictatores cum magistris equitum, bini consules cum binis consularibus exercitibus ingrediebantur fines nostros; ante explorato, et subsidiis positis, et sub signis ad populandum ducebant: nunc proprii unius et parvi ad tuendam Nolam præsidii præda sumus. Jam ne manipulatim quidem, sed latronum*

U. C. 537.
A. C. 215.
Oratio
Samnitium ad
Hannibalem.

U. C. 537. modo, percursant totis finibus nostris negligentius, quam
 A. C. 215. si in Romano vagarentur agro. Causa autem hæc est, quod neque tu defendis, et nostra juvenus, quæ, si domi esset, tutaretur, omnis sub signis militat tuis. Nec te, nec exercitum tuum norim, nisi, a quo tot Romanas acies fusas stratasque esse sciam, ei facile esse ducam obprimere populatores nostros vagos, sine signis, palatos, quo quemque trahit, quamvis vana, prædæ spes. Numidarum paucorum illi quidem præda erunt, præsidiumque missum nobis et Nolæ ademerit: si modo, quos, ut socios haberes, dignos duxisti, haud indignos judicas, quos in fidem receptos tuearis.

Respon-
 sum Han-
 nibalis.

XLIII. Ad ea Hannibal respondit: Omnia simul facere Hirpinos Samnitesque: et indicare clades suas, et petere præsidium, et queri indefensos se neglectosque. Indicandum autem fuisse primum, dein petendum præsidium: postremo, ni inpetraretur, tum denique querendum, frustra opem inploratam. Exercitum sese non in agrum Hirpinum Samnitumve, ne et ipse oneri esset, sed in proxima loca sociorum populi Romani adducturum: iis populandis et militem suum repleturum se, et metu procul ab iis submoturum hostes. Quod ad bellum Romanum adtineret, si Trasimeni quam Trebiæ, si Cannarum quam Trasimeni pugna nobilior esset; Cannarum se quoque memoriam obscuram majore et clariore victoria facturum. Cum hoc responso muneribusque amplis legatos dimisit: ipse, præsidio modico relicto in Tifatis, profectus cetero exercitu ire Nolam pergit. Eodem Hanno ex Bruttiiis, cum supplemento Karthagine advecto atque elephantis, venit: castris haud procul positis, longe alia omnia inquirenti comperta sunt, quam quæ a legatis sociorum audierat: nihil enim Marcellus ita gerebat, ut

aut fortunæ, aut temere hosti commissum dici posset: explorato, cum firmisque præsiidiis, tuto receptu prædatum ierat: omniaque, velut adversus præsentem Hannibalem, cauta provisique fuerunt. Tum, ubi sensit hostem adventare, copias intra mœnia tenuit: per muros inambulare senatores Nolanos iussit, et omnia circa explorare, quæ apud hostes fierent. Ex iis Hanno, quum ad murum successisset, Herennium Bassum et Herium Petrium, ad colloquium evocatos, permissuque Marcelli egressos, per interpretem adloquitur. Hannibalis virtutem fortunamque extollit: populi Romani obterit senescentem cum viribus majestatem. *Quæ si paria essent, ut quondam fuissent, tamen expertis, quam grave Romanum imperium sociis, quanta indulgentia Hannibalis etiam in captivos omnes Italici nominis fuisset, Punicam Romanæ societatem atque amicitiam præoptandam esse. Si ambo consules cum suis exercitibus ad Nolam essent, tamen non magis pares Hannibali futuros, quam ad Cannas fuissent: nedum prætor unus, cum paucis et novis militibus, Nolam tutari possit: ipsorum, quam Hannibalis, interesse, capta an tradita Nola potiretur: potiturum enim, ut Capua Nuceriaque potitus esset: sed, quid inter Capuæ Nuceriæque fortunam interesset, ipsos prope in medio sitos Nolanos scire. Nolite ominari, quæ captæ urbi cessura forent: sed potius spondere, si Marcellum cum præsidio ac Nolam tradidissent, neminem alium, quam ipsos, legem, qua in societatem amicitiamque Hannibalis venirent, dicturum.*

U. C. 537.

A. C. 215.

Animos

Nolanorum

tentat Han-

nibal.

XLIV. Ad ea Herennius Bassus respondit: *Multos annos jam inter Romanum Nolanumque populum amicitiam esse, cujus neutros ad eam diem pœnitere;*

^{U. C. 527.} *et sibi si cum fortuna mutanda fides fuerat, sero jam*
^{A. C. 215.} *esse mutare eam : dedituris se Hannibali non fuisse ar-*
cessendum Romanum præsidium : cum iis, qui ad se
tutendos venissent, omnia sibi et esse consociata, et ad

Obpugnat
Nolam.

ultimum fore. Hoc conloquium abstulit spem Han-
 nibali per prodicionem recipiendæ Nolæ : itaque op-
 pidum corona circumdedit, ut simul ab omni parte
 mœnia adgrederetur. Quem ut successisse muris
 Marcellus vidit, instructa intra portam acie, cum
 magno tumultu erupit : aliquot primo impetu per-
 culsi cæsique sunt ; dein, concursu ad pugnantes
 facto, æquatisque viribus, atrox cœpit esse pugna :
 memorabilisque inter paucas fuisset, ni ingentibus
 procellis effusus imber diremisset pugnantes. Eo
 die commisso modico certamine, atque irritatis ani-
 mis, in urbem Romani, Pœni in castra sese recepe-
 runt : tamen Pœnorum prima eruptione perculsi ce-
 ciderunt haud plus quam triginta, Romanorum nul-
 lus. Imber continens per noctem totam usque ad
 horam tertiam dici insequentis tenuit : itaque, quam-
 quam utraque pars avidi certaminis erant, eo die te-
 nuerunt sese tamen munimentis : tertio die Hanni-
 bal partem copiarum prædatum in agrum Nolanum
 misit. Quod ubi animadvertit Marcellus, extemplo
 in aciem copias educit : neque Hannibal detractavit.
 Mille fere passuum inter urbem erant castraque : eo
 spatio (et sunt omnia campi circa Nolam) concurre-
 runt. Clamor, ex parte utraque sublatus, proximos
 ex cohortibus iis, quæ in agros prædatum exierant,
 ad prælium jam commissum revocavit. Et Nolani
 aciem Romanam auxerunt : quos conlaudatos Mar-
 cellus in subsidiis stare, et saucios ex acie efferre
 jussit ; pugna abstinere, ni ab se signum accepissent.

Prælium
ad Nolam.

XLV. Prælium erat anceps : summa vi et duces U. C. 537.
hortabantur, et milites pugnabant. Marcellus victis A. C. 215.
ante diem tertium, fugatis ante paucos dies a Cumis,
pulsis priore anno ab Nola ab eodem se duce, milite
alio, instare jubet. *Non omnes esse in acie : prædan-*
tes vagari in agro : sed, qui pugnent, marcere Campa-
na luxuria, vino et scortis, omnibusque lustris per to-
tam hiemem confectos. Abisse illam vim vigoremque,
dilapsa esse robor corporum animorumque, quibus Py-
renæi Alpiumque superata sint juga : reliquias illorum
virorum, vix arma membraque sustinentes, pugnare.
Capuam Hannibali Cannas fuisse : ibi virtutem belli-
eam, ibi militarem disciplinam, ibi præteriti temporis
famam, ibi spem futuri extinctam. Quum hæc ex-
probrando hosti Marcellus suorum militum animos
erigeret, Hannibal multo gravioribus probris incre-
pabat : Arma signaque eadem se noscere, quæ ad Tre-
biam Trasimenumque, postremo ad Cannas viderit ha-
bueritque : militem alium profecto se in hiberna Ca-
puam duxisse, alium inde eduxisse. Legatumne Ro-
manum et legionis unius atque alæ magna certamine
vix toleratis pugnam, quos binæ acies consulares num-
quam sustinuerunt ? Marcellus, tirone milite ac Nola-
nis subsidiis, inultus nos jam iterum lacessit ? Ubi ille
meus miles est, qui erepto ex equo C. Flaminio consuli
caput abstulit ? ubi, qui L. Paullum ad Cannas occi-
dit ? Ferrum nunc hebet ? an dextræ torpent ? an quid
prodigii est aliud ? Qui pauci plures vincere soliti estis,
nunc paucis plures vix restatis. Romam vos expugna-
turos, si quis duceret, fortes lingua, jactabatis. En
nunc minor est res : hic experiri vim virtutemque volo.
Expugnate Nolam, campestrum urbem, non flumine,
non mari septam : hinc vos ex tam opulenta urbe

U. C. 537. *præda spoliisque onustos vel ducam, quo voletis, vel*
 A. C. 215. *sequar.*

Pœni in
 castra
 compelluntur.

XLVI. Nec bene, nec male dicta profuerunt ad confirmandos animos. Quum omni parte pellerentur, Romanisque crescerent animi, non duce solum adhortante, sed Nolanis etiam per clamorem, favoris indicem, accendentibus ardorem pugnae, terga Pœni dederunt, atque in castra compulsi sunt: quæ obpugnare cupientes milites Romanos Marcellus Nola reduxit, cum magno gaudio et gratulatione etiam plebis, quæ ante inclinatio ad Pœnos fuerat. Hostium plus quinque millia cæsa eo die, vivi capti sexcenti, et signa militaria undeviginti, et duo elephantum: quatuor in acie occisi. Romanorum minus mille interfecti: posterum diem induciis tacitis, sepeliendo utrimque cæsos in acie, consumserunt. Spolia hostium Marcellus, Vulcano votum, cremavit. Tertio post die (ob iram credo aliquam, aut spem liberalioris militiæ) mille ducenti septuaginta duo equites, mixti Numidæ Hispanique, ad Marcellum transfugerunt: eorum forti fidelique opera in eo bello usi sunt sæpe Romani. Ager Hispanis in Hispania, Numidis in Africa post bellum, virtutis causa, latus datus est. Hannibal, ab Nola remisso in Bruttios Hannone, cum quibus venerat copiis, ipse Apuliæ hiberna petit, circaque Arpos consedit. Q.

Q. Fabii
 res gestæ.

Fabius, ut profectum in Apuliam Hannibalem audivit, frumento ab Nola Neapolique in ea castra convecto, quæ super Suessulam erant, munimentisque firmatis, et præsidio, quod per hiberna ad tutandum locum satis esset, relicto, ipse Capuam propius movit castra, agrumque Campanum ferro ignique est depopulatus: donec coacti sunt Campani,

nihil admodum viribus suis fidentes, egredi portis, et castra ante urbem in aperto communire. Sex milia armatorum habebant, peditem inbellem: equitatu plus poterant: itaque equestribus præliis lacescebant hostem. Inter multos nobiles equites Campanos Cerrinus Jubellius erat, cognomine Taurea: civis indidem erat, longe omnium Campanorum fortissimus eques: adeo ut, quum apud Romanos militaret, unus eum Romanus Claudius Asellus gloria equestri æquaret. Hunc Taurea quum diu perlustans oculis obequitasset hostium turmis, tandem facto silentio, *ubi esset Claudius Asellus?* quæsit: *et, quoniam verbis secum de virtute ambigere solitus esset, cur non ferro decerneret; daretque opima spolia victus, aut victor caperet?*

XLVII. Hæc ubi Asello nunciata sunt in castra, id modo moratus, ut consulem percunctaretur, liceretne extra ordinem in provocantem hostem pugnare? permissu ejus arma extemplo cepit: provectusque ante stationes equo, Tauream nomine compellavit, congregique, ubi vellet, jussit. Jam Romani ad spectaculum pugnae ejus frequentes exierant: et Campani, non vallum modo castrorum, sed mœnia etiam urbis prospectantes repleverant. Quum jam ante ferocibus dictis rem nobilitassent, infestis hastis concitarunt equos: dein libero spatio inter se ludificantes, sine vulnere pugnam extrahebant. Tum Campanus Romano, *Equorum, inquit, hoc, non equitum, erit certamen, nisi e campo in cavam hanc viam demittimus equos: ibi nullo ad evagandum spatio comminus conserentur manus.* Dicto prope citius equum in viam Claudius dejecit. Taurea, verbis ferocior, quam re, *Minime sis, inquit, cantherium in fossa:*

U. C. 537. quæ vox in rusticum inde proverbium prodita. Clau-
 A. C. 215. dius, quum ex via longe perequitasset, nullo obvio
 hoste, in campum rursum evectus, increpans igna-
 viam hostis, cum magno gaudio et gratulatione vic-
 tor in castra redit. Huic pugnae equestri rem (quam
 satis certam, communis existimatio est) mirabilem
 certe, adjiciunt quidam annales : quum refugientem
 ad urbem Tauream Claudius sequeretur, patenti hos-
 tium portæ invectum, per alteram, stupentibus mi-
 raculo hostibus, intactum evasisse.

XLVIII. Quieta inde stativa fuere, ac retro etiam
 consul movit castra, ut, sementem Campani face-
 rent : nec ante violavit agrum Campanum, quam
 jam altæ in segetibus herbæ pabulum præbere pote-
 rant : id convexit in Claudiana castra super Suessu-
 lam ; ibique hiberna ædificavit. M. Claudio pro-
 consuli imperavit, ut, retento Nolæ necessario ad
 tuendam urbem præsidio, ceteros milites dimitteret
 Romam, ne oneri sociis, et sumtui reipublicæ es-
 sent. Et Ti. Gracchus a Cumis Luceriam in Apu-
 liam legiones quum duxisset, M. Valerium inde præ-
 torem Brundisium, cum eo, quem Luceriæ habuerat,
 exercitu misit, tuerique oram agri Sallentini, et pro-
 videre, quod ad Philippum bellumque Macedonicum
 adtineret, jussit. Exitu æstatis ejus, qua hæc gesta
 perscripsimus, literæ a P. et Cn. Scipionibus vene-
 runt, quantas, quamque prosperas in Hispania res
 gessissent : sed pecuniam in stipendium, vestimenta-
 que, et frumentum exercitui, et sociis navalibus om-
 nia deesse. Quod ad stipendium adtineat, si æra-
 rium inops esset, se aliquam rationem inituros, quo
 modo ab Hispanis sumant : cetera utique ab Roma
 mittenda esse : nec aliter aut exercitum aut provin-

Literæ ex
 Hispania.

eiam retineri posse. Literis recitatis, nemo omnium erat, quin, et vera scribi, et postulari æqua, fateretur: sed obcurrerat animis, quantos exercitus terrestres navalesque tuerentur, quantaque nova classis mox paranda esset, si bellum Macedonicum moveretur. Siciliam ac Sardiniam, quæ ante bellum vectigales fuissent, vix præsidēs provinciarum exercitus alere: tributo sumtus subpeditari: quum ipsum tributum conferentium numerum tantis exercituum stragibus, et ad Trasimenum lacum, et ad Cannas, inminutum; tum, qui superessent pauci, si multiplici gravarentur stipendio, alia perituros peste. Itaque, nisi fide staret respublica, opibus non staturam. Prodeundum in concionem Fulvio prætori esse, indicandas populo publicas necessitates, cohortandosque, qui redempturis auxissent patrimonia, ut reipublicæ, ex qua crevissent, ad tempus commodarent; conducereque ea lege præbenda, quæ ad exercitum Hispaniensem opus essent, ut, quum pecunia in ærario esset, iis primis solveretur. Hæc prætor in concione edixit, qua die vestimenta, frumentum, Hispaniensi exercitui præbenda, quæque alia opus essent navalibus sociis, esset locaturus.

U. C. 537.
A. C. 215.

Romano-
rum inopia.

XLIX. Ubi ea dies venit, ad conducendum tres societates aderant hominum undeviginti, quorum duo postulata fuere: unum, ut militia vacarent, dum in co publico essent: alterum, ut, quæ in naves inposuissent, ab hostium tempestatisque vi publico periculo essent. Utroque inpetrato, conduxerunt, privataque pecunia respublica administrata est. Hi mores, eaque caritas patriæ per omnes ordines velut tenore uno pertinebat. Quemadmodum conducta omnia magno animo sunt, sic summa fide præbita,

Privata pecunia respublica administratur.

U. C. 537. nec secus quam si ex opulento ærario, ut quondam,
 A. C. 215. alerentur. Quum hi commeatus venerunt, Illiturgi
 oppidum ab Hasdrubale, ac Magone, et Hamilcare
 Bomilcaris filio, ob defectionem ad Romanos ob-
 pugnabatur. Inter hæc trina castra hostium Sci-
 piones, quum in urbem sociorum magno certamine
 ac strage obsistentium pervenissent, frumentum, cu-
 jus inopia erat, advexerunt: cohortatique oppida-
 nos, ut eodem animo mœnia tutarentur, quo pro se
 pugnantem Romanum exercitum vidissent, ad cas-
 tra maxima obpugnanda, quibus Hasdrubal præerat,
 ducunt. Eodem et duo duces, et duo exercitus Kar-
 thaginiensium, ibi rem summam agi cernentes, con-
 venerunt. Itaque eruptione e castris pugnatum est:
 sexaginta hostium millia eo die in pugna fuerunt,
 sexdecim circiter Romanis: tamen adeo haud dubia
 victoria fuit, ut plures numero, quam ipsi erant,
 Romani hostium occiderint: ceperint amplius tria
 millia hominum, paullo minus mille equorum, unde-
 sexaginta militaria signa, elephantis quinque in
 prælio occisis: trinisque castris eo die potiti sunt.
 Illiturgi obsidione liberato, ad Intibili obpugnandum
 Punici exercitus traducti, suppletis copiis ex pro-
 vincia, ut quæ maxime omnium belli avida, modo
 præda aut merces esset, et tum juventute abundante.
 Iterum signis conlatis, eadem fortuna utriusque par-
 tis pugnatum: supra tredecim millia hostium cæsa,
 supra duo capta, cum signis duobus et quadraginta,
 et novem elephantis. Tum vero omnes prope His-
 paniae populi ad Romanos defecerunt: multoque
 majores ea æstate in Hispania, quam in Italia, res
 gestæ.

Scipiones
 trina Pœ-
 norum
 castra ca-
 piunt.

EPITOME LIBRI XXIV.

HIERONYMUS, *Syracusanorum rex, cujus avus Hiero amicus populi Romani fuerat, ad Karthaginienses defecit; et propter crudelitatem superbiamque a suis interfectus est. Ti. Sempronius Gracchus proconsul prospere adversus Pænos et Hannonem ducem ad Beneventum pugnavit, servorum maxime opera, quos liberos esse jussit. Claudius Marcellus consul, in Sicilia, quæ prope tota ad Pænos defecerat, Syracusas obsedit. Philippo Macedonum regi bellum indictum est; qui, ad Apolloniam nocturno prælio obpressus fugatusque, in Macedoniam cum prope inermi exercitu perfugit: ad id bellum gerendum Valerius prætor missus est. Res præterea in Hispania a P. et Cn. Scipionibus adversus Karthaginienses gestas continet. Syphax, rex Numidarum, in amicitiam adscitus, et a Masinissa, rege Massylorum, pro Karthaginiensibus pugnante, victus, in Maurusios cum magna manu transiit contra Gades; ubi angusto freto Africa et Hispania dirimuntur. Celtiberi quoque in amicitiam recepti sunt: quorum auxiliis adscitis, tunc primum mercenarium militem Romana castra habuerunt.*

T. LIVII PATAVINI

LIBER XXIV.

U. C. 537.
A. C. 215.
Res a Pœ-
nis apud
Bruttios
gestæ.
Rhegium
frustra
tentatum.

Locrenses
se dedunt
Pœnis.

UT ex Campania in Bruttios reditum est, Hanno, adiutoribus et ducibus Bruttiis, Græcas urbes tentavit, eo facilius in societate manentes Romana, quod Bruttios, quos et oderant, et metuebant, Karthaginiensium partis factos cernebant. Rhegium primum tentatum est, diesque aliquot ibi nequidquam absunti. Interim Locrenses frumentum, lignaque, et cetera necessaria usibus ex agris in urbem rapere, etiam ne quid relictum prædæ hostibus esset : et in dies major omnibus portis multitudo effundi : postremo ii modo relictii in urbe erant, qui reficere muros ac portas, telaque in propugnacula congerere cogeabantur. In permixtam omnium ætatum ordinumque multitudinem, et vagantem in agris magna ex parte inermem, Hamilcar Pœnus equites emisit; qui, violare quemquam vetiti, tantum, ut excluderent ab urbe fuga dissipatos, turmas objecere. Dux ipse, loco superiore capto, unde agros urbemque posset conspiceret, Bruttiorum cohortem adire muros, atque evocare principes Locrensiū ad colloquium jussit, et, pollicentes amicitiam Hannibalis, adhortari ad urbem tradendam. Bruttiis in colloquio nullius rei primo fides est : deinde ut Pœnus adparuit in collibus, et refugientes pauci aliam om-

nem multitudinem in potestate hostium esse adfere-
bant; tum, metu victi, consulturos se populum re-
sponderunt: advocataque extemplo concione, quum
et levissimus quisque novas res novamque societatem
mallent, et, quorum propinqui extra urbem interclusi
ab hostibus erant, velut obsidibus datis, pigneratos
haberent animos, pauci magis taciti probarent con-
stantem fidem, quam probatam tueri auderent;
haud dubio in speciem consensu fit ad Pœnos dedi-
tio: L. Atilio præfecto præsidii, quique cum eo mi-
lites Romani erant, clam in portum deductis, atque
inpositis in naves, ut Rhegium deveherentur, Ha-
milcarem Pœnosque ea conditione, ut fœdus extem-
plo æquis legibus fieret, in urbem acceperunt: cujus
rei prope non servata fides deditis est, quum Pœnus
dolo dimissum Romanum incusaret; Locrenses pro-
fugisse ipsum caussarentur. Insecuti etiam equites
sunt, si quo casu in freto æstus morari, aut deferre
naves in terram posset: et eos quidem, quos seque-
bantur, non sunt adepti: alias a Messana trajici-
entes freto Rhegium naves conspexerunt. Milites
erant Romani, a Claudio prætore missi ad obtinen-
dam urbem præsidio: itaque Rhegio extemplo abs-
cessum est. Locrensibus jussu Hannibalis data
pax, *ut liberi suis legibus viverent: urbs pateret Pœnis,*
portus in potestatem Locrensiū esset: societas eo jure
staret, ut Pœnus Locrensem, Locrensisque Pœnum pace
ac bello juvaret.

II. Sic a freto Pœni reducti, frementibus Bruttiis,
quod Rhegium ac Locros, quas urbes direpturos se
destinaverant, intactas reliquissent. Itaque per se
ipsi, conscriptis armatisque juventutis suæ quindecim
millibus, ad Crotonem obpugnandum pergunt

Bruttii Cro-
tonem ca-
piunt, præ-
ter arsem,

U. C. 537. ire ; Græcam et ipsam urbem, et maritimam : plurimum accessurum opibus, si in ora maris urbem portu ac mœnibus validam tenuissent, credentes. Ea cura angebat, quod neque non arcessere ad auxilium Pœnos satis audebant, ne quid non pro sociis egisse viderentur : et, si Pœnus rursus magis arbiter pacis, quam adjutor belli, fuisset, ne in libertatem Crotonis, sicut ante Locrorum, frustra pugnaretur. Itaque optimum visum est, ad Hannibalem mitti legatos, caverique ab eo, ut receptus Croto Bruttiorum esset. Hannibal quum præsentium eam consultationem esse respondisset, et ad Hannonem eos rejecisset, ab Hannone nihil certi ablatum. Nec enim diripi volebant nobilem atque opulentam urbem : et sperabant, quum Bruttiis obpugnaret, Pœnos nec probare, nec juvare eam obpugnationem adpareret, eo maturius ad se defecturos. Crotone nec consilium unum inter populares, nec voluntas erat : unus velut morbus invaserat omnes Italiæ civitates, ut plebes ab optimatibus dissentirent : senatus Romanis faveret, plebs ad Pœnos rem traheret. Eam dissensionem in urbe perfuga nunciat Bruttiis ; Aristomachum esse principem plebis, tradendæque auctorem urbis : et in vasta urbe lateque omnibus disjectis mœnibus raras et stationes custodiasque senatorum esse : quacumque custodiant plebis homines, ea patere aditum. Auctore ac duce perfuga, Bruttii corona cinxerunt urbem : acceptique a plebe primo impetu locos omnes, præter arcem, cepere. Arcem optimates tenebant, præparato jam ante ad talem casum perfugio. Eodem Aristomachus perfugit ; tamquam Pœnis, non Bruttiis, auctor urbis tradendæ fuisset.

III. Urbs Croto murum in circuitu patentem U. C. 537. A. C. 215. duodecim millia passuum habuit, ante Pyrrhi in Italiam adventum: post vastitatem eo bello factam vix pars dimidia habitabatur: flumen, quod medio oppido fluxerat, extra frequentia tectis loca præterfluebat: et arx procul iis, quæ habitabantur. Sex millia aberat ab urbe nobili templum (ipsa urbe erat nobilior) Lacinia Junonis templum. Lacinia Junonis, sanctum omnibus circa populis. Lucus ibi, frequenti silva et proceris abietis arboribus septus, læta in medio pascua habuit, ubi omnis generis sacrum Deæ pascebatur pecus sine ullo pastore: separatimque egressi cujusque generis greges nocte remeabant ad stabula, numquam insidiis ferarum, non fraude violati hominum. Magni igitur fructus ex eo pecore capti, columnaque inde aurea solida facta, et sacrata est: inclitumque templum, divitiis etiam, non tantum sanctitate, fuit. Ac miracula aliqua adfinguntur plerumque tam insignibus locis. Fama est, aram esse in vestibulo templi, cujus cinerem nullo unquam moveri vento. Sed arx Crotonis, una parte imminens mari, altera Arx Crotonis deserta. vergente in agrum, situ tantum naturali quondam munita, postea et muro cincta est, qua per aversas rupes ab Dionysio Siciliae tyranno per dolum fuerat capta. Eam tum arcem, satis, ut videbatur, tutam, Crotoniatum optimates tenebant, circumsedente cum Bruttii eos etiam plebe sua. Postremo Bruttii, quum suis viribus inexpugnabilem viderent arcem, coacti necessitate, Hannonis auxilium inplorant. Is conditionibus ad deditionem compellere Crotoniatas conatus, ut coloniam Bruttiorum eo deduci, antiquamque frequentiam eorum recipere vastam ac desertam bellis urbem paterentur, om-

U. C. 537. nium neminem, præter Aristomachum, movit : mo-
 A. C. 215. rituros se adfirmabant citius, quam, inmixti Bruttiis,
 in alienos ritus, mores, legesque, ac mox linguam
 etiam verterentur. Aristomachus unus, quando nec
 suadendo ad deditionem satis valebat, nec, sicut ur-
 bem prodiderat, locum prodendæ arcis inveniebat,
 transfugit ad Hannonem. Locrenses brevi post le-
 gati, quum permissu Hannonis arcem intrassent,
 persuadent, ut traduci se in Locros paterentur, nec
 ultima experiri vellent. Jam hoc ut sibi liceret, in-
 petraverant et ab Hannibale, missis ad ipsum lega-
 tis : ita Crotone excessum est, deductique Croto-
 niatæ ad mare naves conscendunt. Locros omnis
 multitudo abeunt. In Apulia ne hiems quidem qui-
 eta inter Romanos atque Hannibalem erat. Luce-
 riæ Sempronius consul, Hannibal haud procul Arpis
 hibernabat. Inter eos levia prælia ex occasione,
 aut opportunitate hujus aut illius partis, oriebantur :
 meliorque eis Romanus, et in dies cautior tutiorque
 ab insidiis fiebat.

Hieron
 succedit
 Hierony-
 mus Syra-
 censis.

IV. In Sicilia Romanis omnia mutaverat mors
 Hieronis, regnumque ad Hieronymum nepotem ejus
 translatum : puerum, vixdum libertatem, nedum do-
 minationem, modice laturum. Læte id ingenium
 tutores atque amici ad præcipitandum in omnia vitia
 acceperunt : quæ ita futura cernens Hiero, ultima
 senecta voluisse dicitur liberas Syracusas relinquere,
 ne sub dominatu puerili, per ludibrium, bonis arti-
 bus partum firmatumque interiret regnum. Huic
 consilio ejus summa ope obstitere filiæ, nomen regi-
 um penes puerum futurum ratæ, regimen rerum om-
 nium penes se virosque suos, Andranodorum et Zoip-
 pum : nam ii tutorum primi relinquebantur. Non fa-

tile erat nonagesimum jam agenti annum, circum-^{U. C. 537.}
 sesto dies noctesque muliebribus blanditiis, liberare^{A. C. 215.}
 animum, et convertere ad publicam privata curam.
 Itaque tutores modo quindecim puero reliquit: quos
 precatus est moriens, ut fidem erga populum Roma-
 num, quinquaginta annos ab se cultam, inviolatam
 servarent, juvenemque suis potissimum vestigiis in-
 sistere vellent disciplinæque, in qua edoctus esset.
 Hæc mandata. Quum exspirasset, per tutores testa-
 mento prolato, pueroque in concionem producto;
 (erat autem quindecim tunc ferme annorum) pau-
 cis, qui per concionem ad excitandos clamores dis-
 positi erant, adprobantibus testamentum, ceteris
 velut patre amisso in orba civitate omnia timentibus,
 funus fit regium, magis amore civium et cari-
 tate, quam cura suorum, celebre. Deinde ceteros
 tutores submovet Andranodorus, juvenem jam esse
 dictitans Hieronymum, ac regni potentem: depo-
 nendoque tutelam ipse, quæ cum pluribus communis
 erat, in se unum omnium vires convertit.

V. Vix quidem ulli bono moderatoque regi facilis
 erat favor apud Syracusanos, succedenti tantæ cari-
 tati Hieronis: verum enim vero Hieronymus, velut^{Hieronimi}
 suis vitiis desiderabilem efficere vellet avum, primo^{vitia.}
 statim conspectu, omnia quam disparia essent, os-
 tendit: nam qui per tot annos Hieronem filiumque
 ejus Gelonem, nec vestis habitu, nec alio ullo insigni
 differentes a ceteris civibus vidissent, conspexere
 purpuram, ac diadema, ac satellites armatos; qua-
 drigisque etiam alborum equorum interdum ex regia
 procedentem, more Dionysii tyranni. Hunc tam
 superbum adparatum habitumque convenientes se-
 quebantur contemptus omnium hominum, superbæ

U. C. 537. aures, contumeliosa dicta, rari aditus, non alienis
 A. C. 215. modo, sed tutoribus etiam, libidines novæ, inhumana
 crudelitas. Itaque tantus omnes terror invaserat,
 ut quidam ex tutoribus aut morte voluntaria, aut
 fuga præverterent metum suppliciorum. Tres ex iis,
 quibus solis aditus in domum familiarior erat, An-
 dranodorus et Zoippus, generi Hieronis, et Thraso
 quidam, de aliis quidem rebus haud magnopere au-
 diebantur: tendendo autem duo ad Karthaginien-
 ses, Thraso ad societatem Romanam, certamine ac
 studiis interdum in se convertebant animum adoles-
 centis: quum conjuratio, in tyranni caput facta, in-
 dicatur per calonem quemdam, æqualem Hieronymi,
 et jam inde a puero in omnia familiaria jura adsue-
 tum. Index unum ex conjuratis Theodotum, a quo
 ipse adpellatus erat, nominare potuit: qui compre-
 hensus extemplo, traditusque Andranodoro torquen-
 dus, de se ipse haud cunctanter fassus, conscios ce-
 labat. Postremo, quum omnibus intolerandis pati-
 entiae humanæ cruciatibus laceraretur, victum malis
 se simulans, avertit ab consciis in insontes indicium
 (Thrasonem esse auctorem consilii mentitus, nec,
 nisi tam potenti duce confisos, rem tantam ausuros)
 ab latere tyranni, quorum capita vilissima fingenti
 inter dolores gemitusque obcurrere. Maxime animo
 tyranni credibile indicium Thraso nominatus fecit.
 Ita extemplo traditur ad supplicium: adjectique
 poenæ ceteri juxta insontes. Consciorum nemo,
 quum diu socius consilii torqueretur, aut latuit, aut
 fugit: tantum illis in virtute ac fide Theodoti fidu-
 ciæ fuit: tantumque ipsi Theodoto virium ad arcana
 occultanda.

Conspira-
 tio in ejus
 caput.

VI. Ita, quod unum vinculum cum Romanis so-

cietatis erat, Thrasone sublato e medio, extemplo
 haud dubie ad defectionem res spectabat : legatique
 ad Hannibalem missi, ac remissi ab eo cum Hanni-
 bale nobili adolescente Hippocrates et Epicydes, nati
 Karthagine, sed oriundi ab Syracusis exsule avo,
 Pœni ipsi materno genere. Per hos juncta societas
 Hannibali ac Syracusano tyranno : nec invito Han-
 nibale apud tyrannum manserunt. Ap. Claudius
 prætor, cujus Sicilia provincia erat, ubi ea accepit,
 extemplo legatos ad Hieronymum misit : qui, quum
 sese ad renovandam societatem, quæ cum avo fuis-
 set, venisse dicerent, per ludibrium auditi dimissique
 sunt ab quærente per jocum Hieronymo, *quæ fortu-
 na eis pugnæ ad Cannas fuisset? vix credibilia enim
 legatos Hannibalis narrare. Velle, quid veri sit, scire,
 ut ex eo, utram spem sequatur, consilium capiat.* Ro-
 mani, quum serio legationes audire cœpisset, reditu-
 ros se ad eum dicentes esse, monito magis eo, quam
 rogato, ne fidem temere mutaret, proficiscuntur.
 Hieronymus legatos Karthaginem misit ad fœdus
 ex societate cum Hannibale faciendum. Pacto con-
 venit, ut, quum Romanos Sicilia expulissent, (id
 autem brevi fore, si naves atque exercitum misis-
 sent) Himera amnis, qui ferme insulam dividit, finis
 regni Syracusani ac Punici imperii esset. Aliam de-
 inde, inflatus adsentationibus eorum, qui eum non
 Hieronis tantum, sed Pyrrhi etiam regis, materni
 avi, jubebant meminisse, legationem misit, qua æ-
 quum censebat, Sicilia sibi omni cedi : Italiæ impe-
 rium proprium quæri Karthaginensi populo. Hanc
 levitatem ac jactationem animi neque mirabantur in
 juvene furioso, neque arguebant, dummodo averte-
 rent eum ab Romanis.

U. C. 597.
 A. C. 215.

Ad Hanni-
 balem in-
 clinat.

Legati Ro-
 mani per
 ludibrium
 ab eo au-
 diti.

Fœdus ejus
 cum Pœnis.

U. C. 537. VII. Sed omnia in eo præcipitia ad exitum fue-
 A. C. 215. runt: nam quum, præmissis Hippocrate atque Epi-
 cyde cum binis millibus armatorum ad tentandas
 urbes, quæ præsidiis tenebantur Romanis, et ipse in
 Leontinos cum cetero omni exercitu (erant autem
 ad quindecim millia peditum equitumque) profectus
 esset; liberas ædes conjurati (et omnes forte milita-
 bant) imminentes viæ angustæ, qua descendere ad
 forum rex solebat, sumserunt: ibi, quum instructi
 armatique ceteri transitum exspectantes starent, uni
 ex eis, (Dinomeni fuit nomen) quia custos corporis
 erat, partes datæ sunt, ut, quum adpropinquaret ja-
 nuæ rex, per caussam aliquam in angustis sustineret
 ab tergo agmen. Ita, ut convenerat, factum est:
 tamquam laxaret elatum pedem ab stricto nodo,
 A conju- moratus turbam Dinomenes, tantum intervalli fecit,
 ratis occi- ut, quum in prætereuntem sine armatis regem inpe-
 ditor. tus fieret, confoderetur aliquot prius vulneribus,
 quam subcurri posset. Clamore et tumultu audito,
 in Dinomenem, jam haud dubie obstantem, tela con-
 jiciuntur: inter quæ tamen, duobus acceptis vulne-
 ribus, evasit. Fuga satellitum, ut jacentem videre
 regem, facta est: interfectores pars in forum ad
 multitudinem lætam libertate, pars Syracusas per-
 gunt, ad præoccupanda Andranodori regionumque
 aliorum consilia. Incerto rerum statu, Ap. Claudius,
 bellum oriens ex propinquo quum cerneret, senatum
 literis certiore fecit, Siciliam Karthaginiensi po-
 pulo et Hannibali conciliari: ipse adversus Syracu-
 sana consilia, provinciam, regnique fines omnia con-
 vertit præsidia. Exitu anni ejus, Q. Fabius ex auc-
 toritate senatus Puteolos, per bellum cœptum fre-
 quentari emporium, communiit, præsidiumque inpo-

suit: inde Romam comitiorum caussa veniens, in
 eum, quem primum diem comitialem habuit, comi-
 tia edixit; atque ex itinere præter urbem in cam-
 pum descendit. Eo die quum sors prærogativæ A-
 niensi juniorum exisset, eaque T. Otacilium, M. Æ-
 nilium Regillum consules diceret, tum Q. Fabius,
 silentio facto, tali oratione est usus:

U. C. 537.
 A. C. 215.
 Comitia
 consularia.

VIII. *Si aut pacem in Italia, aut bellum cum eo*
hoste haberemus, in quo negligentia laxior locus esset,
qui vestris studiis, quæ in campum ad mandandos, qui-
bus velitis, honores adfertis, moram ullam obferret, is
mihi parum meminisse videretur vestrae libertatis: sed
quum in hoc bello, in hoc hoste, numquam ab ullo duce
sine ingenti nostra clade erratum sit, eadem vos cura,
qua in aciem armati descenditis, inire suffragium ad
creandos consules decet, et sibi sic quemque dicere;
Hannibali imperatori parem consulem nomino. Hoc
anno ad Capuam Jubellio Taureæ Campano summo
equiti provocanti summus Romanus eques Asellus Clau-
dus est obpositus. Adversus Gallum, quondam provo-
cantem in ponte Anienis, T. Manlium, fidentem et ani-
mo et viribus, misere majores nostri. Ob eandem caus-
sam haud multis annis post fuisse non negaverim, cur
M. Valerio non diffideretur, adversus similiter provo-
cantem arma capienti Gallum ad certamen. Quemad-
modum pedites equitesque optamus, ut validiores, si mi-
nus, ut pares hosti habeamus; ita duci hostium parem
imperatorem quæramus. Quum, qui est summus in ci-
vitae dux, eum legerimus; tamen repente lectus, in
annum creatus, adversus veterem ac perpetuum impera-
torem comparabitur, nullis neque temporis, neque ju-
ris inclusum angustiis, quo minus ita omnia gerat ad-
ministretque, ut tempora postulabunt belli: nobis au-

Fabii cos.
 oratio de
 deligendis
 magna cura
 COSS.

U. C. 537. *tem in adparatu ipso, ac tantum inchoantibus res, an-*
 A. C. 215. *nus circumagitur. Quoniam, quales viros creare vos*
consules deceat, satis est dictum; restat, ut pauca de
eis, in quos prærogativæ favor inclinavit, dicam. M.
Æmilius Regillus flamen est Quirinalis, quem neque
mittere ab sacris, neque retinere possumus, ut non De-
um aut belli deseramus curam. Otacilius sororis meæ
filiam uxorem, atque ex ea liberos, habet: ceterum non
ea vestra in me majoresque meos merita sunt, ut non
potiorem privatis necessitudinibus rempublicam habeam.
Quilibet nautarum vectorumque tranquillo mari guber-
nare potest: ubi sæva orta tempestas est, ac turbato
mari rapitur vento navis, tum viro et gubernatore opus
est. Non tranquillo navigamus, sed jam aliquot pro-
cellis submersi pene sumus: itaque, quis ad gubernacula
sedeat, summa cura providendum ac præcavendum vo-
bis est. In minore te experti, T. Otacili, re sumus:
haud sane, cur ad majora tibi fidamus, documenti quid-
quam dedisti. Classem hoc anno, cui tu præfuisi, tri-
um rerum causa paravimus: ut Africæ oram popula-
retur; ut tuta nobis Italiæ litora essent; ante omnia
ne supplementum cum stipendio commeatuque ab Kar-
thagine Hannibali transportaretur. Create consulem
T. Otacilium, non dico, si omnia hæc, sed si aliquid
eorum reipublicæ præstitit. Sin autem, te classem ob-
tinente, etiam, velut pacato mari, quælibet Hannibali
tuta atque integra ab domo venerunt: si ora Italiæ in-
festior hoc anno, quam Africæ, fuit; quid dicere potes,
cur te potissimum ducem Hannibali hosti obponant? Si
consul esses, dictatorem dicendum exemplo majorum
nostrorum censeremus: nec tu id indignari posses, ali-
quem in civitate Romana meliorem bello haberi, quam
te: magis nullius interest, quam tua, T. Otacili, non

inponi cervicibus tuis onus, sub quo concidas. Ego U. C. 537.
A. C. 215.
magnopere suadeo, eodem animo, quo, si stantibus vo-
bis in aciem armatis repente deligendi duo imperatores
essent, quorum ductu atque auspicio dimicaretis, hodie
quoque consules creetis: quibus sacramento liberi vestri
dicant, ad quorum edictum conveniant, sub quorum tu-
tela atque cura militent. Lacus Trasimenus et Cannæ
tristia ad recordationem exempla, sed ad præcavendum
simile utili documento sunt. Præco, Aniensem junio-
rum in suffragium revoca.

IX. Quum T. Otacilius ferociter, eum continuare consulatum velle, vociferaretur atque obstreperet, lictores ad eum accedere consul jussit: et, quia in urbem non inierat, protinus in campum ex itinere profectus, admonuit, cum securibus sibi fasces præferri. Iterum prærogativa suffragium init; creatique in ea consules Q. Fabius Maximus quartum, M. U. C. 538.
A. C. 214. Marcellus tertium. Eosdem consules ceteræ centuriæ sine variatione ulla dixerunt. Et prætor unus reffectus Q. Fulvius Flaccus: novi alii creati, T. Otacilius Crassus iterum, Q. Fabius consulis filius, qui tum ædilis curulis erat, P. Cornelius Lentulus. Comitibus prætorum perfectis, senatusconsultum factum est, ut Q. Fulvio extra ordinem urbana provincia esset: isque potissimum, consulibus ad bellum profectis, urbi præset. Aquæ magnæ bis eo anno fuerunt: Tiberisque agros inundavit cum magna strage tectorum, pecorumque et hominum pernicie. Quinto anno secundi Punici belli, Q. Fabius Maximus quartum, M. Claudius Marcellus tertium, consulatum incuntes, plus solito converterant in se civitatis animos: multis enim annis tale consulum par non fuerat. Referebant senes, sic Maximum Rullum cum

U. C. 539. P. Decio ad bellum Gallicum, sic postea Papirium
 A. C. 214. Carviliūque adversus Samnites Bruttiosque, et Lu-
 canum cum Tarentino populum, consules declara-
 tos. Absens Marcellus consul creatus, quum ad ex-

Fabio au-
 di est con-
 tinuatus
 consula-
 tus.

ercitum esset; præsenti Fabio, atque ipso comitia
 habente, consulatus continuatus. Tempus ac ne-
 cessitas belli, ac discrimen summæ rerum faciebant,
 ne quis aut in exemplum exquireret, aut suspectum
 cupiditatis imperii consulem haberet: quin lauda-
 bant potius magnitudinem animi, quod, quum sum-
 mo imperatore esse opus reipublicæ sciret, seque
 eum haud dubie esse, minoris invidiam suam, si qua
 ex re oriretur, quam utilitatem reipublicæ, fecisset.

X. Quo die magistratum inierunt consules, sena-
 tus in Capitolio est habitus: decretumque omnium
 primum, ut consules sortirentur, compararentve inter
 se, uter censoribus creandis comitia haberet, prius-
 quam ad exercitum proficisceretur. Prorogatum de-
 inde imperium omnibus, qui ad exercitus erant, jus-
 sique in provinciis manere, Ti. Gracchus Luceriæ,
 ubi cum volonum exercitu erat, C. Terentius Varro
 in agro Piceno, M. Pomponius in Gallico: ex præ-
 toribus prioris anni pro prætore Q. Mucius obtineret
 Sardiniam, M. Valerius ad Brundisium oræ mariti-
 mæ, intentus adversus omnes motus Philippi Mace-
 donum regis, præesset. P. Cornelio Lentulo prætori
 Sicilia decreta provincia; T. Otacilio classis eadem,
 quam adversus Karthaginienses priore anno habuis-
 set. Prodigia eo anno multa nunciata sunt: quæ quo
 magis credebant simplices ac religiosi homines, eo
 plura nunciabantur: Lanuvii in æde intus Sospitæ
 Junonis corvos nidum fecisse: in Apulia palmam
 viridem arsisse: Mantuæ stagnum effusum Mincio

Prodigia.

amni cruentum visum : et Calibus creta, et Romæ U. C. 538.
 in foro boario sanguine pluisse : et in vico Istrico A. C. 214.
 fontem sub terra tanta vi aquarum fluxisse, ut serias
 doliaque, quæ in eo loco erant, provoluta velut in-
 petus torrentis tulerit : tacta de cælo atrium publi-
 cum in Capitolio, ædem in campo Vulcani, nucem
 in Sabinis publicamque viam, murum ac portam Ga-
 biis. Jam alia vulgata miracula erant : hastam Mar-
 tis Præneste sua sponte promotam : bovem in Sicilia
 locutum : infantem in utero matris in Marrucinis,
Io triumphè! clamasse : ex muliere Spoleti virum
 factum : Hadriæ aram in cælo, speciesque hominum
 circum eam, cum candida veste, visas esse. Quin
 Romæ quoque in ipsa urbe, secundum apum examen
 in foro visum, adfirmantes quidam, legiones se ar-
 matas in Janiculo videre, concitaverunt civitatem
 ad arma : qui tum in Janiculo essent, negarunt
 quemquam ibi, præter adsuetos collis ejus cultores,
 adparuisse. Hæc prodigia hostiis majoribus procu-
 rata sunt ex aruspicum responso : et supplicatio
 omnibus Deis, quorum pulvinaria Romæ essent, in-
 dicta est.

XI. Perpetratis, quæ ad pacem Deum pertinebant,
 de republica belloque gerendo, et quantum copiarum,
 et ubi quæque essent, consules ad senatum retulerunt.
 Duodeviginti legionibus bellum geri placuit : binas Duodevi-
ginti legio-
nes.
 consules sibi sumere : binis Galliam, Siciliamque, ac
 Sardiniam obtineri ; duabusque Q. Fabium prætorem
 Apuliæ, duabus volonum Ti. Gracchum circa Luce-
 riam præesse : singulas C. Terentio proconsuli ad
 Picenum, et M. Valerio ad classem circa Brundisium
 relinqui, et duas urbi præsidio esse. Hic ut nume-
 rus legionum expleretur, sex novæ legiones erant

U. C. 538. scribendæ: eas primo quoque tempore consules
A. C. 214. scribere jussi, et classem parare: ut cum eis navi-

Censores

M. Atilius,

P. Furius.

creandis habuit: creati M. Atilius Regulus et P.

Furius Philus. Quum increbresceret rumor, bellum

in Sicilia esse, T. Otacilius eo cum classe proficisci

jussus est. Quum deessent nautæ, consules ex se-

natusconsulto edixerunt, *ut, qui, L. Æmilio, C. Fla-*

minio censoribus, millibus æris quinquaginta ipse aut

pater ejus census fuisset, usque ad centum millia, aut

cui postea res tanta esset facta, nautam unum cum sex

Nautæ pri-
vatis impe-
rati.

mensium stipendio daret: qui supra centum millia,

usque ad trecenta millia, tres nautas cum stipendio

annuo: qui supra trecenta millia, usque ad decies æris,

quinque nautas: qui supra decies, septem: senatores

octo nautas cum annuo stipendio darent. Ex hoc

edicto dati nautæ, armati instructique ab dominis,

cum triginta dierum coctis cibariis naves conscende-

runt. Tum primum est factum, ut classis Romana

sociis navalibus privata impensa paratis complere-

tur.

Terrentur
Campani.

XII. Hic major solito adparatus præcipue con-

terruit Campanos, ne ab obsidione Capuæ bellum

ejus anni Romani inciperent: itaque legatos ad

Hannibalem oratum miserunt, ut Capuam exercitum

admoveret: *ad eam obpugnandam novos exercitus scri-*

bi Romæ; nec ullius urbis defectioni magis infensos eo-

rum animos esse. Id quia tam trepidi nunciabant,

maturandum Hannibal ratus, ne prævenirent Roma-

ni, profectus Arpis, ad Tifata in veteribus castris

super Capuam consedit: inde, Numidis Hispanisque ad præsidium simul castrorum simul Capuæ relictis, cum cetero exercitu ad lacum Averni per speciem sacrificandi, re ipsa ut tentaret Puteolos, quodque ibi præsidii erat, descendit. Maximus, postquam Hannibalem Arpis profectum, et regredi in Campaniam, adlatum est, nec die nec nocte intermisso itinere, ad exercitum redit: et Ti. Gracchum ab Luceria Beneventum copias admove, Q. Fabium prætorem (is filius consulis erat) Luceriam Graccho succedere jubet. In Siciliam eodem tempore duo prætores profecti, P. Cornelius ad exercitum, Otacilius, qui maritimæ oræ rei que navali præesset; et ceteri in suas quisque provincias profecti: et, quibus prorogatum imperium erat, easdem, quas priore anno, regiones obtinuerunt.

XIII. Ad Hannibalem, quum ad lacum Averni esset, quinque nobiles juvenes ab Tarento venerunt, partim ad Trasimenum lacum, partim ad Cannas capti, dimissique domos cum eadem comitate, qua usus adversus omnes Romanorum socios Pœnus fuerat. Ii, memores beneficiorum ejus perpulisse magnam partem se juventutis Tarentinæ, referunt, ut Hannibalis amicitiam ac societatem, quam populi Romani, malent; legatosque ab suis missos rogare Hannibalem, ut exercitum propius Tarentum admoveat. Si signa ejus, si castra conspecta a Tarento sint, haud ullam intercessuram moram, quin urbs dedatur. In potestate juniorum plebem, in manu plebis rem Tarentinam esse, Hannibal conlaudatos eos, oneratosque ingentibus promissis, domum ad cœpta maturanda redire jubet: se in tempore adfuturum esse. Hac cum spe dimissi Tarentini. Ipsum ingens cupido incesserat

U. C. 598.
A. C. 214.

Legati Tarentini ad Hannibalem.

U. C. 538. Tarenti potiundi. Urbem esse videbat, quum opulentam nobilemque, tum maritimam, et in Macedoniam opportune versam : regemque Philippum hunc portum, si transiret in Italiam, quum Brundisium Romani haberent, petiturum. Sacro inde perpetrato, ad quod venerat, et, dum ibi moratur, pervasato agro Cumano usque ad Miseni promontorium, Puteolos repente agmen convertit, ad obprimendum præsidium Romanum. Sex millia hominum erant, et locus munimento quoque, non natura modo, tutus. Triduum ibi moratus Pœnus, ab omni parte tentato præsidio, deinde, ut nihil procedebat, ad populandum agrum Neapolitanum, magis ira quam potiundæ urbis spe, processit. Adventu ejus in propinquum agrum Nolana mota est plebs, jam diu aversa ab Romanis et infesta senatui suo : itaque legati ad arcessendum Hannibalem, cum haud dubio promisso tradendæ urbis, venerunt. Prævenit inceptum eorum Marcellus consul, a primoribus adiectus. Die uno Suessulam a Calibus, quum Vultur-nus amnis trajicientem moratus esset, contenderat : inde proxima nocte sex millia peditum, equitesque trecentos, qui præsidio senatui essent, Nola intro-misit : et, uti a consule omnia in pigre facta sunt ad præoccupandam Nola, ita Hannibal tempus terebat ; bis jam ante nequidquam tentata re, segnior ad credendum Nolanis factus.

Hannonis
et Gracchi
exercitus
ad Bene-
ventum.

XIV. Iisdem diebus et Q. Fabius consul ad Casilinum tentandum, quod præsidio Punico tenebatur, venit ; et ad Beneventum, velut ex composito, parte altera Hanno ex Bruttiis cum magna peditum equitumque manu, altera Ti. Gracchus ab Luceria accessit : qui primo oppidum intravit. Deinde, ut Han-

nonem tria millia ferme ab urbe ad Calorem fluvium U. C. 538.
 castra posuisse, et inde agrum populari audivit, et A. C. 214.
 ipse, egressus mœnibus, mille ferme passus ab hoste
 castra locat, ibique concionem militum habuit. Le-
 giones magna ex parte volonum habebat; qui jam
 alterum annum libertatem tacite mereri, quam pos-
 tulare palam, maluerant. Senserat tamen hibernis Volones.
 egrediens murmur in agmine esse quærentium, *en*
umquam liberi militaturi essent? scripseratque sena-
 tui, non tam quid desiderarent, quam quid meru-
 issent: *bona fortique opera eorum se ad eam diem*
usum: neque ad exemplum justi militis quidquam eis,
præter libertatem, deesse. De eo permissum ipsi erat,
 faceret, quod e republica duceret esse. Itaque prius,
 quam cum hoste manum consereret, pronunciat;
tempus venisse eis libertatis, quam diu sperassent, po-
tiundæ: postero die signis conlatis dimicaturum puro
ac patenti campo, ubi sine ullo insidiarum metu vera
virtute geri res posset. Qui caput hostis retulisset, cum
se extemplo liberum jussurum esse: qui loco cessisset,
in eum servili supplicio animadversurum. Suam cui-
que fortunam in manu esse: libertatis auctorem eis
non se fore solum, sed consulem M. Marcellum, sed
universos Patres; quos, consultos ab se de libertate eo-
rum, sibi permisisse. Literas inde consulis ac sena-
 tusconsultum recitavit. Ad quæ clamor cum ingenti
 adsensu est sublatus: pugnam poscebant, signum-
 que ut daret extemplo, ferociter instabant. Grac-
 chus, prælio in posterum diem pronunciato, concio-
 nem dimisit. Milites læti, præcipue quibus merces
 navatæ in unum diem operæ libertas futura erat,
 armis expediendis quod reliquum consumunt.

Gracchus
 iis liberta-
 tem pro-
 mittit, qui
 capita hos-
 tium retu-
 lissent.

XV. Postero die, ubi signa cœperunt canere, pri-

U. C. 538. mi omnium parati instructique ad prætorium conve-
 A. C. 214. niunt. Sole orto, Gracchus in aciem copias educit :
 Acris pu- nec hostes moram dimicandi fecerunt. Decem et
 gna. septem millia peditum erant, maxima ex parte Brut-
 tii ac Lucani : equites mille ducenti ; inter quos
 pauci admodum Italici, ceteri Numidæ fere omnes
 Maurique. Pugnatum est et acriter, et diu : quatuor
 horis neutro inclinata est pugna : nec alia magis Ro-
 manum inpediebat res, quam capita hostium pretia
 libertati facta. Nam ut quisque hostem inpigre oc-
 ciderat, primum capite ægre inter turbam tumultum-
 que abscidendo tempus terebat : deinde, occupata
 dextra tenendo caput, fortissimus quisque pugnator
 esse desierat : segnibus ac timidis tradita pugna e-
 rat. Quod ubi tribuni militum Graccho nunciave-
 runt, *neminem stantem jam vulnerari hostem, carnifi-*
cari jacentes, et in dextris militum pro gladiis humana
capita esse : signum dari propere jussit, projicerent
capita, invaderentque hostem. Claram satis et insig-
nem virtutem esse : nec dubiam libertatem futuram
strenuis viris. Tum redintegrata pugna est, et eques
etiam in hostem emissus. Quibus quum inpigre
Numidæ concurrissent, nec segnior equitum, quam
peditum, pugna esset, iterum in dubium adducta res.
Quum utrimque duces, Romanus Bruttium Luca-
numque, toties a majoribus suis victos subactosque ;
Pœnus mancipia Romana et ex ergastulo militem,
verbis obtereret ; postremo pronunciat Gracchus,
esse nihil, quod de libertate sperarent, nisi eo die fusi
fugatique hostes essent.

Romani
vincunt.

XVI. Ea demum vox ita animos accendit, atque,
 renovato clamore, velut alii repente facti, tanta vi se
 in hostem intulerunt, ut sustineri ultra non possent.

Primo antesignani Pœnorum, deinde signa pertur- U.C. 538.
 bata, postremo tota impulsæ acies; inde haud dubie A.C. 214.
 terga data, ruuntque fugientes in castra, adeo pavidī
 trepidique, ut ne in portis quidem aut vallo quis-
 quam restiterit, ac prope continenti agmine Romani
 insecuti, novum de integro prælium inclusi hostium
 vallo ediderint. Ibi sicut pugna inpeditiore in angus-
 tiis, ita cædes atrocior fuit: et adjuvare captivi, qui,
 rapti inter tumultum ferro, conglobati et ab tergo
 ceciderunt Pœnos, et fugam inpedierunt. Itaque
 minus duo millia hominum ex tanto exercitu, et ea
 major pars equitum, cum ipso duce effugerunt: alii
 omnes cæsi aut capti: capta et signa duodequadra-
 ginta. Ex victoribus duo millia ferme cecidere:
 præda omnis (præterquam hominum captorum) mi-
 liti concessa est: et pecus exceptum est, quod intra
 dies triginta domini cognovissent. Quum præda o-
 nusti in castra redissent, quatuor millia ferme volo-
 num militum, qui pugnaverant segnius, nec in cas-
 tra inruperant simul, metu pœnæ collem haud pro-
 cul castris ceperunt: postero die per tribunos mili-
 tum inde deducti, concione militum advocata a
 Graccho, superveniunt. Ubi quum proconsul vete-
 res milites primum, prout cujusque virtus atque ope-
 ra in ea pugna fuerat, militaribus donis donasset,
 tunc quod ad volones adtineret, *omnes, ait, malle lau-* Volonibus
datos a se, dignos indignosque, quam quemquam eo die libertas da-
castigatum esse. Quod bonum, faustum, felicemque rei- tur.
publicæ ipsisque esset, omnes eos liberos esse jubere. Ad
 quam vocem quum clamor ingenti alacritate sublatus
 esset, ac nunc complexi inter se gratulantesque, nunc
 manus ad cælum tollentes, bona omnia populo Ro-
 mano Gracchoque ipsi precarentur; tum Gracchus:

U. C. 538. *Priusquam omnes jure libertatis æquassem, inquit, ne-*
 A. C. 214. *minem nota strenui aut ignavi militis notasse volui.*
Nunc, exsoluta jam fide publica, ne discrimen omne vir-
tutis ignaviæque pereat, nomina eorum, qui, detracta-
tæ pugnae memores, secessionem paullo ante fecerunt,
referri ad me jubebo: citatosque singulos jurejurando
adigam, nisi quis morbus caussa erit, non aliter, quam
stantes, cibum potionemque, quoad stipendia facient,
capturos esse. Hanc multam ita æquo animo feretis,
si reputabitis, nulla ignaviæ nota leviorē vos designari
potuisse. Signum deinde conligendi vasa dedit: mi-
litesque prædam portantes agentesque, per lasciviam
ac jocum, ita ludibundi Beneventum rediere, ut ab
epulis per celebrem festumque diem actis, non ex
acie, reverti viderentur. Beneventani omnes turba
effusa quum obviam ad portas exissent, complecti
militēs, gratulari, vocare in hospitium. Adparata
convivia omnibus in propatulo ædium fuerant: ad
ea invitabant, Gracchumque orabant, ut epulari per-
mitteret militibus. Et Gracchus ita permisit, in
publico epularentur omnes. Ante suas quibusque
fores prolata omnia: pileati, aut lana alba velatis
capitibus volones epulati sunt; alii adcubantes, alii
stantes, qui simul ministrabant vescebanturque.
Digna res visa, ut simulacrum celebrati ejus diei
Gracchus, postquam Romam rediit, pingi juberet in
æde Libertatis, quam pater ejus in Aventino ex
multaticia pecunia faciendam curavit dedicavitque.

Pugna Mar-
cellum in-
ter et Han-
nibalem.

XVII. Dum hæc ad Beneventum geruntur, Han-
 nibal, depopulatus agrum Neapolitanum, ad Nolam
 castra movet: quem ubi adventare consul sensit,
 Pomponio proprætore cum eo exercitu, qui super
 Suessulam in castris erat, adcito, ire obviam hosti

parat, nec moram dimicandi facere. C. Claudium U. C. 538.
 Neronem cum robore equitum silentio noctis per A. C. 214.
 aversam maxime ab hoste portam emittit : circum-
 vectumque occulte subsequi sensim agmen hostium
 jubet, et, quum coortum prælium videret, ab tergo
 se objicere. Id errore viarum, an exiguitate tempo-
 ris, Nero exsequi non potuerit, incertum est. Ab-
 sente eo quum prælium commissum esset, superior
 quidem haud dubie Romanus erat : sed, quia equi-
 tes non adfuere in tempore, ratio compositæ rei tur-
 bata est : non ausus insequi cedentes Marcellus, vin-
 centibus suis signum receptui dedit. Plus tamen
 duo millia hostium eo die cæsa traduntur : Romani
 minus quadringentis. Solis fere occasu Nero, diem
 noctemque nequidquam fatigatis equis hominibus-
 que, ne viso quidem hoste rediens, adeo graviter est
 ab consule increpitus, ut per eum stetisse diceret,
 quo minus accepta ad Cannas redderetur hosti cla-
 des. Postero die Romanus in aciem descendit :
 Pœnus, tacita etiam confessione victus, castris se
 tenuit. Tertio die silentio noctis, omissa spe Nolæ
 potiundæ, rei numquam prospere tentatæ, Tarentum
 ad certiores spes prodicionis proficiscitur.

XVIII. Nec minore animo res Romana domi, Censura
 quam militiæ, gerebatur. Censores, vacui ab ope- Romæ se-
 rum locandorum cura, propter inopiam ærarii, ad vere exer-
 citata.
 mores hominum regendos animum adverterunt, cas-
 tigandaque vitia ; quæ, velut diutinis morbis ægra
 corpora ex se gignunt, nata bello erant. Primum
 eos citaverunt, qui post Caunensem pugnam rem-
 publicam deseruisse, Italiaque excessisse velle di-
 cebantur : princeps eorum L. Cæcilius Metellus
 quæstor tum forte erat. Jusso deinde eo ceterisque

U. C. 538. ejusdem noxæ reis causam dicere, quum purgari
 A. C. 214. nequissent, pronunciarunt, verba orationemque eos
 adversus rempublicam habuisse, quo conjuratio deserendæ Italiæ causa fieret. Secundum eos citati nimis callidi exsolvendi jurisjurandi interpretes: qui captivorum, ex itinere regressi clam in castra Hannibalis, solutum, quod juraverant redituros, rebantur. His superioribusque illis equi ademti, qui publicum equum habebant: tribuque moti, ærarii omnes facti. Neque senatu modo aut equestri ordine regendo cura se censorum tenuit: nomina omnium ex juniorum tabulis excerpterunt, qui quadriennio non militassent, quibus neque vacatio justa militiæ, neque morbus causa fuisset. Et ea supra duo millia nominum in ærarios relata, tribuque omnes moti. Additumque inerti censoriæ notæ triste senatusconsultum: ut ii omnes, quos censores notassent, pedibus mererent, mitterenturque in Siciliam ad Canensis exercitus reliquias, cui militum generi non prius, quam pulsus Italia hostis esset, finitum stipendiorum tempus erat. Quum censores, ob inopiam ærarii, se jam locationibus abstinerent ædium sacrarum tuendarum, curuliumque equorum præbendorum, ac similium his rerum; convenere ad eos frequentes, qui hastæ hujus generis adsueverant: hortatique censores, ut omnia perinde agerent, locarent, ac si pecunia in ærario esset. Neminem, nisi bello confecto, pecuniam ab ærario petiturum esse. Convenere deinde domini eorum, quos Ti. Sempronius ad Beneventum manu emiserat: arcessitosque se ab triumviris mensariis esse dixerunt, ut pretia serverum acciperent: ceterum non ante, quam bello confecto, accepturos esse. Quum hæc inclinatio

Benignitas
 privatorum
 erga rem-
 publicam.

animorum plebis ad sustinendam inopiam ærarii fieret; pecuniæ quoque pupillares primo, deinde viduarum, cœptæ conferri: nusquam eas tutius sanctiusque deponere credentibus, qui deferebant, quam in publica fide: inde, si quid emtum paratumque pupillis ac viduis foret, a quæstore perscribebatur. Manavit ea privatorum benignitas ex urbe etiam in castra, ut non eques, non centurio stipendium acciperent, mercenariumque increpantes vocarent, qui accepisset.

XIX. Q. Fabius consul ad Casilinum castra habebat, quod duûm millium Campanorum, et septingentorum militum Hannibalis tenebatur præsidio. Præerat Statius Metius, missus ab Cn. Magio Atellano: qui eo anno Medixtuticus erat, servitiaque et plebem promiscue armabat, ut castra Romana invaderet, intento consule ad Casilinum obpugnandum. Nihil eorum Fabium fefellit. Itaque Nolam ad collegam mittit, *altero exercitu, dum Casilinum obpugnatur, opus esse, qui Campanis obponatur. Vel ipse, relicto Nolæ præsidio modico, veniret: vel, si eum Nola teneret, et necdum securæ res ab Hannibale essent, se Ti. Gracchum proconsulem a Benevento adciturum.* Hoc nuncio Marcellus, duobus militum millibus Nolæ in præsidio relictis, cum cetero exercitu Casilinum venit, adventuque ejus Campani, jam moventes sese, quieverunt. Ita a duobus consulibus Casilinum obpugnari cœptum: ubi quum multa, succedentes temere mœnibus, Romani milites acciperent vulnera, neque satis inceptis succederet, Fabius, omittendam rem parvam ac juxta magnis difficilem, abscedendumque inde censebat, quum res majores instarent. Marcellus, multa magnis ducibus sicut non adgre-

U. C. 538.
A. C. 214.

Fabius Casilinum obsidet.

Marcellus eodem cum exercitu venit.

U. C. 538. dienda, ita semel adgressis non dimittenda esse, di-
 A. C. 214. cendo, quia magna famæ momenta in utramque par-
 tem fierent, tenuit, ne irritò incepto abiretur. Vineæ
 inde omniaque alia operum machinationumque genera
 quum admoventur, Campanique Fabium orarent,
 ut abire Capuam tuto liceret; paucis egressis, Mar-
 cellus portam, qua egrediebantur, occupavit, cædes-
 que promiscue omnium circa portam primo, deinde,
 inruptione facta, etiam in urbe fieri cœpta est. Quin-
 quaginta fere primo egressi Campanorum, quum ad
 Fabium confugissent, præsidio ejus Capuam perve-
 nerunt. Casilinum, inter conloquia cunctationem-
 que petentium fidem, per occasionem captum est :
 captivi, quique Campanorum, quique Hannibalis mi-
 litum erant, Romam missi, atque ibi in carcere in-
 clusi sunt : oppidanorum turba per finitimos populos
 in custodiam divisa.

Casilinum
 captum.

XX. Quibus diebus a Casilino, re bene gesta, re-
 cessum est, eis Gracchus in Lucanis aliquot cohortes,
 in ea regione conscriptas, cum præfecto sociorum in
 agros hostium prædatum misit : eos effuse palatos
 Hanno adortus, haud multo minorem, quam ad Be-
 neventum acceperat, reddidit hosti cladem, atque in
 Bruttios raptim, ne Gracchus adsequeretur, concessit.
 Consules, Marcellus retro, unde venerat, Nolam re-
 dit; Fabius in Samnium ad populandos agros reci-
 piendasque armis, quæ defecerant, urbes processit.
 Caudinus Samnis gravius devastatus; perusti late
 agri, prædæ pecudum hominumque actæ : oppida vi-
 capta, Compulteria, Telesia, Compsa, Melæ, Ful-
 fulæ et Orbitanium : ex Lucanis Blandæ : Apulo-
 rum Æcæ obpugnatae. Millia hostium in his urbibus
 viginti quinque capta, aut occisa : et recepti perfugæ

trecenti septuaginta; quos quum Romam misisset consul, virgis in comitio cæsi omnes, ac de saxo dejecti. Hæc a Q. Fabio intra paucos dies gesta. Marcellum ab gerundis rebus valetudo adversa Nolæ tenuit. Et a prætore Q. Fabio, cui circa Luceriam provincia erat, Accua oppidum per eos dies vi captum: stativaque ad Ardoneas communita. Dum hæc aliis locis ab Romanis geruntur, jam Tarentum pervenerat Hannibal, cum maxima omnium, quacumque ierat, clade. In Tarentino demum agro pacatum incedere agmen cœpit: nihil ibi violatum, neque usquam via excessum est; adparebatque, non id modestia militum aut ducis, nisi ad conciliandos Tarentinorum animos, fieri. Ceterum quum propemodo muris accessisset, nullo ad conspectum primi agminis, ut rebatur, motu facto, castra ab urbe ferme passus mille locat. Tarenti, triduo ante, quam Hannibal ad mœnia accederet, a M. Valerio proprætore, qui classi ad Brundisium præerat, missus M. Livius, primore juventute conscripta, dispositisque ad omnes portas, circaque muros, qua res postulabat, stationibus, die ac nocte plurimum intentus, neque hostibus, neque dubiis sociis loci quidquam præbuit ad tentandum. Quare diebus aliquot frustra ibi absumtis, Hannibal, quum eorum nemo, qui ad lacum Averni adissent, aut ipsi venirent, aut nuncium literasve mitterent, vana promissa se temere secutum cernens, castra inde movit. Tum quoque, intacto agro Tarentino, (quamquam simulata lenitas nihil dum profuerat, tamen spe labefactandæ fidei haud absistens) Salapiam ut venit, frumentum ex agris Metapontino atque Heracliensi (jam media æstas exacta erat, et hibernis placebat locus) comportat. Prædatum inde

U. C. 538.

A. C. 214.

Perfugæ
virgis cæsi
et de saxo
dejecti.Tarentum
tentat frustra
Hannibal.

U. C. 538. Numidæ Maurique per Sallentinum agrum proximosque Apuliæ saltus dimissi: unde ceteræ prædæ haud multum, equorum greges maxime abacti: e quibus ad quatuor millia domanda equitibus divisa.

Rerum
status in
Sicilia.

XXI. Romani quum bellum nequaquam contemnendum in Sicilia oriretur, morsque tyranni duces magis in pigros dedisset Syracusanis, quam caussam aut animos mutasset, M. Marcello alteri consulum eam provinciam decernunt. Secundum Hieronymi cædem primo tumultuatum in Leontinis apud milites fuerat, vociferatumque ferociter, parentandum regi sanguine conjuratorum esse. Deinde libertatis restitutæ dulce auditu nomen crebro usurpatum, spes facta ex pecunia regia largitionis, militiæque fungendæ potioris ducibus, et relata tyranni fœda scelera fœdioresque libidines, adeo mutavere animos, ut insepultum jacere corpus paullo ante desiderati regis paterentur. Quum ceteri ex conjuratis ad exercitum obtinendum remansissent, Theodotus et Sosis regiis equis, quanto maximo cursu poterant, ut ignaros omnium regios obprimerent, Syracusas contendunt: ceterum prævenerat non fama solum, (qua nihil in talibus rebus est celerius) sed nuncius etiam ex regiis servis. Itaque Andranodorus et Insulam, et arcem, et alia, quæ poterat, quæque opportuna erant, præsidiiis firmarat. Hexapylo Theodotus ac Sosis post solis occasum jam obscura luce invecti, quum cruentam regiam vestem atque insigne capitis ostentarent, travecti per Tycham, simul ad libertatem, simul ad arma vocantes, in Achradinam convenire jubent. Multitudo pars procurrat in vias, pars in vestibulis stat, pars ex tectis fenestrisque prospectant, et, quid rei sit, rogitant. Omnia luminibus

Andranodorus ar-
cem Sy-
racusis
occupat.

conlucent, strepituque vario complentur: armati U. C. 538.
 locis patentibus congregantur: inermes ex Olympii A. C. 214.
 Jovis templo spolia Gallorum Illyriorumque, dono
 data Hieroni a populo Romano, fixaque ab eo, de-
 trahunt, precantes Jovem, ut volens propitius præ-
 beat sacra arma, pro patria, pro Deûm delubris, pro
 libertate sese armantibus. Hæc quoque multitudo,
 stationibus per principes regionum urbis dispositis,
 adjungitur. In Insula inter cetera Andranodorus
 præsidiis firmat horrea publica. Locus, saxo qua-
 drato septus, atque arcis in modum emunitus, capitur
 ab juventute, quæ præsidio ejus loci adtributa erat,
 mittuntque nuncios in Achradinam, horrea frumen-
 tumque in senatus potestate esse.

XXII. Luce prima populus omnis armatus iner-
 misque in Achradinam ad curiam convenit: ibi pro
 Concordiæ ara, quæ in eo sita loco erat, ex princi-
 pibus unus nomine Polyænus concionem et liberam Polyæni
 oratio li-
 bera et
 moderata.
 et moderatam habuit: *Servitudinis indignitatisque ho-
 mines expertos, adversus notum malum irritatos esse.*
*Discordia civilis quas inportet clades, audisse magis a
 patribus Syracusanos, quem ipsos vidisse. Arma quod
 inpigre ceperint, laudare: magis laudaturum, si non
 utantur, nisi ultima necessitate coacti. In præsentia
 legatos ad Andranodorum mitti placere, qui denuncient,
 ut in potestate senatus ac populi sit: portæ Insulæ pa-
 teant; recedat præsidium. Si tutelam alieni regni
 suum regnum velit facere, eundem se censere, multo
 acrius ab Andranodoro, quam ab Hieronymo, repeti li-
 bertatem. Ab hac concione legati missi sunt. Se- Legati mit-
 tuntur ad
 Andrano-
 dorum.
 natus inde haberi cœptus est: quod sicut, regnante
 Hierone, manserat publicum consilium, ita post
 mortem ejus, ante eam diem, nulla de re neque con-*

U. C. 538. vocati, neque consulti fuerant. Ut ventum ad An-
 A. C. 214. dranodorum est, ipsum quidem movebat et civium
 consensus, et quum aliæ occupatæ urbis partes, tum
 pars Insulæ, velut munitissima, prodita atque alie-
 nata. Sed evocatum eum ab legatis Damarata uxor,
 filia Hieronis, inflata adhuc regiis animis ac muliebri
 spiritu, admonet sæpe usurpatæ Dionysii tyranni
 vocis : qua, *pedibus tractum, non insidentem equo, re-
 linquere tyrannidem, dixerit, debere. Facile esse mo-
 mento, quo quis velit, cedere possessione magnæ for-
 tunæ : facere et parare eam, difficile atque arduum
 esse. Paullum sumeret spatii ad consultandum ab le-
 gatis : eo uteretur ad arcessendos ex Leontinis milites :
 quibus si pecuniam regiam pollicitus esset, omnia in po-
 testate ejus futura.* Hæc muliebria consilia Andrano-
 dorus neque tota adspersatus est, neque extemplo
 accepit : tutiorem ad opes adfectandas ratus esse
 viam, si in præsentia temporis cessisset. Itaque le-
 gatos renunciare jussit, futurum se in senatus ac
 populi potestate. Postero die luce prima, patefac-
 tis Insulæ portis, in forum Achradinæ venit : ibi in
 aram Concordiæ, ex qua pridie Polyænus conciona-
 tus erat, escendit : orationemque eam orsus est, qua
 primum cunctationis suæ veniam petivit. *Se enim
 clausus habuisse portas, non separantem suas res a pub-
 licis, sed strictis semel gladiis timentem, qui finis cædi-
 bus esset futurus : utrum, quod satis libertati foret,
 contenti nece tyranni essent, an, quicumque aut pro-
 pinquitate, aut adfinitate, aut aliquibus ministeriis re-
 giam contigissent, alienæ culpæ rei trucidarentur. Post-
 quam animadvertit, eos, qui liberassent patriam, ser-
 vare etiam liberatam velle, atque undique consuli in
 medium ; non dubitasse, quin et corpus suum, et cetera*

Oratio
 ejus ad
 Syracu-
 sanos.

omnia, quæ suæ fidei tutelæque essent, quoniam eum, U. C. 538.
 qui mandasset, suus furor absumsisset, patriæ restituere. A. C. 214.
 Conversus deinde ad interfectores tyranni, ac
 nomine adpellans Theodotum ac Sosim: *Facinus,*
 inquit, memorabile fecistis. *Sed, mihi credite, incho-*
ata vestra gloria, nondum perfecta, est; periculumque
ingens manet, nisi paci et concordiae consulitis, ne libera
efferratur respublica.

XXIII. Post hanc orationem claves portarum pecuniaeque regiae ante pedes eorum posuit: atque illo quidem die dimissi ex concione læti, circa omnia fana Deum supplicaverunt cum conjugibus ac liberis: postero die comitia prætoribus creandis habita. Creatus in primis Andranodorus; ceteri magna ex parte interfectores tyranni: duos etiam absentes, Prætores Syracusis creantur. Sopatrum ac Dinomenem, fecerunt. Qui, auditis, quæ Syracusis acta erant, pecuniam regiam, quæ in Leontinis erat, Syracusas devectam, quæstoribus ad id ipsum creatis tradiderunt: et ea, quæ in Insula erat et Achradina, tradita est; murique ea pars, quæ ab cetera urbe nimis firmo munimento intersepiebat Insulam, consensu omnium dejecta est: secutæ et cæteræ res hanc inclinationem animorum ad libertatem. Hippocrates atque Epicydes, audita morte tyranni, quam Hippocrates, etiam nuncio interfecto, celare voluerat, deserti a militibus, quia id tutissimum ex præsentibus videbatur, Syracusas redire: Hippocrates et Epicydes redire velle se ad Hannibalem simulant. ubi ne suspecti obversarentur, tamquam novandi res aliquam occasionem quærentes, prætores primum, dein per eos senatum adeunt. *Ab Hannibale se missos prædicant ad Hieronymum, tamquam amicum ac socium: paruisse imperio ejus, cujus imperator suus voluerit: velle ad Hannibalem redire: ceterum, quum*

U. C. 539. *iter tutum non sit, vagantibus passim per totam Sici-*
 A. C. 214. *liam Romanis armis, petere, ut præsidi dent aliquid,*
quo Locros in Italiam perducantur: gratiam magnam
eos parva opera apud Hannibalem inituros. Facile res
inpetrata: abire enim duces regios, quum peritos
militiæ, tum egentes eosdem atque audaces, cupie-
bant: sed, quod volebant, non, quam maturato opus
erat, naviter expediebant. Interim juvenes militares
et adsueti militibus, nunc apud eos ipsos, nunc apud
transfugas, quorum maxima pars ex navalibus sociis
Romanorum erat, nunc etiam apud infimæ plebis
homines, crimina serebant in senatum optimatesque:
ad moliri clam eos atque struere, ut Syracusæ per spe-
ciem reconciliatæ societatis in ditione Romanorum sint;
dein factio et pauci auctores fæderis renovati dominan-
tur.

Andrano-
dorus ty-
rannidem
adfectat.

XXIV. His audiendis credendisque opportuna multitudo, major in dies, Syracusas confluebat: nec Epicydi solum spem novandarum rerum, sed Andranodoro etiam, præbebat. Qui, fessus tandem uxoris vocibus, monentis, *Nunc illud esse tempus occupandi res, dum turbata omnia nova atque incondita libertate essent, dum regiis stipendiis pastus obversaretur miles, dum ab Hannibale missi duces adsueti militibus juvare possent incepta*, cum Themisto, cui Gelonis filia nupta, rem consociatam paucos post dies Aristoni cuidam tragico actori, cui et alia arcana committere adsuerat, incaute aperit. Huic et genus et fortuna honesta erant, nec ars, quia nihil tale apud Græcos pudori est, ea deformabat: itaque, fidem potiore ratus, quam patriæ debebat, indicium ad prætores defert. Qui, ubi rem haud vanam esse certis indiciis compererunt, consultis senioribus, et

auctoritate eorum præsidio ad fores posito, ingressos U. C. 538.
 curiam Themistum atque Andranodorum interfece- A. C. 214.
 runt: et, quum tumultus ab re in speciem atrocior, Occiditur
 caussam aliis ignorantibus, ortus esset, silentio tan- cum The-
 dem facto, indicem in curiam introduxerunt. Qui
 quum ordine omnia edocuisset. et principium con-
 jurationis factum ab Harmoniæ Gelonis filiæ nuptiis,
 quibus Themisto juncta esset; Afrorum Hispano-
 rumque auxiliares instructos ad cædem prætorum
 principumque aliorum; bonaque eorum prædæ fu-
 tura interfectoribus pronunciatum; jam mercenari-
 orum manum adsuetam imperiis Andranodori para-
 tam fuisse ad Insulam rursus occupandam; singula
 deinde, quæ per quosque agerentur, totamque viris
 armisque instructam conjurationem ante oculos po-
 suisset; senatui quidem tam jure cæsi, quam Hie-
 ronymus, videbantur. Ante curiam variæ atque in-
 certæ rerum multitudinis clamor erat: quam, fero-
 citer minitantem in vestibulo curiæ, corpora conju-
 ratorum eo metu compresserunt, ut silentes integram
 plebem in concionem sequerentur. Sopatro manda-
 tum ab senatu et ab collegis, ut verba faceret.

XXV. Is, tamquam reos ageret, ab anteacta vita
 orsus, quæcumque post Hieronis mortem sceleste at-
 que inpie facta essent, Andranodorum ac Themistum
 arguit fecisse. *Quid enim sua sponte fecisse Hierony-
 mum puerum, ac vixdum pubescentem facere potuisse?*

Tutores ac magistros ejus sub aliena invidia regnasse: Sopatri
itaque aut ante Hieronymum, aut certe cum Hieronymo prætoris
perire eos debuisse. At illos, debitos jam morti desti- oratio in
natosque, alia nova scelera post mortem tyranni moli- tyrannos.
tos: palam primo, cum clausis Andranodorus Insulæ
portis hæreditatem regni creverit, quæque procurator

U. C. 538. tenuerat, pro domino possederit; proditus deinde ab
 A. C. 214. eis, qui in Insula erant, circumsessus ab universa civi-
 tate, quæ Achradinam tenuerit, nequidquam palam at-
 que aperte petitum regnum, etiam et dolo adfectare co-
 natus sit, et ne beneficio quidem atque honore potuerit
 vinci, quum inter liberatores patriæ insidiator ipse li-
 bertatis creatus esset prætor. Sed animos eis regios
 conjuges regias fecisse, alteri Hieronis, alteri Gelonis,
 filias nuptas. Sub hanc vocem ex omnibus partibus
 concionis clamor oritur, nullam earum vivere de-
 bere, nec quemquam superesse tyrannorum stirpis.
 Hæc natura multitudinis est; aut servit humiliter,
 aut superbe dominatur: libertatem, quæ media est,
 nec spernere modice, nec habere sciunt: et non
 ferme desunt irarum indulgentes ministri, qui avidos
 atque intemperantes plebeiorum animos ad sangui-
 nem et cædes irritent. Sicut tum extemplo prætores
 rogationem promulgarunt: acceptaque pene prius,
 quam promulgata, est, ut omnis regia stirps inter-
 ficeretur: missique a prætoribus Damaratam Hiero-
 nis, et Harmoniam Gelonis filias, conjuges Audranodo-
 ri et Themisti, interfecerunt.

Stirps re-
 gia interfi-
 citur.

XXVI. Heraclea erat filia Hieronis, uxor Zoipi-
 pi; qui, legatus ab Hieronymo ad regem Ptolemæum
 missus, voluntarium consciverat exsilium. Ea quum
 ad se quoque venire præscisset, in sacrarium ad pe-
 nates confugit, cum duabus filiabus virginibus, reso-
 lutis crinibus, miserabilique alio habitu: et ad ea
 addidit preces, nunc per memoriam Hieronis patris,
 Gelonisque fratris, ne se innoxiam invidia Hieronymi
 conflagrare sinerent. Nihil se ex regno illius, præter
 exsilium viri, habere; neque fortunam suam eandem
 vivo Hieronymo fuisse, quam sororis; neque interfecto

Preces
 Heracleæ
 Hieronis
 filiae.

eo causam eandem esse. Quid? quod, si Andranodoro consilia processissent, illa cum viro fuerit regnatura; sibi cum ceteris serviendum. Si quis Zoippo nunciet, interfectum Hieronymum, ac liberatas Syracusas, cui dubium esse, quin extemplo consensurus sit narim, atque in patriam rediturus? Quantum spes hominum fallit! In liberata patria conjugem ejus ac liberos de vita dimicare; quid obstantes libertati, aut legibus? Quod ab se cuiquam periculum, a sola ac prope vidua, et puellis in orbitate degentibus, esse? At enim periculi quidem nihil ab se timeri: invisam tamen regiam stirpem esse. Ablegarent ergo procul ab Syracusis Siciliaque, et asportari Alexandriam juberent, ad virum uxorem, ad patrem filias. Aversis auribus animisque, casse ne tempus tereretur, ferrum quosdam expedientes cernebat: tum, omissis pro se precibus, puellis ut saltem parcerent, orare institit: a qua ætate etiam hostes iratos abstinere: ne, tyrannos ulciscendo, quæ odissent, scelera ipsi imitarentur. Inter hæc abstractam a penetralibus jugulant: in virgines deinde, respersas matris cruore, inpetum faciunt: quæ, alienata mente simul luctu metuque, velut captæ furore, eo cursu se ex sacrario proripuerunt, ut, si effugium patuisset in publicum, inpleturæ urbem tumultu fuerint. Tum quoque haud magno ædium spatio, inter medios tot armatos, aliquoties integro corpore evaserunt: tenentibusque, quum tot ac tam validæ elucandæ manus essent, sese eripuerunt: tandem, vulneribus confectæ, quum omnia replessent sanguine, exanimes conruerunt; cædemque per se miserabilem miserabiliorem casus fecit, quod paullo post nuncius venit, mutatis repente ad misericordiam animis, ne interficerentur. Ira deinde ex misericordia orta,

U. C. 538. quod adeo festinatum ad supplicium, neque locus
 A. C. 214. pœnitendi, aut regressus ab ira relictus esset : itaque
 fremere multitudo, et in locum Andranodori ac The-
 misti (nam ambo prætores fuerant) comitia poscere :
 quæ nequaquam ex sententia prætorum futura es-
 sent.

Epicyles
 et Hippo-
 crates
 prætores
 fiunt.

XXVII. Statutus est comitiis dies : quo, neco-
 pinantibus omnibus, unus ex ultima turba Epicydem
 nominavit, tum inde alius Hippocratem : crebriores
 deinde eæ voces, et cum haud dubio adsensu mul-
 titudinis esse. Et erat confusa concio, non popula-
 ri modo, sed militari quoque turba, magna ex parte
 etiam perfugis, qui omnia novare cupiebant, per-
 mixtis. Prætores dissimulare primo, et trahenda re
 esse : postremo victi consensu, et seditionem metu-
 entes, pronunciant eos prætores. Nec illi primo
 statim creati nudare, quid vellent : quamquam ægre
 ferebant, et de induciis dierum decem legatos isse ad
 Ap. Claudium, et, inpetratis eis, alios, qui de fœdere
 antiquo renovando agerent, missos. Ad Murgan-
 tiam tum classem navium centum Romanus habe-
 bat, quonam evaderent motus ex cædibus tyranno-
 rum orti Syracusis, quove eos ageret nova atque in-
 solita libertas, opperiens. Per eosdem dies quum
 ad Marcellum, venientem in Siciliam, legati Syracu-
 sani missi ab Appio essent, auditis conditionibus
 pacis, Marcellus, posse rem convenire ratus, et ipse
 legatos Syracusas, qui coram cum prætoribus de re-
 novando fœdere agerent, misit. Et jam ibi nequa-
 quam eadem quies et tranquillitas erat : postquam
 Punicam classem accessisse Pachynum adlatum est,
 demto timore Hippocrates et Epicyles, nunc apud
 mercenarios milites, nunc apud transfugas, prodi

Turbæ
 Syracusis.

Romano Syracusas, criminabantur. Ut vero Ap- U.C. 538.
 pius naves ad ostium portus, quo aliæ partis homi- A. C. 214.
 nibus animus accederet, in statione habere cœpit,
 ingens in speciem criminibus vanis accesserat fides :
 ac primo etiam tumultuose decurrerat multitudo ad
 prohibendos, si in terram egrederentur.

XXVIII. In hac turbatione rerum in concionem
 vocari placuit : ubi quum alii alio tenderent, nec
 procul seditione res esset, Apollonides principum
 unus orationem salutarem, ut in tali tempore, ha- Apolloni-
 buit ; *nec spem salutis, nec perniciem propiorem um- dæ saluta-*
quam civitati ulli fuisse. Si enim uno animo omnes ris oratio.
vel ad Romanos, vel ad Karthaginienses inclinent, nul-
lius civitatis statum fortunatiorem beatioremve fore :
si alii alio trahant res, non inter Pœnos Romanosque
bellum atrocius fore, quam inter ipsos Syracusanos ;
quum intra eosdem muros pars utraque suos exercitus,
sua arma, suos habitura sit duces. Itaque, ut omnes
idem sentiant, summa vi agendum esse : utra societas
sit utilior, eam longe minorem ac levioris momenti con-
sultationem esse : sed tamen Hieronis potius, quam
Hieronymi, auctoritatem sequendum in sociis legendis,
vel quinquaginta annis feliciter expertam amicitiam
nunc incognitæ, quondam infideli, præferendam. Esse
etiam momenti aliquid ad consilium, quod Karthagini-
ensibus ita pax negari possit, ut non utique in præsentia
bellum cum eis geratur : cum Romanis exemplo aut
pacem, aut bellum habendum. Quo minus cupiditatis
ac studii visa est oratio habere, eo plus auctoritatis
habuit. Adjectum est prætoribus ac delectis sena-
torum militare etiam consilium : jussi et duces ordi-
num præfectique auxiliorum simul consulere. Quum
sæpe acta res esset magnis certaminibus, postremo,
 Pax cum
 Romanis
 decernitur.

U. C. 538. quia belli cum Romanis gerendi ratio nulla adpare-
 A. C. 214. bat, pacem fieri placuit, mittique cum eis legatos ad
 rem confirmandam.

XXIX. Dies haud ita multi intercesserunt, quum
 ex Leontinis legati, præsidium finibus suis orantes,
 venerunt; quæ legatio peropportuna visa ad multi-
 tudinem inconditam ac tumultuosam exonerandam,
 ducesque ejus ablegandos. Hippocrates prætor du-
 cere eo transfugas jussus: secuti multi ex mercena-
 riis auxiliis, quatuor millia armatorum effecerunt.
 Et mittentibus et missis ea læta expeditio fuit: nam
 et illis, quod jam diu cupiebant, novandi res occasio
 data est; et hi, sentinam quamdam urbis rati ex-
 haustam, lætabantur: ceterum levaverunt modo in
 præsentia velut corpus ægrum, quo mox in gra-
 viorem morbum recideret. Hippocrates enim fini-
 tima provinciæ Romanæ primo furtivis excursio-
 nibus vastare cœpit: deinde, quum ad tuendos so-
 ciorum agros missum ab Appio præsidium esset,
 omnibus copiis inpetum in obpositam stationem cum
 cæde multorum fecit. Quæ quum essent nunciata
 Marcello, legatos extemplo Syracusas misit, qui pa-
 cis fidem ruptam esse dicerent: nec belli defuturam
 unquam caussam, nisi Hippocrates atque Epicydes
 non ab Syracusis modo, sed tota procul Sicilia, able-
 garentur. Epicydes, ne aut reus criminis absentis fra-
 tris præsens esset, aut deesset pro parte sua concitan-
 do bello, profectus et ipse in Leontinos, quia satis
 eos adversus populum Romanum concitatos cerne-
 bat, avertere etiam ab Syracusis cœpit. *Nam ita eos
 pacem pepigisse cum Romanis, ut, quicumque populi sub
 regibus fuissent, et suæ ditionis essent; nec jam libertate
 contentos esse, nisi etiam regnent ac dominantur. Re-*

Turbant
 rem com-
 positam
 Hippo-
 crates et
 Epicydes.

nunciandum igitur eis esse, *Leontinos quoque æquum* U. C. 538.
censere liberos esse ; vel quod in solo urbis suæ tyrannus A. C. 214.
ceciderit, vel quod ibi primum conclamatum ad liberta-
tem, relictisque regiis ducibus Syracusas sit concursum.
Itaque aut eximendum id de fœdere esse, aut legem eam
fœderis non accipiendam. Facile multitudini persua-
sum : legatisque Syracusanorum, et de cæde statio-
nis Romanæ querentibus, et Hippocratem atque
Epicypdem abire seu Locros, seu quo alio mallent,
dummodo Sicilia cederent, jubentibus, ferociter re-
sponsum est : *Neque mandasse sese Syracusanis, ut*
pacem pro se cum Romanis facerent : neque teneri alie-
nis fœderibus. Hæc ad Romanos Syracusani detule-
runt, abnuentes *Leontinos in sua potestate esse : ita-*
que integro secum fœdere bellum Romanos cum iis ges-
turos : neque sese defuturos ei bello ; ita ut in potes-
tatem redacti suæ rursus ditionis essent, sicut pax con-
venisset.

XXX. Marcellus cum omni exercitu profectus in Leontino-
Leontinos, Appio quoque adcito, ut altera parte ad- rum urbs a
grederetur, tanto ardore militum est usus ab ira in- Marcello
ter conditiones pacis interfectæ stationis, ut primo in- capta.
petu urbem expugnarent. Hippocrates atque Epicy-
des, postquam capi muros refringique portas videre,
in arcem sese cum paucis recepere : inde clam nocte.
Herbessum perfugiunt. Syracusanis, octo millium
armatorum agmine profectis domo, ad Mylam flu-
men nuncius obcurrit, captam urbem esse ; cetera
falsa mixta veris ferens : cædem promiscuam mili-
tum atque oppidanorum factam, nec quemquam pu-
berem arbitrari superesse : direptam urbem : bona
locupletium donata. Ad nuncium tam atrocem con-
stitit agmen ; concitatisque omnibus, duces, (erant

U. C. 538. autem Sosis ac Dinomenes) quid agerent, consulta-
 A. C. 214. bant. Terroris speciem haud vanam mendacio præ-
 buerant verberati ac securi percussi transfugæ ad
 duo millia hominum: ceterum Leontinorum mili-
 tumque aliorum nemo, post captam urbem, violatus
 fuerat: suaque omnia eis, nisi quæ primus tumultus
 captæ urbis absumserat, restituebantur. Nec ut
 Leontinos irent, proditos ad cædem commilitones
 querentes, perPELLI potuere, nec ut eodem loco cer-
 tiorem nuncium expectarent. Quum ad defectio-
 nem inclinatos animos cernerent prætores, sed eum
 motum haud diuturnum fore, si duces amentiae sub-
 lati essent; exercitum ducunt Megaram: ipsi cum
 paucis equitibus Herbessum proficiscuntur, spe, ter-
 ritis omnibus, per prodicionem urbis potiundæ: quod
 ubi frustra eis fuit inceptum, vi agendum rati, pos-
 tero die Megaris castra movent, ut Herbessum om-
 nibus copiis obpugnarent. Hippocrates et Epicy-
 des, non tam tutum prima specie, quam unum, spe
 undique abscissa, consilium esse rati, ut se militibus
 permitterent, et adsuetis magna ex parte sibi, et tum
 fama cædis commilitonum accensis, obviam agmini
 procedunt. Prima forte signa sexcentorum Creten-
 sium erant, qui apud Hieronymum meruerant sub
 eis, et Hannibalis beneficium habebant, capti ad
 Trasimenum inter Romanorum auxilia, dimissique:
 quos ubi ex signis armorumque habitu cognovere
 Hippocrates atque Epicydes, ramos oleæ ac vela-
 menta alia supplicum porrigentes, orare, *ut recipe-
 rent sese, receptosque tutarentur, neu proderent Syra-
 cusanis, a quibus mox ipsi trucidandi populo Romano
 dederentur.*

XXXI. *Enimvero, conclamant, bonum ut animum*

habere : omnem se cum illis fortunam subituros. In-
 ter hoc colloquium signa constiterant, tenebaturque
 agmen : necdum, quæ moræ causa foret, pervenerat
 ad duces : postquam Hippocratem atque Epicydem
 adesse pervasit rumor, fremitusque toto agmine
 erat haud dubie adprobantium adventum eorum ;
 extemplo prætores citatis equis ad prima signa per-
 rerunt, *Qui mos ille, quæ licentia Cretensium esset,*
rogitantes, colloquia serendi cum hoste, injussuque
prætorum miscendi eos agmini suo ? Comprehendi
 injicique catenas jusserunt Hippocrati : ad quam
 vocem tantus extemplo primum a Cretibus clamor
 est ortus, deinde exceptus ab aliis, ut facile, si ultra
 tenderent, adpareret, eis timendum esse. Solliciti
 incertique rerum suarum Megaram, unde profecti
 erant, referri signa jubent, nunciosque de statu præ-
 senti Syracusas mittunt. Fraudem quoque Hippo-
 crates addit, inclinatis ad omnem suspicionem ani-
 mis, et, Cretensium quibusdam ad itinera insidenda
 missis, velut interceptas literas, quas ipse composu-
 erat, recitat : *Prætores Syracusani consuli Marcello :*
secundum salutem, ut adsolet, scriptum erat : Recte
eum atque ordine fecisse, quod in Leontinis nulli peper-
cisset. Sed omnium mercenariorum militum eandem
esse causam, nec umquam Syracusas quieturas, donec
quidquam externorum auxiliorum, aut in urbe, aut in
exercitu suo, esset : itaque daret operam, ut eos, qui
cum suis prætoribus castra ad Megaram haberent, in
suam potestatem redigeret, ac supplicio eorum liberaret
tandem Syracusas. Hæc quum recitata essent, cum
 tanto clamore ad arma discursus est, ut prætores
 inter tumultum pavidum adequitaverint Syracusas : et
 ne fuga quidem eorum seditio compressa est, inpe-

U. C. 538.
 A. C. 214.

Fraus Hip-
 pocratis.

U. C. 538. tusque in Syracusanos milites fiebant : nec ab ullo
 A. C. 214. temperatum foret, ni Epicydes atque Hippocrates
 iræ multitudinis obviam issent : non a misericordia
 aut humano consilio, sed ne spem reditus præciderent
 sibi, et quum ipsos simul milites fidos haberent,
 simul obsides ; tum cognatos quoque eorum atque
 amicos tanto merito primum, dein pignore sibi conciliarent :
 expertique, quam vana aut levi aura mobile vulgus esset,
 militem nacti ex eo numero, qui in Leontinis
 circumsessi erant, subornant, ut Syracusas perferret
 nuncium convenientem eis, quæ ad Mylam falso nunciata
 erant ; auctoremque se exhibendo, ac velut visa, quæ
 dubia erant, narrando, concitaret iras hominum.

XXXII. Huic non apud vulgum modo fides fuit, sed
 senatum quoque in curiam introductus movit : haud vani
 quidam homines palam ferre, *perbene detectam in Leontinis
 esse avaritiam et crudelitatem Romanorum : eadem, si intrassent
 Syracusas, aut fædiora etiam, quo majus ibi avaritiæ præmium
 esset, facturos fuisse.* Itaque claudendas cuncti portas,
 et custodiendam urbem censere : sed non ab eisdem omnes
 timere, nec eosdem odisse : ad militare genus omne partemque
 magnam plebis invisum esse nomen Romanum. Prætores
 optimatumque pauci, quamquam inflammati vano nuncio
 erant, tamen ad propius præsentiusque malum cautiores
 esse. Et jam ad Hexapylum erant Hippocrates atque Epicydes :
 se-rebanturque conloquia per propinquos popularium, qui
 in exercitu erant, ut portas aperirent, sinerentque communem
 patriam defendi ab inpetu Romanorum. Jam, unis foribus
 Hexapyli apertis, cœpti erant recipi, quum prætores
 intervenerunt : et primo

Syracusas
 occupant
 Hippocrates
 et Epicydes.

imperio minisque, deinde auctoritate; deterrendo, U. C. 538.
 postremo, ut omnia vana erant, obliti majestatis, A. C. 214.
 precibus agebant, ne proderent patriam tyranni ante
 satellitibus, et tum conruptoribus exercitus. Sed
 surdæ ad hæc omnia aures concitatae multitudinis
 erant, nec minore intus vi, quam foris, portæ effrin-
 gebantur: effractisque omnibus, tuto in Hexapylo
 agmen receptum est. Prætores in Achradinam cum
 juventute popularium confugiunt: mercenarii mili-
 tes perfugæque, et quidquid regionum militum Syra-
 censis erat, agmen hostium augment. Ita Achradina
 quoque primo inpetu capitur, prætorumque (nisi qui
 inter tumultum effugerunt) omnes interficiuntur:
 nox cædibus finem fecit. Postero die servi ad pi-
 leum vocati, et carcere vincti emissi: confusaque
 hæc omnis multitudo Hippocratem atque Epicydem
 creant prætores: Syracusæque, quum breve tempus
 libertas adfulsisset, in antiquam servitutem recide-
 runt.

XXXIII. Hæc nunciata quum essent Romanis, Romani ad
Syracusas
castra mo-
vent.
 ex Leontinis mota sunt extemplo castra ad Syracu-
 sas. Et ab Appio legati per portum missi forte in
 quinquere mi erant: præmissa quadriremis, quum in-
 trasset fauces portus, capitur: legati ægre effuge-
 runt. Et jam non modo pacis, sed ne belli quidem
 jura relicta erant: quum Romanus exercitus ad
 Olympium (Jovis id templum est) mille et quingen-
 tis passibus ab urbe castra posuit. Inde quoque le-
 gatos præmitti placuit: quibus ne intrarent urbem,
 extra portam Hippocrates atque Epicydes obviam
 cum suis processerunt. Romanus orator *non bellum
 se Syracusanis, sed opem auxiliumque adferre, ait, et
 eis, qui, ex media cæde elapsi, perfugerint ad se, et*

U. C. 538. *eis, qui, metu obpressi, fœdiorem, non exsilio solum, sed*
 A. C. 214. *etiam morte, servitutem patiantur. Nec cædem nefan-*
dam sociorum inultam Romanos passuros. Itaque si
eis, qui ad se perfugerunt, tutus in patriam reditus pa-
teret, cædis auctores dedantur, et libertas legesque Sy-
racusanis restituantur, nihil armis opus esse: si ea non
fiant, quicumque in mora sit, bello persecuturos. Ad
ea Epicydes, Si qua ad se mandata haberent, respon-
sum eis, ait, se daturos fuisse: quum in eorum, ad
quos venerint, manu res Syracusana esset, tum rever-
terentur. Si bello lucessant, ipsa re intellecturos, ne-
quaquam idem esse Syracusas ac Leontinos obpugnare.
 Obpug- Ita legatis relictis, portas clausit. Inde terra mari-
 nantur que simul cœptæ obpugnari Syracusæ: terra ab Hex-
 Syracusæ. apylo, mari ab Achradina, cujus murus fluctu adlui-
 tur: et, quia, sicut Leontinos terrore ac primo inpetu
 ceperant, non diffidebant, vastam disjectamque spa-
 tio urbem parte aliqua se invasuros, omnem adpara-
 tum obpugnandarum urbium muris admoverunt.

Archime-
des cona-
tus Ro-
manorum
ludifica-
tur.

XXXIV. Et habuisset tanto inpetu cœpta res for-
 tunam, nisi unus homo Syracusis ea tempestate fu-
 isset. Archimedes is erat, unicus spectator cœli si-
 derumque; mirabilior tamen inventor ac machina-
 tor bellicorum tormentorum operumque, quibus ea,
 quæ hostes ingenti mole agerent, ipse perlevi mo-
 mento ludificaretur. Murum per inæquales ductum
 colles, (pleraque alta et difficilia aditu, submissa
 quædam, et quæ planis vallibus adiri possent) ut
 cuique aptum visum est loco, ita omni genere tor-
 mentorum instruxit. Achradinæ murum, qui, ut
 ante dictum est, mari adluitur, ex quinqueremibus
 Marcellus obpugnabat. Ex ceteris navibus sagittarii
 funditoresque, et velites etiam, quorum telum inha-

bile ad remittendum inperitis est, vix quemquam U. C. 538.
sine vulnere consistere in muro patiebantur. Hi, A. C. 214.
quia spatio missilibus opus est, procul muro tene-
bant naves: junctæ aliæ binæ ad quinqueremes,
demptis interioribus remis, ut latus lateri adplicaretur,
quum exteriori ordine remorum velut naves ageren-
tur, turres contabulatas machinamentaue alia qua-
tiendis muris portabant. Adversus hunc navalem
adparatum Archimedes variæ magnitudinis tormenta
in muris disposuit: in eas, quæ procul erant, naves
saxa ingenti pondere emittebat: propiores leviori-
bus, eoque magis crebris, petebat telis: postremo,
ut sui vulnere intacti tela in hostem ingererent, mu-
rum ab imo ad summum crebris cubitalibus fere ca-
vis aperuit; per quæ cava pars sagittis, pars scor-
pionibus modicis ex occulto petebant hostem. Quæ
propius quædam subibant naves, quo interiores icti-
bus tormentorum essent, in eas tollenone super mu-
rum eminente ferrea manus firmæ catenæ inligata
quum injecta proræ esset, gravi libramento plumbi
recellente ad solum, suspensa prora, navim in pup-
pim statuebat: dein, remissa subito, velut ex muro
cadentem navim cum ingenti trepidatione nautarum
ita undæ adfligebat, ut, etiamsi recta reciderat, ali-
quantum aquæ acciperet. Ita maritima obpugnatio
est elusa, omnisque vis est eo versa, ut totis viribus
terra adgrederentur. Sed ea quoque pars eodem
omni adparatu tormentorum instructa erat, Hieronis
inpensis curaue per multos annos, Archimedis uni-
ca arte: natura etiam juvabat loci, quod saxum,
cui inposita muri fundamenta sunt, magna ex parte
ita proclive est, ut non solum missa tormento, sed
etiam quæ pondere suo provoluta essent, graviter in

U. C. 538. hostem inciderent : eadem caussa ad subeundum ar-
 A. C. 214. duum aditum instabilemque ingressum præbebat.
 Ita, consilio habito, quum omnis conatus ludibrio
 esset, absistere obpugnatione, atque obsidendo tan-
 tum arcere terra marique com meatibus hostem pla-
 cuit.

Marcellus
 alias urbes
 capit.

Himilco
 cum exer-
 citu in Si-
 ciliam ve-
 nit.

XXXV. Interim Marcellus, cum tertia fere parte
 exercitus ad recipiendas urbes profectus, quæ in mo-
 tu rerum ad Karthaginienses defecerant, Helorum
 atque Herbessum, deditibus ipsis, recipit. Megara
 vi capta diruit ac diripuit ad reliquorum, ac maxime
 Syracusanorum, terrorem. Per idem fere tempus et
 Himilco, qui ad Pachyni promontorium classem diu
 tenuerat, ad Heracleam, quam vocant Minoam, quin-
 que et viginti millia peditum, tria equitum, duode-
 cim elephantos exposuit : nequaquam cum quantis
 copiis ante tenuerat ad Pachynum classem. Sed,
 postquam ab Hippocrate occupatæ Syracusæ erant,
 profectus Karthaginem, adjutusque ibi et ab legatis
 Hippocratis, literisque Hannibalis, qui venisse tem-
 pus aiebat Siciliæ per summum decus repetendæ, et
 ipse haud vanus præsens monitor facile perpulerat,
 ut, quantæ maximæ possent, peditum equitumque
 copię in Siciliam trajicerentur. Adveniens Hera-
 cleam, intra paucos dies inde Agrigentum recipit :
 aliarumque civitatum, quæ partis Karthaginensium
 erant, adeo accensæ sunt spes ad pellendos Sicilia
 Romanos, ut postremo etiam, qui obsidebantur Sy-
 racusis, animos sustulerint ; et, parte copiarum satis
 defendi urbem posse rati, ita inter se munera belli
 partiti sint, ut Epicydes præset custodiæ urbis,
 Hippocrates, Himilconi conjunctus, bellum adversus
 consulem Romanum gereret. Cum decem millibus
 egreditur.

peditum, quingentis equitibus nocte per intermissa U. C. 538.
 custodiis loca profectus, castra circa Acrillas urbem A. C. 214.
 ponebat. Munientibus supervenit Marcellus, ab Agrigento jam occupato, quum frustra eo prævenire hostem festinans tetendisset, rediens; nihil minus ratus, quam illo tempore ac loco Syracusanum sibi exercitum obviam fore; sed tamen metu Himilconis Pœnorumque (ut quibus nequaquam eis copiis, quas habebat, par esset) quam poterat maxime intentus, atque agmine ad omnes casus composito ibat.

XXXVI. Forte ea cura, quæ erat adversus Pœ- Vincitur a
 nos præparata, adversus Siculos usui fuit. Castris Marcello.
 ponendis incompositos ac dispersos nactus eos et plerosque inermes, quod peditum fuit, circumvenit: eques, levi certamine inito, cum Hippocrate Acras perfugit. Ea pugna deficientes ab Romanis quum cohibuisset Siculos, Marcellus Syracusas rediit: et post paucos dies Himilco, adjuncto Hippocrate, ad flumen Anapum, octo ferme inde millia, castra posuit. Sub idem fere tempus et naves longæ quinque et quinquaginta Karthaginiensium cum Bomilcare classis præfecto in magnum portum Syracusas ex alto decurrere; et Romana item classis, triginta quinqueres, legionem primam Panormi exposueret; versumque ab Italia bellum, adeo uterque populus in Siciliam intentus, fuisse videri poterat. Legionem Romanam, quæ exposita Panormi erat, venientem Syracusas, prædæ haud dubie sibi futuram Himilco ratus, via decipitur: mediterraneo namque Pœnus itinere duxit; legio maritimis locis, classe prosequente, ad Ap. Claudium, Pachynum cum parte copiarum obviam progressum, pervenit. Nec diutius Pœni ad Syracusas morati sunt: et Bomilcar,

U. C. 538. simul parum fidens navibus suis, duplici facile numero classem habentibus Romanis, simul inutili mora cernens nihil aliud ab suis quam inopia adgravari socios, velis in altum datis, in Africam transmisit. Et Himilco, secutus nequidquam Marcellum Syracusas, si qua, priusquam majoribus copiis jungeretur, occasio pugnandi esset, postquam ea nulla contigerat, tutumque ad Syracusas et munimento et viribus hostem cernebat, ne frustra adsidendo spectandoque obsidionem sociorum tempus tereret, castra inde movit: ut, quocumque vocasset defectionis ab Romanis spes, admooveret exercitum, ac præsens suas res foveantibus adderet animos. Murgantiam primum, prodito ab ipsis præsidio Romano, recepit: ubi frumenti magna vis commeatusque omnis generis convecti erant Romanis.

XXXVII. Ad hanc defectionem erecti sunt et aliarum civitatum animi: præsidiaque Romana aut pellebantur arcibus, aut prodita per fraudem obprimebantur. Henna, excelso loco ac prærupto undique sita, quum loco inexpugnabilis erat, tum præsidium in arce validum, præfectumque præsidii haud sane opportunum insidiantibus habebat. L. Pinarius erat vir acer, et qui plus in eo, ne posset decipi, quam in fide Siculorum, reponeret: et tum intenderant eum ad cavendi omnia curam tot auditæ proditioes defectionesque urbium, et clades præsidiorum. Itaque nocte dieque juxta parata instructaque omnia custodiis ac vigiliis erant: nec ab armis aut loco suo miles abscedebat. Quod ubi Hennensium principes, jam pacti cum Himilcone de proditioe præsidii, animadverterunt, nulli occasionem fraudis Romanum patere, palam rentur agendum *Urberem*

Hennensium
motiones.

*arcemque suæ potestatis, aiunt, debere esse, si liberi in societatem, non servi in custodiam, traditi essent Romanis: itaque claves portarum reddi sibi æquum censent. Bonis sociis fidem suam maximum vinculum esse: et ita sibi populum Romanum senatumque gratias habiturum, si volentes, ac non coacti, mansissent in amicitia. Ad ea Romanus, Se in præsidio inpositum esse, dicere, ab imperatore suo: clavesque portarum et custodiam arcis ab eo accepisse, quæ nec suo nec Hennensium arbitrio haberet, sed ejus, qui commisisset: præsidio decedere apud Romanos capital esse: et nece liberorum etiam suorum eam legem parentes sanxisse. Consulem Marcellum haud procul esse: ad eum mitterent legatos, cujus juris atque arbitrii esset. Se vero negare illi missuros: testarique, si verbis nihil agerent, vindictam aliquam libertatis suæ quæsitu-
 rum. Tum Pinarius: at illi, si ad consulem gravarentur mittere, sibi saltem darent populi concilium: ut sciretur, utrum paucorum ea denunciata, an universæ civitatis, essent. Consensu in posterum diem concio edicitur.*

XXXVIII. Postquam ab eo conloquio in arcem sese recepit, convocatis militibus, Credo ego vos au-
*disse, milites, inquit, quemadmodum præsidia Romana ab Siculis circumventa et obpressa sint per hos dies. Eam vos fraudem, Deum primo benignitate, dein vestra ipsi virtute, dies noctesque perstando ac pervigilando in armis, vitastis: utinam reliquum tempus nec patiendo infanda, nec faciendo, traduci possit! Hæc occulta in fraude cautio est, qua usi adhuc sumus: cui quoniam pa-
 rum succedit, aperte ac propalam clares portarum re-
 poseunt: quas simul tradiderimus, Karthaginensium ex-
 templo Henna erit, fœdiusque hic trucidabimur, quam*

Pinarii
 Hennæ
 præfecti
 oratio ad
 milites.

U. C. 538. *Murgantiæ præsidium interfectum est. Noctem unam*
 A. C. 214. *ægre ad consultandum sumsi, qua vos certiores periculi*
instantis facerem. Orta luce concionem habituri sunt,
ad criminandum me concitandumque in vos populum :
itaque crastino die, aut vestro, aut Hennensium san-
guine Henna inundabitur : nec præoccupati spem ullam,
nec occupantes periculi quidquam habebitis : qui prior
strinxerit ferrum, ejus victoria erit. Intenti ergo om-
nes armatique signum expectabitis : ego in concione
ero : et tempus, quoad omnia instructa sint, loquendo
altercandoque traham. Quum toga signum dederò,
tum mihi undique clamore sublato turbam invadite, ac
sternite omnia ferro : et cavete, quisquam supersit, a
quibus aut vis, aut fraus timeri possit. Vos, Ceres ma-
ter ac Proserpina, precor, ceteri superi infernique Dii,
qui hanc urbem, hos sacratos lacus lucosque colitis, ut
ita nobis volentes propitii adsitis, si vitandæ, non fe-
rendæ, fraudis causa hoc consilii capimus. Pluribus
vos, milites, hortarer, si cum armatis dimicatio futura
esset : inermes, incautos ad satietatem trucidabitis. Et
consulis castra in propinquo sunt, ne quid ab Himilcone
et Karthaginiensibus timeri possit.

XXXIX. Ab hac adhortatione dimissi corpora
 curant. Postero die alii aliis locis, ad obsidenda iti-
 nera claudendosque oppidanis exitus, pars maxima
 super theatrum circaque, adsueti et ante spectaculis
 concionum, consistunt. Productus ad populum a
 magistratibus præfectus Romanus, quum consulis ea
 de re jus ac potestatem esse, non suam, et pleraque
 eadem, quæ pridie, dixisset ; primo sensim, ac
 plures, reddere claves, dein jam una voce id omnes
 jubarent, cunctantique ac differenti ferociter mini-
 tarentur, nec viderentur ultra vim ultimam dilaturi ;

Cæduntur
 Hennens-
 ses.

tum præfectus toga signum, ut convenerat, dedit: U. C. 538.
A. C. 214.
 militesque intenti dudum ac parati, alii superne in
 aversam concionem clamore sublato decurrunt, alii
 ad exitus theatri conferti obsistunt. Cæduntur Hen-
 nenses cavea inclusi, coacervanturque, non cæde so-
 lum, sed etiam fuga; quum alii super aliorum capita
 ruerent, atque integri sauciis, vivi mortuis inciden-
 tes, cumularentur. Inde passim discurritur, et urbis
 captæ modo fugaque et cædes omnia tenet: nihilo
 remissiore militum ira, quod turbam inermem cæde-
 bant, quam si periculum par et ardor certaminis eos
 irritaret. Ita Henna, aut malo, aut necessario fa-
 cinore retenta. Marcellus nec factum inprobavit, et
 prædam Hennensium militibus concessit, ratus, ti-
 more deterritos temperaturos proditionibus præsi-
 diorum Siculos. Atque ea clades, ut urbis in media
 Sicilia sitæ, claræque vel ob insignem munimento
 naturali locum, vel ob sacrata omnia vestigiis raptæ
 quondam Proserpinæ, prope uno die omnem Siciliam
 pervasit. Et quia cæde infanda rebantur, non ho-
 minum tantum, sed etiam Deorum sedem violatam
 esse, tum vero, qui etiam ante dubii fuerant, defe-
 cere ad Pœnos. Hippocrates inde Murgantiam, Hi-
 milco Agrigentum sese recepit: quum aditi a pro-
 ditoribus nequidquam ad Hennam exercitum admo-
 vissent. Marcellus retro in Leontinos redit: fru-
 mentoque et com meatibus aliis in castra convectis,
 præsidio modico ibi relicto, ad Syracusas obsidendas
 venit: inde Ap. Claudio Romam ad consulatum pe-
 tendum misso, T. Quinctium Crispinum in ejus lo-
 cum classi castrisque præficit veteribus: ipse hiber-
 nacula quinque millia passuum Hexapylo (Leonta

U. C. 589. vocant locum) communiit, ædificavitque. Hæc in
A. C. 214 Sicilia usque ad principium hiemis gesta.

Bellum cum Phil- XL Eodem æstate et cum Philippo rege, quod
ippo. jam ante suspectum fuerat, motum bellum est. Le-
gati ab Orico ad M. Valerium prætorem venerunt,
præsidentem classi Brundisio Calabriaeque circa li-
toribus, nunciantes Philippum primum Apolloniam
tentasse, lembis biremibus centum viginti flumine
adverso subvectum: deinde, ut ea res tardior spe
Oricum a fuerit, ad Oricum clam nocte exercitum admovisse:
Philippo eamque urbem, sitam in plano, neque mœnibus, ne-
captum. que viris atque armis validam, primo inpetu obpres-
sam esse. Hæc nunciantes orabant, ut opem ferret,
hostemque haud dubium Romanis terra aut mariti-
mis viribus arceret; qui ob nullam aliam causam,
nisi quod imminerent Italiae, peterentur. M. Vale-
rius, præsidio loci ejus relicto P. Valerio legato, cum
classe instructa parataque, et, quod longæ naves mi-
litum capere non poterant, in onerarias inpositis, al-
tero die Oricum pervenit: urbemque eam, levi te-
nente præsidio, quod recedens inde reliquerat Phi-
lippus, haud magno certamine recepit. Legati eo
ab Apollonia venerunt, nunciantes, in obsidione
sese, quod deficere ab Romanis nollent, esse: ne-
que sustinere ultra vim Macedonum posse, nisi præ-
sidium mittatur Romanum. Facturum se, quæ vel-
lent, pollicitus, duo millia delectorum militum na-
vibus longis mittit ad ostium fluminis, cum præfecto
socium, Q. Nævio Crista, viro inpigro et perito mi-
litiae. Is, expositis in terram militibus, navibusque
Oricum retro, unde venerat, ad ceteram classem re-
missis, milites procul a flumine per viam minime ab

Apollonia
obsessa a
Philippo.

regiis obsessam duxit, et nocte, ita ut nemo hostium sentiret, urbem est ingressus. Die insequenti quievere, dum præfectus juventutem Apolloniatum, armaque et urbis vires inspiceret : ubi ea visa inspectaque satis animorum fecere, simulque ab exploratoribus comperit, quanta socordia ac negligentia apud hostes esset ; silentio noctis ab urbe sine ullo tumultu egressus, castra hostium adeo neglecta atque aperta intravit, ut satis constaret, prius mille hominum vallum intrasse, quam quisquam sentiret : ac, si cæde abstinuissent, pervenire ad tabernaculum regium potuisse. Cædes proximorum portæ excitavit hostes : inde tantus terror pavorque omnes occupavit, ut non modo alius quisquam arma caperet, aut castris pellere hostem conaretur ; sed etiam ipse rex, sicut somno excitus erat, prope seminudus fugiens, militi quoque, nedum regi, vix decoro habitu, ad flumen navesque perfugerit : eodem et alia turba effusa est. Paulo minus tria millia militum in castris aut capta, aut occisa : plus tamen hominum aliquanto captum, quam cæsum, est. Castris direptis, Apolloniæ catapultas, ballistas, tormentaque alia, quæ obpugnandæ urbi comparata erant, ad tuenda mœnia, si quando similis fortuna venisset, Apolloniam devexere : cetera omnis præda castrorum Romanis concessa est. Hæc quum Oricum essent nunciata, M. Valerius classem extemplo ad ostium fluminis duxit, ne navibus capessere fugam rex posset. Itaque Philippus, neque terrestri, neque navali certamine satis fore parem se fidens, subductis aut incensis navibus, terra Macedoniam petiit, magna ex parte inermi exercitu spoliatoque. Romana classis cum M. Valerio Orici hibernavit

U. C. 538.

A. C. 214.

Castra Macedonum
invadunt
Romani.Philippi
fuga.

U. C. 538. XLI. Eodem anno in Hispania varie res gestæ :
 A. C. 214. nam priusquam Romani amnem Iberum transirent,
 Res in ingentes copias Hispanorum Mago et Hasdrubal fu-
 Hispania derunt : defecissetque ab Romanis ulterior Hispania,
 gestæ. ni P. Cornelius, raptim traducto exercitu Iberum,
 dubiis sociorum animis in tempore advenisset. Pri-
 mo ad castrum Altum (locus est insignis cæde mag-
 ni Hamilcaris) castra Romani habuere. Arx erat
 munita, et convexerant ante frumentum : tamen,
 quia omnia circa hostium plena erant, agmenque
 Romanum inpune incursatum ab equitibus hostium
 fuerat, et ad duo millia, aut moratorum aut palan-
 tium per agros, interfecta, cessere inde Romani pro-
 prius pacata loca, et ad montem Victoriæ castra com-
 munivere. Eo Cn. Scipio cum omnibus copiis, et
 Hasdrubal Gisgonis filius, tertius Karthaginiensium
 dux, cum exercitu justo advenit : contraque castra
 Romana trans fluvium omnes consedere. P. Scipio,
 cum expeditis clam profectus ad loca circa visenda,
 haud fefellit hostes : obpressissentque eum in paten-
 tibus campis, ni tumultum in propinquo cepisset : ibi
 quoque circumsessus adventu fratris obsidione exi-
 mitur. Castulo urbs Hispaniæ valida ac nobilis, et
 adeo conjuncta societate Pœnis, ut uxor inde Han-
 nibali esset, ad Romanos defecit. Karthaginienses
 Illiturgin obpugnare adorti, quia præsidium ibi Ro-
 manum erat : videbanturque inopia eum locum ma-
 xime expugnaturi. Cn. Scipio, ut sociis præsidioque
 ferret opem, cum legione expedita profectus, inter
 bina castra cum magna cæde hostium urbem est in-
 gressus, et postero die eruptione æque felici pugna-
 vit. Supra duodecim millia hominum cæsa duobus
 præliis : plus mille capti, cum sex et triginta mili-

taribus signis: ita ab Illiturgi recessum est. Bi- U. C. 539.
 gerra inde urbs (socia et hæc Romanorum erat) a A. C. 214.
 Karthaginiensibus obpugnari cœpta est. Eam ob-
 sidionem sine certamine adveniens Cn. Scipio solvit.

XLII. Ad Mundam exinde castra Punica mota: Ter victo-
 et Romani eo confestim secuti sunt. Ibi signis con- res Roma-
 latis pugnatum per quatuor ferme horas: egregieque ni.
 vincentibus Romanis signum receptui est datum,
 quod Cn. Scipionis femur tragula confixum erat:
 pavorque circa eum ceperat milites, ne mortiferum
 esset vulnus. Ceterum haud dubium fuit, quin, nisi
 ea mora intervenisset, castra eo die Punica capi po-
 tuerint: jam non milites solum, sed elephantum etiam
 usque ad vallum acti erant, superque ipso novem et
 triginta elephantum pilis confixi. Hoc quoque prælio
 ad duodecim millia hominum dicuntur cæsa, prope
 tria capta, cum signis militaribus septem et quin-
 quaginta. Ad Auringen inde urbem Pœni recessere;
 et, ut territis instaret, secutus Romanus. Ibi iterum
 Scipio lecticula in aciem inlatus conflixit: nec dubia
 victoria fuit: minus tamen dimidio hostium, quam
 antea, quia pauciores superfuerant, qui pugnarent,
 occisum. Sed gens nata instaurandis reparandisque
 bellis, Magone ad conquisitionem militum fratre
 misso, brevi replevit exercitum, animosque ad ten-
 tandum de integro certamen fecit. Alii plerique
 milites, sicut pro parte toties intra paucos dies victa,
 iisdem animis, quibus prius, eodemque eventu pug-
 navere: plus octo millia hominum cæsa: haud multo
 minus quam mille captum, et signa militaria quin-
 quaginta octo; et spolia plurima Gallica fuisse, au-
 rei torques, armillæque, magnus numerus: duo etiam
 insignes reguli Gallorum (Mœnicapto et Civismaro

U. C. 538. nomina erant) eo prælio ceciderunt : octo elephantibus
 A. C. 214 capti, tres occisi. Quum jam res prosperæ in Hispania
 Saguntum essent, verecundia Romanos tandem cepit, Saguntum
 receptum oppidum, quæ causa belli esset, octavum
 a Romanis. jam annum sub hostium potestate esse. Itaque id
 oppidum, vi pulso præsidio Punico, receperunt, cultoribusque antiquis, quos vis reliquerat belli, restituerunt : et Turdetanos, qui contraxerant eis cum Karthaginiensibus bellum, in potestatem redactos sub corona vendiderunt, urbemque eorum delevere.

Censoribus dies dicta ad populum.

XLIII. Hæc in Hispania, Q. Fabio, M. Claudio consulibus, gesta. Romæ quum tribuni plebis novi magistratum inissent, extemplo censoribus, P. Furio et M. Atilio, a L. Metello tribuno plebis dies dicta ad populum est : quæstorem eum proximo anno, adempto ego, tribu moverant, atque ærarium fecerant, propter conjurationem deserendæ Italiæ ad Cannas factam : sed novem tribunorum auxilio vetiti causam in magistratu dicere, dimissique fuerant. Ne lustrum perficerent, mors prohibuit P. Furii. M. Atilius magistratu se abdicavit. Consularia comitia habita a Q. Fabio Maximo consule : creati consules ambo absentes, Q. Fabius Maximus consulis filius, et Ti. Sempronius Gracchus iterum. Prætores fiunt M. Atilius, et, qui tum ædiles curules erant, P. Sempronius Tuditanus, et Cn. Fulvius Centumalus, et M. Æmilius Lepidus. Ludos scenicos per quadri-duum eo anno primum factos ab curulibus ædilibus, memoriæ proditur. Ædilis Tuditanus hic erat, qui ad Cannas, pavore aliis in tanta clade torpentibus, per medios hostes evasit. Comitibus perfectis, auctore Q. Fabio consule, designati consules Romam

arcessiti magistratum inierunt: senatumque de bello ac provinciis suis prætorumque, et de exercitibus, quibus quique præessent, consuluerunt.

XLIV. Itaque provinciæ atque exercitus divisi. Bellum cum Hannibale consulibus mandatum, et exercituum unus, quem ipse Sempronius habuerat; alter, quem Fabius consul: eæ binæ erant legiones.

M. Æmilius prætor, cujus peregrina sors erat, jurisdictione M. Atilio collegæ prætori urbano mandata, Luceriam provinciam haberet, legionesque duas, quibus Q. Fabius, qui tum consul erat, prætor præfuerat. P. Sempronio provincia Ariminum, Cn. Fulvio Suessula, cum binis item legionibus, evenerunt: ut Fulvius urbanas legiones duceret, Tuditanus a M. Pomponio acciperet. Prorogata imperia provinciæque, M. Claudio Sicilia finibus eis, quibus regnum Hieronis fuisset: Lentulo proprætori provincia vetus: T. Otacilio classis: exercitus nulli additi novi. M. Valerio Græcia Macedoniaque cum legione et classe, quam haberet: Q. Mucio cum veteri exercitu (duæ autem legiones erant) Sardinia: C. Terentio legio una, cui jam præerat, et Picenum. Scribi præterea duæ legiones urbanæ jussæ, et viginti millia sociorum. His ducibus, his copiis, adversus multa simul, aut mota aut suspecta bella, munierunt Romanum imperium. Consules, duabus urbanis legionibus scriptis, supplementoque in alias lecto, priusquam ab urbe moverent, prodigia procurarunt, quæ nunciata erant. Murus ac portæ tactæ, et Ariciæ etiam Jovis ædes de cælo tacta fuerat. Et alia ludibria oculorum auriumque credita pro veris: navium longarum species in flumine Tarracinæ, quæ nullæ erant, visæ; et in Jovis

U. C. 536.

A. C. 214.

U. C. 539.

A. C. 213.

Provincia-

rum divi-

sio.

Prodigia.

U. C. 339. Vicilini templo, quod in Compsano agro est, arma
A. C. 213. concrepuisse : et flumen Amiterni cruentum fluxisse.

His procuratis ex decreto pontificum, profecti consules, Sempronius in Lucanos, in Apuliam Fabius. Pater filio legatus ad Suessulam in castra venit : quum obviam filius progredieretur, lictoresque reverentia majestatis ejus taciti anteirent ; præter undecim fascēs equo prævectus senex, ut consul animadvertere proximum lictorem jussit, et is, ut descenderet ex equo, inclamavit ; tum demum desiliens, *Experiri, inquit, volui, fili, satin' scires, consulem te esse.*

Altinius
Arpinus
venit ad
eos.

XLV. In ea castra Dasius Altinius Arpinus clam nocte cum tribus servis venit, promittens, si sibi præmio foret, se Arpos proditurum esse. Quum eam rem ad consilium retulisset Fabius, aliis *pro transfuga verberandus necandusque videri, ancipitis animi communis hostis : qui post Cannensem cladem, tamquam cum fortuna fidem stare oporteret, ad Hannibalem discessisset, traxissetque ad defectionem Arpos ; quumque res Romana contra spem votumque ejus velut resurgeret, turpius videatur novam referre prodicionem proditis olim : qui aliunde stet semper, aliunde sentiat, infidus socius, vanus hostis ; ad Faleriorum Pyrrhive proditorem tertium transfugis documentum esset.* Contra ea consulis pater Fabius, temporum oblitos homines, in medio ardore belli, tamquam in pace, libera de quoque arbitria agere, aiebat : Qui, quum illud potius agendum atque eis cogitandum sit, si quo modo fieri possit, ne qui socii a populo Romano desciscant, id non cogitent ; documentum autem dicant statui oportere, si quis resipiscat, et antiquam societatem respiciat. Quod si abire ab Romanis liceat, redire ad eos non liceat ;

cui dubium esse, quin brevi deserta ab sociis Romana U. C. 539.
 res, fœderibus Punicis omnia in Italia juncta visura A. C. 213.
 sit? Se tamen non eum esse, qui Altinio fidei quidquam
 censeat habendum, sed mediam consecuturum consilii
 viam: neque eum pro hoste, neque pro socio in præsenti-
 tia habitum, libera custodia haud procul a castris pla-
 cere in aliqua fida civitate servari per belli tempus:
 perpetrato bello, tum consultandum, utrum defectio
 prior plus merita sit pœnæ, an hic reditus veniæ. Fa-
 bio adsensum est: catenisque ligatus, traditur et
 ipse et comites: et auri satis magnum pondus, quod
 secum tum adtulerat, ei servari jussum. Calibus
 eum interdiu solutum custodes sequebantur: nocte
 clausum adservabant. Arpis domi primum deside-
 rari quærique est cœptus: dein fama, per totam ur-
 bem vulgata, tumultum, ut principe amisso, fecit:
 metuque rerum novarum extemplo nuncii ad Hanni-
 balem missi. Quibus nequaquam offensus Pœnus,
 quia et ipsum, ut ambiguae fidei virum, suspectum
 jam pridem habebat, et caussam nactus erat tam di-
 tis hominis bona possidendi vendendique; ceterum
 ut iræ magis, quam avaritiæ, datum crederent homi-
 nes, crudelitati quoque gravitatem addidit: conju-
 gemque ejus ac liberos in castra adcitòs, quæstione
 prius habita, primum de fuga Altinii, dein quantum
 auri argentique domi relictum esset, satis cognitis
 omnibus, vivos combussit.

XLVI. Fabius, ab Suessula profectus, Arpos pri- Arpos reci-
 mum institit obpugnare: ubi quum a quingentis fere pit Fabius
 passibus castra posuisset, contemplatus ex propinquo
 situm urbis mœniaque, quæ pars tutissima mœnibus
 erat, qua maxime neglectam custodiam vidit, ea po-
 tissimum adgredi statuit. Comparatis omnibus, quæ

U. C. 539. ad urbes obpugnandas usui sunt, centurionum robo-
 A. C. 213. ra ex toto exercitu delegit, tribunosque viros fortes
 eis præfecit, et milites sexcentos, quantum satis vi-
 sum est, adtribuit: eosque, ubi quartæ vigiliæ sig-
 num cecinisset, ad eum locum scalas jussit ferre.
 Porta ibi humilis et angusta erat, via infrequenti per
 desertam partem urbis: eam portam scalis prius
 transgressos ad murum pergere, et ex interiore parte
 vi claustra refringere jubet, et tenentes partem ur-
 bis cornu signum dare, ut ceteræ copiæ admoveren-
 tur: parata omnia atque instructa sese habiturum.
 Ea inpigre facta: et, quod impedimentum agentibus
 fore videbatur, id maxime ad fallendum adjuvit: im-
 ber, ab nocte media coortus, custodes vigilesque,
 dilapsos e stationibus, subfugere in tecta coëgit: so-
 nituque primo largioris procellæ strepitum molien-
 tium portam exaudiri prohibuit; lentior deinde æ-
 qualiorque accidens auribus magnam partem homi-
 num sopivit. Postquam portam tenuerunt, corni-
 cines in via paribus intervallis dispositos canere ju-
 bent, ut consulem excirent. Id ubi factum ex com-
 posito est, signa efferri consul jubet, ac paullo ante
 lucem per effractam portam urbem ingreditur.

XLVII. Tum demum hostes excitati sunt, jam et
 imbre conquiescente, et propinqua luce. Præsidium
 in urbe erat Hannibalis, quinque millia ferme arma-
 torum: et ipsi Arpini tria millia hominum arma-
 bant: eos primos Pœni, ne quid ab tergo fraudis
 esset, hosti obposuerunt. Pugnatum primo in tene-
 bris angustisque viis est: quum Romani non vias
 tantum, sed tecta etiam proxima portæ, occupassent,
 ne peti superne ac vulnerari possent. Cogniti inter
 se quidam Arpinique et Romani; atque inde conlo-

quia cœpta fieri, percunctantibus Romanis, quid sibi ^{U. C. 539.} ^{A. C. 213.} vellent Arpini? quam ob noxam Romanorum, quod aut meritum Pœnorum, pro alienigenis ac barbaris, Italici adversus veteres sanctos Romanos bellum gererent, et vecrigalem ac stipendiariam Italiam Africæ facerent? Arpinis purgantibus, ignaros omnium se venum a principibus datos Pœno, captos obpressosque a paucis esse. Initio orto, plures cum pluribus conloqui: postremo prætor Arpinus ab suis ad consulem deductus; fideque data inter signa aciesque, Arpini repente pro Romanis adversus Karthaginiensem arma verterunt. Hispani quoque, paullo minus mille homines, nihil præterea cum consule pacti, quam ut sine fraude Punicum emitteretur præsidium, ad consulem transtulerunt signa. Karthaginiensibus portæ patefactæ, emissique cum fide incolumes ad Hannibalem Salapiam venerunt. Arpi sine clade ullius, præterquam unius veteris proditoris, novi perfugæ, restituti ad Romanos. Hispanis duplicia cibaria dari iussa: operaque eorum forti ac fideli persæpe respublica usa est. Quum consul alter in Apulia, alter in Lucanis esset; equites centum duodecim nobiles Campani, per speciem prædandi ex ^{Campani} hostium agro, permissu magistratuum ab Capua profecti, ad castra Romana, quæ super Suessulam erant, ^{equites centum duodecim ad castra Romana veniunt.} venerunt: stationi militum, qui essent, dixerunt; conloqui sese cum prætore velle. Cn. Fulvius castris præerat: cui ubi nunciatum est, decem ex eo numero jussis inermibus deduci ad se, ubi, quæ postularent, audivit, (nihil autem aliud petebant, quam ut, Capua recepta, bona sibi restituerentur) in fidem omnes accepti. Et ab altero prætore Sempronio Tuditano oppidum Aternum expugnatum: amplius

Ū. C. 539. septem millia hominum capta, et æris argentique
 A. C. 213. signati aliquantum. Romæ fœdum incendium per
 Romæ in-
 cendium. duas noctes ac diem unum tenuit: solo æquata omnia inter Salinas ac portam Carmentalem, cum Æquimælio Jugarioque vico: in templis Fortunæ ac matris Matutæ et Spei extra portam, late vagatus ignis sacra profanaque multa absumsit.

Res in
 Hispania
 gestæ.

Legati ad
 Syphacem
 missi a
 Scipioni-
 bus.

XLVIII. Eodem anno P. et Cn. Cornelii, quum in Hispania res prosperæ essent, multosque et veteres reciperent socios, et novos adjicerent, in Africam quoque spem extenderunt. Syphax erat rex Numidarum, subito Karthaginiensibus hostis factus: ad eum centuriones tres legatos miserunt, qui cum eo amicitiam societatemque facerent; et pollicerentur, si perseveraret urgere bello Karthaginenses, gratam eam rem fore senatui populoque Romano, et adnisiuros, ut in tempore, et bene cumulatam gratiam referant. Grata ea legatio barbaro fuit: conlocutusque cum legatis de ratione belli gerundi, ut veterum militum verba audivit, quam multarum rerum ipse ignarus esset, ex comparatione tam ordinatæ disciplinæ, animum advertit. Tum, primum ut pro bonis ac fidelibus sociis facerent, oravit, *ut duo legationem referrent ad imperatores suos; unus apud sese magister rei militaris remaneret: rudem ad pedestria bella Numidarum gentem esse, equis tantum habilem. Ita jam inde a principiis gentis majores suos bella gessisse, ita se a pueris insuetos. Sed habere hostem pedestri fidentem Marte: cui si æquari robore virium velit, et sibi pedites comparandos esse; et ad id multitudine hominum regnum abundare: sed armandi, ornandique et instruendi eos artem ignorare: omnia, velut forte congregata turba, vasta ac temeraria esse.*

Facturos se in præsentia, quod vellet, legati respon- U. C. 539.
derunt: fide accepta, ut remitteret extemplo eum, si A. C. 213.
imperatores sui non comprobassent factum. Q. Sta-
torio nomen fuit, qui ad regem remansit. Cum duo-
bus Romanis reliquis Numida legatos in Hispaniam
misit ad accipiendam fidem ab imperatoribus Roma-
nis: iisdem mandavit, ut protinus Numidas, qui in-
tra præsidia Karthaginiensium auxiliares essent, ad
transitionem perlicerent. Et Statorius ex multa ju-
ventute regi pedites conscripsit: ordinatosque pro-
xime morem Romanum, instruendo et decurrendo
signa sequi, et servare ordines docuit: et operi aliis-
que justis militaribus ita adsuefecit, ut brevi rex
non equiti magis fideret, quam pediti; conlatisque
æquo campo signis, justo prælio Karthaginiensem
hostem superaret. Romanis quoque in Hispania
legatorum regis adventus magno emolumento fuit:
namque ad famam eorum transitiones crebræ ab Nu-
midis cœptæ fieri. Ita cum Syphace Romanis juncta
amicitia est. Quod ubi Karthaginienses acceperunt,
extemplo ad Galam, in parte altera Numidiæ (Mas-
syli ea gens vocatur) regnantem, legatos mittunt.

XLIX. Filium Gala Masinissam habebat, septem Karthagi-
nienses
cum Gala
foedus fa-
ciunt.
et decem annos natum, ceterum juvenem ea indole,
ut jam tum adpareret, latius regnum opulentiusque,
quam acceperat, facturum. Legati, quoniam Syphax
*se Romanis junxisset, ut potentior societate eorum ad-
versus reges populosque Africæ esset, docent; melius
fore Galæ quoque, Karthaginiensibus jungi quam pri-
mum, antequam Syphax in Hispaniam, aut Romani in
Africam transeant; obprimi Syphacem, niltildum præ-
ter nomen ex fœdere Romano habentem, posse.* Facile Masinissa
persuasum Galæ, filio deposcente id bellum, ut exer- Galæ filius
Syphacem
vincit.

U. C. 539. citum mitteret: qui, Karthaginiensium legionibus
 A. C. 213. conjunctis, magno prælio Syphacem devicit. Tri-
 ginta millia eo prælio hominum cæsa dicuntur. Sy-
 phax cum paucis equitibus in Maurusios ex acie Nu-
 midas (extremi prope oceanum adversus Gades co-
 lunt) refugit: affluentibusque ad famam ejus undi-
 que barbaris, ingentes brevi copias armavit: cum
 quibus antequam in Hispaniam angusto diremtam
 freto trajiceret, Masinissa cum victore exercitu ad-
 venit: isque ibi cum Syphace ingenti gloria per se,
 sine ullis Karthaginiensium opibus, gessit bellum.
 In Hispania nihil memorabile gestum, præterquam
 quod Celtiberûm juventutem eadem mercede, qua
 pacta cum Karthaginiensibus erat, imperatores Ro-
 mani ad se perduxerunt: et nobilissimos Hispanos
 supra trecentos in Italiam ad sollicitandos populares,
 qui inter auxilia Hannibalis erant, miserunt. Id
 modo ejus anni in Hispania ad memoriam insigne
 est, quod mercenarium militem in castris neminem
 ante, quam tum Celtiberos, Romani habuerunt.

Celtiberi
 primi
 mercede
 militant
 apud Ro-
 manos.

EPITOME LIBRI XXV.

P. CORNELIUS SCIPIO, postea Africanus, ante annos ædilis factus est. Hannibal urbem Tarentum, præter arcem, in quam præsidium Romanorum fugerat, per Tarentinos juvenes, qui se noctu renatum ire simulaverant, cepit. Ludi Apollinares ex Marcii carminibus, quibus Cannensis clades prædicta fuerat, instituti sunt. A Q. Fulvio et Ap. Claudio consulibus adversus Hannonem Pænorum ducem prospere pugnatum est. Ti. Sempronius Gracchus proconsul, ab hospite suo Lucano in insidias deductus, a Magone interfectus est. Centenius Penula, qui centurio militaverat, quum petisset a senatu, ut sibi exercitus daretur, pollicitusque esset, si hoc inpetrasset, de Hannibale victoriam, octo millibus acceptis, militum dux factus, conflixit acie cum Hannibale, et cum exercitu casus est. Cn. Fulvius prætor male adversus Hannibalem pugnavit: in quo prælio hominum sexdecim millia ceciderunt: ipse cum equitibus ducentis effugit. Capua obsessa est a Q. Fulvio et Ap. Claudio consulibus. Claudius Marcellus Syracusas expugnavit anno tertio, et ingentem se virum gessit: in eo tumultu urbis captæ Archimedes, intentus formis, quas in pulvere descripserat, interfectus est. P. et Cn. Scipiones in Hispania tot tantarumque rerum feliciter gestarum tristem exitum tulerunt: prope cum totis exercitibus cæsi anno octavo, quam in

Hispaniam iverant : amissaque ejus provinciæ possessio foret, nisi L. Marcii equitis Romani virtute et industria, contractis exercituum reliquiis, ejusdem hortatu, bina castra hostium expugnata essent. Ad triginta septem millia cæsa, ad mille octingentos triginta capti, præda ingens parta. Dux Marcius adpellatus est.

T. LIVII PATAVINI

LIBER XXV.

DUM hæc in Africa atque in Hispania geruntur, U. C. 539.
A. C. 213.
Hannibal in agro Tarentino æstatem consum- Hannibal
ad Taren-
sit, spe per prodicionem urbis Tarentinorum potiun- tum.
dæ: ipsorum interim Sallentinorum ignobiles urbes
ad eum defecerunt. Eodem tempore in Bruttis ex
duodecim populis, qui anno priore ad Pœnos descive-
rant, Consentini et Thurini in fidem populi Romani
redierunt. Et plures rediissent, ni T. Pomponius Ve-
intanus præfectus sociûm, prosperis aliquot popula-
tionibus in agro Bruttio justis ducis speciem nactus,
tumultuario exercitu coacto, cum Hannone conflixis-
set. Magna ibi vis hominum, sed inconditæ turbæ
agrestium servorumque, cæsa aut capta est: mini-
mumque jacturæ fuit, quod præfectus inter ceteros
est captus, et tum temerariæ pugnæ auctor, et ante
publicanus, omnibus malis artibus et reipublicæ et
societatibus infidus damnosusque. Sempronius con-
sul in Lucanis multa prælia parva, haud ullum dig-
num memoratu, fecit: et ignobilia oppida Lucano-
rum aliquot expugnavit. Quo diutius trahebatur Superstitio-
nes Romæ
exortæ.
bellum, et variabant secundæ adversæque res non
fortunam magis, quam animos, hominum; tanta re-
ligio, et ea magna ex parte externa, civitatem in-
cessit, ut aut homines, aut Dii repente alii videren-

U. C. 539. tur facti: nec jam in secreto modo atque intra pa-
 A. C. 213. rietes abolebantur Romani ritus; sed in publico
 etiam ac foro Capitolioque mulierum turba erat, nec
 sacrificantium, nec precantium Deos patrio more.
 Sacrificuli ac vates ceperant hominum mentes: quo-
 rum numerum auxit rustica plebs, ex incultis diutino
 bello infestisque agris egestate et metu in urbem
 compulsa; et quæstus ex alieno errore facilis, quem
 velut ex concessæ artis usu exercebant. Primo se-
 cretæ bonorum indignationes exaudiebantur, deinde
 ad Patres etiam et ad publicam querimoniam excres-
 sit res. Incusati graviter ab senatu ædiles triumvi-
 rique capitales, quod non prohiberent, quum emo-
 vere eam multitudinem e foro, ac disjicere adparatus
 sacrorum conati essent, haud procul afuit, quin vio-
 larentur. Ubi potentius jam esse id malum adpa-
 ruit, quam ut minores per magistratus sedaretur, M.
 Atilio prætori urbis negotium ab senatu datum est,
 ut his religionibus populum liberaret. Is et in con-
 cione senatusconsultum recitavit, et edixit, *Ut, qui-
 cumque libros vaticinos precationesve, aut artem sacrifi-
 candi conscriptam haberet, eos libros omnes literasque
 ad se ante Kalendas Apriles deferret: neu quis, in
 publico sacrove loco, novo aut externo ritu sacrifi-
 caret.*

Coërcitæ
 a senatu.

II. Et aliquot publici sacerdotes mortui eo anno
 sunt: L. Cornelius Lentulus pontifex maximus, et
 C. Papirius C. F. Maso pontifex, et P. Furius Philus
 augur, et C. Papirius L. F. Maso decemvir sacrorum.
 In Lentuli locum M. Cornelius Cethegus, in Papirii
 Cn. Servilius Cæpio, pontifices subfecti sunt: augur
 creatus L. Quinctius Flaminius, decemvir sacrorum
 L. Cornelius Lentulus. Comitiorum consularium

jam adpetebat tempus; sed, quia consules a bello U. C. 539.
A. C. 213. intentos avocare non placebat, Ti. Sempronius consul comitiorum caussa dictatorem dixit C. Claudium Centhonem: ab eo magister equitum est dictus Q. Fulvius Flaccus. Dictator primo comitali die creavit consules Q. Fulvium Flaccum, magistrum equitum, et Ap. Claudium Pulchrum, cui Sicilia provincia in prætura fuerat. Tum prætores creati Cn. Fulvius Flaccus, C. Claudius Nero, M. Junius Silanus, P. Cornelius Sulla. Comitiiis perfectis, dictator magistratu abiit. Ædilis curulis fuit eo anno cum M. Cornelio Cethego P. Cornelius Scipio, cui post P. Corneli-
us Scipio
ædilis. Africano fuit cognomen: huic petenti ædilitatem quum obsisterent tribuni plebis, negantes rationem ejus habendam esse, quod nondum ad petendum legitima ætas esset: *Si me, inquit, omnes Quirites ædilem facere volunt, satis annorum habeo.* Tanto inde favore ad suffragium ferendum in tribus discursum est, ut tribuni repente incepto destiterint. Ædilitia largitio hæc fuit. Ludi Romani pro temporis illius copiis magnifice facti, et diem unum instaurati, et congii olei in vicos singulos dati. L. Villius Tappulus et M. Fundanius Fundulus, ædiles plebei, aliquot matronas apud populum probri accusarunt: quasdam ex eis damnatas in exsilium egerunt. Ludi plebei per biduum instaurati; et Jovis epulum fuit ludorum caussa.

III. Q. Fulvius Flaccus tertium, Ap. Claudius U. C. 540.
A. C. 212. consulatum ineunt. Et prætores provincias sortiti sunt; P. Cornelius Sulla urbanam et peregrinam, quæ duorum ante sors fuerat, Cn. Fulvius Flaccus Apuliam, C. Claudius Nero Suessulam, M. Junius Silanus Tuscos. Consulibus bellum cum Hannibale

U. C. 540. et binæ legiones decretæ: alter a Q. Fabio superioris
 A. C. 212. anni consule, alter a Fulvio Centumalo acciperet. Prætorum, Fulvii Flacci, quæ Luceriæ sub Æmilio prætore; Neronis Claudii, quæ in Piceno sub C. Terentio fuissent, legiones essent: supplementum in eas quisque scriberet sibi. M. Junio in Tuscos legiones urbanæ prioris anni datæ. Ti. Sempronio Graccho et P. Sempronio Tuditano imperium provinciæque Lucani et Galliæ cum suis exercitibus prorogata: item P. Lentulo, qua vetus provincia in Sicilia esset; M. Marcello Syracusæ, et qua Hieronis regnum fuisset: T. Otacilio classis: Græcia M. Valerio: Sardinia Q. Mucio Scævola: Hispaniæ P. et Cn. Corneliis. Ad veteres exercitus duæ urbanæ legiones a consulibus scriptæ, summaque trium et viginti legionum eo anno effecta est. Delectum consulum M. Postumii Pyrgensis cum magno prope motu rerum factum inpediit. Publicanus erat Postumius, qui multis annis parem fraude avaritiæque neminem in civitate habuerat, præter T. Pomponium Veientanum, quem, populantem temere agros in Lucanis, ductu Hannonis priore anno ceperant Karthaginienses. Hi, quia publicum periculum erat a vi tempestatis in iis, quæ portarentur ad exercitus, et ementiti erant falsa naufragia, et ea ipsa, quæ vera renunciaverant, fraude ipsorum facta erant, non casu: in veteres quassasque naves paucis et parvi pretii rebus inpositis, quum mersissent eas in alto, exceptis in præparatas scaphas nautis, multiplices fuisse merces ementiebantur. Ea fraus indicata M. Atilio prætori priore anno fuerat, ac per eum ad senatum delata, nec tamen ullo senatusconsulto notata: quia Patres ordinem publicanorum in

Postumii
 publicani
 fraus.

tali tempore offensum nolebant. Populus severior U. C. 540.
 vindex fraudis erat; excitatique tandem duo tribuni A. C. 212.
 plebis Sp. et L. Carvili, quum rem invisam infame-
 memque cernerent, ducentum millium æris multam
 M. Postumio dixerunt: cui certandæ quum dies ad-
 venisset, conciliumque tam frequens plebis adesset,
 ut multitudinem area Capitolii vix caperet; perora-
 ta caussa, spes una videbatur esse, si C. Servilius
 Casca tribunus plebis, qui propinquus cognatusque
 Postumio erat, prius, quam ad suffragium tribus vo-
 carentur, intercessisset. Testibus datis, tribuni po-
 pulum submoverunt; sitellaque adlata est, ut sorti-
 rentur, ubi Latini suffragium ferrent. Interim pub-
 licani Cascæ instare, ut concilio diem eximeret:
 populus reclamare: et forte in cornu primus sede-
 bat Casca, cui simul metus pudorque animum ver-
 sabat. Quum in eo parum præsidii esset, turbandæ Publicano-
 rei caussa publicani per vacuum in submoto locum rum auda-
 cuneo inruperunt, jurgantes simul cum populo tribu-
 nisque. Nec procul dimicatione res erat, quum Ful-
 vius consul tribunis, *Nonne videtis, inquit, vos in or-*
dinem coactos esse, et rem ad seditionem spectare, ni
propere dimittitis plebis concilium?

IV. Plebe dimissa, senatus vocatur, et consules
 referunt de concilio plebis turbato vi atque audacia
 publicanorum. *M. Furium Camillum, cujus exsilium*
ruina urbis secuta fuerit, damnari se ab iratis civibus
passum esse. Decemviros ante eum, quorum legibus ad
eam diem viverent, multos postea principes civitatis, ju-
dicium de se populi passos. Postumium Pyrgensem suf-
fragium populo Romano extorsisse, concilium plebis
sustulisse, tribunos in ordinem cõgisse, contra populum
Romanum aciem instruxisse, locum occupasse, ut tribu-

U. C. 540. *nos a plebe intercluderet, tribus in suffragium vocari*
 A. C. 212. *prohiberet. Nihil aliud a cæde ac dimicatione continuisse*

homines, nisi patientiam magistratuum, quod cesserint in præsentia furori atque audaciæ paucorum, vincique se ac populum Rōmanum passi sint : et comitia, quæ reus vi atque armis prohibiturus erat, ne caussa quærentibus dimicationem daretur, voluntate ipsius sustulerint. Hæc quum ab optimo quoque pro atrocitate rei acta essent, vimque eam contra rempublicam et pernicioso exemplo factam, senatus decreset ; confestim Carvili tribuni plebis, ommissa multæ certatione, rei capitalis diem Postumio dixerunt : ac, ni vades daret, prehendi a viatore, atque in carcerem duci jusserunt. Postumius, vadibus datis, non adfuit. Tribuni plebem rogaverunt, plebesque ita scivit : Si M. Postumius ante Kalendas Maias non prodisset, citatusque eo die non respondisset, neque excusatus esset, videri eum in exilio esse : bonaque ejus venire, ipsi aqua et igni placere interdici. Singulis deinde eorum, qui turbæ ac tumultus concitatores fuerant, rei capitalis diem dicere, ac vades poscere cœperunt. Primo non dantes, deinde etiam eos, qui dare possent, in carcerem conjiciebant : cujus rei periculum vitantes plerique in exilium abierunt.

Rei capitalis dies Postumio dicitur a tribunis plebis.

In exilium ipse et alii aliquot abeunt.

V. Hunc fraus publicanorum, deinde fraudem audacia protegens, exitum habuit. Comitia inde pontifici maximo creando sunt habita. Ea comitia novus pontifex M. Cornelius Cethegus habuit. Tres ingenti certamine petierunt : Q. Fulvius Flaccus consul, qui et ante bis consul et censor fuerat : et T. Manlius Torquatus, et ipse duobus consulatibus et censura insignis : et P. Licinius Crassus, qui et ædilitatem curulem petiturus erat : hic senes honoratos-

P. Licinius Pontifex

que juvenis in eo certamine vicit. Ante hunc, intra U. C. 540.
centum annos et viginti, nemo præter P. Cornelium A. C. 212.
Calussam, pontifex maximus creatus fuerat, qui sel- Maximus
la curuli non sedisset. Consules quum ægre delec- ante ædili-
tum conficerent, quod inopia juniorum non facile in- tatem.
utrumque, ut et novæ urbanæ legiones, et supple- Delectuum
mentum veteribus scriberetur, subficiebat; senatus difficultas.
absistere eos incepto vetuit, et triumviros binos creari
jussit: alteros, qui citra, alteros, qui ultra quinquage-
simum lapidem in pagis, forisque, et conciliabulis om-
nem copiam ingenuorum inspicerent: et, si qui roboris
satis ad ferenda arma habere viderentur, etiamsi non-
dum militari ætate essent, milites facerent. Tribuni
plebis, si iis videretur, ad populum ferrent, ut, qui mi-
nores septem et decem annis sacramento dixissent, iis
perinde stipendia procederent, ac si septem et decem an-
norum, aut majores, milites facti essent. Ex hoc se-
natusconsulto creati triumviri bini conquisitionem
ingenuorum per agros habuerunt. Eodem tempore Legati Can-
ex Sicilia literæ M. Marcelli de postulatis militum, nensis ex-
qui cum P. Lentulo militabant, in senatu recitatæ exercitus ad
sunt. Cannensis reliquæ cladis hic exercitus erat, Marcell-
relegatus in Siciliam, sicut ante dictum est, ne ante lum.
Punici belli finem in Italiam reportaretur.

VI. Hi permissu Lentuli primores equitum centu-
rionumque, et robora ex legionibus peditum, legatos
in hiberna ad M. Marcellum miserunt, e quibus unus,
potestate dicendi facta, *Consulem, inquit, te, M. Mar-* Eorum ora-
celle, in Italiam adissemus, quum primum de nobis, etsi tio.
non iniquum, certe triste senatusconsultum factum est;
nisi hoc sperassemus, in provinciam nos morte regum
turbatam ad grave bellum adversus Siculos simul Pæ-
nosque mitti: et sanguine nostro vulneribusque nos se-

U. C. 540. natui satisfacturos esse: sicut patrum memoria, qui
 A. C. 212. capti a Pyrrho ad Heracleam erant, adversus Pyrrhum
 ipsum pugnantes satisfecerunt. Quamquam quod ob
 meritum nostrum succensuistis, Patres conscripti, nobis,
 aut succensetis? Ambo mihi consules et universum se-
 natum intueri videor, quum te, M. Marcelle, intueor:
 quem si ad Cannas consulem habuissemus, melior et rei-
 publicæ et nostra fortuna esset. Sine, quæso, prius-
 quam de conditione nostra queror, noxam, cujus argui-
 mur, nos purgare. Si non Deûm ira, nec fato, cujus
 lege immobilis rerum humanarum ordo seritur, sed culpa
 periimus ad Cannas, cujus tandem ea culpa fuit? mi-
 litum, an imperatorum? Equidem miles nihil umquam
 dicam de imperatore meo, cui præsertim gratias sciam
 ab senatu actas, quod non desperaverit de republica;
 cui post fugam ab Cannis per omnes annos prorogatum
 imperium. Ceteros item ex reliquiis cladis ejus, quos
 tribunos militum habuimus, honores petere et gerere, et
 provincias obtinere audivimus. An vobis vestrisque li-
 beris ignoscitis facile, Patres conscripti, in hæc vilia
 capita sævi? et consuli primoribusque aliis civitatis fu-
 gere, quum spes alia nulla esset, turpe non fuit; mili-
 tes utique morituros in aciem misistis? Ad Alliam prope
 omnis exercitus fugit: ad Furculas Caudinas, ne ex-
 pertus quidem certamen, arma tradidit hosti, ut alias
 pudendas clades exercituum taceam: tamen tantum
 afuit ab eo, ut ulla ignominia iis exercitibus quæreretur,
 ut et urbs Roma per eum exercitum, qui ab Allia Veios
 transfugerat, reciperaretur; et Caudinæ legiones, quæ
 sine armis redierant Romam, armatæ remissæ in Sam-
 nium, eundem illum hostem sub jugum miserint, qui
 hac sua ignominia lætatus fuerat. Cannensem vero
 quisquam exercitum fugæ aut pavoris insimulare potest,

ubi plus quinquaginta millia hominum ceciderunt? unde U. C. 540.
 consul cum equitibus septuaginta fugit? unde nemo su- A. C. 212.
 perest, nisi quem hostis cædendo fessus reliquit? Quum
 captivis redemptio negabatur, nos vulgo homines lauda-
 bant, quod reipublicæ nos reservassemus: quod ad con-
 sulem Venusiam redissemus, et speciem justî exercitus
 fecissemus. Nunc deteriore conditione sumus, quam
 apud patres nostros fuerant captivi: quippe illis arma
 tantum atque ordo militandi, locusque, in quo tenderent
 in castris, est mutatus: quæ tamen, semel navata rei-
 publicæ opera, et uno felici prælio, recuperarunt. Ne-
 mo eorum relegatus in exsilium est: nemini spes eme-
 rendi stipendia ademta: hostis denique est datus, cum
 quo dimicantes, aut vitam semel, aut ignominiam fini-
 rent. Nos, quibus (nisi quod commisimus, ut quisquam
 ex Cannensi acie miles Romanus superesset) nihil objici
 potest, non solum a patria procul Italiaque, sed ab hoste
 etiam, relegati sumus: ubi senescamus in exsilio, ne qua
 spes, ne qua occasio abolendæ ignominia, ne qua pla-
 candæ civium iræ, ne qua denique bene moriendi sit.
 Neque ignominia finem, nec virtutis præmium petimus;
 modo experiri animum, et virtutem exercere liceat: la-
 borem et periculum petimus, ut virorum, ut militum of-
 ficio fungamur. Bellum in Sicilia jam alterum annum
 ingenti dimicatione geritur: urbes alias Pænus, alias
 Romanus expugnat: peditum, equitum acies concur-
 runt: ad Syracusas terra marique res geritur: clamo-
 rem pugnantium crepitumque armorum exaudimus re-
 sides ipsi ac segnes, tamquam nec manus, nec arma ha-
 beamus. Servorum legionibus Ti. Sempronius consul
 toties jam cum hoste signis conlatis pugnavit. Operæ
 pretium habent, libertatem civitatemque. Pro servis
 saltem ad hoc bellum emtis vobis simus: congregari cum

U. C. 540. *hoste liceat, et pugnando quærere libertatem. Vis tu*
 A. C. 212. *mari, vis terra, vis acie, vis urbibus obpugnandis expe-*
riri virtutem? asperrima quæque ad laborem pericu-
lumque deposcimus, ut, quod ad Cannas faciendum
fuit, quamprimum fiat; quoniam, quidquid postea vixi-
mus, id omne destinatum ignominia est.

Ad sena-
tum reji-
ciuntur.

Senatus
severitas.

VII. Sub hæc dicta ad genua Marcelli procubue-
 runt. Marcellus id nec juris, nec potestatis suæ
 esse dixit: senatui scripturum se, omniaque de sen-
 tentia Patrum facturum esse. Hæ literæ ad novos
 consules adlatæ, ac per eos in senatu recitatæ sunt:
 consultusque de his literis ita decrevit senatus: *Mi-*
litibus, qui ad Cannas commilitones suos pugnantes de-
seruissent, senatum nihil videre, cur respublica commit-
tenda sit. Si M. Claudio proconsuli aliter videretur,
faceret, quod e republica fideque sua duceret: dum ne
quis eorum munere vacaret, neu dono militari virtutis
ergo donaretur, neu in Italiam reportaretur, donec
hostis in terra Italia esset. Comitia deinde a prætore
 urbano de senatus sententia plebisque scitu sunt ha-
 bita: quibus creati sunt quinqueviri muris turribus-
 que reficiendis: et triumviri bini; uni sacris conqui-
 rendis, donisque persignandis; alteri reficiendis ædi-
 bus Fortunæ et matris Matutæ intra portam Car-
 mentalem, sed et Spei extra portam, quæ priore an-
 no incendio consumptæ fuerant. Tempestates fœdæ
 fuere. In Albano monte biduum continenter lapi-
 dibus pluit: tacta de cœlo multa: duæ in Capitolio
 ædes; vallum in castris multis locis supra Suessu-
 lam, et duo vigiles exanimati: murus turresque quæ-
 dam Cumis non ictæ modo fulminibus, sed etiam de-
 cussæ. Reate saxum ingens visum volitare: sol ru-
 bere solito magis, sanguineoque similis. Horum

prodigiorum caussa diem unum supplicatio fuit, et per aliquot dies consules rebus divinis operam dederunt: et per eosdem dies sacrum novemdiale fuit.

U. C. 540.
A. C. 212.

Quum Tarentinorum defectio jam diu et in spe Hannibali, et in suspicione Romanis esset, caussa forte extrinsecus maturandæ ejus intervenit. Phileas Tarentinus, diu jam per speciem legationis Romæ quum esset, vir inquieti animi, et minime otium, quo tum diutino senescere videbatur, patientis, aditum sibi ad obsides Tarentinos invenit. Custodiebantur in atrio Libertatis minore cura, quia nec ipsis, nec civitati eorum fallere Romanos expediebat. Hos, crebris conloquiis sollicitatos, corruptis ædituis duobus, quum primis tenebris custodia eduxisset, ipse comes occulti itineris factus profugit. Luce prima vulgata per urbem fuga est; missique, qui sequerentur, ab Tarracina comprehensos omnes retraxerunt: deducti in comitio, virgisque, adprobante populo, cæsi de saxo dejiciuntur.

Obsides Tarentini Roma fugiunt.

VIII. Hujus atrocitas pœnæ duarum nobilissimarum in Italia Græcarum civitatum animos irritavit, quum publice, tum etiam singulos privatim, ut quisque tam fœde interemtus aut propinquitate, aut amicitia contingebat. Ex iis tredecim fere nobiles juvenes Tarentini conjuraverunt, quorum principes Nico et Philemenus erant. Hi, prius, quam aliquid moverent, conloquendum cum Hannibale rati, nocte per speciem venandi urbem egressi, ad eum proficiscuntur: et, quum haud procul castris abessent, ceteri silva prope viam sese occuluerunt: Nico et Philemenus, progressi ad stationes comprehensique, ultro id petentes, ad Hannibalem deducti sunt. Qui quum et caussas consilii sui, et quid pararent, expo-

Tarentum
Hannibali
proditum.

U. C. 540. suissent ; conlaudati, oneratique promissis, jubentur,
 A. C. 212. ut fidem popularibus facerent, prædandi caussa se
 urbe egressos, pecora Karthaginensium, quæ pas-
 tum propulsa essent, ad urbem agere : tuto ac sine
 certamine id facturos, promissum est. Conspecta
 ea præda juvenum est : minusque, iterum ac sæpius
 id eos audere, miraculo fuit. Congressi cum Han-
 nibale rursus, fide sanxerunt, liberos Tarentinos le-
 ges suaque omnia habituros, neque ullum vectigal
 Pœno pensuros, præsidiumve invitos recepturos :
 prodita præsidia Karthaginensium fore. Hæc ubi
 convenerunt, tunc vero Philemenus consuetudinem
 nocte egrediendi redeundique in urbem frequentio-
 rem facere : (et erat venandi studio insignis) canes-
 que et alius adparatus sequebatur ; captumque ferme
 aliquid, aut ab hoste ex præparato ablatum repor-
 tando, donabat aut præfecto, aut custodibus porta-
 rum : nocte maxime commeare propter metum hos-
 tium, credebant. Ubi jam eo consuetudinis adducta
 res est, ut, quocumque noctis tempore sibilo dedis-
 set signum, porta aperiretur, tempus agendæ rei
 Hannibali visum est. Tridui viam aberat : ubi,
 quo minus mirum esset, uno eodemque loco stativa
 eum tamdiu habere, ægrum simulabat. Romanis
 quoque, qui in præsidio Tarenti erant, suspecta esse
 jam segnis mora ejus desierat.

IX. Ceterum postquam Tarentum ire constituit,
 decem millibus peditum atque equitum, quos in ex-
 peditione velocitate corporum ac levitate armorum
 aptissimos esse ratus est, electis, quarta vigilia noc-
 tis signa movit : præmissisque octoginta fere Numi-
 dis equitibus præcepit, ut discurrerent circa vias,
 perlustrarentque omnia oculis, ne quis agrestium

procul spectator agminis falleret; prægressos retra- U. C. 540.
herent, obvios occiderent, ut prædonum magis, A. C. 212.
quam exercitus, adcolis species esset: ipse, raptim
agmine acto, quindecim ferme millium spatio castra
ab Tarento posuit: et, ne ibi quidem nunciato, quo
pergerent, tantum convocatos milites monuit, via
omnes irent; nec diverti quemquam, aut excedere
ordinem agminis paterentur, et in primis intenti ad
imperia accipienda essent; neu quid nisi ducum jus-
su facerent: se in tempore editurum, quæ vellet agi.
Eadem ferme hora Tarentum fama pervenerat,
Numidas equites paucos populari agros, terrorem-
que late agrestibus injecisse. Ad quem nuncium
nihil ultra motus præfectus Romanus, quam ut par-
tem equitum postero die luce prima juberet exire ad
arcendum populationibus hostem: in cetera adeo
nihil ob id intenta cura est, ut contra pro argumento
fuerit illa procursatio Numidarum, Hannibalem ex-
ercitumque castris non movisse. Hannibal concubia
nocte movit: dux Philemenus erat, cum solito captæ
venationis onere: ceteri proditores ea, quæ compo-
sita erant, exspectabant. Convenerat autem, ut Phi-
lemenus, portula adsueta venationem inferens, ar-
matus induceret: parte alia portam Temenida adiret
Hannibal. Ea mediterranea regione orientem spec-
tabat: aliquantum intra mœnia includuntur. Quum
portæ adpropinquaret, editus ex composito ignis ab
Hannibale est, refulsitque: idem redditum ab Ni-
cone signum: extinctæ deinde utrimque flammæ
sunt. Hannibal silentio ducebat ad portam. Nico Tarentum
ex improviso adortus sopitos vigiles in cubilibus suis ingreditur
obtruncat, portamque aperit. Hannibal cum pedi- Hannibal.
tum agmine ingreditur, equites subsistere jubet: ut,

U. C. 540. quo res postulet, obcurrere libero campo possent.

A. C. 212. Et Philemenus portulæ parte alia, qua commeare adsuerat, adpropinquabat : nota vox ejus et familiare jam signum quum excitasset vigilem, dicentis, vix sustinere grandis bestię onus, portula aperitur : inferentes aprum duos juvenes secutus ipse cum expedito venatore, vigilem, incautius miraculo magnitudinis in eos, qui ferebant, versum, venabulo trajicit : ingressi deinde triginta fere armati, ceteros vigiles obtruncant, refringuntque portam proximam : et agmen sub signis confestim inrupit : inde cum silentio in forum ducti, Hannibali sese conjunxerunt. Cum duobus millibus Gallorum Pœnus, in tres divisas partes, per urbem dimittit Tarentinos, et itinera quam maxime frequentia occupare jubet : tumultu orto, Romanos passim cædi, oppidanis parci : sed, ut fieri id posset, præcipit juvenibus Tarentinis, ut, ubi quem suorum procul vidissent, quiescere et silere, ac bono animo esse juberent.

X. Jam tumultus erat clamorque, qualis esse in capta urbe solet : sed, quid rei esset, nemo satis pro certo scire. Tarentini Romanos ad diripiendam urbem credere coortos : Romanis seditio aliqua cum fraude videri ab oppidanis mota. Præfectus primo excitatus tumultu, in portum effugit : inde, acceptus scapha, in arcem circumvehitur. Terrorem et tuba audita ex theatro faciebat : nam et Romana erat, a proditoribus ad hoc ipsum præparata : et inscianter a Græco inflata, quis, aut quibus signum daret, incertum efficiebat. Ubi inluxit, et Romanis Punica et Gallica arma cognita, tum dubitationem exemerunt : et Græci, Romanos passim cæde stratos cernentes, ab Hannibale captam urbem senserunt. Post-

quam lux certior erat, et Romani, qui cædibus su-
 perfuerant, in arcem confugerant, conticescebatque
 paullatim tumultus, tum Hannibal Tarentinos sine
 armis convocare jubet. Convenere omnes, præter-
 quam qui, cedentes in arcem, Romanos ad omnem
 adeundam simul fortunam persecuti fuerant. Ibi
 Hannibal, benigne adlocutus Tarentinos, testatus-
 que, quæ præstitisset civibus eorum, quos ad Trasi-
 menum aut ad Cannas cepisset, simul in dominatio-
 nem superbam Romanorum invectus, recipere se in
 domos suas quemque jussit, et foribus nomen suum
 inscribere: se domos eas, quæ inscriptæ non essent,
 signo extemplo dato, diripi jussurum. Si quis in
 hospitio civis Romani (vacuas autem tenebant do-
 mos) nomen inscripsisset, eum se pro hoste habitu-
 rum. Concione dimissa, quum titulis notatæ fores
 discrimen pacatæ ab hostili domo fecissent, signo
 dato, ad diripienda hospitia Romana passim discur-
 sum est: et fuit prædæ aliquantum.

U. C. 540.
 A. C. 212.
 Romani in
 arcem con-
 fugiunt.

XI. Postero die ad obpugnandam arcem ducit:
 quam quum et mari, quo in peninsulæ modum pars
 major circumluitur, præaltis rupibus, et ab ipsa urbe
 muro et fossa ingenti septam videret, eoque nec vi,
 nec operibus expugnabilem esse; ne aut se ipsum
 cura tuendi Tarentinos a majoribus rebus moraretur;
 aut in relictos sine valido præsidio Tarentinos
 inpetum ex arce, quum vellent, Romani facerent,
 vallo urbem ab arce intersepire statuit: non sine
 illa etiam spe, cum prohibentibus opus Romanis
 manum posse conseri; et, si ferocius procucurris-
 sent, magna cæde ita adtenuari præsidii vires, ut
 facile per se ipsi Tarentini urbem ab iis tueri pos-
 sent. Ubi cœptum opus est, patefacta repente porta,

U. C. 540. in munientes inpetum fecerunt Romani : pellicque se
A. C. 212. statio passa est, quæ pro opere erat, ut successu cresceret audacia, pluresque et longius pulsos persequerentur. Tum signo dato coorti undique Pœni sunt, quos instructos ad hoc Hannibal tenuerat ; nec sustinere inpetum Romani, sed ab effusa fuga loci angustiae eos, impeditaque alia opere jam cœpto, alia adparatu operis, morabantur : plurimi in fossam præcipitavere, occisique sunt plures in fuga, quam in pugna. Inde et opus nullo prohibente fieri cœptum. Fossa ingens ducta, et vallum intra eam erigitur : modicoque post intervallo murum etiam eadem regione addere parat, ut vel sine præsidio tueri se adversus Romanos possent. Reliquit tamen modicum præsidium, ut simul in faciendo muro adjuvaret : ipse, profectus cum ceteris copiis, ad Galæsum flumen (quinque millia ab urbe abest) posuit castra. Ex iis stativis regressus ad inspiciendum opus (quod aliquantum opinione ejus celerius creverat) spem cepit, etiam arcem expugnari posse. Et est non altitudine, ut cetera, tuta, sed loco plano posita, et ab urbe muro tantum ac fossa divisa. Quum jam machinationum omni genere et operibus obpugnaretur, missum a Metaponto præsidium Romanis fecit animum, ut nocte ex improviso opera hostium invaderent. Alia disjecerunt, alia igni conruperunt : isque finis Hannibali fuit ea parte arcem obpugnandi. Reliqua erat in obsidione spes, nec ea satis efficax, quia arcem tenentes, quæ in peninsula posita inminet faucibus portus, mare liberum habebant : urbs contra exclusa maritimis commeatibus, propiusque inopiam erant obsidentes, quam obsessi. Hannibal, convocatis principibus Tarentinorum, omnes præ-

santes difficultates exposuit : neque arcis tam munitæ U. C. 540.
 expugnandæ viam cernere, neque in obsidione quidquam A. C. 212.
 habere spei, donec mari potiantur hostes. Quod si
 naves sint, quibus commeatus invehi prohibeant, exem-
 plo aut abscessuros, aut dedituros se hostes. Adsentie-
 bantur Tarentini ; ceterum ei, qui consilium adfer-
 ret, opem quoque in eam rem adferendam esse, cen-
 sebant. *Punicas enim naves ex Sicilia aditas id posse* Plaustris
facere : suas, quæ sinu exiguo intus inclusæ essent, quum naves
claustra portus hostis haberet, ecquem ad modum inde transfe-
in apertum mare evasuras ? Evadent, inquit Hanni- runtur in
bal. Multa, quæ impedita natura sunt, consilio expe- mare.
diuntur. Urbem in campo sitam habetis : planæ et sa-
tis latæ viæ patent in omnes partes. Via, quæ in por-
tum per mediam urbem ad mare transmissa est, plau-
stris transveham naves haud magna mole : et mare
nostrum erit, quo nunc hostes potiuntur : et illinc mari,
hinc terra circumsidebimus arcem : immo brevi, aut re-
lictam ab hostibus, aut cum ipsis hostibus capiemus.
 Hæc oratio non spem modo effectus, sed ingentem
 etiam ducis admirationem fecit. Contracta exem-
 plo undique plaustra, junctaque inter se : et ma-
 chinæ ad subducendas naves admotæ, munitumque
 iter, quo faciliora plaustra minorque moles in trans-
 itu esset. Jumenta inde et homines contracti, et
 opus inpigre cœptum : paucosque post dies classis
 instructa ac parata circumvehitur arcem, et ante os
 ipsum portus anchoras jacit. Hunc statum rerum
 Hannibal Tarenti reliquit, regressus ipse in hiberna.
 Ceterum, defectio Tarentinorum utrum priore anno,
 an hoc, facta sit, in diversum auctores trahunt :
 plures propioresque ætate memoriæ rerum hoc anno
 tradunt factum.

U.C. 540. XII. Romæ consules prætoresque usque ante
 A.C. 212. diem quintum Kalendas Maias Latinæ tenuerunt :
 eo die perpetrato sacro in monte, in suas quisque
 provincias proficiscuntur. Religio deinde nova ob-
 jecta est ex carminibus Marcianis. Vates hic Mar-
 cius inlustris fuerat, et quum conquisitio priore an-
 no ex senatusconsulto talium librorum fieret, in M.
 Atilii prætoris urbani, qui eam rem agebat, manus
 venerant : is protinus novo prætori Sullæ tradiderat.
 Ex hujus Marcii duobus carminibus, alterius post
 rem actam editi cum rato auctoritas eventu, alteri
 quoque, cujus nondum tempus venerat, adferebat
 fidem. Priore carmine Cannensis prædicta clades
 in hæc ferme verba erat : *Amnem Trojugena Cannam
 Romane fuge : ne te alienigenæ cogant in campo Dio-
 medis conserere manus. Sed neque credes tu mihi, do-
 nec compleris sanguine campum ; multaque millia oc-
 cisa tua deferat amnis in pontum magnum ex terra
 frugifera ; piscibus atque avibus ferisque, quæ incolunt
 terras, iis fuat esca caro tua : nam mihi ita Jupiter
 fatus est. Et Diomedis Argivi campos et Cannam
 flumen, qui militaverant in iis locis, juxta atque ip-
 sam cladem agnoscebant. Tum alterum carmen re-
 citatum, non eo tantum obscurius, quia incertiora
 futura præteritis sunt, sed perplexius etiam scrip-
 turæ genere. Hostem, Romani, si expellere vultis,
 vomitamque, quæ gentium venit longe, Apollini voven-
 dos censeo ludos, qui quotannis comiter Apollini fiant :
 quum populus dederit ex publico partem, privati uti
 conferant pro se suisque. Iis ludis faciendis prærit
 prætor is, qui jus populo plebeique dabit summum.
 Decemviri Græco ritu hostiis sacra faciant. Hæc si
 recte faxitis, gaudebitis semper, fietque res vestra me-*

Marcus
 vates, et
 ejus duo
 carmina.

lior: nam is Divus exstinguet perduelles vestros, qui vestros campos pascunt placide. Ad id carmen ex-

U. C. 540.

A. C. 212.

planandum diem unum sumserunt: postero die senatusconsultum factum est, ut decemviri libros, de ludis Apollini reque divina faciunda, inspicerent. Ea quum inspecta relataque ad senatum essent, censuerunt Patres: *Apollini ludos rovendos faciundosque: et, quando ludi facti essent, duodecim millia æris prætori ad rem divinam et duas hostias majores dandas.* Alterum senatusconsultum factum est, *Ut decemviri sacra Græco ritu facerent, iisque hostiis. Apollini bove aurato et capris duabus albis auratis, Latonæ bove femina aurata.* Ludos prætor in circo maximo quum facturus esset, edixit, ut populus per eos ludos stipem Apollini, quantam commodum esset, conferret. Hæc est origo ludorum Apollinarium, victoriæ, non valetudinis, ergo, ut plerique rentur, votorum factorumque: populus coronatus spectavit: matronæ supplicavere: vulgo apertis januis in propatulis epulati sunt, celeberrime dies omni ceremoniarum genere fuit.

Origo Apollinarium ludorum.

XIII. Quum Hannibal circa Tarentum, consules ambo in Samnio essent, sed circumsessuri Capuam viderentur; quod malum diuturnæ obsidionis esse solet, jam famem Campani sentiebant; quia semen-tem facere prohibuerant eos Romani exercitus. Itaque legatos ad Hannibalem miserunt, orantes, ut prius, quam consules in agros suos educerent legiones, viæque omnes hostium prædiis insiderentur, frumentum ex propinquis locis convehi juberet Capuam. Hannibal, Hannonem ex Brutiis cum exercitu in Campaniam transire, et dare operam, ut frumenti copia fieret Campanis, jussit. Hanno, ex

Capuæ inopia.

U. C. 540. Bruttii profectus cum exercitu, vitabundus castra
 A. C. 212. hostium consulesque, qui in Samnio erant, quum
 Hanno in Benevento jam adpropinquaret, tria passuum millia
 Campa- ab ipsa urbe loco edito castra posuit: inde ex sociis
 niam cum exercitu venit. circa populis, quo æstate comportatum erat, deveh
 frumentum in castra jussit; præsiidiis datis, quæ
 commeatus eos prosequerentur. Capuam inde nun
 cium misit, qua die in castris ad accipiendum fru
 mentum præsto essent, omni undique genere vehi
 culorum jumentorumque ex agris contracto. Id pro
 cetera socordia negligentiaque a Campanis actum:
 paullo plus quadringenta vehicula missa, et pauca
 præterea jumenta: ob id castigatis ab Hannone,
 quod ne fames quidem, quæ mutas accenderet bes
 tias, curam eorum stimulare posset, alia prodita dies
 ad frumentum majore adparatu petendum. Ea om
 nia, sicut acta erant, quum enunciata Beneventanis
 essent, legatos decem extemplo ad consules (circa
 Bovianum castra Romanorum erant) miserunt. Qui
 quum, auditis, quæ ad Capuam agerentur, inter se
 comparassent, ut alter in Campaniam exercitum du
 ceret; Fulvius, cui ea provincia obvenerat, profec
 tus, nocte Beneventi mœnia est ingressus. Ex pro
 pinquo cognoscit, Hannonem cum exercitus parte
 profectum frumentatum: per quæstorem Campanis
 datum frumentum: duo millia plaustrorum, incon
 ditam inermemque aliam turbam, advenisse: per tu
 multum ac trepidationem omnia agi: castrorumque
 formam et militarem ordinem, inmixtis agrestibus
 iis ex terris, sublatum. His satis compertis, consul
 militibus edicit, signa tantum armaque in proximam
 noctem expedirent: castra Punica obpugnanda esse.
 Quarta vigilia profecti, sarcinis omnibus inpedimen-

tisque Beneventi relictis, paullo ante lucem quum ad U. C. 540. castra pervenissent, tantum pavoris injecerunt, ut, A. C. 212. si in plano castra posita essent, haud dubie primo inpetu capi potuerint: altitudo loci et munimenta defenderunt, quæ nulla ex parte adiri, nisi arduo ac difficili adscensu, poterant. Luce prima prælium ingens accensum est: nec vallum modo tutantur Pœni, sed, ut quibus locus æquior esset, deturbant nitentes per ardua hostes.

XIV. Vicit tamen omnia p̄tinax virtus, et ali- Hannonis
quot simul partibus ad vallum ac fossas perventum castra ca-
est; sed cum multis vulneribus ac militum pernicie. piuntur a
Romanis.
Itaque convocatis tribunis militum consul, *absisten-*
dum temerario incepto, ait: *tutius sibi videri, reduci*
eo die exercitum Beneventum: dein postero castris se
hostium jungi, ne exire inde Campani, neve Hanno re-
gredi posset. Id quo facilius obtineatur, collegam quo-
que et exercitum ejus se adciturum, totumque eo ver-
suros bellum: hæc consilia ducis, quum jam receptui
caneret, clamor militum adspernantium tam segne
imperium disjecit. Proxima portæ hostium erat co-
hors Peligna: cujus præfectus Vibius Accuæus ad-
reptum vexillum trans vallum hostium trajecit. Ex-
secratus inde seque et cohortem, si ejus vexilli hos-
tes potiti essent, princeps ipse per fossam vallumque
in castra inrumpit. Jamque intra vallum Peligni
pugnabant, quum altera parte, Valerio Flacco tri-
buno militum tertiæ legionis exprobrante Romanis
ignaviam, qui sociis captorum castrorum conceder-
ent decus, T. Pedanius, princeps primus centurio,
quum signifero signum ademisset, Jam hoc signum,
et hic centurio, inquit, intra vallum hostium erit. Se-
quantur, qui capi signum ab hoste prohibitori sunt.

U. C. 540. Manipulares sui primum transcendentem fossam,
 A. C. 212. dein legio tota secuta est. Jam et consul, ad conspectum transgredientium vallum mutato consilio, ab revocando ad incitandos hortandosque versus milites, ostendere, in quanto discrimine ac periculo fortissima cohors sociorum et civium legio esset. Itaque pro se quisque omnes per æqua atque iniqua loca, quum undique tela conjicerentur, armaque et corpora hostes objicerent, pervadunt, inrumpuntque: multi vulnerati, etiam quos vires sanguisque desereret, ut intra vallum hostium caderent, nitebantur. Capta itaque momento temporis, velut in plano sita, nec permunita castra. Cædes inde, non jam pugna erat, omnibus intra vallum permixtis: supra sex millia hostium occisa, supra septem millia capitum, cum frumentatoribus Campanis omniique plaustorum et jumentorum adparatu, capta: et alia ingens præda fuit, quam Hanno, populabundus passim quum isset, ex sociorum populi Romani agris traxerat. Inde, dejectis hostium castris, Beneventum reditum est, prædamque ibi ambo consules (nam et Ap. Claudius eo post paucos dies venit) vendiderunt, diviseruntque: et donati, quorum opera castra hostium capta erant: ante alios Accuæus Pelignus, et T. Pedanius princeps tertiæ legionis. Hanno ab Cominio Cerito, quo nunciata castrorum clades est, cum paucis frumentatoribus, quos forte secum habuerat, fugæ magis, quam itineris, modo in Bruttios rediit.

Campani
 Hannibalem vo-
 cant.

XV. Et Campani, audita sua pariter sociorumque clade, legatos ad Hannibalem miserunt, qui nunciarent, *duos consules ad Beneventum esse, diei iter a Capua; tantum non ad portas et muros bellum esse:*

ni propere subveniat, celerius Capuam, quam Arpos, in potestatem hostium venturam. Ne Tarentum quidem, non modo arcem, tanti debere esse, ut Capuam, quam Karthagini æquare sit solitus, desertam indefensamque populo Romano tradat. Hannibal, curæ sibi fore rem Campanam pollicitus, in præsentia duo millia equitum cum legatis mittit, quo præsidio agros populationibus possent prohibere. Romanis interim, sicut aliarum rerum, arcis Tarentinæ, præsidiique, quod ibi obsideretur, cura esse. C. Servilius legatus, ex auctoritate Patrum a P. Cornelio prætore in Etruriam ad frumentum coëmendum missus, cum aliquot navibus onustis in portum Tarentinum inter hostium custodias pervenit. Cujus adventu, qui ante, in exigua spe, vocati sæpe ad transitionem ab hostibus per colloquia erant, ultro ad transeundum hostes vocabant sollicitabantque: et erat satis validum præsidium, traductis ad arcem Tarenti tuendam, qui Metaponti erant, militibus. Itaque Metapontini extemplo, metu, quo tenebantur, liberati, ad Hannibalem defecere. Hoc idem eadem ora maris et Thurini fecerunt: movit eos non Tarentinorum magis defectio Metapontinorumque, quibus, indidem ex Achaia oriundi, etiam cognatione juncti erant, quam ira in Romanos propter obsides nuper interfectos. Eorum amici cognatique literas ac nuncios ad Hannonem Magonemque, qui in propinquo in Brutiis erant, miserunt, si exercitum ad mænia admovissent, se in potestatem eorum urbem tradituros esse. M. Atinius Thuriis cum modico præsidio præerat: quem facile elici ad certamen temere ineundum rebantur posse; non militum, quos perpaucos habebat, fiducia, quam juventutis Thurinæ: eam ex in-

Metapontini Thuri-
 nique ad
 Hannibalem defi-
 ciunt.

U. C. 540. dustria centuriaverat armaveratque ad tales casus.

A. C. 212. Divisis copiis inter se, duces Pœni quum agrum Thurinum ingressi essent, Hanno cum peditum agmine infestis signis ire ad urbem pergit. Mago cum equitatu, tectus collibus, ad tegendas insidias obpositis, subsistit. Atinius, peditum tantum agmine per exploratores comperto, in aciem copias educit, et fraudis intestinæ, et hostium insidiarum ignarus. Pedestre prælium fuit persegne, paucis in prima acie pugnantibus Romanis; Thurinis expectantibus magis, quam adjuvantibus, eventum: et Karthaginensium acies de industria pedem referebat, ut ad terga collis ab equite suo insessi hostem incautum pertraheret. Quo ubi ventum est, coorti cum clamore equites, propere inconditam Thurinorum turbam, nec satis fido animo, unde pugnabat, stantem, extemplo in fugam averterunt. Romani, quamquam circumventos hinc pedes, hinc eques urgebat, tamen aliquamdiu pugnam traxere: postremo et ipsi terga vertunt, atque ad urbem fugiunt. Ibi proditores conglobati, quum popularium agmen patentibus portis accepissent, ubi Romanos fusos ad urbem ferri viderunt, conclamant, *instare Pœnum, permixtosque et hostes urbem invasuros, nî propere portas claudant*. Ita exclusos Romanos præbuere hosti ad cædem. Atinius tamen cum paucis receptus. Seditio inde paullisper tenuit; quum alii urbem tuendam, inde alii cedendum fortunæ, et tradendam urbem victoribus censerent: ceterum, ut plerumque, fortuna et consilia mala vicerunt: Atinio cum suis ad mare ac naves deducto, magis quia ipsi, ob imperium in se mite ac justum, consultum volebant, quam respectu Romanorum, Karthaginienses in ur-

bon accipiunt. Consules a Benevento in Campa- U.C. 546.
A.C. 212.
Coss. in Campa-
num agrum le-
giones du-
cunt.
num agrum legiones ducunt, non ad frumenta modo,
quæ jam in hibernis erant, conrumpenda, sed ad Ca-
puam obpugnandam; nobilem se consulatum tam
opulentæ urbis excidio rati facturos, simul et ingens
flagitium imperio demturos, quod urbi tam propin-
quæ tertium annum impunita defectio esset. Cete-
rum, ne Beneventum sine præsidio esset, et ut ad
subita belli, si Hannibal (quod facturum haud du-
bitabant) ad opem ferendam sociis Capuam venisset,
equites vim sustinere possent, Ti. Gracchum ex Lu-
canis cum equitatu ac levi armatura Beneventum
venire jubent: legionibus stativisque ad obtinendas
res in Lucanis aliquem præficeret.

XVI. Graccho, priusquam ex Lucanis moveret, Prodigium
Graccho
factum.
sacrificanti triste prodigium factum est: ad exta,
sacrificio perpetrato, angues duo ex occulto adlapsi,
edere jecur, conspectique repente ex oculis abierunt:
id quum aruspicum monitu sacrificium instauraretur,
atque intentius exta reserata servarentur: iterum ac
tertium venisse tradunt, libatoque jecinore intactos
angues abiisse. Quum aruspices, ad imperatorem
id pertinere prodigium, præmonuissent, et ab occul-
tis cavendum hominibus consultisque; nulla tamen
providentia fatum imminens moveri potuit. Flavius Flavius Lu-
canus pro-
ditor.
Lucanus fuit, caput partis ejus Lucanorum, quum
pars ad Hannibalem defecisset, quæ cum Romanis
stabat: et jam anno in magistratu erat; ab eisdem
illis creatus prætor. Is, mutata repente voluntate,
locum gratiæ apud Pœnum quærens, neque transire
ipse, neque trahere ad defectionem Lucanos satis
habuit, nisi imperatoris et ejusdem hospitis proditi
capite ac sanguine fœdus cum hostibus sanxisset:

U. C. 540. ad Magonem, qui in Bruttiis præerat, clam in con-
 A. C. 212. loquium venit: fideque ab eo accepta, si Romanum
 iis imperatorem tradidisset, liberos cum suis legibus
 venturos in amicitiam Lucanos; deducit Pœnum,
 in locum pacis Gracchum adducturus. Magonem
 ibi pedites equitesque armare, et capere eas latebras,
 ubi ingentem numerum occuleret, jubet. Loco sa-
 tis inspecto atque undique explorato, dies composita
 gerendæ rei est. Flavius ad Romanum imperatorem
 venit: *Rem se, ait, magnam inchoasse, ad quam per-
 ficiendum ipsius Gracchi opera opus esse: omnium po-
 pulorum prætoribus, qui ad Pœnum in illo communi
 Italiæ motu descissent, persuasisse, ut redirent in ami-
 citiam Romanorum: quando res quoque Romana, quæ
 prope exitium clade Cannensi venisset, in dies melior
 atque auctior fieret; Hannibalis vis senesceret, ac prope
 ad nihilum venisset. Veteri delicto haud implacabiles
 fore Romanos: nullam umquam gentem magis exora-
 bilem, promptioremque veniæ dandæ fuisse: quoties re-
 bellioni etiam majorum suorum ignotum? Hæc ab se,
 ait, dicta: ceterum ab ipso Graccho eadem hæc audire
 malle eos, præsentisque contingere dextram: id pignus
 fidei secum ferre. Locum se consciis dixisse a con-
 spectu amotum, haud procul a castris Romanis. Ibi
 paucis verbis transigi rem posse, ut omne nomen Lu-
 canum in fide ac societate Romana sit. Gracchus,
 fraudem et sermoni et rei abesse ratus, ac similitu-
 dine veri captus, cum lictoribus ac turma equitum e
 castris profectus, duce hospite in insidias præcipita-
 tur. Hostes subito exorti: et, ne dubia proditio
 esset, Flavius his se adjungit: tela undique in Grac-
 chum atque equites conjiciuntur. Gracchus ex equo
 desilit: idem ceteros facere jubet, hortaturque, *Ut,**

Gracchus
 proditione
 circum-
 ventus.

quod unum reliquum fortuna fecerit, id cohonestent vir-
 tute. Reliquum autem quid esse paucis, a multitudine
 in valle silva ac montibus septa circumventis, præter
 mortem? id referre, utrum præbentes corpora pecorum
 modo inulti trucidentur, an, toto animo a patiendo ex-
 spectandoque eventu in inpetum atque iram verso,
 agentes audentesque, perfusi hostium cruore, inter ex-
 spirantium inimicorum cumulata armaque et corpora
 cadant. Lucanum proditorem ac transfugam omnes
 peterent: qui eam victimam præ se ad inferos misisset,
 eum decus eximium egregiumque solatium suæ morti
 inventurum. Inter hæc dicta, paludamento circum-
 lævum brachium intorto, (nam ne scuta quidem se-
 cum extulerant) in hostes inpetum fecit. Major,
 quam pro numero hominum, editur pugna: jaculis
 maxime aperta corpora Romanorum, et quum un-
 dique ex altioribus locis in cavam vallem conjectus
 esset, transfiguntur. Gracchum, jam nudatum præ-
 sidio, vivum capere Pœni nituntur: ceterum ille,
 conspicatus Lucanum hospitem inter hostes, adeo
 infestus confertos invasit, ut parci ei sine multorum
 perniciæ non posset. Exanimem eum Mago exem-
 plo ad Hannibalem misit, ponique cum captis simul
 fascibus ante tribunal imperatoris jussit. Hæc vera
 fama est. Gracchus in Lucanis ad campos, qui
 Veteres vocantur, periit.

XVII. Sunt, qui in agro Beneventano, prope Ca-
 lorem fluvium, ostendant a castris cum lictoribus ac
 tribus servis lavandi caussa progressum, quum forte
 inter salicta innata ripis laterent hostes, nudum at-
 que inermem, saxisque, quæ volvit amnis, propug-
 nantem, interfectum. Sunt, qui aruspicum monitu
 quingentos passus a castris progressum, uti loco

U. C. 540. puro ea, quæ ante dicta prodigia sunt, procuraret,
 A. C. 212. ab insidentibus forte locum duabus turmis Numidarum circumventum scribant: adeo nec locus, nec ratio mortis in viro tam claro et insigni constat. Funeris quoque Gracchi varia est fama. Alii in castris Romanis sepultum ab suis, alii ab Hannibale (et ea vulgatiores fama est) tradunt in vestibulo Punicorum castrorum rogam exstructum esse: armatum exercitum decucurrisse cum tripudiis Hispanorum, motibusque armorum et corporum suæ cuique genti adsuetis, ipso Hannibale omni rerum verborumque honore exsequias celebrante. Hæc tradunt, qui in Lucanis rei gestæ auctores sunt. Si illis, qui ad Calorem fluvium interfectum memorant, credere velis, capitis tantum Gracchi hostes potiti sunt: eo delato ad Hannibalem, missus ab eo confestim Karthalo, qui in castra Romana ad Cn. Cornelium quæstorem deferret: is funus imperatoris in castris, celebrantibus cum exercitu Beneventanis, fecit.

Coss. ad
 Capuam
 fusi.

XVIII. Consules, agrum Campanum ingressi, quum passim popularentur, eruptione oppidanorum et Magonis cum equitatu territi et trepidi, ad signa milites palatos passim revocarunt: et, vixdum instructa acie fusi, supra mille et quingentos milites amiserunt. Inde ingens ferocia superbæ suopte ingenio genti crevit, multisque præliis lacescebant Romanos: sed intentiores ad cavendum consules una pugna fecerat, incaute atque inconsulte inita. Restituit tamen his animos, et illis minuit audaciam, parva una res: sed in bello nihil tam leve est, quod non magnæ interdum rei momentum faciat. T. Quinctio Crispino Badius Campanus hospes erat, perfamiliari hospitio junctus: creverat consuetudo,

Crispinus
 Rom.

Badius
 Camp.

quod æger Romæ apud Crispinum Badius ante de- U. C. 540.
fectionem Campanam liberaliter comiterque curatus A. C. 212.
fuerat. Tum Badius, progressus ante stationes, quæ
pro porta stabant, vocari Crispinum jussit: quod
ubi est Crispino nunciatum, ratus conloquium ami-
cum ac familiare quæri, manente memoria, etiam in
discidio publicorum fœderum, privati juris, paullum
a ceteris processit. Postquam in conspectum venere,
Provoco te, inquit, ad pugnam, Crispine, Badius:
conscendamus equos, submotisque aliis, uter bello me-
lior sit, decernamus. Ad ea Crispinus, *nec sibi, nec*
illi, ait, hostes deesse, in quibus virtutem ostendant: se,
etiamsi in acie obcurrat, declinaturum, ne hospitali
cede dextram violet: conversusque abibat. Enim-
vero ferocius tum Campanus increpare mollitiem ig-
naviamque, et se digna probra in insontem jacere,
hospitalem hostem adpellans, simulantemque parcere,
cui sciat parem se non esse: si parum publicis fœderi-
bus ruptis diremta simul et privata jura esse putet, Ba-
dium Campanum T. Quinctio Crispino Romano palam,
duobus exercitibus audientibus, renunciare hospitium.
Nihil sibi cum eo consociatum, nihil fœderatum hosti
cum hoste, cujus patriam ac penates publicos privatos-
que obpugnatum venisset. Si vir esset, congredederetur.
Diu cunctantem Crispinum perpulere turmales, ne
inpune insultare Campanum pateretur: itaque tan-
tum moratus, dum imperatores consuleret, permit-
terentne sibi extra ordinem in provocantem hostem
pugnare, permissu eorum arma cepit, equumque
conscendit, et Badium, nomine compellans, ad pug-
nam evocavit. Nulla mora a Campano facta est: Singulare
infestis equis concurrerunt. Crispinus supra scutum eorum cer-
sinistrum humerum Badio hasta transfixit, superque tamen.

U. C. 540. delapsus cum vulnere ex equo desiluit, ut pedes ja-
 centem conficeret. Badius, priusquam obprimeretur, parma atque equo relicto, ad suos aufugit. Crispinus, equum, armaque capta, et cruentam cuspidem insignis spoliis ostentans, cum magna laude et gratulatione militum, ad consules est deductus, laudatusque ibi magnifice, et donis donatus.

Coss. pug-
 nant cum
 Hanniba-
 le, æquo
 Marte.

XIX. Hannibal ex agro Beneventano castra ad Capuam quum movisset, tertio post die, quam venit, copias in aciem eduxit: haudquaquam dubius, quod Campanis, absente se, paucos ante dies secunda fuisset pugna, quin multo minus se suumque toties victorem exercitum sustinere Romani possent. Ceterum, postquam pugnari cœptum est, equitum maxime incursu, quum jaculis obrueretur, laborabat Romana acies: donec signum equitibus datum est, ut in hostem admitterent equos: ita equestre prælium erat; quum procul visus Sempronianus exercitus, cui Cn. Cornelius quæstor præerat, utrique parti parem metum præbuit, ne hostes novi adventarent. Velut ex composito utrimque signum receptui datum: reductique in castra prope æquo Marte discesserunt: plures tamen ab Romanis primo incursu equitum ceciderunt. Inde consules, ut averterent Capua Hannibalem, nocte, quæ secuta est, diversi, Fulvius in agrum Cumanum, Claudius in Lucanos abiit. Postero die, quum vacua castra esse Romanorum nunciatum Hannibali esset, et duobus agminibus diversos abiisse; incertus primo, utrum sequeretur, Appium institit sequi. Ille, circumducto hoste, qua voluit, alio itinere ad Capuam rediit. Hannibali alia in his locis bene gerendæ rei fortuna oblata est. M. Centenius fuit cognomine

M. Cente-
 nius.

Penula, insignis inter primipili centuriones et magnitudine corporis et animo : is, perfunctus militia, per P. Cornelium Sullam prætorem in senatum introductus, petit a Patribus, uti sibi quinque millia militum darentur. *Se, peritum et hostis et regionum, brevi operæ pretium facturum ; et, quibus artibus ad id locorum nostri et duces et exercitus capti forent, iis adversus inventorem usurum.* Id non promissum magis stolide quam stolide creditum : tamquam eadem militares et imperatoriæ artes essent : data, pro quinque, octo millia militum ; pars dimidia cives, pars socii : et ipse aliquantum voluntariorum itinere in agris concivit, ac, prope duplicato exercitu, in Lucanos pervenit ; ubi Hannibal, nequidquam secutus Claudium, substiterat. Haud dubia res est, quippe inter Hannibalem ducem et centurionem, exercitusque, alterum vincendo veteranum, alterum novum totum, magna ex parte etiam tumultuarium ac semiermem. Ut conspecta inter se agmina sunt, et neutra pars detractavit pugnam, extemplo instructæ acies : pugnatum tamen, ut in nulla pari re, duas amplius horas, concitata et, donec dux stetisset, Romana acie. Postquam is, non pro vetere fama solum, sed etiam metu futuri dedecoris, si sua temeritate contractæ cladi superesset, objectans se hostium telis, cecidit, fusa extemplo est Romana acies : sed adeo ne fugæ quidem iter patuit, omnibus viis ab equite insessis, ut ex tanta multitudine vix mille evaserint ; ceteri passim, alii alia peste, absunti sint.

XX. Capua a consulibus iterum summa vi obsideri cœpta est : quæque in eam rem opus erant, comportabantur parabanturque. Casilinum frumentum convectum : ad Vulturii ostium, ubi nunc urbs

Capua obsessa.

U. C. 540. est, castellum communitum: (ante Fabius Maxi-
 A. C. 212. mus munierat) præsidium inpositum, ut mare proxi-
 mum et flumen in potestate essent. In ea duo ma-
 ritima castella frumentum, quod ex Sardinia nuper
 missum erat, quodque M. Junius prætor ex Etruria
 coëmerat, ab Æstia convectum est, ut exercitui per
 hiemem copia esset. Ceterum super eam cladem,
 quæ in Lucanis accepta erat, volonum quoque ex-
 exercitus, qui, vivo Graccho, summa fide stipendia fe-
 cerat, velut exauctoratus morte ducis, ab signis dis-
 ccessit. Hannibal non Capuam neglectam, neque,
 ut tanto discrimine, desertos volebat socios: sed,
 prospero ex temeritate unius Romani ducis succes-
 su, in alterius ducis exercitusque obprimendi occa-
 sionem imminebat. Cn. Fulvium prætorem Apuli le-
 gati nunciabant, primo, dum urbes quasdam Apulo-
 rum, quæ ad Hannibalem descivissent, obpugnaret,
 intentius rem egisse: postea nimio successu et ip-
 sum et milites, præda inpletos, in tantam licentiam
 socordiamque effusos, ut nulla disciplina militiæ es-
 set. Quum sæpe alias, tum paucis diebus ante ex-
 pertus, qualis sub incerto duce exercitus esset, in
 Apuliam castra movit.

XXI. Circa Herdonæam Romanæ legiones et præ-
 tor Fulvius erant: quo ubi adlatum est, hostes ad-
 ventare, prope est factum, ut injussu prætoris signis
 convulsis in aciem exirent: nec res ulla magis te-
 nuit, quam spes haud dubia, suo id arbitrio, ubi vel-
 lent, acturos. Nocte insequenti Hannibal, quum
 tumultuatum in castris, et plerosque ferociter, sig-
 num ut daret, instituisse duci ad arma vocantes sciret,
 haud dubius prosperæ pugnæ occasionem dari, tria
 millia expeditorum militum in villis circa, vepribus-

que, et silvis disponit; qui, signo dato, simul omnes U. C. 540.
 e latebris exsisterent: et Magonem ac duo ferme A. C. 212.
 millia equitum, qua fugam inclinaturam credebat,
 omnia itinera insidere jubet: his nocte præparatis,
 prima luce in aciem copias educit. Nec Fulvius est Ab Hanni-
 cunctatus, non tam sua ulla spe, quam militum in- bale vinci-
 petu fortuito tractus: itaque eadem temeritate, qua tur.
 processum in aciem est, instruitur ipsa acies ad libi-
 dinem militum forte procurrentium consistentium-
 que, quo loco ipsorum tulisset animus, deinde per
 libidinem aut metum deserentium locum: prima le-
 gio et sinistra ala in primo instructæ, et in longitu-
 dinem porrecta acies: clamantibus tribunis, *nihil*
introrsus roboris ac virium esse, et, quacumque inpe-
tum fecisset hostes, perrupturos: nihil, quod salutare
 esset, non modo ad animum, sed ne ad aures quidem
 admittebant. Et Hannibal, haudquaquam similis
 dux, neque simili exercitu, neque ita instructo ade-
 rat: ergo ne clamorem quidem atque inpetum pri-
 mum eorum Romani sustinuerunt. Dux, stultitia et
 temeritate Centenio par, animo nequaquam compa-
 randus, ubi rem inclinatham ac trepidantes suos vidit,
 equo adrepto cum ducentis ferme equitibus effugit:
 cetera a fronte pulsa, a tergo atque alis circumventa
 acies, eo usque est cæsa, ut ex duodeviginti millibus
 hominum, duo millia haud amplius evaserint: cas-
 tris hostes potiti sunt.

XXII. Hæ clades, super aliam alia, Romam quum
 essent nunciatæ, ingens quidem et luctus et pavor
 civitatem cepit: sed tamen, quia consules, ubi sum-
 ma rerum esset, ad id locorum prospere rem gere-
 rent, minus his cladibus commovebantur. Legatos
 ad consules mittunt C. Lætorium, M. Metilium, qui

U. C. 540. nunciarent, ut reliquias duorum exercituum cum
 A. C. 212. cura conligerent: darentque operam, ne per metum
 ac desperationem hosti se dederent, (id quod post
 Cannensem accidisset cladem) et ut desertores de
 exercitu volonum conquirerent. Idem negotii P.
 Cornelio datum, cui et delectus mandatus erat: is-
 que per fora conciliabulaque edixit, ut conquisitio
 volonum fieret, iique ad signa reducerentur. Hæc
 omnia intentissima cura acta. Ap. Claudius consul,
 D. Junio ad ostium Vulturni, M. Aurelio Cotta Pu-
 teolis præposito, qui, ut quæque naves ex Etruria
 ac Sardinia accessissent, extemplo in castra mitte-
 rent frumentum; ipse ad Capuam regressus, Q. Ful-
 vium collegam invenit Casilini, omnia inde portan-
 tem molientemque ad obpugnandam Capuam. Tum
 ambo circumsederunt urbem, et Claudium Neronem
 prætorem ab Suessula ex Claudianis castris excive-
 runt. Is quoque, modico ibi præsidio ad tenendum
 locum relicto, ceteris omnibus copiis ad Capuam
 descendit: ita tria prætoria circa Capuam erecta,
 tres et exercitus diversis partibus opus adgressi, fos-
 sa valloque circumdare urbem parant, et castella ex-
 citant modicis intervallis: multisque simul locis cum
 prohibentibus opera Campanis eo eventu pugnant,
 ut postremo portis muroque se contineret Campa-
 nus. Prius tamen, quam hæc continuarentur opera,
 legati ad Hannibalem missi, qui quererentur, deser-
 tam ab eo Capuam, ac prope redditam Romanis:
 obtestarenturque, ut tunc saltem opem non circum-
 sessis modo, sed etiam circumvallatis, ferret. Con-
 sulibus literæ a P. Cornelio prætore missæ, *Ut pri-
 usquam clauderent Capuam operibus, potestatem Cam-
 panis facerent, ut, qui eorum vellent, exirent ab Capua,*

Capua
operibus
cingitur.

suasque res secum auferrent. Liberos fore suaque om- U. C. 540;
nia habituros, qui ante Idus Martias exissent: post A. C. 212.
eam diem quique exissent, quique ibi mansissent, hos-
tium futuros numero: ea prouinciata Campanis, at-
que ita spreta, ut ultro dicerent contumelias, mina-
renturque. Hannibal ab Herdonea Tarentum dux-
erat legiones: spe, aut vi, aut dolo, arcis Tarentinæ
potiundæ. Quod ubi parum processit, ad Brundi-
sium flexit iter, prodi id oppidum ratus: ibi quoque
quum frustra tereret tempus, legati Campani ad eum
venerunt, querentes simul, orantesque: quibus Han- Hannibal
nibal magnifice respondit, et antea solvisse obsidio- auxilium
nem, et nunc adventum suum consules non laturos. promittit
Cum hac spe dimissi legati, vix regredi Capuam, Campanis.
jam duplici fossa valloque cinctam, potuerunt.

XXIII. Quum maxime Capua circumvallaretur, Syracusarum obpugnatio ad finem venit, præterquam vi ac virtute ducis exercitusque, intestina etiam prodicione adjuta. Namque Marcellus initio veris incertus, utrum Agrigentum ad Himilconem et Hippocratem verteret bellum, an obsidione Syracusas premeret, quamquam nec vi capi videbat posse inexpugnabilem terrestri ac maritimo situ urbem, nec fame, quam prope liberi ab Karthagine commeatus alerent, tamen, ne quid inexpertum relinqueret, transfugas Syracusanos (erant autem apud Romanos aliqui nobilissimi viri, inter defectionem ab Romanis, quia ab novis consiliis abhorrebant, pulsi) conloquiis suæ partis tentare hominum animos jussit, et fidem dare, si traditæ forent Syracusæ, liberos eos ac suis legibus victuros esse. Non erat conloquii copia, quia multorum animi suspecti omnium curam oculosque converterant, ne quid falleret tale

Conloquia
de proden-
dis Marcel-
lo Syracu-
sis.

U. C. 540. admissum. Servus unus exsulum, pro transfuga in-
 A. C. 212. tromissus in urbem, conventis paucis, initium con-
 loquendi de tali re fecit: deinde in piscatoria qui-
 dam navī, retibus operti, circumvectique ita ad cas-
 tra Romana, conlocutique cum transfugis: et idem
 sæpius eodem modo alii atque alii: postremo ad
 octoginta facti. Et, quum jam composita omnia ad
 Res de ser- prodicionem essent, indicio delato ad Epicydem per
 tur ad Epi- Attalum quemdam, indignantem sibi rem creditam
 cydem. non esse, necati omnes cum cruciatu sunt. Alia
 subinde spes, postquam hæc vana evaserat, excepit.
 Damippus quidam Lacedæmonius, missus ab Syra-
 cusicis ad Philippum regem, captus ab Romanis na-
 vibus erat: hujus utique redimendi et Epicydæ cu-
 ra erat ingens; nec abnuī Marcellus, jam tum Æto-
 lorum, cujus gentis socii Lacedæmonii erant, amici-
 tiam adfectantibus Romanis. Ad colloquium de re-
 demptione ejus missis, medius maxime atque utris-
 que opportunus locus, ad portum Trogiliorum, prop-
 ter turrim, quam vocant Galeagram, est visus: quo
 quum sæpius commearent, unus ex Romanis, ex
 propinquo murum contemplatus, numerando lapides,
 æstimandoque ipse secum, quid in frōte paterent
 singuli, altitudinem muri, quantum proxime conjec-
 tura poterat, permensus, humilioremque aliquanto
 pristina opinione sua et ceterorum omnium ratus
 esse, et vel mediocribus scalis superabilem, ad Mar-
 cellum rem defert. Haud spernenda visa: sed, quum
 adiri locus, qui ob id ipsum iatentius custodiebatur,
 non posset, occasio quærebatur: quam obtulit trans-
 fuga, nuncians, diem festum Dianæ per triduum agi,
 et, quia alia in obsidione desint, vino largius epulas
 celebrari, et ab Epicyde præbito universæ plebei, et

per tribus a principibus diviso. Id ubi accepit Marcellus, cum paucis tribunorum militum conlocutus, electisque per eos ad rem tantam agendam audendamque idoneis centurionibus militibusque, et scalis in occulto comparatis, ceteris signum dari jubet, ut mature corpora curarent, quietique darent: nocte in expeditionem eundum esse. Inde ubi id temporis visum, quo de die epulatis jam vini satias principumque somni esset, signi unius milites ferre scalas jussit; et ad mille fere armati tenui agmine per silentium eo deducti. Ubi sine strepitu ac tumultu primi evaserunt in murum, secuti ordine alii; quum priorum audacia dubiis etiam animum faceret.

U. C. 540.
A. C. 212.

Murum
urbis su-
perant
scalas Ro-
mani.

XXIV. Jam mille armatorum ceperant partem, quum ceteræ admotæ, pluribusque scalis in murum evadebant, signo ab Hexapylo dato; quo per ingentem solitudinem erat perventum, quia magna pars, in turribus epulati, aut sopiti vino erant, aut semi-graves potabant: paucos tamen eorum obpressos incubilibus interfecerunt. Prope Hexapylon est portula magna vi refringi cœpta; et e muro ex composito tuba datum signum erat. Et jam undique, non furtim, sed vi aperta, gerebatur res: quippe ad Epipolas, frequentem custodiis locum, perventum erat, terrendique magis hostes erant, quam fallendi; sicut territi sunt: nam simul ac tubarum est auditus cantus, clamorque tenentium muros partemque urbis; omnia teneri custodes rati, alii per murum fugere, alii salire de muro, præcipitarique turba paventium. Magna pars tamen ignara tanti mali erat, et gravatis omnibus vino somnoque, et, in vastæ magnitudinis urbe, partium sensu non satis pertinente in omnia. Sub luce, Hexapylo effracto, Mar-

U. C. 540. cellus, omnibus copiis urbem ingressus, excitavit.
 A. C. 212. convertitque omnes ad arma capienda, opemque, si quam possent, jam captæ prope urbi ferendam. Epicydes, ab Insula, quam ipsi Nason vocant, citato profectus agmine, haud dubius, quin paucos, per negligentiam custodum transgressos murum, expulsurus foret, obcurrentibus pavidis, tumultum augere eos, dictitans, et majora ac terribiliora vero adferre, postquam conspexit omnia circa Epipolas armis completa, lacessito tantum hoste paucis missilibus, retro in Achradinam agmen convertit, non tam vim multitudinemque hostium metuens, quam ne qua intestina fraus per occasionem oriretur, clausasque inter tumultum Achradinæ atque Insulæ inveniret portas.

Marcelli
 lacrimæ.

Marcellus, ut, mœnia ingressus, ex superioribus locis urbem, omnium ferme illa tempestate pulcherrimam, subjectam oculis vidit, inlacrimasse dicitur, partim gaudio tantæ perpetratæ rei, partim vetusta gloria urbis. Atheniensium classes demersæ, et duo ingentes exercitus cum duobus clarissimis ducibus delati, obcurrerant, et tot bella cum Karthaginiensibus tanto cum discrimine gesta; tot tam opulenti tyranni regesque; præter ceteros Hiero, quum recentissimæ memoriæ rex, tum ante omnia, quæ virtus ei fortunaque sua dederat, beneficiis in populum Romanum insignis: ea quum universa obcurrerent animo, subiretque cogitatio, jam illa momento horæ arsura omnia, et ad cineres reditura: priusquam signa Achradinam admoveret, præmittit Syracusanos, qui intra præsidia Romana, ut ante dictum est, fuerant, ut adloquio leni perlicerent hostes ad dedendam urbem.

XXV. Tenebant Achradinæ portas murosque

maxime transfugæ, quibus nulla erat per conditiones U. C. 540.
 veniæ spes: ii nec adire muros, nec adloqui quem- A. C. 212.
 quam passi: itaque Marcellus, postquam id incep-
 tum irritum fuit, ad Euryalum signa referri jussit:
 tumulus est in extrema parte urbis versus a mari,
 viæque imminens ferenti in agros mediterraneaue
 insulæ, percommode situs ad commeatus excipien-
 dos. Præerat huic arci Philodemus Argivus, ab
 Epicyde inpositus, ad quem missus a Marcello Sosis,
 unus ex interfectoribus tyranni, quum, longo ser-
 mone habito, dilatus per frustrationem esset, retulit
 Marcello, tempus eum ad deliberandum sumsisse.
 Quum is diem de die differret, dum Hippocrates at-
 que Himilco admoverent castra legionesque, haud
 dubius, si in arcem accepisset eos, deleri Romanum
 exercitum inclusum muris posse; Marcellus, ut Eu-
 ryalum neque tradi, neque capi vidit posse, inter
 Neapolim et Tycham (nomina partium urbis, et in-
 star urbium sunt) posuit castra, timens, ne, si fre-
 quentia intrasset loca, contineri ab discursu miles
 avidus prædæ non posset. Legati eo ab Tycha et Neapolis et
 Neapoli cum infulis et velamentis venerunt, precan- Tycha de-
 tes, ut a cædibus et ab incendiis parceretur. De duntur.
 quorum precibus, quam postulatis, magis consilio
 habito, Marcellus ex omnium sententia edixit mili-
 tibus, *ne quis liberum corpus violaret: cetera prædæ
 futura*: castraque tectis parietum pro muro septa:
 portis regione platearum patentibus stationes præ-
 sidiaque disposuit, ne quis in discursu militum inpe-
 tus in castra fieri posset. Inde, signo dato, milites
 discurrerunt: refractisque foribus, quum omnia ter-
 rore ac tumultu streperent, a cædibus tamen tempe-
 ratum est: rapinis nullus ante modus fuit; quam

U. C. 540. omnia diuturna felicitate cumulata bona egessere.

A. C. 212. Inter hæc et Philodemus, quum spes auxilii nulla esset, fide accepta, ut inviolatus ad Epicydem rediret, deducto præsidio, tradidit tumultum Romanis. Aversis omnibus ad tumultum ex parte captæ urbis, Bomilcar, noctem eam nactus, qua propter vim tempestatis stare ad anchoram in salo Romana classis non posset, cum triginta quinque navibus ex portu Syracusano profectus, libero mari vela in altum dedit, quinque et quinquaginta navibus Epicydæ et Syracusanis relictis : edoctisque Karthaginiensibus in quanto res Syracusana discrimine esset, cum centum navibus post paucos dies redit, multis (ut fama est) donis ex Hieronis gaza ab Epicyde donatus.

XXVI. Marcellus, Euryalo recepto præsidioque addito, una cura erat liber, ne qua ab tergo vis hostium in arcem accepta inclusos inpeditosque mœnibus suos turbaret. Achradinam inde, trinis castris per idonea dispositis loca, spe ad inopiam omnium rerum inclusos redacturum, circumscedit. Quum per aliquot dies quietæ stationes utrimque fuissent, repente adventus Hippocratis et Himilconis, ut ultro undique obpugnarentur Romani, fecit : nam et Hippocrates, castris ad magnum portum communis, signoque iis dato, qui Achradinam tenebant, castra vetera Romanorum adortus est, quibus Crispinus præerat ; et Epicydes eruptionem in stationes Marcelli fecit : et classis Punica litori, quod inter urbem et castra Romana erat, adpulsa est ; ne quid præsidii Crispino submitti a Marcello posset. Tumultum tamen majorem hostes præbuerunt, quam certamen : nam et Crispinus Hippocratem non repulit tantum munimentis, sed insecutus etiam est trepide

Marcellus
Achradinam
obsidet.

Hippocrates
et Himilco
veniunt
Syracusas.

fugientem : et Epicydem Marcellus in urbem com- U. C. 540.
 pulit : satisque jam etiam in posterum videbatur pro- A. C. 212.
 visum, ne quid ab repentinis eorum excursionibus
 periculi foret. Accessit et pestilentia, commune ma- Pestilentia.
 lum, quod facile utrorumque animos averteret a belli
 consiliis : nam tempore autumnii, et locis natura gra-
 vibus, multo tamen magis extra urbem, quam in
 urbe, intoleranda vis æstus per utraque castra om-
 nium ferme corpora movit. Et primo temporis ac
 loci vitio et ægri erant, et moriebantur : postea cu-
 ratio ipsa et contactus ægrorum vulgabat morbos :
 ut aut neglecti desertique, qui incidissent, moreren-
 tur, aut adsidentes curantesque eadem vi morbi re-
 pletos secum traherent : quotidianaque funera et
 mors ob oculos esset, et undique dies noctesque plo-
 ratus audirentur. Postremo ita aduetudine mali
 efferaverant animos, ut non modo lacrimis justoque
 comploratu prosequerentur mortuos, sed ne efferrent
 quidem, aut sepelirent, jacerentque strata exanimæ
 corpora in conspectu similem mortem expectan-
 tium ; mortuique ægros, ægri validos, cum metu,
 tum tabe ac pestifero odore corporum, conficerent :
 et, ut ferro potius morerentur, quidam invadebant
 soli hostium stationes. Multo tamen vis major pes-
 tis Pœnorum castra, quam Romana, (diu circumse-
 dendo Syracusas, cœlo aquisque adsuerant magis)
 adfecerat. Ex hostium exercitu Siculi, ut primum
 videre ex gravitate loci vulgari morbos, in suas quis-
 que propinquas urbes dilapsi sunt : at Karthaginien-
 ses, quibus nusquam receptus erat, cum ipsis duci-
 bus Hippocrate atque Himilcone, ad internecionem
 omnes perierunt. Marcellus, ut tanta vis ingruebat
 mali, traduxerat in urbem suos : infirmaque corpora

U. C. 540. tecta et umbræ recreaverant. Multi tamen ex Ro-
 A. C. 212. mano exercitu eadem peste absumti sunt.

Classis
 Punica.

XXVII. Deleto terrestri Punico exercitu, Siculi, qui Hippocratis milites fuerant, in haud magna oppida, ceterum et situ et munimentis tuta, (tria millia alterum ab Syracusis, alterum quindecim abest) eo et commeatus e civitatibus suis comportabant, et auxilia arcessebant. Interea Bomilcar, iterum cum classe profectus Karthaginem, ita exposita fortuna sociorum, ut spem faceret, non ipsis modo salutarem opem ferri posse, sed Romanos quoque in capta quodammodo urbe capi, perpulit, ut onerarias navēs quam plurimas omni copia rerum onustas secum mitterent, classemque suam augerent: igitur, centum triginta navibus longis et septingentis onerariis profectus a Karthagine, satis prosperos ventos ad trajiciendum in Siciliam habuit: sed iidem venti superare eum Pachynum prohibebant. Bomilcaris adventus, fama primo, dein præter spem mora, quum gaudium et metum in vicem Romanis Syracusanisque præbuisset; Epicydes metuens, ne, si pergerent iidem, qui tum tenebant, ab ortu solis flare per dies plures venti, classis Punica Africam repeteret, tradita Achradina mercenariorum militum ducibus, ad Bomilcarem navigat: classem in statione versa in Africam habentem, atque timentem navale prælium, non tam quod impar viribus aut numero navium esset, (quippe etiam plures habebat) quam quod venti aptiores Romanæ, quam suæ, classi flarent, perpulit tandem, ut fortunam navalis certaminis experiri vellet. Et Marcellus, quum et Siculum exercitum ex tota insula conciri videret, et cum ingenti commeatu classem Punicam adventare, ne simul terra marique

inclusus urbe hostium urgeretur, quamquam inpar U. C. 540.
 numero navium erat, prohibere aditu Syracusarum A. C. 212.

Bomilcarem constituit. Duæ classes infestæ circa promontorium Pachynum stabant, ubi prima tranquillitas maris in altum evexisset, concursuræ. Itaque, cadente jam Euro, qui per dies aliquot sævierat, prior Bomilcar movit: cujus prima classis petere altum visa est, quo facilius superaret promontorium: ceterum, postquam tendere ad se Romanas naves vidit, incertum qua subita territus re, Bomilcar vela in altum dedit, missisque nunciis Heracleam, Prælium navale de- qui onerarias retro in Africam repetere juberent, tractat. ipse, Siciliam prætervectus, Tarentum petit. Epicydes, a tanta repente destitutus spe, ne in obsidionem magna ex parte captæ urbis rediret, Agrigentum navigat, expectaturus magis eventum, quam inde quidquam moturus.

XXVIII. Quæ ubi in castra Siculorum sunt nunciata, Epicydem Syracusis excessisse, a Karthaginensibus relictam insulam, et prope iterum Romanis traditam; legatos de conditionibus dedendæ urbis, Legati exercitus Siculorum ad Marcellum. explorata prius per colloquia voluntate eorum, qui obsidebantur, ad Marcellum mittunt. Quum haud ferme discreparet, quin, quæ ubique regum fuissent, Romanorum essent; Siculis cetera cum libertate ac legibus suis servarentur; evocatis ad colloquium his, quibus ab Epicyde creditæ res erant, *missos se simul ad Marcellum, simul ad eos ab exercitu Siculorum, aiunt, ut una omnium, qui obsiderentur, quique extra obsidionem essent, fortuna esset; neve alteri proprie sibi paciscerentur quidquam.* Recepti deinde ab iis, ut necessarios hospitesque adloquerentur, expositis, quæ pacta jam cum Marcello haberent, oblata

U. C. 540. spe salutis perpulere eos, ut secum præfectos Epicydis, Polyclitum, et Philistionem, et Epicydem, cui Sindon cognomen erat, adgrederentur: interfectis iis, et multitudine ad concionem vocata, et inopiam, qua ipsi inter se fremere occulte soliti erant, conquesti, *quamquam tot mala urgerent, negarunt, fortunam accusandam esse, quod in ipsorum esset potestate, quamdiu ea paterentur. Romanis caussam obpugnandi Syracusas fuisse caritatem Syracusanorum, non odium: nam, ut occupatas res ab satellitibus Hannibalis, deinde Hieronymi, Hippocrate atque Epicyde audierint, tum bellum movisse, et obsidere urbem cæpisse, ut crudeles tyrannos ejus, non ut ipsam urbem, expugnarent. Hippocrate vero interemto, Epicyde intercluso ab Syracusis, et præfectis ejus occisis, Karthaginiensibus omni possessione Siciliæ terra marique pulsis, quam superesse caussam Romanis, cur non, perinde ac si Hiero ipse viveret, unicus Romanæ amicitiae cultor, incolumes Syracusas esse velint? Itaque nec urbi nec hominibus aliud periculum, quam ab semet ipsis, esse, si occasionem reconciliandi se Romanis prætermisissent: eam autem, qualis illo momento horæ sit, nullam deinde fore, simul liberatos ab inpotentibus tyrannis adparuisset.*

XXIX. Omnium ingenti adsensu audita ea oratio est. Prætores tamen prius creari, quam legatos nominari, placuit: ex ipsorum deinde prætorum numero missi oratores ad Marcellum: quorum princeps, *Neque primo, inquit, Syracusani a vobis defecimus, sed Hieronymus, nequaquam tam in vos inpius, quam in nos: nec postea pacem, tyranni cæde compositam, Syracusanus quisquam, sed satellites regii Hippocrates atque Epicydes, obpressis nobis hinc metu, hinc fraude, turbaverunt: nec quisquam dicere potest, ali-*

Legatorum Syracusanorum ad Marcellum oratio.

quando nobis libertatis tempus fuisse, quod pacis vobis- U. C. 540.
 cum non fuerit. Nunc certe cæde eorum, qui obpressas A. C. 212,
 tenebant Syracusas, quum primum nostri arbitrii esse
 cæpimus, extemplo venimus ad tradenda arma; deden-
 dos nos, urbem, mænia: nullam recusandam fortunam,
 quæ inposita a vobis fuerit. Gloriam captæ nobilissimæ
 pulcherrimæque urbis Græcarum Dei tibi dederunt,
 Marcelle: quidquid umquam terra marique memoran-
 dum gessimus, id tui triumphi titulo accedit. Famæne
 credi velis, quanta urbs a te capta sit, quam posteris
 quoque eam spectaculo esse, (quo quisque terra, quisque
 mari venerit, nunc nostra de Atheniensibus Karthagini-
 ensibusque tropæa, nunc tua de nobis ostendat) incolu-
 mesque Syracusas familiæ vestræ sub clientela nominis
 Marcellorum tutelaque habendas tradas? Ne plus apud
 vos Hieronymi, quam Hieronis, memoria momenti fa-
 ciat: diutius ille multo amicus fuit, quam hic hostis:
 et illius etiam benefacta persensistis; hujus amentia ad
 perniciem tantum ipsius valuit. Omnia et inpetra-
 bilia et tuta erant apud Romanos: inter ipsos plus
 belli ac periculi erat. Namque transfugæ, tradi se
 Romanis rati, mercenariorum quoque militum auxi-
 lia in eundem compulere metum: adreptisque ar-
 mis prætores primum obtruncant, inde ad cædem
 Syracusanorum discurrunt: quosque fors obtulit,
 irati interfecere, atque omnia, quæ in promptu erant,
 diripuerunt: tum, ne sine ducibus essent, sex præ-
 fectos creavere, ut terni Achradinæ ac Naso præses-
 sent. Sedato tandem tumultu, exsequentibus scis-
 citando mercenariis, quæ acta cum Romanis essent,
 dilucere, id quod erat, cæpit; aliam suam ac per-
 fugarum caussam esse.

Transfuga-
 rum et
 mercena-
 riorum tu-
 multus Sy-
 racusis.

XXX. In tempore legati a Marcello redierunt,

U. C. 540. falsa eos suspitione incitatos memorantes, nec caus-
 A. C. 212. sam expetendæ pœnæ eorum ullam Romanis esse.
 Recipit Erat ex tribus Achradinæ præfectis Hispanus, Meri-
 Romanos cus nomine : ad eum inter comites legatorum de in-
 in urbem dustria unus ex Hispanorum auxiliariis est missus :
 Mericus Mericus qui, sine arbitris Mericum nactus, primum, quo in
 Hispanus. statu reliquisset Hispaniam, (et nuper inde venerat)
 exponit. *Omnia Romanis ibi obtineri armis : posse eum, si operæ pretium faciat, principem popularium esse : seu militare cum Romanis, seu in patriam reverti libeat. Contra, si malle obsideri pergat, quam spem esse terra marique clauso ?* Motus his Mericus, quum legatos ad Marcellum mitti placuisset, fratrem inter eos mittit : qui, per eundem illum Hispanum secretus ab aliis ad Marcellum deductus, quum fidem accepisset, composuissetque agendæ rei ordinem, Achradinam redit. Tum Mericus, ut ab suspitione proditiōis averteret omnium animos, negat sibi placere, legatos commeare ultro citroque, neque recipiendum quemquam, neque mittendum : et, quo intentius custodia serventur, opportuna loca dividenda præfectis esse, ut suæ quisque partis tutandæ reus sit. Omnes ad sensi sunt partibus dividundis : ipsi regio evenit ab Arethusa fonte usque ad ostium magni portus : id ut scirent Romani, fecit. Itaque Marcellus nocte navem onerariam cum armatis remulco quadriremis trahi ad Achradinam jussit, exponique milites regione portæ, quæ prope fontem Arethusam est. Hoc quum quarta vigilia factum esset, expositosque milites porta, ut convenerat, recepisset Mericus ; luce prima Marcellus omnibus copiis mœnia Achradinæ adgreditur : ita ut non eos solum, qui Achradinam tenebant, in se converteret, sed ab Naso etiam ag-

mina armatorum concurrerent, relictis stationibus U. C. 540.
 suis ad vim et inpetum Romanorum arcendum. In A. C. 212.
 hoc tumultu actuariae naves, instructae jam ante circumvectaeque, ad Nasum armatos exponunt, qui, improvise adorti semiplenas stationes et adapertas fores portae, qua paullo ante excurrerant armati, haud magno certamine Nasum cepere, desertam trepidatione et fuga custodum: neque ullis minus praesidii aut pertinaciae ad manendum, quam transfugis, fuit: quia, ne suis quidem satis credentes se, medio certamine effugerunt. Marcellus ut captam esse Nasum didicit, et Achradinae regionem unam teneri, Mericumque cum praesidio suis adjunctum, receptui cecinit: ne regiae opes, quarum fama major, quam res, erat, diriperentur.

XXXI. Subpresso inpetu militum, et iis, qui in Achradina erant, transfugis spatium locusque fugae datus est; et Syracusani, tandem liberi metu, portis Achradinae apertis, oratores ad Marcellum mittunt, Syracusani permittunt se Marcel-
 nihil petentes aliud, quam incolumitatem sibi liberisque suis. Marcellus, consilio advocato, et adhibitis etiam Syracusanis, qui per seditiones pulsati ab domo intra praesidia Romana erant, respondit: *non plura per annos quinquaginta benefacta Hieronis, quam paucis his annis maleficia eorum, qui Syracusas tenuerint, erga populum Romanum esse: sed pleraque eorum, quo debuerint, recidisce; foederumque ruptorum ipsos ab se graviores multo, quam populus Romanus voluerit, poenas exegisse. Se quidem tertium annum circumsedere Syracusas: non ut populus Romanus servam civitatem haberet, sed ne transfugarum duces captam et obpressam tenerent. Quid potuerint Syracusani facere, exemplo vel eos Syracusanorum esse, qui intra praesidia Romani*

U. C. 540. fuerint, vel Hispanum ducem Mericum, qui præsidium
 A. C. 212. tradiderit, vel ipsorum Syracusanorum postremo, serum
 quidem, sed forte consilium. Omnium sibi laborum periculorumque, circa mœnia Syracusana terra marique tam diu exhaustorum, nequaquam tantum fructum esse, quam capere Syracusas potuisse. Inde quæstor cum præsidio ad Nasum ad accipiendam pecuniam regiam custodiendamque missus: urbs diripienda militi data est, custodibus divisis per domos eorum, qui intra præsidia Romana fuerant. Quum multa iræ, multa avaritiæ, fœda exempla cderentur, Archimedes, memoriæ proditum est, in tanto tumultu, quantum capta urbs in discursu diripientium militum ciere poterat, intentum fornis, quas in pulvere descripserat, ab ignaro milite, quis esset, interfectum: ægre id Marcellum tulisse, sepulturæque curam habitam: et propinquis etiam inquisitis honori præsidioque nomen ac memoriam ejus fuisse. Hoc maxime modo Syracusæ captæ: in quibus prædæ tantum fuit, quantum vix capta Karthagine tum fuisset, cum qua viribus æquis certabatur. Paucis ante diebus, quam Syracusæ caperentur, T. Otacilius cum quinquere-
 mibus octoginta Uticam ab Lilybæo transmisit: et, quum ante lucem portum intrasset, onerarias frumento onustas cepit: egressusque in terram, depulatus est aliquantum agri circa Uticam, prædamque omnis generis retro ad naves egit. Lilybæum tertio die, quam inde profectus erat, cum centum triginta onerariis navibus frumento prædaque onustis rediit: idque frumentum extemplo Syracusas misit: quod ni tam in tempore subvenisset, victoribus victisque pariter perniciosa fames instabat.

XXXII. Eadem æstate in Hispania, cum biennio

Urbs diripi-
 enda
 militi da-
 tur.

Archime-
 dis mors.

ferme nihil admodum memorabile factum esset, con-^{U. C. 540.}
siliisque magis, quam armis, bellum gereretur, Ro-^{A. C. 212.}
mani imperatores egressi hibernis copias conjunxe-^{Res in}
runt: ibi consilium advocatum, omniumque in unum ^{Hispania}
congruerunt sententiæ; quando ad id locorum id ^{gestæ.}
modo actum esset, ut Hasdrubalem tendentem in
Italiam retinerent; tempus esse id jam agi, ut bel-
lum in Hispania finiretur: et satis ad id virium cre-
debant accessisse, viginti millia Celtiberorum ea
hieme ad arma excitata. Tres exercitus erant. Has-
drubal Gisgonis filius et Mago, conjunctis castris,
quinque ferme dierum iter ab Romanis aberant.
Propior erat Hamilcaris filius Hasdrubal, vetus in
Hispania imperator: ad urbem nomine Anitorgin
exercitum habebat. Eum volebant prius obprimi
duces Romani: et spes erat satis superque ad id vi-
rium esse: illa restabat cura, ne, fuso eo perculsi,
alter Hasdrubal et Mago, in avios saltus montesque
recipientes sese, bellum extraherent. Optimum igitur
rati, divisis bifariam copiis, totius simul Hispani-
æ amplecti bellum, ita inter se diviserunt, ut P.
Cornelius duas partes exercitus Romanorum socio-
rumque adversus Magonem duceret atque Hasdru-^{Scipiones}
balem; Cn. Cornelius cum tertia parte veteris ex-^{exercitum}
ercitus, Celtiberis adjunctis, cum Hasdrubale Bar-^{partiuntur.}
cino bellum gereret. Una profecti ambo duces ex-
ercitusque, Celtiberis prægredientibus, ad urbem
Anitorgin in conspectu hostium, dirimente amni,
ponunt castra. Ibi Cn. Scipio, cum quibus ante
dictum est copiis, substitit, et P. Scipio profectus ad
destinatam belli partem.

XXXIII. Hasdrubal postquam animadvertit, exi-
guum Romanum exercitum in castris, et spem om-

U. C. 540. nemi in Celtiberorum auxiliis esse; peritus omnis
 A. C. 212. barbaricæ, et præcipue omnium earum gentium, in
 Celtiberi quibus per tot annos militabat, perfidiæ, facili linguæ
 deserunt commercio, quum utraque castra plena Hispanorum
 Cn. Sci- essent, per occulta conloquia paciscitur magna mer-
 pionem. cede cum Celtiberorum principibus, ut copias inde
 abducant. Nec atrox visum facinus: non enim, ut
 in Romanos verterent arma, agebatur: et merces,
 quanta vel pro bello satis esset, dabatur, ne bellum
 gererent: et quum quies ipsa, tum reditus domum
 fructusque videndi suos suaque, grata vulgo erant.
 Itaque non ducibus facilius, quam multitudini, per-
 suasum est: simul ne metus quidem ab Romanis
 erat, quippe tam paucis, si vi retinerent. Id quidem
 cavendum semper Romanis ducibus erit, exemplaque
 hæc vere pro documentis habenda, ne ita externis
 credant auxiliis, ut non plus sui roboris suarumque
 proprie virium in castris habeant. Signis repente
 sublatis, Celtiberi abeunt, nihil aliud quærentibus
 caussam obtestantibusque, ut manerent, Romanis
 respondentes, quam domestico se avocari bello. Sci-
 pio, postquam socii nec precibus, nec vi retineri pot-
 erant, nec se aut parem sine illis hosti esse, aut
 fratri rursus conjungi vidit posse, nec ullum aliud
 salutare consilium in promptu esse, retro, quantum
 posset, cedere statuit; in id omni cura intentus,
 necubi hosti æquo se committeret loco; qui, trans-
 gressus flumen, prope vestigiis abeuntium insistebat.

XXXIV. Per eosdem dies P. Scipionem par ter-
 ror, periculum majus ab novo hoste, urgebat. Ma-
 sinissa erat juvenis, eo tempore socius Karthaginien-
 sium, quem deinde clarum potentemque Romana fe-
 cit amicitia: is tum cum equitatu Numidarum et ad-

venienti P. Scipioni obcurrit, et deinde adsidue dies U. C. 540.
 noctesque infestus aderat, ut non vagos tantum, A. C. 212.
 procul a castris lignatum pabulatumque progressos,
 exciperet, sed ipsis obequicaret castris, invectusque
 in medias sæpe stationes, omnia ingenti tumultu
 turbaret: noctibus quoque sæpe incursu repentino
 in portis valloque trepidatum est: nec aut locus, aut
 tempus ullum vacuum a metu ac sollicitudine erat
 Romanis: compulsisque intra vallum, adempto rerum
 omnium usu, quum prope justa obsidio esset, futu-
 ramque artiozem eam adpareret, si se Indibilis, quem
 cum septem millibus et quingentis Suessetanorum
 adventare fama erat, Pœnis conjunxisset; dux cau- P. Scipionis
 tus et providens Scipio, vietus necessitatibus, teme- temera-
 rarium capit consilium, ut nocte Indibili obviam rium con-
 iret: et, quocumque obcurrisset loco, prælium con- silium.
 sereret. Relicto igitur modico præsidio in castris,
 præpositoque T. Fonteio legato, media nocte pro-
 fectus, cum obviis hostibus manus conseruit. Ag-
 mina magis, quam acies, pugnabant: superior ta-
 men, ut in tumultuaria pugna, Romanus erat: cete-
 rum et equites Numidæ repente, quos fefellisse se
 dux ratus erat, ab lateribus circumfusi, magnum ter-
 rorem intulere. Contracto adversus Numidas cer-
 tamine novo, tertius insuper advenit hostis, duces
 Pœni adsecuti ab tergo jam pugnantes: ancepsque
 prælium Romanos circumsteterat, incertos in quem
 potissimum hostem, quamve in partem conferti erup-
 tionem facerent. Pugnanti hærtantique imperatori
 et obferenti se, ubi plurimus labor erat, latus dex-
 trum lancea trajicitur: cuneusque is hostium, qui
 in confertos circa ducem inpetum fecerat, ut exani-
 mem labentem ex equo Scipionem vidit, alacres gau-

U. C. 540. dio cum clamore per totam aciem nunciantes discursurunt, imperatorem Romanum cecidisse. Hæc per-
 A. C. 212. vagata passim vox, ut et hostes haud dubie pro vic-
 P. Scipio toribus, et Romani pro victis essent, fecit. Fuga
 occisus, et exercitus confestim ex acie, duce amisso, fieri cœpta est: ce-
 cæsus. terum ut ad erumpendum inter Numidas leviumque
 armorum alia auxilia haud difficilis res erat; ita ef-
 fugere tantum equitum, æquantiumque equos velo-
 citate peditum, vix poterant: cæsique prope plures
 in fuga, quam in pugna, sunt: nec superfuisset quis-
 quam, ni præcipiti jam ad vesperum die nox inter-
 venisset.

XXXV. Haud segniter inde duces Pœni fortuna
 usi, confestim e prælio, vix necessaria quiete data
 militibus, ad Hasdrubalem Hamilcaris citatum ag-
 men rapiunt, non dubia spe, quum juncti essent, de-
 bellari posse. Quo ubi est ventum, inter exercitus
 ducesque, victoria recenti lætos, gratulatio ingens
 facta, imperatore tanto cum omni exercitu deleta, et
 alteram pro haud dubia parem victoriam exspectan-
 tes. Ad Romanos nondum quidem fama tantæ cla-
 dis pervenerat, sed mœstum quoddam silentium erat,
 et tacita divinatio; qualis jam præsagientibus ani-
 mis imminentis mali esse solet. Imperator ipse, præ-
 terquam quod ab sociis se desertum, hostium tantum
 auctas copias sentiebat, conjectura etiam et ratione
 ad suspicionem acceptæ cladis, quam ad ullam bo-
 nam spem, pronior erat. *Quonam modo enim Has-
 drubalem ac Magonem, nisi defunctos suo bello, sine
 certamine adducere exercitum potuisse? Quomodo au-
 tem non obstitisse, aut ab tergo secutum fratrem? ut,
 si prohibere, quo minus in unum coirent et duces et ex-
 ercitus hostium, non posset, ipse certe cum fratre con-*

Tres Pœni
 duces con-
 jungunt se
 adversus
 Cn. Sci-
 pionem.

jungeret copias. His anxius curis id modo esse salutare in præsens credebat, cedere inde, quantum posset: et inde una nocte, ignaris hostibus, et ob id quietis, aliquantum emensus est iter. Luce, ut senserunt profectos hostes, præmissis Numidis, quam poterant maxime citato agmine sequi cœperunt: ante noctem adsecuti Numidæ, nunc ab tergo, nunc in latera incursantes. Consistere cœperunt, ac tutari agmen, quantum possent; tamen, tuto ut simul pugnarent procederentque, Scipio hortabatur, priusquam pedestres copiæ adsequerentur.

XXXVI. Ceterum nunc agendo, nunc sustinendo agmen, quum aliquamdiu haud multum procedere-tur, et nox jam instaret, revocat e prælio suos Scipio: et conlectos in tumultum quemdam, non quidem satis tutum, (præsertim agmini perculso) editiorem tamen, quam cetera circa erant, subducit. Ibi primo, impedimentis et equitatu in medium receptis, circumdati pedites haud difficulter inpetus incursantium Numidarum arcebant: dein, postquam toto agmine tres imperatores cum tribus justis exerciti-bus aderant, adparebatque, parum armis ad tuendum locum sine munimento valituros esse; circumspec-tare atque agitare dux cœpit, si quo modo posset vallum circuminjacere: sed erat adeo nudus tumulus et asperi soli, ut nec virgulta vallo cædendo, nec terra cespiti faciendo, aut ducendæ fossæ, aliive ulli operi apta inveniri posset: nec natura quidquam satis arduum aut abscisum erat, quod hosti aditum ad-scensumve difficilem præberet; omnia fastigio leni subvexa. Ut tamen aliquam imaginem valli objice-rent, clitellas inligatas oneribus, velut struentes ad altitudinem solitam, circumdabant; cumulo sarci-

U. C. 540. narum omnis generis objecto, ubi ad moliendum cli-
 A C. 219. tellæ defuerant. Punici exercitus postquam adve-

nere, in tumulum quidem perfacile agmen erexere, munitionis vero facies nova primo eos velut miraculo quodam tenuit, quum duces undique vociferarentur, *Quid starent? et non ludibrium illud, vix feminis puerisve morandis satis validum, distraherent diriperentque? Captum hostem teneri, latentem post sarcinas.*

Hæc contemtum duces increpabant: ceterum, neque transilire, neque moliri onera objecta, nec cædere stipatas clitellas, ipsisque obrutas sarcinis, facile erat. Tardatis diu quum amolita objecta onera armatis dedissent viam, pluribusque idem partibus fieret, capta jam undique castra erant: pauci ab multis, percussique a victoribus passim cædebantur. Magna pars tamen militum, quum in propinquas re-

Cn. Scipio
 occisus,
 exercitus-
 que cæ-
 sus,

fugisset silvas, in castra P. Scipionis, quibus T. Fonteius legatus præerat, perfugerunt. Cn. Scipionem alii in tumulo primo inpetu hostium cæsum tradunt: alii cum paucis in propinquam castris turrim perfugisse: hanc igni circumdatam, atque ita exustis foribus, quas nulla moliri potuerunt vi, captam; omnesque intus cum ipso imperatore occisos. Anno octavo, postquam in Hispaniam venerat, Cn. Scipio, undetrigesimo die post fratris mortem, est interfectus. Luctus ex morte eorum non Romæ major, quam per totam Hispaniam, fuit. Quin apud cives partem doloris et exercitus amissi, et alienata provincia, et publica trahebat clades. Hispaniæ ipsos lugebant desiderabantque duces: Cnæum tamen magis, quo diutius præfuerat iis, priorque et favorem occupaverat, et specimen justitiæ temperantiæque Romanæ primus dederat.

XXXVII. Quum deletus exercitus amissæque Hispaniæ viderentur, vir unus res perditas restituit. U. C. 540.
A. C. 212.
 Erat in exercitu L. Marcius Septimi filius, eques Romanus, inpiger juvenis, animique et ingenii aliquanto, quam pro fortuna, in qua erat natus, majoris: ad summam indolem accesserat Cn. Scipionis disciplina: sub qua per tot annos omnes militiæ artes edoctus fuerat. Hic, et ex fuga conlectis militibus, et quibusdam de præsiidiis deductis, haud contemnendum exercitum fecerat, junxeratque cum T. Fonteio P. Scipionis legato. Sed tantum præstitit eques Romanus auctoritate inter milites atque honore, ut, castris citra Iberum communitis, quum ducem exercituum comitiis militaribus creari placuisset, subeuntes alii aliis in custodiam valli stationesque, donec per omnes suffragium iret, ad L. Marcium cuncti summam imperii detulerint. Omne inde tempus (exiguum id fuit) muniendis castris convehendisque commeatibus consumtum: et omnia imperia milites, quum inpigre, tum haudquaquam abjecto animo, exsequebantur. Ceterum postquam Hasdrubalem Gisgonis, venientem ad reliquias belli delendas, transisse Iberum, et adpropinquare adlatum est, signumque pugnæ propositum ab novo duce milites viderunt; recordati, quos paullo ante imperatores habuissent, quibusque et ducibus et copiis freti prodire ad pugnam soliti essent, flere omnes repente et obfensare capita: et alii manus ad cælum tendere, Deos incusantes; alii, strati humi, suum quisque nominatim ducem inplorare: neque sedari lamentatio poterat, excitantibus centurionibus manipulares, et ipso mulcente et increpante Marcio, *quid in mulieres et inutiles se projecissent fletus potius, quam ad*

U. C. 540. *tutandos semet ipsos et rempublicam secum acuerent*
 A. C. 212. *animos, et ne inultos imperatores suos jacere sinerent?*

Quum subito clamor tubarumque sonus (jam enim prope vallum hostes crant) exauditur: inde, verso repente in iram luctu, discurrere ad arma: ac, velut accensi rabie, discurrent ad portas, et in hostem, negligenter atque incomposite venientem, incurrunt. Extemplo improvisa res pavorem incutit Pœnis; mirabundique unde tot hostes tam subito exorti prope deleto exercitu forent, unde tanta audacia, tanta fiducia sui victis ac fugatis, quis imperator duobus Scipionibus cæsis exstitisset, quis castris præseset, quis signum dedisset pugnae, ad hæc tot tam necopinata, primo omnium incerti stupentesque referunt pedem: dein, valida inpressione pulsī, terga vertunt. Et aut fugientium cædes fœda fuisset, aut temerarius periculosusque sequentium inpetus, ni Marcius propere receptui dedisset signum, obsistensque ad prima signa, quosdam et ipse retinens, concitatam represisset aciem: inde in castra avidos adhuc cædisque et sanguinis reduxit. Karthaginienses, trepide primo ab hostium vallo acti, postquam neminem insequi viderunt, metu substitisse rati, contemtum rursus et sedato gradu in castra abeunt. Par negligentia in castris custodiendis fuit: nam, etsi propinquus hostis erat, tamen reliquias eum esse duorum exercituum ante paucos dies deletorum subcurrebat. Ob hoc quum omnia neglecta apud hostes essent, exploratis iis, Marcius ad consilium, prima specie temerarium magis, quam audax, animum adjecit, ut ultro castra hostium obpugnaret; facilius esse ratus, unius Hasdrubalis expugnari castra, quam, si se rursus tres exercitus ac tres duces junxissent, sua de-

Marcus
statuit ob-
pugnare
castra
hostium.

fendi : simul aut, si successisset cœptis, recepturum U. C. 540.
 se adflictas res ; aut, si pulsus esset, tamen ultro in- A. C. 212.
 ferendo arma, contemptum sui demiturum.

XXXVIII. Ne tamen subita res et nocturnus terror etiani non suæ fortunæ consilium perturbaret, adloquendos adhortandosque sibi milites ratus, concione advocata ita disseruit : *Vel mea erga imperatores nostros vivos mortuosque pietas, vel præsens omnium nostrûm, milites, fortuna fidem cuivis facere potest, mihi hoc imperium, ut amplum iudicio vestro, ita re ipsa grave ac sollicitum esse. Quo enim tempore, nisi metus mærorem obstupefaceret, vix ita compos mei essem, ut aliqua solatia invenire ægro animo possem ; cogor vestram omnium vicem (quod difficillimum in luctu est) unus consulere : et ne tum quidem, ubi, quonam modo has reliquias duorum exercituum patriæ conservare possim, cogitandum est, avertere animum ab adsiduo mærore libet. Præsto est enim acerba memoria, et Scipiones me ambo dies noctesque curis insomniisque agitant, et excitant sæpe somno ; neu se, neu invictos per octo annos in his terris milites suos, commilitones vestros, neu rempublicam patiar inultam, et suam disciplinam suaque instituta sequi jubent : et, ut imperiis vivorum nemo obedientior me uno fuerit, ita post mortem suam, quod quaque in re facturos illos fuisse maxime censeam, id optimum ducere. Vos quoque velim, milites, non lamentis lacrimisque tamquam extinctos prosequi, (vivunt vigentque fama rerum gestarum) sed quotiescumque obcurrat memoria illorum, velut si adhortantes signumque dantes videatis eos, ita prælia inire. Nec alia profecto species, hesterno die oculis animisque vestris oblata, memorabile illud edidit prælium : quo documentum dedistis hostibus, non cum Scipionibus ex-*

*Ejus oratio
ad milites.*

U. C. 540. *stinctum esse nomen Romanum : et, cujus populi vis*
 A. C. 212. *atque virtus non obruta sit Cannensi clade, ex omni*
profecto sævitia fortunæ emersuram esse. Nunc, quia
tantum ausi estis sponte vestra, experiri libet, quantum
audeatis duce vestro auctore : non enim hesterno die,
quum signum receptui dedi sequentibus effuse vobis tur-
batum hostem, frangere audaciam vestram, sed differre
in maiorem gloriam atque opportunitatem, volui : ut
postmodo præparati incautos, armati inermes, atque
etiam sopitos, per occasionem adgredi possetis. Nec
hujus occasionis spem, milites, forte temere, sed ex re
ipsa conceptam habeo. A vobis quoque profecto si quis
quærat, quonam modo pauci a multis, victi a victori-
bis castra tutati sitis ; nihil aliud respondeatis, quam
id ipsum timentes vos omnia et operibus firmata habuisse,
et ipsos paratos instructosque fuisse. Et ita se res ha-
bet : ad id, quod, ne timeatur, fortuna facit, minime
tuti sunt homines : quia, quod neglexeris, incautum at-
que apertum habeas. Nihil omnium nunc minus me-
tuunt hostes, quam ne obsessi modo ipsi atque obpug-
nati castra sua ultro obpugnemus. Audeamus, quod
credi non potest ausuros nos : eo ipso, quod difficilli-
imum videtur, facillimum erit. Tertia vigilia noctis si-
lenti agmine ducam vos : exploratum habeo, non vi-
giliarum ordinem, non stationes justas esse. Clamor in
portis auditus et primus inpetus castra ceperit : tum
inter torpidos somno, paventesque ad necopinatum tu-
multum, et inermes in cubilibus suis obpressos, illa cæ-
des edatur, a qua vos hesterno die revocatos ægre fere-
batis. Scio, audax videri consilium : sed in rebus as-
peris et tenui spe fortissima quæque consilia tutissima
sunt : quia, si in occasionis momento, cujus prætervolat
opportunitas, cunctatus paulum fueris, nequidquam

mox omissam quæras. Unus exercitus in propinquo est : duo haud procul absunt : nunc adgredientibus spes aliqua est : et jam tentastis vestras atque illorum vires. Si diem proferimus, et hesternæ eruptionis fama contemni desierimus, periculum est, ne omnes duces, omnes copię convenient. Tres deinde duces, tres exercitus sustinebimus hostium, quos Cn. Scipio incolumi exercitu non sustinuit ? Ut dividendo copias periere duces nostri, ita separati ac divisi obprimi possunt hostes : alia belli gerendi via nulla est : proinde nihil, præter noctis proximæ opportunitatem, exspectemus. Ite, Deis bene juvantibus, corpora curate, ut integri vigentesque eodem animo in castra hostium inrumpatis, quo vestra tutati estis. Læti et audire ab novo duce novum consilium, et, quo audacius erat, magis placebat : reliquum diei expediendis armis et curatione corporum consumtum : et major pars noctis quieti data est : quarta vigilia movere.

XXXIX. Erant ultra proxima castra sex millium intervallo distantes aliæ copię Pœnorum. Vallis cava intererat, condensa arboribus : in hujus silvæ medio ferme spatio cohors Romana arte Punica abditur, et equites. Ita medio itinere intercepto, ceteræ copię silenti agmine ad proximos hostes ductæ : et, quum statio nulla pro portis, neque in vallo custodiæ essent, velut in sua castra, nullo usquam obistente, penetravere. Inde signa canunt, et tollitur clamor. Pars semisomnos hostes cædunt : pars ignes casis, stramento arido tectis, injiciunt : pars portas occupant, ut fugam intercludant. Hostes simul ignis, clamor, cædes, velut alienatos sensibus, nec audire, nec providere quidquam sinunt : incidunt inermes inter catervas armatorum ; alii ruunt

U. C. 540.
A. C. 212.

Castra Hasdrubalis capiuntur.

U. C. 540. ad portas, alii obseptis itineribus super vallum sa-
 A. C. 212. liunt: et, ut quisque evaserat, protinus ad castra al-
 tera fugiunt: ubi ab cohorte et equitibus ex occulto
 procurrentibus circumventi, cæsique ad unum omnes
 sunt: quamquam, etiam si quis ex ea cæde effugis-
 set, adeo raptim captis propioribus castris in altera
 transcursum castra ab Romanis est, ut prævenire
 nuncius cladis non posset. Ibi vero, quo longius ab
 hoste aberant, et quia sub lucem pabulatum, ligna-
 tum, et prædatum quidam dilapsi fuerant, neglecta
 magis omnia ac soluta invenere: arma tantum in
 stationibus posita: milites inermes, aut humi se-
 dentes adcubantesque, aut obambulantes ante vallum
 portasque. Cum his tam securis solutisque Romani,
 calentes adhuc ab recenti pugna, ferocesque victoria,
 prælium ineunt. Itaque nequaquam resisti in portis
 potuit: intra portas, concursu ex totis castris ad
 primum clamorem et tumultum facto, atrox prælium
 oritur: diuque tenuisset, ni cruenta scuta Romano-
 rum visa, indicium alterius cladis Pœnis, atque inde
 pavorem iniecissent. Hic terror in fugam avertit
 omnes: effusique, qua iter est, nisi quos cædes ob-
 pressit, exuuntur castris. Ita nocte ac die bina cas-
 tra hostium expugnata ductu L. Marcii. Ad triginta
 septem millia hostium cæsa, auctor est Claudius, qui
 annales Acilianos ex Græco in Latinum sermonem
 vertit: captos ad mille octingentos triginta: præ-
 dam ingentem partam: in ea fuisse clipeum argen-
 teum pondo centum triginta octo, cum imagine Bar-
 cini Hasdrubalis. Valerius Antias una castra Ma-
 gonis capta tradit, septem millia cæsa hostium: al-
 tero prælio, eruptione pugnatum cum Hasdrubale:
 decem millia occisa, quatuor millia trecentos triginta

Altera
 etiam cas-
 tra capta.

captos. Piso quinque millia hominum, quum Mago U. C. 540.
cedentes nostros effuse sequeretur, cæsa ex insidiis A. C. 212.
scribit. Apud omnes magnum nomen Marcii ducis
est: et veræ gloriæ ejus etiam miracula addunt:
flammam ei concionanti fusam e capite, sine ipsius
sensu, cum magno pavore circumstantium militum:
monumentumque victoriæ ejus de Pœnis, usque ad
incensum Capitolium, fuisse in templo clipeum, Mar-
cium adpellatum, cum imagine Hasdrubalis. Quie-
tæ deinde aliquamdiu in Hispania res fuere, utris-
que, post tantas acceptas in vicem inlatasque clades,
cunctantibus periculum summæ rerum facere.

XL. Dum hæc in Hispania geruntur, Marcellus, Spolia Sy-
captis Syracusis, quum cetera in Sicilia tanta fide racusis Ro-
atque integritate composuisset, ut non modo suam nam de-
gloriam, sed etiam majestatem populi Romani, au-
geret; ornamenta urbis, signa, tabulasque, quibus
abundabant Syracusæ, Romam devexit. Hostium
quidem illa spolia, et parta belli jure: ceterum inde
primum initium mirandi Græcarum artium opera,
licentiæque huic sacra profanaque omnia vulgo spo-
liandi factum est: quæ postremo in Romanos Deos,
templum id ipsum primum, quod a Marcello eximie
ornatum est, vertit. Visebantur enim ab externis
ad portam Capenam dedicata a Marcello templa,
propter excellentia ejus generis ornamenta, quorum
perexigua pars comparet. Legationes omnium fer-
me civitatum Siciliæ ad eum conveniebant. Dispar
ut caussa earum, ita conditio erat: qui ante captas
Syracusas aut non desciverant, aut redierant in ami-
citiam, ut socii fideles accepti cultique: quos metus
post captas Syracusas dediderat, ut victi a victore
leges acceperunt. Erant tamen haud parvæ reli-

U. C. 540. quia belli circa Agrigentum Romanis . Epicydes et
 A. C. 212. Hanno duces reliqui prioris belli, et tertius novus
 Mutines ab Hannibale in locum Hippocratis missus, Liby-
 novus Poe- phœnicum generis Hipponiates, (Mutinem popula-
 norum in res vocabant) vir inpiger, et sub Hannibale ma-
 Sicilia gistro omnes belli artes edoctus. Huic ab Epicyde
 dux. et Hannone Numidæ dati auxiliares: cum quibus
 ita pervagatus est hostium agros, ita socios ad reti-
 nendos in fide animos eorum, ferendoque in tempore
 cuique auxilium, adiit, ut brevi tempore totam Sici-
 liam inpleret nominis sui, nec spes alia major apud
 faventes rebus Karthaginiensium esset. Itaque in-
 clusi ad tempus mœnibus Agrigenti dux Pœnus Sy-
 racusanusque, non consilio Mutinis, quam fiducia,
 magis ausi egredi extra muros, ad Himeram amnem
 posuerunt castra. Quod ubi perlatum ad Marcellum
 est, extemplo copias movit; et ab hoste quatuor
 ferme millium intervallo consedit, quid agerent pa-
 rarentve exspectaturus. Sed nullum neque locum,
 neque tempus cunctationi consiliove dedit Mutines,
 transgressus amnem, ac stationibus hostium cum
 ingenti terrore ac tumultu invectus. Postero die
 prope justo prælio compulit hostem intra munimen-
 ta: inde revocatus scditione Numidarum in castris
 facta, quum trecenti ferme eorum Heracleam Mino-
 am concessissent, ad mitigandos revocandosque eos
 profectus, magnopere monuisse duces dicitur, ne ab-
 sente se cum hoste manus consererent. Id ambo
 ægre passi duces, magis Hanno, jam ante anxius
 gloria ejus: *Mutinem sibi modum facere, degenerem
 Afrum imperatori Karthaginiensi, misso ab senatu po-
 puloque.* Is perpulit cunctantem Epicydem, ut,
 transgressi flumen, in aciem exirent: nam si Muti-

Terret Ro-
 manos.

nem opperirentur, et secunda pugnæ fortuna evenisset, haud dubie Mutinis gloriam fore. U. C. 540.
A. C. 212.

XLI. Enimvero indignum ratus Marcellus se, qui Hannibalem subnisum victoria Cannensi ab Nola repulisset, his terra marique victis ab se hostibus cedere, arma propere capere milites, et efferri signa jubet. Instruenti exercitum decem effusis equis advolant ex hostium acie Numidæ, nunciantes, populares suos, primum ea seditione motos, qua trecenti ex numero suo concesserint Heracleam, dein quod præfectum suum ab obtractantibus ducibus gloriæ ejus, sub ipsam certaminis diem, ablegatum videant, quieturos in pugna. Gens fallax promissi fidem præstitit: itaque et Romanis crevit animus, nuncio celeri per ordines misso, destitutum ab equite hostem esse, quem maxime timuerant: et territi hostes, præterquam quod maxima parte virium suarum non juvabantur, timore etiam incusso, ne ab suo et ipsi equite obpugnarentur. Itaque haud magni certaminis fuit: primus clamor atque inpetus rem decrevit. Numidæ, quum in concursu quieti stetissent in cornibus, ut terga dantes suos viderunt, fugæ tantum parumper comites facti, postquam omnes Agrigentum trepido agmine petentes viderunt, ipsi metu obsidionis passim in civitates proximas dilapsi. Multa millia hominum cæsa captaque, et octo elephantum. Hæc ultima in Sicilia Marcelli pugna fuit: victor inde Syracusas rediit. Jam ferme in exitu annus erat: itaque senatus Romæ decrevit, ut P. Cornelius prætor literas Capuam ad consules mitteret; dum Hannibal procul abesset, nec ulla magni discriminis res ad Capuam gereretur, alter eorum, si ita videretur, ad magistratus subrogandos Romam veni-

Eo absente, prælium committitur.

Vincuntur Pœni.

U. C. 540. ret. Literis acceptis, inter se consules compararunt,
A. C. 212. ut Claudius comitia perficeret, Fulvius ad Capuam
maneret. Consules Claudius creavit Cn. Fulvium
Centumalum et P. Sulpicium Servii filium Galbam,
qui nullum antea curulem magistratum gessisset.
Prætores deinde creati, L. Cornelius Lentulus, M.
Cornelius Cethegus, C. Sulpicius, C. Calpurnius
Piso. Pisoni jurisdictio urbana, Sulpicio Sicilia,
Cethego Apulia, Lentulo Sardinia evenit. Consuli-
bus prorogatum in annum imperium est.

EPITOME LIBRI XXVI.

HANNIBAL ad tertium ab urbe Roma lapidem super Anienem castra posuit: ipse vero cum duobus millibus equitum usque ad ipsam Capenam portum, ut urbis situm exploraret, obequitavit: et quum per triduum in aciem utrimque exercitus omnis descendisset, certamen tempestas diremit: nam quum in castra rediissent, statim serenitas erat. Capua capta est a Q. Fulvio et Ap. Claudio consulibus. Principes Campanorum veneno sibi consciverunt mortem. Quum senatus Campanorum deligatus esset ad palos, ut securi feriretur; literas a senatu missas Q. Fulvius consul, quibus jubebatur parcere, antequam legeret, in sinu posuit, et lege agi jussit, et supplicium peregit. Quum in comitiis apud populum quæreretur, cui mandaretur Hispaniarum imperium; nullo id volente suscipere, P. Scipio, P. filius, qui in Hispania ceciderat, professus est se iturum: et, suffragio populi consensuque omnium missus, Novam Karthaginem uno die expugnavit, quum ageret vigesimum quartum annum, videreturque divina stirpe creatus: quoniam et ipse, postquam togam acceperat, quotidie in Capitolio erat; et in cubiculo matris ejus anguis sæpenumero videbatur. Res præterea in Sicilia gestas continet, et amicitiam cum Ætolis junctam, bellumque gestum adversus Acarnanas et Philip-pum Macedoniae regem.

T. LIVII PATAVINI

LIBER XXVI.

U. C. 541. A. C. 211. **C**N. Fulvius Centumalus, P. Sulpicius Galba consules, quum idibus Martiis magistratum inissent, senatu in Capitolium vocato, de republica, de administratione belli, de provinciis exercitibusque Patres consuluerunt. Q. Fulvio, Ap. Claudio, prioris anni consulibus, prorogatum imperium est; atque exercitus, quos habebant, decreti: adjectumque, ne a Capua, quam obsidebant, abscederent, priusquam expugnassent. Ea tum cura maxime intentos habebat Romanos: non ab ira tantum, quæ in nullam umquam civitatem justior fuit, quam quod urbs tam nobilis ac potens, sicut defectione sua traxerat aliquot populos, ita recepta inclinatura rursus animos videbatur ad veteris imperii respectum. Et prætoribus prioris anni, M. Junio in Etruria, P. Sempronio in Gallia, cum binis legionibus, quas habuerant, prorogatum est imperium: prorogatum et M. Marcello, ut pro consule in Sicilia reliqua belli perficeret eo exercitu, quem haberet: si supplemento opus esset, suppleret de legionibus, quibus P. Cornelius proprætor in Sicilia præesset: dum ne quem militem legeret ex eo numero, quibus senatus missionem redditumque in patriam negasset ante belli finem. C. Sulpicio, cui Sicilia evenerat, duæ legiones, quas

P. Cornelius habuisset, decretæ : et supplementum U. C. 541.
 de exercitu Cn. Fulvii, qui priore anno in Apulia A. C. 211.
 fœde cæsus fugatusque erat. Huic generi militum
 senatus eundem, quem Cannensibus, finem statue-
 rat militiæ : additum etiam utrorumque ignominia
 est, ne in oppidis hibernarent, neve hiberna propius
 ullam urbem decem millibus passuum ædificarent.
 L. Cornelio in Sardinia duæ legiones datæ, quibus
 Q. Mucius præfuerat : supplementum, si opus esset,
 consules scribere jussi. T. Otacilio et M. Valerio
 Siciliae Græciæque ora cum legionibus classibusque,
 quibus præerant, decretæ. Quinquaginta Græci cum
 legione una, centum Siculi cum duabus legionibus
 habebant naves. Tribus et viginti legionibus Ro-
 manis eo anno bellum terra marique est gestum.

II. Principio ejus anni quum de literis L. Marcii Literæ Marcii.
 referretur, res gestæ magnificæ senatui visæ : titu-
 lus honoris (quod, imperio non populi jussu, non ex
 auctoritate Patrum dato, *Proprætor senatui*, scripse-
 rat) magnam partem hominum obfendebat. Rem
 mali exempli esse, imperatores legi ab exercitibus :
 et sollemne auspicatorum comitiorum in castra et
 provincias, procul ab legibus magistratibusque, ad
 militarem temeritatem transferri : et, quum quidam
 referendum ad senatum censerent, melius visum dif-
 ferri eam consultationem, donec proficiscerentur
 equites, qui ab Marcio literas adtulerant. Rescribi
 de frumento et vestimentis exercitus placuit : *eam*
utramque rem curæ fore senatui : adscribi autem,
Proprætori L. Marcio, non placuit : ne id ipsum,
 quod consultationi reliquerant, pro præjudicato fer-
 ret. Dimissis equitibus, de nulla re prius consules
 retulerunt, omniumque in unum sententiæ congru-

U. C. 541. ebant, agendum cum tribunis plebis esse, primo

A. C. 211. quoque tempore ad plebem ferrent, quem cum imperio mitti placeret in Hispaniam ad eum exercitum, cui Cn. Scipio imperator præfuisset. Ea res cum tribunis acta promulgataque est. Sed aliud certamen occupaverat animos. C. Sempronius Blæ-

Cn. Fulvius accusatur.

sus die dicta Cn. Fulvium, ob exercitum in Apulia amissum, in concionibus vexabat : *multos imperatores temeritate atque inscientia exercitum in locum præcipitem perduxisse dictitans : neminem, præter Cn. Fulvium, ante corrupisse omnibus vitiis legiones suas, quam proderet : itaque vere dici posse, prius eos perisse, quam viderent hostem ; nec ab Hannibale, sed ab imperatore suo, victos esse. Neminem, quum suffragium ineat, satis cernere, cui imperium, cui exercitum permittat. Quid interfuisse inter Ti. Sempronium ? Quum ei servorum exercitus datus esset, brevi effecisse disciplina atque imperio, ut nemo eorum generis ac sanguinis sui memor in acie esset, præsidio sociis, hostibus terrori essent : Cumas, Beneventum, aliasque urbes eos velut e faucibus Hannibalis ereptas populo Romano restituisse. Cn. Fulvium Quiritium Romanorum exercitum, honeste genitos, liberaliter educatos, servilibus vitiis inbuisse : ergo effecisse, ut feroces et inquieti inter socios, ignavi et inbelles inter hostes essent, nec inperitum modo Pænorum, sed ne clamorem quidem sustinere possent. Nec, Hercule, mirum esse, milites in acie non stetisse, quum primus omnium imperator fugeret : magis mirari se, aliquos stantes cecidisse, et non omnes comites Cn. Fulvii fuisse pavoris ac fugæ. C. Flaminium, L. Paullum, L. Postumium, Cn. ac P. Scipiones cadere in acie maluisse, quam deserere circumventos exercitus. Cn. Fulvium prope unum nuncium deleti*

exercitus Romam redisse. Facinus indignum esse, Can- U. C. 541.
nensem exercitum, quod ex acie fugerit, in Siciliam de- A. C. 211.
portatum, ne prius inde dimittatur, quam hostis ex
Italia decesserit, et hoc idem in Cn. Fulvii legionibus
nuper decretum: Cn. Fulvio fugam ex prælio, ipsius
temeritate commisso, impunitam esse: et eum in ganea
lustrisque, ubi juventam egerit, senectutem acturum:
milites, qui nihil aliud peccaverint, quam quod impe-
ratoris similes fuerint, relegatos prope in exsilium, ig-
nominosam pati militiam: adeo inparem libertatem
Romæ diti ac pauperi, honorato atque inhonorato esse.

III. Reus ab se culpam in milites transferebat: Se defendit.
Eos ferociter pugnam poscentes productos in aciem,
non eo, quo voluerint, (quia serum diei fuerit) sed
postero die, et tempore et loco æquo instructos, seu fa-
mam, seu vim hostium non sustinuisse. Quum effuse
omnes fugerent, se quoque turba ablatum; ut Varro-
nem Cannensi pugna, ut multos alios imperatores. Qui
autem solum se restantem prodesse reipublicæ, nisi si
mors sua remedio publicis cladibus futura esset, potu-
isse? Non se inopia commeatus, non in loca iniqua
incaute deductum, non agmine inexplorato euntem in-
sidiis circumventum: vi aperta, armis, acie victum:
nec suorum animos, nec hostium, in potestate habuisse:
suum cuique ingenium audaciam aut pavorem facere.
Bis est accusatus, pecuniaque anquisitum: tertio,
testibus datis, quum, præterquam quod omnibus
probris onerabatur, iurati permulti dicerent, fugæ
pavorisque initium a prætore ortum; ab eo desertos
milites, quum haud vanum timorem ducis crederent,
terga dedisse; tanta ira accensa est, ut capite an-
quirendum concio subclamaret. De eo quoque no-
vum certamen ortum: nam, quum tribunus bis pe-

U. C. 541. cunia anquisisset, tertio capitis se anquirere diceret ;
 A. C. 211. tribuni plebis adpellati, *collegæ*, negarunt, *se in mora esse, quo minus, quod ei more majorum permissum esset, seu legibus, seu moribus mallet, anquireret, quoad vel capitis, vel pecuniæ judicasset privato*. Tum Sempronius, *perduellionis se judicare Cn. Fulvio*, dixit, diemque comitiis ab C. Calpurnio prætore urbis petit. Inde alia spes ab reo tentata est : si adesse in judicio Q. Fulvius frater posset, florens tum et fama rerum gestarum, et propinqua spe Capuæ potiundæ.

It in exsili- Id quum per literas miserabiliter pro fratris capite
 lium. scriptas petisset Fulvius, negassentque Patres e re-
 publica esse, abscedi a Capua ; postquam dies co-
 mitiorum aderat, Cn. Fulvius exsulatum Tarquinius
 abiit : id ei justum exsilium esse, scivit plebs.

Capuæ arctior ob- IV. Inter hæc vis omnis belli versa in Capuam
 sidio. erat : obsidebatur tamen acrius, quam obpugnaba-
 tur : nec aut famem tolerare servitia ac plebs pote-
 rant, aut mittere nuncios ad Hannibalem per custo-
 dias tam artas. Inventus est Numida, qui, acceptis
 literis, evasurum se professus, ut promissum præsta-
 ret, per media Romana castra nocte egressus, spem
 accendit Campanis, dum aliquid virium superesset,
 ab omni parte eruptionem tentandi. Ceterum in
 multis certaminibus equestria prælia ferme prospera
 faciebant : pedites superabantur : sed nequaquam
 tam lætum vincere, quam triste vinci ulla parte erat
 ab obsesso et prope expugnato hoste. Inita tandem
 ratio est, ut, quod viribus deerat, arte æquaretur :
 ex omnibus legionibus electi sunt juvenes, maxime
 vigore ac levitate corporum veloces : eis parmæ bre-
 viores, quam equestres, et septena jacula quaternos
 longa pedes data, præfixa ferro, quale hastis velita-

ribus inest : eos singulos in equos suos accipientes U. C. 541.
 equites adsuefecerunt, et vehi post sese, et desilire A. C. 211.
 perneciter, ubi signum datum esset. Postquam ad-
 suetudine quotidiana satis intrepide visum est fieri,
 in campum, qui medius inter castra murumque erat,
 adversus instructos Campanorum equites processe-
 runt : et, ubi ad conjectum teli ventum est, signo
 dato velites desiliunt : pedestris inde acies ex equi-
 tatu repente in hostium equites incurrit : jaculaque
 cum inpetu alia super alia emittunt. Quibus plurimis
 in equos virosque passim conjectis permultos vulne-
 raverunt : pavoris tamen plus ex re nova atque ino-
 pinata injectum est, et in perculsum hostem equites
 invecti, fugam stragemque eorum usque ad portas
 fecerunt. Inde equitatu quoque superior Romana
 res fuit. Institutum, ut velites in legionibus essent. Velites in
 Auctorem peditum equiti inmiscendorum centurio- legionibus.
 nem Q. Navium ferunt, honorique id ei apud impe-
 ratorem fuisse.

V. Quum in hoc statu ad Capuam res essent,
 Hannibalem diversum Tarentinæ arcis potiundæ Hannibal
 Capuæque retinendæ trahebant curæ : vicit tamen ad Capu-
 respectus Capuæ, in quam omnium sociorum hosti-
 umque conversos videbat animos ; documento futu-
 ræ, qualemcumque eventum defectio ab Romanis
 habuisset. Igitur, magna parte inpedimentorum re-
 licta in Bruttis, et omni graviore armatu, cum de-
 lectis peditum equitumque, quam poterat aptissimis
 ad maturandum iter, in Campaniam contendit : se-
 cuti tamen tam raptim euntem tres et triginta ele-
 phanti. In valle occulta post Tifata montem inmi-
 nentem Capuæ consedit. Adveniens quum castellum
 Galatiam, præsidio vi pulso, cepisset, in circumse-

U. C. 541. dentes Capuam se vertit: præmissis ante nunciis
 A. C. 211. Capuam, quo tempore castra Romana adgressurus
 Proelium. esset, ut eodem et illi, ad eruptionem parati, portis
 omnibus sese effunderent, ingentem præbuit terro-
 rem: nam alia parte ipse adortus est; alia Campani
 omnes, pedites equitesque, et cum iis Punicum præ-
 sidium, cui Bostar et Hanno præerant, erupit. Ro-
 mani, ut in re trepida, ne ad unam concurrento
 partem aliquid indefensi relinquerent, ita inter se
 copias partiti sunt. Ap. Claudius Campanis, Ful-
 vius Hannibali est obpositus. C. Nero proprætor
 cum equitibus sextæ legionis via, quæ Suessulam
 fert; C. Fulvius Flaccus legatus cum sociali equi-
 tatu constitit e regione Vulturni amnis. Proelium
 non solito modo clamore ac tumultu est cœptum,
 sed, ad alium virorum, equorum, armorumque so-
 num, disposita in muris Campanorum inbellis mul-
 tudo tantum cum æris crepitu, qualis in defectu
 lunæ silenti nocte cieri solet, edidit clamorem, ut
 averteret etiam pugnantium animos. Campanos fa-
 cile a vallo Appius arcebat. Major vis ab altera
 parte Fulvium, Hannibal et Pœni, urgebant: legio
 ibi sexta loco cessit: qua pulsa, cohors Hispano-
 rum cum tribus elephantis usque ad vallum pervasit:
 ruperatque mediam aciem Romanorum, et in auci-
 piti spe ac periculo erat, utrum in castra perrumpe-
 ret, an intercluderetur a suis. Quem pavorem legio-
 nis periculumque castrorum Fulvius ubi vidit, Q.
 Navium primoresque alios centurionum hortatur, *ut*
cohortem hostium sub vallo pugnantem invadant: in
summo discrimine rem verti: aut viam dandam iis esse,
et minore conatu, quam condensam aciem inrupissent,
in castra inrupturos: aut conficiendos sub vallo esse.

Nec magni certaminis rem fore : paucos esse, et ab suis U. C. 541.
interclusos ; et quæ, dum paveat Romanus, interrupta A. C. 211.
acies videatur, eam, si se utrimque in hostem vertat,
ancipiti pugna medios circumventuram. Navius ubi
 hæc imperatoris dicta accepit, secundi hastati sig-
 num ademtum signifero in hostes infert ; jacturum
 in medios eos minitans, ni se propere sequantur mi-
 lites, et partem capessant pugnae. Ingens corpus
 erat, et arma honestabant ; et sublatum alte signum
 converterat ad spectaculum cives hostesque : cete-
 rum, postquam jam ad signa pervenerat Hispano-
 rum, tum undique in eum tragulae conjectae, et prope
 tota in unum acies versa : sed neque hostium multi-
 tudo, neque telorum vis arcere inpetum ejus viri po-
 tuerunt.

VI. Et M. Atilius legatus, primi principis ex ea-
 dem legione signum inferri in cohortem Hispano-
 rum coëgit. Et, qui castris præerant, L. Porcius
 Licinus et T. Popillius legati pro vallo acriter pro-
 pugnant, elephantosque transgredientes in ipso vallo
 conficiunt : quorum corporibus quum oppleta esset
 fossa, velut aggere aut ponte injecto, transitum hos-
 tibus dedit. Ibi per stragem jacentium elephantor-
 um atrox edita cædes. Altera in parte castrorum
 jam impulsæ erant Campani Punicumque præsidium,
 et sub ipsa porta Capuæ, quæ Vulturium fert, pug-
 nabatur : neque tam armati inrumpentibus Romanis
 resistebant, quam quod porta, ballistis scorpionibus-
 que instructa, missilibus procul hostes arcebat : et
 subpressit inpetum Romanorum vulnus imperatoris
 Ap. Claudii : cui, suos ante prima signa adhortanti,
 sub lævo humero summum pectus gæso ictum est.
 Magna tamen vis hostium ante portam est cæsa :

U. C. 541. ceteri trepidi in urbem compulsi. Et Hannibal,
 A. C. 211. postquam cohortis Hispanorum stragem vidit, sum-
 Hannibal maque vi castra hostium defendi, ommissa obpugna-
 recipit sig- tione, recipere signa, et convertere agmen peditum,
 na. objecto a tergo equitatu, ne hostis instaret, coepit.
 Legionum ardor ingens ad hostem insequendum fuit:
 sed Flaccus receptui cani jussit; satis ad utrumque
 profectum ratus, ut et Campani, quam haud mul-
 tum in Hannibale præsidi esset, et ipse Hannibal
 sentiret. Cæsa eo die, qui hujus pugnae auctores
 sunt, octo millia hominum de Hannibalis exercitu,
 tria ex Campanis tradunt; signaque Karthaginien-
 sibus quindecim ademta, duodeviginti Campanis.
 Apud alios nequaquam tantam molem pugnae in-
 veni, plusque pavoris, quam certaminis, fuisse:
 quum inopinato in castra Romana Numidæ Hispa-
 nique cum elephantis inrupissent; elephantibus, per
 media castra videntes, stragem tabernaculorum in-
 genti sonitu ac fugam abrumpentium vincula ju-
 mentorum facerent; fraudem quoque super tumultum
 adjectam, inmissis ab Hannibale, qui (habuit
 aliquot) gnari Latinæ linguæ juberent consulum
 verbis, quoniam amissa castra essent, pro se quem-
 que militum in proximos montes fugere: sed eam
 celeriter cognitam fraudem, obpressamque magna
 cæde hostium; elephantos igni e castris exactos.
 Hoc ultimum (utcumque initum finitumque est) ante
 deditionem Capuæ prælium fuit. Medixtuticus, qui
 summus magistratus apud Campanos est, eo anno
 Seppius Lesius erat, loco obscuro tenuique fortuna
 ortus. Matrem ejus quondam, pro pupillo eo pro-
 curantem familiare ostentum, quum respondisset
 aruspex, summum quod esset imperium Capuæ, per-

Seppius
 Lesius Me-
 dixtuticus
 Capuæ.

venturum ad eum puerum, nihil ad eam spem ag- U.C. 541.
noscentem, dixisse ferunt, *Næ tu perditas res Cam-* A.C. 211.
panorum narras, ubi summus honos ad filium meum
perveniet! Ea ludificatio veri, et ipsa in verum ver-
tit: nam quum fame ferroque urgerentur, nec spes
ulla superesset, iis, qui nati in spem honorum erant,
honores detractantibus; Lesius, querendo desertam
ac proditam a primoribus Capuam, summum ma-
gistratum ultimus omnium Campanorum cepit.

VII. Ceterum Hannibal, ut nec hostes elici am-
plius ad pugnam vidit, nec per castra eorum per-
rumpi ad Capuam posse, ne suos quoque commea-
tus intercluderent novi consules, abscedere irritò
incepto, et movere a Capua statuit castra. Multa
secum, quonam inde ire pergeret, volventi subiit
animum inpetus, caput ipsum belli Romam petendi:
cujus rei semper cupitæ prætermisam occasionem
post Cannensem pugnam et alii vulgo fremebant, et
ipse non dissimulabat: *necopinato pavore ac tumultu,* Hannibal
non esse desperandum, aliquam partem urbis occupari Romam
posse; et, si Roma in discrimine esset, Capuam extem- petere sta-
plo omissuros aut ambo imperatores Romanos, aut al- tuit.
terum ex iis: et, si divisissent copias, utrumque infir-
miorem factum aut sibi, aut Campanis, bene gerendæ
rei fortunam daturus esse. Una ea cura angebat, ne,
ubi abscessisset, extemplo dederentur Campani. Nu-
midam promptum ad omnia audenda donis perlicit,
ut, literis acceptis, specie transfugæ castra Roma-
na ingressus, altera parte Capuam clam pervadat.
Literæ autem erant adhortatione plenæ. *Profec-*
tionem suam, quæ salutaris illis foret, abstracturam
ad defendendam Romam ab obpugnanda Capua duces
atque exercitus Romanos. Ne desponderent animos:

U. C. 541. *tolerando paucos dies, totam soluturos obsidionem. Inde*
 A. C. 211. *naves in flumine Vulturno comprehensas subigi ad*
id, quod jam ante præsidii caussa fecerat, castellum
jussit. Quarum ubi tantam copiam esse, ut una
nocte trajici posset exercitus, adlatum est, cibariis
decem dierum præparatis, deductas nocte ad fluvium
legiones ante lucem trajecit.

Variae in
 senatu
 sententiæ.

VIII. Id priusquam fieret, ita futurum comper-
 tum ex transfugis, Fulvius Flaccus senatui Romam
 quum scripsisset, varie hominum animi pro cujusque
 ingenio adfecti sunt. Ut in re tam trepida, senatu
 extemplo vocato, P. Cornelius, cui Asinæ cognomen
 erat, omnes duces exercitusque ex tota Italia, neque
 Capuæ, neque ullius alterius rei memor, ad urbis
 præsidium revocabat. Fabius Maximus, abscedi a
 Capua, terrerique et circumagi ad nutus commina-
 tionesque Hannibalis, flagitiosum ducebat. *Qui ad*
Cannas victor ire tamen ad urbem ausus non esset,
eum, a Capua repulsum, spem potiundæ urbis Romæ
cepisse? Non ad Romam obsidendam, sed ad Capuæ
liberandam obsidionem, ire. Romam cum eo exercitu,
qui ad urbem esset, Jovem, fæderum raptorum ab Han-
nibale testem, Deosque alios defensuros esse. Has di-
versas sententias media sententia P. Valerii Flacci
vicit: qui, utriusque rei memor, imperatoribus, qui
ad Capuam essent, scribendum censuit, Quid ad ur-
bem præsidii esset, quantas autem Hannibal copias du-
ceret, aut quanto exercitu ad Capuam obsidendam opus
esset, ipsos scire. Si et Romam e ducibus alter, et ex-
ercitus pars mitti posset, ut ab reliquo et duce et exer-
citu Capua recte obsideretur; inter se compararent
Claudius Fulviusque, utri obsidenda Capua, utri, ad
prohibendam obsidione patriam, Romam veniundam es-

set. Hoc senatusconsulto Capuam perlato, Q. Fulvius proconsul, cui, collega ex vulnere ægro, eundem Romam erat, e tribus exercitibus milite electo, ad quindecim millia peditum, mille equites, Vulturum traducit: inde quum Hannibalem Latina via iturum satis comperisset, ipse per Appiæ municipia, quæque propter eam viam sunt, Setiam, Coram, Lanuvium præmisit, ut commeatus paratos et in urbibus haberent, et ex agris deviis in viam proferrent, præsidiaque in urbes contraherent, ut sua cuique respublica in manu esset.

U. C. 541.
A. C. 211.
Fulvius a
Capua Ro-
mam revo-
catur.

IX. Hannibal, quo die Vulturum est transgressus, haud procul a flumine castra posuit. Postero die præter Cales in agrum Sidicinum pervenit: ibi diem unum populando moratus, per Suessulam Allifanumque et Casinatem agrum via Latina ducit: sub Casinum biduo stativa habita et passim populationes factæ. Inde, præter Interamnam Aquinumque, in Fregellanum agrum ad Lirim fluvium ventum: ubi intercisum pontem a Fregellanis morandi itineris caussa invenit. Et Fulvium Vulturum tenuerat amnis, navibus ab Hannibale incensis, rates ad trajiciendum exercitum, in magna inopia materiæ, ægre comparantem. Trajecto ratibus exercitu, reliquum Fulvio expeditum iter, non per urbes modo, sed circa viam, expositis benigne commeatibus, erat: alacresque milites alius alium, ut adderet gradum, memor ad defendendam ire patriam, hortabantur. Romam Fregellanus nuncius, diem noctemque itinere continuato, ingentem adtulit terrorem: tumultuosius, quam adlatum erat, cursus hominum, adfingentium vana auditis, totam urbem conciverat: ploratus mulierum non ex privatis solum domibus

Tumultus
Romæ.

U. C. 541. exaudiebatur; sed undique matronæ, in publicum
 A. C. 211. effusæ, circa Deûm delubra discurrunt, crinibus passis aras verrentes, nixæ genibus, supinas manus ad cœlum ac Deos tendentes, orantesque, ut urbem Romanam e manibus hostium eriperent; matresque Romanas et liberos parvos inviolatos servarent. Senatus magistratibus in foro præsto est, si quid consulere velint. Alii accipiunt imperia, disceduntque ad suas quisque officiorum partes: alii obferunt se, si quo usus operæ sit: præsidia in arce, in Capitolio, in muris, circa urbem, in monte etiam Albano atque arce Æsulana ponuntur. Inter hunc tumultum, Q. Fulvium proconsulem profectum cum exercitu a Capua adfertur; cui ne minueretur imperium, si in urbem venisset, decernit senatus, ut Q. Fulvio par cum consulibus imperium esset. Hannibal, infestius perpopulato agro Fregellano propter intercisos pontes, per Frusinatem Ferentinatempque et Anagninum agrum in Lavicanum venit: inde Algido Tusculum petiit: nec receptus mœnibus, infra Tusculum dextrorsus Gabios descendit: inde in Pupiniæ exercitu demisso, octo millia passuum ab Roma posuit castra. Quo propius hostis accedebat, eo major cædes fiebat fugientium, præcedentibus Numidis: pluresque omnium generum atque ætatum capiebantur.

X. In hoc tumultu Fulvius Flaccus, porta Capena cum exercitu Romam ingressus, media urbe per Carinas Esquilias contendit: inde egressus, inter Esquilinam Collinamque portam posuit castra. Ædiles plebis commeatum eo comportarunt. Consules senatusque in castra venerunt: ibi de summa re publica consultatum. Placuit, consules circa portas

Collinam Esquilinamque ponere castra : C. Calpur- U. C. 541.
 nium prætorem urbanum Capitolio atque arci præ- A. C. 211.
 esse : et senatum frequentem in foro contineri, si
 quid in tam subitis rebus consulto opus esset. Inter Hannibal
 hæc Hannibal ad Anienem fluvium, tria millia pas- ad Romam.
 suum ab urbe, castra admovit : ibi stativis positis,
 ipse cum duobus millibus equitum a porta Collina
 usque ad Herculis templum est progressus ; atque,
 unde proxime poterat, mœnia situmque urbis obe-
 quitans contemplabatur. Id eum tam licenter atque
 otiose facere, Flacco indignum visum est : itaque
 inmisit equites, submoverique atque in castra redigi
 hostium equitatum jussit. Quum commissum præ-
 lium esset, consules transfugas Numidarum, qui tum
 in Aventino ad mille et ducentos erant, media urbe
 transire Esquilias jusserunt : nullos aptiores, inter
 convalles tectaque hortorum et sepulcra aut cavas
 undique vias, ad pugnandum futuros rati : quos
 quum ex arce Capitolioque clivo publico in equis
 decurrentes quidam vidissent, captum Aventinum
 conclamaverunt. Ea res tantum tumultum ac fugam
 præbuit, ut, nisi castra Punica extra urbem fuissent,
 effusura se omnis pavida multitudo fuerit : tunc in
 domos atque in tecta refugiebant : vagosque in viis
 suos pro hostibus lapidibus telisque incessebant.
 Nec comprimi tumultus aperirique error poterat,
 refertis itineribus agrestium turba pecorumque, quæ
 repentinus pavor in urbem compulerat. Equestre
 prælium secundum fuit, submotique hostes sunt :
 et, quia multis locis comprimendi tumultus erant,
 qui temere oriebantur, placuit, omnes, qui dictato-
 res, consules, censoresve fuissent, cum imperio esse,
 donec recessisset a muris hostis. Et diei quod reli-

U. C. 541. quum fuit, et nocte insequenti, multi temere excitati
 A. C. 211. tumultus sunt, compressique.

Instructas
 utrimque
 acies tem-
 pestas di-
 rimit.

XI. Postero die transgressus Anienem Hannibal in aciem omnes copias eduxit : nec Flaccus consu-lesque certamen detractavere. Instructis utrimque exercitibus in ejus pugnae casum, in qua urbs Roma victori praeium esset, imber ingens grandine mixtus ita utramque aciem turbavit, ut vix armis retentis in castra sese receperint, nullius rei minore, quam hostium, metu. Et postero die eodem loco acies instructas eadem tempestas diremit : ubi recepissent se in castra, mira serenitas cum tranquillitate oriebatur. In religionem ea res apud Pœnos versa est : auditaque vox Hannibalis fertur, *Potiundæ sibi urbis Romæ modo mentem non dari, modo fortunam.* Minuere etiam spem ejus et aliæ, parva magnaue, res : magna illa, quod, quum ipse ad mœnia urbis Romæ armatus sederet, milites sub vexillis in supplementum Hispaniæ profectos audivit : parva autem, quod per eos dies eum forte agrum, in quo ipse castra haberet, venisse, nihil ob id deminuto pretio, cognitum ex quodam captivo est. Id vero adeo superbum atque indignum visum, ejus soli, quod ipse bello captum possideret haberetque, inventum Romæ emptorem ; ut, extemplo vocato præcone, tabernas argentarias, quæ circa forum Romanum tunc essent, jusserit venire. His motus ad Tutiā fluvium castra retulit, sex millia passuum ab urbe : inde ad lucum Feroniæ pergit ire, templum ea tempestate inclitum divitiis. Capenates aliqui adcolæ ejus erant ; primitias frugum eo donaque alia pro copia portantes, multo auro argentoque id exornatum habebant. His omnibus donis tum spolia-

Recedit
 Hannibal.

tum templum : æris acervi, quum rudera milites re- U. C. 541.
 ligione inducti jacerent, post profectionem Hanni- A. C. 211.
 balis magni inventi. Hujus populatio templi haud
 dubia inter scriptores est. Cælius, Romam euntem
 ab Ereto divertisse eo Hannibalem, tradit : iterque
 ejus ab Reate, Cutilisque, et ab Amiterno orditur :
 ex Campania in Samnium, inde in Pelignos perve-
 nisse ; præterque oppidum Sulmonem in Marrucinos
 transisse ; inde Albensi agro in Marsos, hinc Ami-
 ternum, Forulosque vicum venisse. Neque ibi error
 est, quod tanti exercitus vestigia intra tam brevis
 ævi memoriam potuerint confundi : isse enim ea
 constat. Tantum id interest, veneritne eo itinere
 ad urbem, an ab urbe in Campaniam redierit.

XII. Ceterum non quantum pertinaciæ ad pre- It Rhegi-
 mendam obsidione Capuam Romanis fuit, tantum um.
 ad defendendam Hannibali : namque ex Lucanis in
 Bruttium agrum, ad fretum vero ac Rhegium eo
 cursu contendit, ut prope repentino adventu incau-
 tos obpresserit. Capua etsi nihilo segnius obsessa
 per eos dies fuerat, tamen adventum Flacci sensit :
 et admiratio orta est, non simul regressum Hanni-
 balem. Inde per conloquia intellexerunt, relictos se
 desertosque, et spem Capuæ retinendæ deploratam
 apud Pœnos esse. Accessit edictum proconsulis ex
 senatusconsulto propositum, vulgatumque apud hos-
 tes : *ut, qui civis Campanus ante certam diem transis-*
set, sine fraude esset. Nec ulla facta est transitio, Campano-
 metu magis eos, quam fide, continente ; quia majora rum de-
 in defectione deliquerant, quam quibus ignosci pos- speratio.
 set. Ceterum quemadmodum nemo privato consilio
 ad hostem transibat, ita nihil salutare in medium
 consulebatur. Nobilitas rempublicam deseruerat,

U. C. 541. neque in senatum cogi poterant : in magistratu au-
 A. C. 211. tem erat, qui non sibi honorem adjecisset, sed indig-
 nitate sua vim ac jus magistratui, quem gerebat,
 demississet. Jam ne in foro quidem, aut publico loco,
 principum quisquam adparebat : domibus inclusi
 patriæ occasum cum suo exitio in dies expecta-
 bant : summa curæ omnis in Bostarem Hannonem-
 que præfectos præsidii Punici versa erat, suo, non
 sociorum, periculo sollicitos. Hi, conscriptis ad
 Hannibalem literis, non libere modo, sed etiam as-
 pere, quibus, *non Capuam solam traditam in manum
 hostibus, sed se quoque et præsidium in omnes cruciatus
 proditos, incusabant : abiisse eum in Bruttios, velut
 avertentem sese, ne Capua in oculis ejus caperetur : at,
 Hercule, Romanos ne obpugnatione quidem urbis Ro-
 manæ abstrahi ab Capua obsidenda potuisse : tanto
 constantiorem inimicum Romanum, quam amicum Pæ-
 num esse. Si redeat Capuam, bellumque omne eo ver-
 tat, et se et Campanos paratos eruptioni fore. Non
 eum Rheginis, neque Tarentinis bellum gesturos trans-
 isse Alpes : ubi Romanæ legiones sint, ibi et Karthagi-
 niensium exercitus debere esse. Sic ad Cannas, sic ad
 Trasimenum rem bene gestam ; cœundo, conferendo
 cum hoste castra, fortunam tentando. In hanc sen-
 tentiam literæ conscriptæ Numidis, proposita mer-
 cede jam professis operam, dantur. Hi specie trans-
 fugarum quum ad Flaccum in castra venissent, ut
 inde tempore capto abirent ; famesque, quæ tam diu
 Capuæ erat, nulli non probabilem causam transi-
 tionis faceret, mulier repente Campana in castra ve-
 nit, scortum transfugarum unius ; indicatque impe-
 ratori Romano, Numidas fraude composita trans-
 isse, literasque ad Hannibalem ferre : id unum ex*

Literæ
 Bostaris et
 Hannonis
 ad Hanni-
 balem.

iis, qui sibi rem aperuisset, arguere sese paratam U. C. 541.
 esse. Productus primo satis constanter ignorare se A. C. 211.
 mulierem simulabat : paullatim dein convictus veris,
 quum tormenta posci et parari videret, fassus id ita
 esse : literæque prolatae ; et additum etiam indicio,
 quod celabatur, et alios specie transfugarum Numi-
 das vagari in castris Romanis : hi supra septuaginta
 comprehensi, et cum transfugis novis mulcati virgis,
 manibusque præcis, Capuam rediguntur. Conspec-
 tum tam triste supplicium fregit animos Campano-
 rum.

XIII. Concursus ad curiam populi factus coëgit Senatus
 Lesium senatum vocare : et primoribus, qui jam diu Campanus
 publicis consiliis aberant, propalam minabantur, nisi convoca-
 venirent in senatum, circa domos eorum ituros se,
 et in publicum omnes vi extracturos esse. Is timor
 frequentem senatum magistratui præbuit. Ibi quum
 ceteri de legatis mittendis ad imperatores Romanos
 agerent, Vibius Virrius, qui defectionis ab Romanis
 auctor fuerat, interrogatus sententiam, negat, *eos*, Vibii Virrii
qui de legatis et de pace ac deditione loquantur, memi- oratio.
nisse, nec quid facturi fuerint, si Romanos in potestate
habuissent ; nec quid ipsis patiendum sit. Quid ? vos,
inquit, eam deditionem fore censetis, qua quondam, ut
adversus Samnites auxilium inpetraremus, nos nostra-
que omnia Romanis dedidimus ? Jam e memoria exces-
sit, quo tempore, et in qua fortuna a populo Romano
defecerimus ? jam, quemadmodum in defectione præsi-
dium, quod poterat emitti, per cruciatum et ad contu-
meliam necarimus ? quoties in obsidentes, quam inimice
eruperimus, castra obpugnarimus ? Hannibalem voca-
verimus ad obprimendos eos ? hoc quod recentissimum
est, ad obpugnandam Romam hinc eum miserimus ?

U. C. 541. *Age contra, quæ illi infeste in nos fecerint, repetite: ut*
 A. C. 211. *ex eo, quid speretis, habeatis. Quum hostis alienigena*
in Italia esset, et Hannibal hostis, et cuncta bello arde-
rent, omissis omnibus, omisso ipso Hannibale, ambo con-
sules et duo consulares exercitus ad Capuam obpugnand-
am miserunt. Alterum annum circumvallatos inclu-
sosque nos fame macerant, et ipsi nobiscum ultima peri-
cula ac gravissimos labores perpessi, circa vallum ac
fossas sæpe trucidati, et prope ad extremum castris ex-
uti. Sed omitto hæc: vetus atque usitata res est, in
obpugnanda hostium urbe labores ac pericula pati: illud
iræ atque odii execrabilis indicium est. Hannibal in-
gentibus copiis peditum equitumque castra obpugnavit,
et ex parte cepit: tanto periculo nihil moti sunt ab ob-
sidione. Profectus trans Vulturnum, perussit Calenum
agrum: nihil tanta sociorum clade avocati sunt. Ad
ipsam urbem Romam infesta signa ferri jussit: eam
quoque tempestatem imminentem spreverunt. Trans-
gressus Anienem, tria millia passuum ab urbe castra
posuit: postremo ad mœnia ipsa et ad portas accessit.
Romam se ademturum eis, nisi omitterent Capuam,
ostendit: non omiserunt. Feras bestias, cæco inpetu ac
rabie concitatas, si ad cubilia et catulos earum ire per-
gas, ad opem suis ferendam avertas. Romanos Roma
circumsessa, conjuges, liberi, quorum ploratus hinc
prope exaudiebantur, aræ, foci, Deûm delubra, sepul-
cra majorum temerata ac violata, a Capua non averte-
runt: tanta aviditas supplicii expetendi, tanta sangui-
nis nostri hauriendi est sitis. Nec injuria forsitan:
nos quoque idem fecissemus, si data fortuna esset. Ita-
que quando aliter Diis immortalibus visum est, quum
mortem ne recusare quidem debeam; cruciatus contu-
meliasque, quas sperat hostis, dum liber, dum mei po-

*tens sum, effugere morte, præterquam honesta, etiam U. C. 541.
leni, possum. Non videbo Ap. Claudium et Q. Fulvium, A. C. 211.
victoria insolenti subnisis, neque vinctus per urbem Ro-
manam triumphi spectaculum trahar, ut deinde in car-
cere, aut ad palum deligatus, lacerato virgis tergo, cer-
vicem securi Romanæ subjiciam : nec dirui incendique
patriam videbo : nec rapi ad stuprum matres Campa-
nas, virginesque, et ingenuos pueros. Albam, unde ipsi
oriundi erant, a fundamentis proruerunt, ne stirpis, ne
memoria originum suarum exstaret : nedum eos Capuæ
parsuros credam, cui infestiores, quam Karthagini,
sunt. Itaque quibus vestrum ante fato cedere, quam
hæc tot tam acerba videant, in animo est ; iis apud me
hodie epulæ instructæ paratæque sunt. Satiatis vino
ciboque poculum idem, quod mihi datum fuerit, cir-
cumferetur : ea potio corpus ab cruciatu, animum a
contumeliis, oculos, aures, a videndis audiendisque om-
nibus acerbis indignisque, quæ manent victos, vindica-
bit : parati erunt, qui magno rogo in propatulo ædium
accenso corpora exanima injiciant. Hæc una via et ho-
nesta et libera ad mortem : et ipsi virtutem mirabuntur
hostes, et Hannibal fortes socios sciet ab se desertos ac
proditos esse.*

XIV. Hanc orationem Virrii plures audierunt
cum adsensu, quam forti animo id, quod probabant,
exsequi potuerunt. Major pars senatus, multis sæpe
bellis expertam populi Romani clementiam haud
diffidentes sibi quoque placabilem fore, legatos ad
dedendam Romanis Capuam decreverunt, miserunt-
que. Vibium Virrium septem et viginti ferme sena-
tores domum secuti sunt, epulatique cum eo ; et,
quantum facere potuerant, alienatis mentibus vino ab
inminenti sensu mali, venenum omnes sumserunt :

Legati ad
Romanos
missi.

Virrius et
alii senato-
res vene-
num su-
munt.

U. C. 541. inde misso convivio, dextris inter se datis, ultimo-
A. C. 211.

que complexu, conlacrimantes suum patriæque casum, alii, ut eodem rogo cremarentur, manserunt; alii domos digressi sunt. Inpletæ cibus vinoque venæ minus efficacem in maturanda morte vim veneni fecerunt: itaque noctem totam plerique eorum, et diei insequentis partem quum animam egissent; omnes tamen, priusquam aperirentur hostibus portæ, expirarunt. Postero die porta Jovis, quæ adversus castra Romana erat, jussu proconsulis aperta est: ea intromissa legio una et duæ alæ, cum C. Fulvio legato. Is, quum omnium primum arma telaque, quæ Capuæ erant, ad se conferenda curasset, custodiis ad omnes portas dispositis, ne quis exire aut emitti posset, præsidium Punicum comprehendit, senatum Campanum ire in castra ad imperatores Romanos jussit: quo quum venissent, extemplo his omnibus catenæ injectæ, jussique ad quæstores deferre, quod auri argentique haberent: auri pondo septuaginta fuit, argenti tria millia pondo et ducenta: senatores quinque et viginti Cales in custodiam, duodetriginta Teanum missi: quorum de sententia maxime descitum ab Romanis constabat.

Capuam
ingrediun-
tur Roma-
ni.

XV. De supplicio Campani senatus haudquaquam inter Fulvium Claudiumque conveniebat. Facilis inpetrandæ veniæ Claudius, Fulvio durior sententia erat. Itaque Appius Romam ad senatum arbitrium ejus rei totum rejiciebat: percunctandi etiam æquum esse potestatem fieri Patribus, num communicassent consilia cum aliquibus sociorum Latini nominis municipiorum: et num ope eorum in bello forent et municipiorum adjuti. *Id vero minime committendum esse, Fulvius dicere, ut sollicitarentur crimini-*

bus dubiis sociorum fidelium animi: et subjicerentur in- U. C. 541.
dicibus, quæis, neque quid facerent, neque quid dicerent, A. C. 211.
quidquam umquam pensi fuisset: itaque se eam quæ-
stionem obpressurum extincturumque. Ab hoc sermo-
ne quum digressi essent, et Appius, quamvis ferociter
loquentem, collegam, non dubitaret, tamen literas
super tanta re ab Roma expectaturum; Fulvius, ne
id ipsum impedimentum incepto foret, dimittens præ-
torium, tribunis militum ac præfectis socium impe-
ravit, uti duobus millibus equitum delectis denunci-
arent, ut ad tertiam buccinam præsto essent. Cum
hoc equitatu nocte Teanum profectus, prima luce
portam intravit, atque in forum perrexit: concursu-
que ad primum equitum ingressum facto, magistra-
tum Sidicinum citari jussit, imperavitque, ut produ-
ceret Campanos, quos in custodia haberet. Pro- Senatores
ducti omnes, virgisque cæsi, ac securi percussi. Inde Campani
citato equo Cales percurrit: ubi quum in tribunali securi per-
consedisset, productique Campani deligarentur ad cutiuntur.
palum, eques citus ab Roma venit, literasque a C.
Calpurnio prætore Fulvio et senatusconsultum tra-
didit: murmur ab tribunali totam concionem perva-
sit, differri rem integram ad Patres de Campanis: et
Fulvius, id ita esse ratus, acceptas literas, neque re-
solutas, quum in gremio reposuisset, præconi impe-
ravit, ut lictorem lege agere juberet. Ita de iis quo-
que, qui Calibus erant, sumtum supplicium. Tum
literæ lectæ senatusque consultum, serum ad inpedi-
endam rem actam; quæ summa ope adproperata
erat, ne inpediri posset. Consurgentem jam Fulvi- Jubellii
um Taurea Jubellius Campanus, per mediam vadens mors.
urbem turbamque, nomine inclamavit: et, quum,
mirabundus quidnam sese vellet, resedisset Flaccus,

U. C. 541. *Me quoque, inquit, jube occidi, ut gloriari possis, multo*
 A. C. 211. *fortiorem, quam ipse es, virum abs te occisum esse.*
 Quum Flaccus negaret, *profecto satis compotem mentis esse: modo, prohiberi etiam se, si id vellet, senatusconsulto, diceret: tum Jubellius, Quandoquidem, inquit, capta patria, propinquis amicisque amissis, quum ipse manu mea conjugem liberosque interfecerim, ne quid indigni paterentur, mihi ne mortis quidem copia eadem est, quæ his civibus meis; petatur a virtute invisæ hujus vitæ vindicta: atque ita gladio, quem veste texerat, per adversum pectus transfixus, ante pedes imperatoris moribundus procubuit.*

XVI. Quia, et quod ad supplicium adtinet Campanorum, et pleraque alia, de Flacci unius sententia acta erant; mortuum Ap. Claudium sub deditionem Capuæ, quidam tradunt: hunc quoque ipsum Tauream neque sua sponte venisse Cales, neque sua manu interfectum: sed, dum inter ceteros ad palum deligatur, quia parum inter strepitus exaudiri possent, quæ vociferabatur, silentium fieri Flaccum jussisse: tum Tauream illa, quæ ante memorata sunt, dixisse, *virum se fortissimum ab nequaquam pari ad virtutem occidi.* Sub hæc dicta, jussu proconsulis præconem ita pronunciassse: *Lictor, viro forti adde virgas, et in eum primum lege age.* Lectum quoque senatusconsultum, priusquam securi feriret, quidam auctores sunt: sed, quia adscriptum in senatusconsulto fuerit, *si ei videretur, integram rem ad senatum rejiceret,* interpretatum esse, quid magis e republica duceret, æstimationem sibi permissam. Capuam a Calibus reductum est, Atellaque et Calatia in deditionem acceptæ: ibi quoque in eos, qui capita rerum erant, animadversum. Ita ad septuaginta principes

senatus interfecti ; trecenti ferme nobiles Campani U. C. 541.
in carcerem conditi : alii, per sociorum Latini no- A. C. 211.
minis urbes in custodias dati, variis casibus interi-
erunt : multitudo alia civium Campanorum venum-
data. De urbe agroque reliqua consultatio fuit, qui- Res ad Ca-
busdam delendam censentibus urbem prævalidam, puam com-
propinquam, inimicam. Ceterum præsens utilitas positæ.
vicit : nam propter agrum, quem omni fertilitate
terræ satis constabat primum in Italia esse, urbs
servata est, ut esset aliqua aratorum sedes : urbi
frequentandæ multitudo incolarum libertinorumque
et institorum opificumque retenta : ager omnis et
tectæ publicæ populi Romani factæ. Ceterum habi-
tari tantum, tamquam urbem, Capuam, frequentari-
que placuit : corpus nullum civitatis, nec senatus,
nec plebis concilium, nec magistratus esse : sine
consilio publico, sine imperio multitudinem, nullius
rei inter se sociam, ad consensum inhabilem fore :
præfectum ad jura reddenda ab Roma quotannis
missuros. Ita ad Capuam res compositæ, consilio
ab omni parte laudabili : severe et celeriter in max-
ime noxios animadversum : multitudo civium dissi-
pata in nullam spem reditus : non sævitum incendiis
ruinisque in tectæ innoxia murosque : et cum emo-
lumento quæsitæ etiam apud socios lenitatis species,
incolumitate urbis nobilissimæ opulentissimæque,
cujus ruinis omnis Campania, omnes, qui Campani-
am circa adcolunt, populi ingemuissent : confessio
expressa hosti, quanta vis in Romanis ad expetendas
pœnas ab infidelibus sociis, et quam nihil in Hanni-
bale auxilii ad receptos in fidem tuendos esset.

XVII. Romani Patres, perfuncti, quod ad Capu-
am adtinebat, cura, C. Neroni ex iis duabus legionibus

U. C. 541. bus, quas ad Capuam habuerat, sex millia peditum,
 A. C. 211. et trecentos equites, quos ipse legisset, et sociûm
 Latini nominis peditum numerum parem, et octin-
 gentos equites decernunt: eum exercitum Puteolis
 Nero it in in naves inpositum Nero in Hispaniam transporta-
 Hispani- vit. Quum Tarraconem navibus venisset, expositis-
 am. que ibi copiis, et navibus subductis, socios quoque
 navales multitudinis augendæ caussa armasset; pro-
 fectus ad Iberum flumen, exercitum ab T. Fonteio
 et L. Marcio accepit: inde pergit ad hostes ire.
 Hasdrubal Hamilcaris ad Lapidés atros castra habe-
 bat in Ausetanis: is locus est inter oppida Illitur-
 gin et Mentissam. Hujus saltus fauces Nero occu-
 pavit. Hasdrubal, ne in arto res esset, caduceato-
 rem misit, qui promitteret, si inde missus foret, se
 omnem exercitum ex Hispania deportaturum. Quam
 rem quum læto animo Romanus accepisset, diem
 posterum Hasdrubal conloquio petivit, ut Romani
 leges conscriberent de tradendis arcibus urbium,
 dieque statuenda, ad quam præsidia deducerentur,
 suaque omnia sine fraude Pœni deportarent. Quod
 ubi inpetravit, extemplo primis tenebris, atque inde
 Hasdrubal tota nocte, quod gravissimum exercitus erat, Has-
 circum- drubal, quacumque posset, evadere e saltu jussit:
 ventus data sedulo opera est, ne multi ea nocte exirent, ut
 fraude ipsa paucitas, quum ad hostem silentio fallendum
 elabatur. aptior, tum ad evadendum per artas semitas ac diffi-
 ciles esset. Ventum insequenti die ad conloquium
 est: sed loquendo plura scribendoque, dedita opera,
 quæ in rem non essent, die consumto, in posterum
 dilatum est. Addita insequens nox spatium dedit et
 alios emittendi: nec postero die res finem invenit:
 ita aliquot dies disceptando palam de legibus, noctes-

que emittendis clam e castris Karthaginiensibus, absumtæ: et, postquam major pars emissa exercitus erat, jam ne iis quidem, quæ ultro dicta erant, stabatur: minusque ac minus (cum timore simul fide decrescente) conveniebat. Jam ferme pedestres omnes copiæ evaserant e saltu: quum prima luce densa nebula saltum omnem camposque circa intexit: quod ubi sensit Hasdrubal, mittit ad Neronem, qui in posterum diem colloquium differret: illum diem religiosum Karthaginiensibus ad agendum quidquam rei seriæ esse. Ne tum quidem suspecta fraus: quum data esset venia ejus diei, extemplo Hasdrubal, cum equitatu elephantisque castris egressus, sine ullo tumultu in tutum evasit. Hora ferme quarta dispulsa sole nebula aperuit diem, vacuaque hostium castra conspexerunt Romani. Tum demum Claudius, Punicam fraudem agnoscens, ut se dolo captum sensit, proficiscentem institit sequi, paratus configere acie: sed hostis detractabat pugnam, levia tamen prælia inter extremum Punicum agmen præcursoresque Romanorum fiebant.

XVIII. Inter hæc Hispaniæ populi, nec qui post cladem acceptam defecerant, redibant ad Romanos, nec ulli novi deficiebant. Et Romæ senatui populoque, post receptam Capuam, non Italiæ jam major, quam Hispaniæ, cura erat: et exercitum augeri, et imperatorem mitti placebat: nec tamen, quem mitterent, satis constabat; quam illud, ubi duo summi imperatores intra dies triginta cecidissent, qui in locum duorum succederet, extraordinaria cura deligendum esse. Quum alii alium nominarent, postremum eo decursum est, ut populus proconsuli creando in Hispaniam comitia haberet: diemque comitiis con-

U.C. 541.
A.C. 211.

Comitia
procon-
suli crean-
do in His-
paniam.

U. C. 541. sules edixerunt. Primo exspectaverant, ut, qui se
 A. C. 211. tanto imperio dignos crederent, nomina profiterentur: quæ ut destituta exspectatio est, redintegratus luctus acceptæ cladis, desideriumque imperatorum amissorum. Mœsta itaque civitas, prope inops consilii, comitiorum die tamen in Campum descendit: atque in magistratus versi circumspectant ora principum, aliorum alios intuentium, fremuntque, adeo perditas res desperatumque de republica esse, ut nemo audeat in Hispaniam imperium accipere. Quum subito P. Cornelius, Publii, qui Hispania ceciderat, filius, quatuor et viginti ferme annos natus, professus se petere, in superiore, unde conspici posset, loco constitit. In quem postquam omnium ora conversa sunt, clamore ac favore ominati extemplo sunt felix faustumque imperium: jussi deinde inire suffragium, ad unum omnes non centuriæ modo, sed etiam homines, P. Scipioni imperium esse in Hispania jusserunt. Ceterum post rem actam, ut jam resederat inpetus animorum ardorque, silentium subito ortum et tacita cogitatio, quidnam egissent, num favor plus valuisset, quam ratio? ætatis maxime pœnitebat: quidam fortunam etiam domus horrebant nomenque, ex funestis duabus familiis, in eas provincias, ubi inter sepulcra patris patruique res gerendæ essent, proficiscentis.

Deligitur
 P. Scipio.

XIX. Quam ubi ab re tanto inpetu acta solitudinem curamque hominum animadvertit, advocata concione, ita de ætate sua imperioque mandato, et bello, quod gerundum esset, magno elatoque animo disseruit, ut ardorem eum, qui resederat, excitaret rursus novaretque: et inpleret homines certioris spei, quam quantam fides promissi humani, aut ratio

ex fiducia rerum subjicere solet. Fuit enim Scipio non veris tantum virtutibus mirabilis, sed arte quoque quadam ab juvena in ostentationem earum compositus : pleraque apud multitudinem, aut per nocturnas visa species, aut velut divinitus mente monita, agens : sive et ipse capti quadam superstitione animi, sive ut imperia consiliaque, velut sorte oraculi missa, sine cunctatione exsequerentur. Ad hoc jam inde ab initio præparans animos, ex quo togam virilem sumsit, nullo die prius ullam publicam privatamque rem egit, quam in Capitolium iret, ingressusque ædem consideret : et plerumque solus in secreto ibi tempus tereret. Hic mos, qui per omnem vitam servabatur, seu consulto, seu temere, vulgatæ opinionioni fidem apud quosdam fecit, stirpis eum divinæ virum esse ; retulitque famam, in Alexandro Magno prius vulgatam, et vanitate et fabula parem, anguis inmanis concubitu conceptum, et in cubiculo matris ejus persæpe visam prodigii ejus speciem, intervenitque hominum evolutam repente, atque ex oculis elapsam. His miraculis numquam ab ipso elusa fides est : quin potius aucta arte quadam, nec abnuendi tale quidquam, nec palam adfirmandi. Multa alia ejusdem generis, alia vera, alia adsimulata, admirationis humanæ in eo juvene excesserant modum : quibus freta tunc civitas, ætati haudquaquam maturæ tantam molem rerum, tantumque imperium permisit. Ad eas copias, quas ex vetere exercitu Hispania habebat, quæque a Putcolis cum C. Nerone trajectæ erant, decem millia militum et mille equites adduntur : et M. Junius Silanus proprætor adjutor ad res gerendas datus est. Ita cum triginta navium classe (omnes autem quinqueremes erant) ostiis Ti-

U. C. 541.

A. C. 211.

Scipionis
artes apud
multitudi-
nem.

U. C. 541. berinis profectus præter oram Tusci maris, Alpes at-
 A. C. 211. que Gallicum sinum, et deinde Pyrenæi circumvectus
 Venit in promontorium, Emporiis urbe Græca (oriundi et
 Hispaniam. ipsi a Phocæa sunt) copias exposuit: inde sequi na-
 vibus jussis, Tarraconem pedibus profectus, conven-
 tum omnium sociorum (etenim legationes ad famam
 adventus ejus ex omni se provincia effuderant) ha-
 buit: naves ibi subduci jussit, remissis quatuor tri-
 remibus Massiliensium, quæ officii causa ab domo
 prosecutæ fuerant. Responsa inde legationibus sus-
 pensis varietate tot casuum dare cœpit, ita elato ab
 ingenti virtutum suarum fiducia animo, ut nullum
 ferox verbum excideret; ingensque omnibus, quæ
 diceret, quum majestas inesset, tum fides.

XX. Profectus ab Tarracone, et civitates socio-
 rum et hiberna exercitus adiit: conlaudavitque mi-
 lites, quod, duabus tantis cladibus deinceps icti, pro-
 vinciam obtinuissent: nec fructum secundarum re-
 rum sentire hostes passi, omni cis Iberum agro eos
 arcuissent, sociosque cum fide tutati essent. Mar-
 cium secum habebat cum tanto honore, ut facile ad-
 pareret, nihil minus, quam vereri, ne quis obstaret
 gloriæ suæ. Successit inde Neroni Silanus, et in
 hiberna novi milites deducti. Scipio, omnibus, quæ
 adeunda agendaque erant, mature aditis peractisque,
 Tarraconem concessit. Nihilo minor fama apud
 hostes Scipionis erat, quam apud cives sociosque, et
 divinatio quædam futuri; quo minus ratio timoris
 reddi poterat oborti temere, majorem inferens me-
 tum. In hiberna diversi concesserant: Hasdrubal
 Gisgonis usque ad oceanum et Gades: Mago in
 mediterranea, maxime supra Castulonensem saltum:
 Hasdrubal Hamilcaris filius proximus Ibero circa Sa-

guntum hibernavit. Æstatis ejus extremo, quo capta U. C. 541.
 est Capua, et Scipio in Hispaniam venit, Punica clas- A. C. 211.
 sis, ex Sicilia Tarentum adcita ad arcendos commea-
 tus præsidii Romani, quod in arce Tarentina erat,
 clauserat quidem omnes ad arcem a mari aditus; sed
 adsidendo diutius artio rem annonam sociis, quam
 hosti, faciebat: non enim tantum subvehi oppidanis
 per pacata litora apertosque portus præsidio navium
 Punicarum poterat, quantum frumenti classis ipsa
 turba navali mixta ex omni genere hominum absu-
 mebat: ut arcis præsidium etiam sine invecto (quia
 pauci erant) ex ante præparato sustentari posset;
 Tarentinis classique ne invectum quidem subficeret.
 Tandem majore gratia, quam venerat, classis dimis-
 sa est: annona haud multum laxaverat: quia, re-
 moto maritimo præsidio, subvehi frumentum non
 poterat.

XXI. Ejusdem æstatis exitu, M. Marcellus ex Si- Marcellus
 cilia provincia quum ad urbem venisset, a C. Cal- ovans ur-
 purnio prætore senatus ei ad ædem Bellonæ datus bem init.
 est: ibi quum de rebus a se gestis disseruisset, que-
 stus leniter non suam magis, quam militum, vicem,
 quod provincia confecta exercitum deportare non li-
 cuisset, postulavit, ut triumphanti urbem inire lice-
 ret: id non inpetravit. Quum multis verbis actum
 esset, utrum minus conveniret, cujus nomine absen-
 tis, ob res prospere ductu ejus gestas, supplicatio
 decreta foret, et Diis immortalibus habitus honos, ei
 præsentī negare triumphum: an, quem tradere ex-
 ercitus successorī jussissent, (quod, nisi manente in
 provincia bello, non decerneretur) eum quasi debel-
 lato triumphare, quum exercitus, testis meriti atque
 inmeriti triumphī, abesset; medium visum, ut ovans

U.C. 541. urbem iniret. Tribuni plebis ex auctoritate senatus A. C. 211. ad populum tulerunt, ut M. Marcello, quo die urbem ovans iniret, imperium esset. Pridie, quam urbem iniret, in monte Albano triumphavit: inde ovans multam præ se prædam in urbem intulit. Cum simulacro captarum Syracusarum, catapultæ ballistæque, et alia omnia instrumenta belli lata, et pacis diuturnæ regiæque opulentiae ornamenta, argenti ærisque fabrefacti vis, alia supellex, pretiosaque vestis, et multa nobilia signa, quibus inter primas Græciæ urbes Syracusæ ornatae fuerant. Punicæ quoque victoriæ signum, octo ducti elephanti. Et non minimum fuit spectaculum cum coronis aureis præcedentes Sosis Syracusanus, et Mericus Hispanus: quorum altero duce nocturno Syracusas introitum erat; alter Nasum, quodque ibi præsidii erat, prodiderat. His ambobus civitas data, et quingena jugera agri. Sosidi in agro Syracusano, qui aut regius, aut hostium populi Romani fuisset, et ædes Syracusis cujus vellet eorum, in quos belli jure animadversum esset: Merico Hispanisque, qui cum eo transierant, urbs agerque in Sicilia ex iis, qui a populo Romano defecissent, jussa dari. Id M. Cornelio mandatum, ut, ubi ei videretur, urbem agrumque eis adsignaret. In eodem agro Belligeni, per quem inlectus ad transitionem Mericus erat, quadringenta jugera agri decreta. Post profectionem ex Sicilia Marcelli, Punica classis octo millia peditum, tria Numidarum equitum exposuit. Ad eos Murgantinæ desciverunt terræ: secutæ defectionem earum Hybla et Macella sunt, et ignobiliores quædam aliæ. Et Numidæ, præfecto Mutine, vagi per totam Siciliam, sociorum populi Romani agros urebant.

Super hæc exercitus Romanus iratus, partim quod U. C. 541.
 cum imperatore non devectus ex provincia esset, A. C. 211.
 partim quod in oppidis hibernare vetiti erant, segni
 fungebantur militia : magisque eis auctor ad seditio-
 nem, quam animus, deerat. Inter has difficultates
 M. Cornelius prætor et militum animos, nunc con-
 solando, nunc castigando, sedavit, et civitates om-
 nes, quæ defecerant, in ditionem redegit : atque ex
 his Murgantiam Hispanis, quibus urbs agerque de-
 bebatur, ex senatusconsulto adtribuit.

XXII. Consules, quum ambo Apuliam provinciam
 haberent, minusque jam terroris a Pœnis et Hanni-
 bale esset, sortiri jussi Apuliam Macedoniamque pro-
 vincias. Sulpicio Macedonia evenit, isque Lævino
 successit. Fulvius, Romam comitiorum causa ar-
 cessitus, quum comitia consulibus rogandis haberet,
 prærogativa Veturia juniorum declaravit T. Manlium
 Torquatum et T. Otacilium. Manlius, qui præsens Manlius
consula-
tum re-
cusat.
 erat, gratulandi causa quum turba coiret, nec du-
 bius esset consensus populi, magna circumfusus turba
 ad tribunal consulis venit ; petitque, ut pauca sua
 verba audiret, centuriamque, quæ tulisset suffragium,
 revocari juberet. Erectis omnibus expectatione,
 quidnam postulaturus esset, oculorum valetudinem
 excusavit. *Inpudentem et gubernatorem et imperato-
 rem esse, qui, quum alienis oculis ei omnia agenda sint,
 postulet sibi aliorum capita ac fortunas committi : pro-
 inde, si videretur, et redire in suffragium Veturiam ju-
 niorum juberet, et meminisset in consulibus creandis bel-
 li, quod in Italia sit, temporumque reipublicæ. Vix-
 dum requiesse aures a strepitu et tumultu hostili, quo
 paucos ante menses adsederint prope mœnia Romana.*
 Post hæc quum centuria frequens subclamasset, ni-

U. C. 541. *hil se mutare sententiæ, eosdemque consules dicturos*
 A. C. 211. *esse; tum Torquatus, Neque ego vestros, inquit, mores*
consul ferre potero, neque vos imperium meum. Redite
in suffragium, et cogitate bellum Punicum in Italia, et
hostium ducem Hannibalem esse. Tum centuria, et
auctoritate mota viri, et admirantium circa fremitu,
petit a consule, ut Veturiam seniorum citaret: Velle
se cum majoribus natu conloqui, et ex auctoritate eorum
consules dicere. Citatis Veturiæ senioribus, datum
secreto in Ovili cum his conloquendi tempus. Se-
niiores de tribus consulendum dixerunt esse, duobus
jam plenis honorum, Q. Fabio et M. Marcello; et,
si utique novum aliquem adversus Pœnos consulem
creari vellent, M. Valerium Lævinum egregie adver-
sus Philipum regem terra marique res gessisse. Ita
de tribus consultatione data, senioribus dimissis, ju-
niiores suffragium ineunt. M. Claudium Marcellum,
fulgentem tum Sicilia domita, et M. Valerium absen-
tes consules dixerunt: auctoritatem prærogativæ om-
nes centuriæ secutæ sunt. Eludant nunc antiqua
mirantes: non equidem, si qua sit sapientium civi-
tas, quam docti fingunt magis, quam norunt, aut
principes graviores temperantioresque a cupidine im-
perii, aut multitudinem melius moratam censeam
fieri posse. Centuriam vero juniorum seniores con-
sulere voluisse, quibus imperium suffragio mandaret,
vix ut verisimile sit, parentum quoque hoc seculo
vilis levisque apud liberos auctoritas fecit.

XXIII. Prætoria inde comitia habita. P. Manlius Vulso, et L. Manlius Acidinus, et C. Lætorius, et L. Cincius Alimentus creati sunt. Forte ita incidit, ut comitiis perfectis nunciaretur, T. Otacilium, quem T. Manlio, nisi interpellatus ordo comitiorum

esset, collegam absentem daturus fuisse videbatur U. C. 541.
 populus, mortuum in Sicilia esse. Ludi Apollinares A. C. 211.
 et priore anno fuerant, et, eo anno ut fierent, refe-
 rente Calpurnio prætore, senatus decrevit, ut in per-
 petuum voverentur. Eodem anno prodigia aliquot
 visa nuntiataque sunt. In æde Concordiæ Victoria,
 quæ in culmine erat, fulmine icta decussaque, ad
 Victorias, quæ in antefixis erant, hæsit, neque inde
 procidit. Et Anagnia et Fregellis nunciatum est,
 murum portasque de cœlo tactas: et in foro Suder-
 tano sanguinis rivos per diem totum fluxisse, et
 Ereti lapidibus pluisse, et Reate mulam peperisse.
 Ea prodigia hostiis majoribus sunt procurata, et ob-
 secratio in unum diem populo indicta, et novemdiale
 sacrum. Sacerdotes publici aliquot eo anno demor-
 tui sunt, novique subfecti: in locum M'. Æmilii
 Numidæ decemviri sacrorum M. Æmilius Lepidus:
 in locum M'. Pomponii Mathonis pontificis C. Li-
 vivius: in locum Sp. Carvili Maximi auguris M. Ser-
 vilius. T. Otacilius Crassus pontifex quia exacto
 anno mortuus erat, ideo nominatio in locum ejus
 non est facta. C. Claudius flamen Dialis, quod exta
 perperam dederat, flaminio abiit.

XXIV. Per idem tempus M. Valerius Lævinus,
 tentatis prius per secreta conloquia principum ani-
 mis, ad indictum ante ad id ipsum concilium Æto-
 lorum classe expedita venit. Ubi quum Syracusas
 Capuamque captam, in fidem in Sicilia Italiaque re-
 rum secundarum, ostentasset, adjecissetque, *jam inde* Valerii ora-
 tio apud
 Ætolos.
a majoribus traditum morem Romanis colendi socios,
ex quibus alios in civitatem atque æquum secum jus ac-
cepissent, alios in ea fortuna haberent, ut socii esse,
quam cives, mallent. Ætolos eo in majore futuros ho-

U. C. 541. *nore, quod gentium transmarinarum in amicitiam primi*
 A. C. 211. *venissent. Philippum eis et Macedonas graves adcolas*
esse; quorum se vim ac spiritus et jam fregisse, et eo
reducturum esse, ut non his modo urbibus, quas per vim
ademissent Ætolis, excedant, sed ipsam Macedoniam
infestam habeant. Et Acarnanas, quos ægre ferrent
Ætoli a corpore suo diremtos, restitutum se in anti-
quam formulam jurisque ac ditionis eorum. Hæc,
dicta promissaque ab Romano imperatore, Scopas,
qui tum prætor gentis erat, et Dorymachus, princeps
Ætolorum, adfirmaverunt auctoritate sua, minore
cum verecundia et majore cum fide vim majestatemque
populi Romani extollentes: maxime tamen spes po-
tiundæ movebat Acarnaniæ. Igitur conscriptæ con-
ditiones, quibus in amicitiam societatemque populi
Romani venirent: additumque, ut, si placeret vellent-
que, eodem jure amicitiae Elei, Lacedæmonique, et At-
talus, et Pleuratus, et Scerdilædus essent. (Asiæ At-
talus, hi Thracum et Illyriorum reges.) Bellum ut
extemplo Ætoli cum Philippo terra gererent. Navibus
ne minus viginti quinqueremibus adjuvaret Romanus.
Urbium Corcyrae tenus ab Ætolia incipienti solum tec-
taque, et muri cum agris, Ætolorum; alia omnis præda
populi Romani esset. Darentque operam Romani, ut
Acarnaniam Ætoli haberent. Si Ætoli pacem cum
Philippo facerent, fœderi adscriberent, ita ratam eorum
pacem, si Philippus arma ab Romanis sociisque, quique
eorum ditionis essent, abstinuisset. Item, si populus
Romanus fœdere jungeretur regi, ut caveret, ne jus ei
belli inferendi Ætolis sociisque eorum esset. Hæc con-
venerunt, conscriptaque biennio post Olympiæ ab
Ætolis, in Capitolio ab Romanis, ut testata sacratis
monumentis essent, sunt posita. Moræ caussa fue-

Fœdus
cum Æ-
tolis.

rant retenti Romæ diutius legati Ætolorum. Nec U. C. 541.
 tamen inpedimento id rebus gerendis fuit : et Ætoli A. C. 211.
 extemplo moverunt adversus Philippum bellum, et Res gestæ
 Lævinus Zacynthum (parva insula est propinqua ab Ætolis
 Ætoliæ : urbem unam eodem, quo ipsa est, nomine et a Va-
 habet ; eam præter arcem vi cepit) et Cœniadas Na-
 sumque Acarnanum captas Ætolis contribuit. Phi-
 lippum quoque satis implicatum bello finitimo ratus,
 ne Italiam Pœnosque et pacta cum Hannibale posset
 respicere, Corcyram ipse se recepit.

XXV. Philippo Ætolorum defectio Pellæ hiber-
 nanti adlata est : itaque, quia primo vere moturus
 exercitum in Græciam erat, Illyrios finitimasque eis
 urbes alterno metu quietas ut Macedonia haberet,
 expeditionem subitam in Oricinorum atque Apollo-
 niatum fines fecit : egressosque Apolloniatas, cum
 magno terrore atque pavore, compulit intra muros.
 Vastatis proximis Illyrici, in Pelagoniam eadem ce-
 leritate vertit iter : inde Dardanorum urbem, sitam
 in Macedonia, transitum Dardanis facturam, cepit.
 His raptim actis, memor Ætolici junctique cum eo
 Romani belli, per Pelagoniam, et Lyncum, Botti-
 æam, in Thessaliam descendit. Ad bellum secum
 adversus Ætolos capessendum incitari posse homines
 credebat : et, relicto ad fauces Thessaliæ Perseo cum
 quatuor millibus armatorum ad arcendos aditu Æto-
 los, ipse, priusquam majoribus occuparetur rebus,
 in Macedoniam, atque inde in Thraciam exercitum
 ac Mædos duxit. Incurrere ea gens in Macedoniam
 solita erat ; ubi regem occupatum externo bello, ac
 sine præsidio esse regnum sensisset. Ad Phragan-
 das igitur vastare agros, et urbem Jamphorinam,
 caput arcemque Mædicæ, obpugnare cœpit. Scopas,

U. C. 541. ubi profectum in Thraciam regem, occupatumque
 A. C. 211. ibi bello audivit, armata omni juventute Ætolorum,
 Acarnaniae bellum inferre Acarnaniae parat. Adversus quod
 Acarnanum gens et viribus inpar, et jam Cœniadas
 Nasumque amissa cernens, Romanaque insuper arma
 ingruere, ira magis instruit, quam consilio, bellum.
 Conjugibus liberisque et senioribus supra sexaginta
 annos in propinquam Epirum missis, ab quindecim
 ad sexaginta annos conjurant, nisi victores, se non
 redituros. Qui victus acie excessisset, eum ne quis
 urbe, tecto, mensa, lare reciperet, diram execratio-
 nem in populares, obtestationem quam sanctissimam
 potuerunt adversus hospites, composuerunt: preca-
 tique simul Epirotas sunt, ut, qui suorum in acie ce-
 cidissent, eos uno tumulo contegerent, adhiberent-
 que humatis titulum: HIC SITI SUNT ACARNANES,
 QUI, ADVERSUS VIM ATQUE INJURIAM ÆTOLORUM
 PRO PATRIA PUGNANTES, MORTEM OBCUBUERUNT.
 Per hæc incitatis animis, castra in extremis finibus
 suis obvia hosti posuerunt: nunciis ad Philippum
 missis, quanto res in discrimine esset, omittere Phi-
 lippum, id quod in manibus erat, coëgerunt bellum,
 Jamphorina per deditionem recepta, et prospero alio
 successu rerum. Ætolorum inpetum tardaverat pri-
 mo conjurationis fama Acarnanica: deinde auditus
 Philippi adventus, regredi etiam in intimos coëgit
 fines. Nec Philippus, quamquam, ne obprimerentur
 Acarnanes, itineribus magnis ierat, ultra Dium est
 progressus: inde, quum audisset reditum Ætolorum
 ex Acarnania, et ipse Pellam rediit.

XXVI. Lævinus, veris principio a Corcyra pro-
 fectus navibus, superato Leucata promontorio, quum
 venisset Naupactum, Anticyram inde se petiturum

Acarna-
niæ bel-
lum infe-
runt Æ-
toli.

Acarna-
num con-
juratio.

Eos libe-
rat peri-
culo Phi-
lippus.

edixit, ut præsto ibi Scopas Ætolique essent. Sita ^{U. C. 542.}
 Anticyra est in Locride læva parte sinum Corinthia- ^{A. C. 219.}
 cum intrantibus : breve terra iter eo, brevis naviga-
 tio ab Naupacto est. Tertio ferme post die utrim-
 que obpugnari cœpta est. Gravior a mari obpugna-
 tio erat ; quia et tormenta machinæque omnis gene-
 ris in navibus erant, et Romani inde obpugnabant.
 Itaque intra paucos dies recepta urbs per deditionem
 Ætolis traditur, præda ex pacto Romanis cessit.
 Literæ Lævino redditæ, consulem eum absentem de-
 claratum, et successorem venire P. Sulpicium : ce-
 terum, diuturno ibi morbo implicitus, serius spe om-
 nium Romam venit. M. Marcellus, quum Idibus
 Martiis consulatum inisset, senatum eo die, moris
 modo caussa, habuit : professus, *nihil se, absente col-
 lega, neque de republica, neque de provinciis, acturum.*
*Scire se, frequentes Siculos prope urbem in villis ob-
 tractatorum suorum esse : quibus, tantum abesse, ut
 per se non liceat palam Romæ crimina edita fictaque
 ab inimicis vulgare, ut, ni simularent, aliquem sibi ti-
 morem, absente collega, dicendi de consule esse, ipse
 eis extemplo daturus senatum fuerit. Ubi quidem col-
 lega venisset, non passurum quidquam prius agi, quam
 ut Siculi in senatum introducantur. Delectum prope
 a M. Cornelio per totam Siciliam habitum, ut quam-
 plurimi questum de se Romam venirent : eundem li-
 teris falsis urbem inplesse, bellum in Sicilia esse, ut
 suam laudem minuat. Moderati animi gloriam eo
 die adeptus consul, senatum dimisit ; ac prope jus-
 titium omnium rerum futurum videbatur, donec al-
 ter consul ad urbem venisset. Otium, ut solet, ex-
 citavit plebis rumores : belli diuturnitate, et vastatos
 agros circa urbem, qua infesto agmine isset Hannibal,*

U. C. 542. *et exhaustam delectibus Italiam, et prope quotannis*
 A. C. 210. *exercitus cæsos querebantur; et consules bellicosos am-*
bo, viros acres nimis et feroces, creatos, qui vel in pace
tranquilla bellum excitare possent, nedum in bello re-
spirare civitatem forent passuri.

XXVII. Interrupit hos sermones nocte, quæ pridie Quinquatrus fuit, pluribus simul locis circa forum incendium ortum: eodem tempore septem tabernæ, quæ postea quinque, et argentariæ, quæ nunc novæ adpellantur, arsere. Comprehensa postea privata ædificia: neque enim tum basilicæ erant: comprehensæ lautuminiæ, forumque piscatorium, et atrium regium. Ædes Vestæ vix defensa est tredecim maxime servorum opera, qui in publicum redempti ac manumissi sunt: nocte ac die continuatum incendium fuit. Nec ulli dubium erat, humana id fraude factum esse, quod pluribus simul locis, et iis diversis, ignes coorti essent. Itaque consul ex auctoritate senatus pro concione edixit, qui, quorum opera id conflatum incendium, profiteretur, præmium fore, libero pecuniam, servo libertatem. Eo præmio inductus Campanorum Calaviorum servus (Mannus ei nomen erat) indicavit, dominos et quinque præterea juvenes nobiles Campanos, quorum parentes a Q. Fulvio securi percussi erant, id incendium fecisse; vulgoque facturos alia, ni comprehendantur. Comprehensi ipsi familiæque eorum: et primo elevabatur index indiciumque: pridie eum verberibus castigatum ab dominis discessisse, per iram ac levitatem ex re fortuita crimen commentum: ceterum ut coram coarguebantur, et quæstio ex ministris facinoris foro medio haberi cœpta est, fassi omnes, atque in dominos servosque conscios animadversum est: indici libertas data, et

viginti millia æris. Consuli Lævino Capuam præ-
 tereunti circumfusa multitudo Campanorum est, ob-
 secrantium cum lacrimis, ut sibi Romam ad sena-
 tum ire liceret, oratum, si qua misericordia tandem
 flecti possent, ne se ad ultimum perditum irent, no-
 menque Campanorum a Q. Flacco deleri sinerent.
 Flaccus, sibi *privatam simultatem cum Campanis*, ne-
 gare, *nullam esse: publicas inimicitias et hostiles esse,*
et futuras, quoad eo animo esse erga populum Roma-
num sciret: nullam enim in terris gentem esse, nullum
infestiorum populum nomini Romano. Ideo se manibus
inclusos tenere eos: quia, si qui evasissent aliqua,
velut feras bestias per agros vagari, et laniare, et tru-
cidare, quodcumque obvium detur. Alios ad Hanniba-
lem transfugisse, alios ad Romam incendendam pro-
fectos: inventurum in semiusto foro consulem vestigia
sceleris Campanorum. Vestæ ædem petitam, et æternos
ignes, et conditum in penetrali fatale pignus imperiū
Romani. Se minime censere tutum esse, Campanis po-
testatem intrandi Romana mania fieri. Lævinus Cam-
 panos, jurejurando a Flacco adactos, quinto die,
 quam ab senatu responsum accepissent, Capuam re-
 dituros, sequi se Romam jussit. Hac circumfusus
 multitudine, simul Siculis obviam egressis Ætolis-
 que Romam præivit, clarissimarum urbium excidio
 celeberrimis viris victos bello accusatores in urbem
 adducens. De republica tamen primum ac de pro-
 vinciiis ambo consules ad senatum retulere.

XXVIII. Ibi Lævinus, quo statu Macedonia et
 Græcia, Ætoli, Acarnanes Locrique essent, quasque
 ibi res ipse egisset terra marique, exposuit. *Philip-*
pum, inferentem bellum Ætolis, in Macedoniam retro
ab se compulsum, ad intima penitus regni abisse, legio-

U. C. 542. *nemque inde deduci posse : classem satis esse ad arcen-*
 A. C. 210. *dum Italia regem.* Hæc de se deque provincia, cui

præfuerat. Consulum de provinciis communis relatio fuit : decrevere Patres, *Ut alteri consulum Italia bellumque cum Hannibale provincia esset : alter classem, cui T. Otacilius præfuisset, Siciliamque provinciam cum L. Cincio prætore obtineret.* Exercitus eis duo decreti, qui in Etruria Galliaque essent : eæ quatuor erant legiones : urbanæ duæ superioris anni in Etruriam ; duæ, quibus Sulpicius consul præfuisset, in Galliam mitterentur. Galliæ et legionibus præesset, quem consul, cujus Italia provincia esset, præfecisset. In Etruriam C. Calpurnius, post præturam prorogato in annum imperio, missus ; et Q. Fulvio Capua provincia decreta, prorogatumque in annum imperium. Exercitus civium sociorumque minui iussus, ut ex duabus legionibus una legio, quinque millia peditum et trecenti equites essent ; dimissis, qui plurima stipendia haberent : et sociorum septem millia peditum et trecenti equites relinquerentur, eadem ratione stipendiorum habita in veteribus militibus dimittendis. Cn. Fulvio consuli superioris anni, nec de provincia Apulia, nec de exercitu, quem habuerat, quidquam mutatum : tantum in annum prorogatum imperium est. P. Sulpicius collega ejus omnem exercitum, præter socios navales, iussus dimittere est. Item ex Sicilia exercitus, cui M. Cornelius præesset, ubi consul in provinciam venisset, dimitti iussus. L. Cincio prætori ad obtinendam Siciliam Cannenses milites dati, duarum instar legionum. Totidem legiones in Sardiniam P. Manlio Vulsoni prætori decretæ, quibus L. Cornelius in eadem provincia priore anno præfuerat. Ur-

banas legiones ita scribere consules jussi, ne quem U. C. 542.
 militem facerent, qui in exercitu M. Claudii, M. Va- A. C. 210.
 lerii, Q. Fulvii, fuissent; neve eo anno plures, quam
 una et viginti, Romanæ legiones essent.

XXIX. His senatusconsultis perfectis, sortiti pro-
 vincias consules. Sicilia et classis Marcello, Italia Marcello
 cum bello adversus Hannibalem Lævino evenit. obvenit
 Quæ sors, velut iterum captis Syracusis, ita exani- Sicilia.
 mavit Siculos, exspectatione sortis in consulum con-
 spectu stantes, ut comploratio eorum flebilesque
 voces et extemplo oculos hominum converterent, et
 postmodo sermones præbuerint. Circumibant enim
 senatum cum veste sordida, adfirmantes, *se non modo*
suam quisque patriam, sed totam Siciliam, relicturos,
si eo Marcellus iterum cum imperio redisset. Nullo
suo merito eum ante inplacabilem in se fuisse: quid
iratum, quod Romam de se questum venisse Siculos
sciat, facturum? Obrui Ætnæ ignibus, aut mergi freto,
satius illi insulæ esse, quam velut dedi noxæ inimico.
 Hæ Siculorum querelæ, domos primum nobilium
 circumlatæ, celebratæque sermonibus, quos partim
 misericordia Siculorum, partim invidia Marcelli ex-
 citabat, in senatum etiam pervenerunt. Postulatum
 a consulibus est, ut de permutandis provinciis sena-
 tum consulerent. Marcellus, *si jam auditi ab senatu* Mutantur
Siculi essent, aliam forsitan futuram fuisse sententiam provinciae.
suam, dicere: nunc, ne quis timore frenari eos dicere
posset, quo minus de eo libere querantur, in cujus po-
testate mox futuri sint, si collegæ nihil intersit, mutare
se provinciam paratum esse: deprecari senatus præju-
dicium; nam, quum extra sortem collegæ optionem
dari provinciæ iniquum fuerit, quanto majorem inju-
riam, immo contumeliam esse, sortem suam ad eum

U. C. 542. *transferri?* Ita senatus, quum, quid placeret, magis
 A. C. 210. ostendisset, quam decresset, dimittitur: inter ipsos
 consules permutatio provinciarum, rapiente fato
 Marcellum ad Hannibalem, facta est: ut, ex quo
 primus adversæ pugnæ gloriam ceperat, in ejus lau-
 dem postremus Romanorum imperatorum, prosperis
 tum maxime bellicis rebus, caderet.

Siculorum
 oratio in
 Marcellum.

XXX. Permutatis provinciis, Siculi, in senatum
 introducti, multa de Hieronis regis fide perpetua
 erga populum Romanum verba fecerunt, in gra-
 tiam publicam avertentes, *Hieronymum ac postea
 Hippocratem et Epicydem tyrannos, quum ob alia, tum
 propter defectionem ab Romanis ad Hannibalem, invi-
 sos fuisse sibi: ob eam causam et Hieronymum a prin-
 cipibus juventutis prope publico consilio interfectum: et
 in Epicydis Hippocratisque cædem septuaginta nobilis-
 simorum juvenum conjurationem factam; quos, Mar-
 celli mora destitutos, quia ad prædictum tempus exer-
 citum ad Syracusas non admovisset, indicio facto, om-
 nes ab tyrannis interfectos. Eam quoque Hippocratis
 atque Epicydis tyrannidem Marcellum excitasse, Leon-
 tinis crudeliter direptis. Numquam deinde principes
 Syracusanorum desisse ad Marcellum transire, pollice-
 rique, se urbem, quum vellet, ei tradituros: sed eum
 primo vi capere maluisse; dein, quum id neque terra,
 neque mari, omnia expertus, potuisset, auctores tradi-
 tarum Syracusarum fabrum ærarium Sosim, et Meri-
 cum Hispanum, quam principes Syracusanorum habere,
 toties id nequidquam ultro obferentes, præoptasse: quo
 scilicet justiore de causa vetustissimos socios populi
 Romani trucidaret, ac diriperet. Si non Hieronymus
 ad Hannibalem defecisset, sed populus Syracusanus et
 senatus, si portas Marcello Syracusani publice, et non,*

obpressis Syracusanis, tyranni eorum Hippocrates et U. C. 542.
 Epicydes, clausissent, si Karthaginiensium animis bel- A. C. 210.
 lum cum populo Romano gessissent; quid ultra, quam
 quod fecerit, nisi ut deleteret Syracusas, facere hostiliter
 Marcellum potuisse? Certe præter mœnia et tecta ex-
 hausta urbis, et refracta ac spoliata Deûm delubra,
 Diis ipsis ornamentisque eorum ablatis, nihî relictum
 Syracusis esse. Bona quoque multis ademta, ita ut ne
 nudo quidem solo, reliquiis direptæ fortunæ, alere sese
 ac suos possent. Orare se Patres conscriptos, ut, si ne-
 queant omnia, saltem, quæ compareant cognoscique
 possint, restitui dominis jubeant. Talia conquestos
 quum excedere ex templo, ut de postulatis eorum
 Patres consuli possent, Lævinus jussisset, Maneant
 immo, inquit Marcellus, ut coram his respondeam,
 quando ea conditione pro vobis, Patres conscripti, bella
 gerimus, ut victos armis accusatores habeamus. Duæ
 captæ hoc anno urbes Capua Iulium reum, Marcel-
 lum Syracusæ habeant.

XXXI. Reductis in curiam legatis, tum consul, Siculis re-
 Non adeo majestatis, inquit, populi Romani imperii- spondet
 que hujus oblitus sum, Patres conscripti, ut, si de meo Marcellus.
 crimine ambig-retur, consul dicturus caussam, accusan-
 tibus Græcis, fuerim: sed non, quid ego fecerim, in dis-
 quisitionem venit, quam quid isti pati debuerint: qui si
 non fuerunt hostes, nihil interest, nunc, an vivo Hiero-
 ne, Syracusas violaverim. Sin autem desciverunt, le-
 gatos nostros ferro atque armis petierunt, urbem ac
 mœnia clauserunt, exercituque Karthaginiensium ad-
 versus nos tutati sunt: quis passos esse hostilia, quum
 fecerint, indignatur? Tradentes urbem principes Syra-
 cusanorum aversatus sum: Sosim et Mericum Hispanum,
 quibus tantum crederem, potiores habui. Non

U. C. 542. *estis extremi Syracusanorum, quippe qui aliis humili-*
 A. C. 210. *tatem obijciatis. Quis est restrum, qui se mihi portas*
aperturum, qui armatos milites meos in urbem accep-
turum promiserit? Odistis et exsecramini eos, qui fece-
runt, et ne hic quidem contumeliis in eos dicendis par-
citis: tantum abest, ut et ipsi tale quidquam facturi
fueritis. Ipsa humilitas eorum, Patres conscripti, quam
isti obijciunt, maximo argumento est, me neminem, qui
navatam operam reipublicæ nostræ velit, aversatum
esse. Et, antequam obsiderem Syracusas, nunc lega-
tis mittendis, nunc ad colloquium eundo, tentavi pa-
cem: et, postquam neque legatos violandi verecundia
erat, nec mihi ipsi congresso ad portas cum principibus
responsum dabatur, multis terra marique exhaustis la-
boribus, tandem vi atque armis Syracusas cepi. Quæ
captis acciderint, apud Hannibalem et Karthaginienses
victosque justius, quam apud victoris populi senatum,
quererentur. Ego, Patres conscripti, Syracusas spolia-
tus si negaturus essem, numquam spoliis earum urbem
Romam exornarem. Quæ autem singulis victor aut
ademi, aut dedi; quum belli jure, tum ex cujusque me-
rito, satis scio me fecisse. Ea vos rata habeatis, Patres
conscripti, nã magis reipublicæ interest, quam mea.
Mea quippe fides exsoluta est: ad rempublicam perti-
net, ne acta mea rescindendo, alios in posterum segnio-
res duces faciatis. Et quoniam coram et Siculorum et
mea verba audistis, Patres conscripti, simul templo ex-
cedemus, ut, me absente, liberius consuli senatus possit.
Ita dimissis Siculis, et ipse in Capitolium ad delec-
tum discessit.

XXXII. Consul alter de postulatis Siculorum ad Patres retulit. Ibi quum diu de sententiis certatum esset, et magna pars senatus, principe ejus senten-

tiæ T. Manlio Torquato, cum tyrannis bellum geren- U. C. 542.
dum fuisse, censerent, hostibus et Syracusanorum et A. C. 210.
populi Romani: et urbem recipi, non capi: et recep-
tam legibus antiquis et libertate stabiliri, non fessam
miseranda servitute bello adfligi. Inter tyrannorum et
ducis Romani certamina, præmium victoris in medio
positam urbem pulcherrimam ac nobilissimam periisse,
horreum atque ærarium quondam populi Romani: cu-
jus munificentia ac donis multis tempestatibus, hoc de-
nique ipso Punico bello, adjuta ornataque respublica
esset. Si ab inferis existat rex Hiero, fidissimus im-
perii Romani cultor, quo ore aut Syracusas, aut Ro-
mam ei ostendi posse? quum, ubi semirutam ac spolia-
tam patriam respexisset, ingrediens Romam in vestibulo
urbis, prope in porta, spolia patriæ suæ visurus sit?
Hæc taliaque quum ad invidiam consulis miseratio-
nemque Siculorum dicerentur, mitius tamen decre-
verunt Patres caussa Marcelli: Quæ is gerens bellum
victorque egisset, rata habenda esse: in reliquum curæ
senatui fore rem Syracusanam, mandatuosque consuli
Lævino, quod sine jactura reipublicæ fieri posset, fortu-
nis ejus civitatis consuleret. Missis duobus senatori-
bus in Capitolium ad consulem, uti rediret in curi-
am, et introductis Siculis, senatusconsultum recita-
tum est: legatique, benigne adpellati ac dimissi, ad
genua se Marcelli consulis projecerunt, obsecrantes,
ut, quæ deplorandæ ac levandæ calamitatis caussa dix- Syracusæ
issent, veniam eis daret, et in fidem clientelamque se in clientela
urbemque Syracusas acciperet: post hæc consul cle- Marcelli.
menter adpellatos dimisit.

XXXIII. Campanis deinde senatus datus est, Campanis
quorum oratio miserabilior, caussa durior erat: ne- datur sena-
que enim meritas pœnas negare poterant, nec ty- tus.

U. C. 542. ranni erant, in quos culpam conferrent : sed satis

A. C. 210. pensum pœnarum, tot veneno absumtis, tot securi percussis senatoribus, credebant. *Paucos nobilium superstites esse, quos nec sua conscientia, ut quidquam de se gravius consulerent, inpulerit, nec victoris ira capitis damnaverit ; eos libertatem sibi suisque, et bonorum aliquam partem orare, cives Romanos, adfinitatibus plerosque et propinquis jam cognationibus ex conubio vetusto junctos.* Submotis deinde e templo, paullisper dubitatum, an arcessendus a Capua Q. Fulvius esset : (mortuus enim post captam Claudius consul erat) ut coram imperatore, qui res gessisset, sicut inter Marcellum Siculosque disceptatum fuerat, disceptaretur : dein, quum M. Atilium, C. Fulvium fratrem Flacci, legatos ejus, ac Q. Minucium et L. Veturium Philonem, item Claudii legatos, qui omnibus gerendis rebus adfuerant, in senatu viderent, nec Fulvium avocari a Capua, nec differri Campanos vellent ; interrogatus sententiam M. Atilius Regulus, cujus ex iis, qui ad Capuam fuerant, maxima auctoritas erat ; *In consilio, inquit, arbitror me fuisse consulibus, Capua capta, quum quæreretur, ecquis Campanorum de republica nostra bene meritus esset ; duas mulieres compertum est, Vestiam Oppiam Atellinam Capuæ habitantem, et Fauculam Cluviam, quæ quondam quæstum corpore fecisset ; illam quotidie sacrificasse pro salute et victoria populi Romani ; hanc captivis egentibus alimenta cum subpeditasse. Ceterorum omnium Campanorum eundem erga nos animum, quem Karthaginiensium, fuisse : securique percussos a Q. Fulvio esse magis, quorum dignitas inter alios, quam quorum culpa eminebat. Per senatum agi de Campanis, qui cives Romani sunt, injussu populi non video posse :*

M. Atilii
sententia.

idque et apud majores nostros in Satricanis factum est, quum defecissent, ut M. Antistius tribunus plebis prius rogationem ferret, sciretque plebs, uti senatui de Satricanis sententiæ dicendæ jus esset. Itaque censeo, cum tribunis plebis agendum esse, ut eorum unus pluresve rogationem ferant ad plebem, qua nobis statuendi de Campanis jus fiat. L. Atilius tribunus plebis ex auctoritate senatus plebem in hæc verba rogavit: Omnes Campani, Atellani, Calatini, Sabatini, qui se dederunt in arbitrium ditionemque populi Romani Fulvio proconsuli, quæque una secum dediderunt, agrum urbemque, divina, humanaque, utensiliaque, sive quid aliud dediderunt; de iis rebus quid fieri velitis, vos rogo, Quirites. Plebes sic jussit. Quod senatus juratus, maxima pars, censeat, qui adsidetis, id volumus jubemusque.

XXXIV. Ex hoc plebeiscito senatus consultus, *Senatus-consultum de Campanis.* Oppiæ Cluviæque primum bona ac libertatem restituit: si qua alia præmia petere ab senatu vellent, venire eas Romam. Campanis in familias singulas decreta facta, quæ non operæ pretium est omnia enumerare. Aliorum bona publicanda: ipsos liberosque eorum et conjuges vendendas, extra filias, quæ enupsissent prius, quam in populi Romani potestatem venirent. Alios in vincula condendos, ac de his posterius consulendum. Aliorum Campanorum summam etiam census distinxerunt, publicanda necne bona essent; pecua captiva, præter equos, et mancipia, præter puberes virilis sexus, et omnia, quæ solo non continerentur, restituenda, censuerunt, dominis. Campanos omnes, Atellanos, Calatinos, Sabatinos, extra quam, qui eorum, aut ipsi aut parentes eorum, apud hostes essent, liberos esse, jusserunt, ita ut nemo eorum civis Romanus, aut La-

U. C. 542. *tini nominis esset: neve quis eorum, qui Capuæ fuissent, dum portæ clausæ essent, in urbe agrove Campano intra certam diem maneret. Locus, ubi habitarent, trans Tiberim, qui non contingeret Tiberim, daretur: qui nec Capuæ, nec in urbe Campana, quæ a populo Romano defecisset, per bellum fuissent, eos cis Lirim amnem Romam versus; qui ad Romanos transissent prius, quam Hannibal Capuam veniret, cis Vulturum emovendos, censuerunt: ne quis eorum propius mare quindecim millibus passuum agrum ædificiumve haberet. Qui eorum trans Tiberim emori essent, ne ipsi posterive eorum uspiam pararent haberentve, nisi in Veiente, aut Sutрино, Nepesinore agro: dum ne cui major, quam quinquaginta iugerum, agri modus esset. Senatorum omnium, quique magistratus Capuæ, Atellæ, Calatiæ gessissent, bona venire Capuæ, jusserunt: libera corpora, quæ venundari placuerat, Romam mitti, ac Romæ venire. Signa, statuas æneas, quæ capta de hostibus dicerentur, quæ eorum sacra ac profana essent, ad pontificum collegium rejecerunt. Ob hæc decreta mœstiores aliquanto, quam Romam venerant, Campanos dimiserunt: nec jam Q. Fulvii sævitiam in sese, sed iniquitatem Deûm atque exsecrabilem fortunam suam incusabant.*

Edictum
coss. de
remigibus
dandis.

XXXV. Dimissis Siculis Campanisque, delectus habitus: scripto deinde exercitu, de remigum supplemento agi cœptum: in quam rem quum neque hominum satis, nec, ex qua pararentur, stipendiumque acciperent, pecuniæ quidquam ea tempestate in publico esset, edixerunt consules, ut privati ex censu ordinibusque, sicut antea, remiges darent cum stipendio cibariisque dierum triginta. Ad id edictum tantus fremitus hominum, tanta indignatio fuit, ut

magis dux, quam materia, seditioni deesset. *Secundum Siculos Campanosque plebem Romanam perdendam lacerandamque sibi consules sumsisse : per tot annos tributo exhaustos nil reliqui, præter terram nudam ac vastam, habere Tecta hostes incendisse, servos agri cultores rempublicam abduxisse, nunc ad militiam parvo ære emendo, nunc remiges imperando. Si quid cui argenti ærisve fuerit, stipendio remigum et tributis annuis ablatum. Se, ut dent, quod non habeant, nulla vi, nullo imperio cogi posse. Bona sua venderent : in corpora, quæ reliqua essent, sævirent. Ne unde redimantur quidem, quidquam superesse. Hæc non in occulto, sed propalam in foro atque oculis ipsorum consulum ingens turba circumfusi fremebant : nec eos sedare consules, nunc castigando, nunc consolando, poterant. Spatium deinde his tridui se dare ad cogitandum dixerunt : quo ipsi ad rem inspiciendam expediendamque usi sunt. Senatum postero die habuerunt de remigum supplemento : ubi quum multa disseruissent, cur æqua plebis recusatio esset, verterunt orationem eo, ut dicerent, *Privatis id, seu æquum, seu iniquum, onus injungendum esse. Nam unde, quum pecunia in ærario non esset, paraturos navales socios ? Quomodo autem sine classibus aut Siciliam obtineri, aut Italia Philippum arceri posse, aut tuta Italiæ litora esse ?**

U. C. 542.

A. C. 210.

Querelas
excitat.Consilia
ea de re.

XXXVI. Quum in hac difficultate rerum consilium hæreret, ac prope torpor quidam occupasset hominum mentes, tum Lævinus consul, *Magistratus senatui, et senatum populo, sicut honore præstent, ita ad omnia, quæ dura atque aspera essent, subeunda duces debere esse. Si quid injungere inferiori velis, id prius in te ac tuos si ipse juris statueris, facilius omnes obe-*

Lævini
sententia.

U. C. 542. *dientes habeas : nec inpensa gravis est, quum ex ea plus*
 A. C. 210. *quam pro virili parte sibi quemque capere principum*
vident. Itaque classes habere atque ornare volumus
populum Romanum ? privatos sine recusatione remiges
dare ? nobismet ipsis primum imperemus. Aurum, ar-
gentum, æs signatum omne senatores crastino die in pub-
licum conferamus : ita ut annulos sibi quisque, et con-
jugi, et liberis, et filio bullam, et, quibus uxor filiæve
sunt, singulas uncias pondo auri relinquunt ; argenti,
qui curuli sella sederunt, equi ornamenta et libras pon-
do, ut salinum patellamque Deorum caussa habere pos-
sint : ceteri senatores libram argenti tantum, aris sig-
nati quina millia in singulos patres familiæ relinqua-
mus. Ceterum omne aurum, argentum, æs signatum,
ad triumviros mensarios extemplo deferamus, nullo ante
senatusconsulto facto : ut voluntaria conlatio et certa-
men adjuvandæ reipublicæ excitet ad æmulandum ani-
mos primum equestris ordinis, dein reliquæ plebis.
Hanc unam viam, multa inter nos conlocuti, consules
invenimus. Ingredimini, Diis bene juvantibus. Res-
publica incolumis et privatas res facile salvas præstat :
publica prodendo, tua nequidquam serves. In hæc tan-
to animo consensum est, ut gratiæ ultro consulibus
agerentur : senatu inde misso, pro se quisque au-
rum, argentum et æs in publicum conferunt, tanto
certamine injecto, ut prima inter primos nomina sua
vellent in publicis tabulis esse ; ut nec triumviri ac-
cipiundo, nec scribæ referendo subficerent. Hunc
consensum senatus equester ordo est secutus : eques-
tris ordinis, plebes. Ita sine edicto, sine coërcitione
magistratus, nec remige in supplementum, nec sti-
pendio respublica eguit : paratisque omnibus ad bel-
lum, consules in provincias profecti sunt.

Volunta-
ria con-
latio.

XXXVII. Neque aliud magis tempus belli fuit, U. C. 542.
quo Karthaginienses Romanique pariter variis ca- A. C. 210.
sibus inmixtis magis in ancipiti spe ac metu fuerint.
Nam Romanis et in provinciis, hinc in Hispania ad-
versæ res, hinc prosperæ in Sicilia, luctum et læti-
tiam miscuerant : et in Italia, quum Tarentum amis-
sum damno et dolori, tum arx cum præsidio retenta
præter spem gaudio fuit : et terrorem subitum pavo-
remque urbis Romæ obsessæ et obpugnatae Capua
post dies paucos capta in lætitiā vertit. Trans-
marinæ quoque res quadam vice pensatæ. Philip-
pus hostis tempore haud satis opportuno factus ;
Ætoli novi adsciti socii, Attalusque Asiæ rex, jam
velut despondente fortuna Romanis imperium ori-
entis. Karthaginienses quoque Capuam amissam et
Tarentum captum æquabant : et, ut ad mœnia urbis
Romanæ nullo prohibente se pervenisse in gloria
ponebant, ita pigebat irriti incepti ; pudebatque adeo
se spreto, ut, sedentibus ipsis ad Romana mœnia,
alia porta exercitus Romanus in Hispaniam ducere-
tur. Ipsæ quoque Hispaniæ, quo propius spem ve-
nerant, tantis duobus ducibus exercitibusque cæsis,
debellatum ibi, ac pulsos inde Romanos esse ; eo
plus, ab L. Marcio tumultuario duce ad vanum et ir-
ritum victoriam redactam esse, indignationis præbe-
bant. Ita æquante fortuna, suspensa omnia utrim-
que erant, integra spe, integro metu, velut illo tem-
pore primum bellum inciperent.

XXXVIII. Hannibalem ante omnia angebat,
quod Capua, pertinacius obpugnata ab Romanis,
quam defensa ab se, multorum Italiæ populorum
animos averterat : quos neque omnes tenere præ-
sidiis, nisi vellet in multas parvasque partes carpere

U.C. 542. exercitum, quod minime tum expediebat, poterat :
 A. C. 210. nec, deductis præsiidiis, spei liberam vel obnoxiam
 Hannibal timori sociorum relinquere fidem. Præceps in ava-
 vastat quæ ritiam et crudelitatem animus ad spolianda, quæ tueri ne-
 quit, nequibat, ut vastata hosti relinquerentur, inclinavit.
 Id fœdum consilium, quum incepto, tum etiam exitu
 fuit : neque enim indigna patientium modo abalie-
 nabantur animi, sed ceterorum etiam : quippe ad
 plures exemplum, quam calamitas, pertinebat. Nec
 consul Romanus tentandis urbibus, sicunde spes ali-
 qua se ostendisset, deerrat. Salapiæ principes erant
 Dasius et Blattius : Dasius Hannibali amicus ; Blat-
 tius, quantum ex tuto poterat, rem Romanam fove-
 bat, et per occultos nuncios spem proditiōis fecerat
 Marcello ; sed sine adiutore Dasio res transigi non
 poterat. Multum ac diu cunctatus, et tum quoque
 magis inopia consilii potioris, quam spe effectus,
 Dasium adpellabat : at ille, quum ab re aversus, tum
 æmulo potentatus inimicus, rem Hannibali aperit.
 Arcessito utroque, Hannibal quum pro tribunali
 quædam ageret, mox de Blattio cogniturus, starent-
 que submoto populo accusator et reus : Blattius de
 proditiōe Dasium adpellabat. *Enimvero, ille, vel-
 ut in manifesta re, exclamat, sub oculis Hannibalis
 secum de proditiōe agi.* Hannibali atque eis, qui
 aderant, quo audacior res erat, minus similis veri vi-
 sa est : *æmulationem profecto atque odium esse : et id
 crimen adferri, quod, quia testem habere non posset, li-
 berius fingenti sit.* Ita inde dimissi sunt : nec Blat-
 tius ante abstinit tamen tam audaci incepto, quam
 idem obtundendo, docendoque, quam ea res ipsis
 patriæque salutaris esset, pervicit, ut præsidium Pu-
 nicum (quingenti autem Numidæ erant) Salapiaque

Salapia
 tradita
 Marcello.

traderetur Marcello. Nec sine cæde multa tradi po-
tuit : longe fortissimi equitum toto Punico exercitu
erant. Itaque, quamquam improvisa res fuit, nec usus
equorum in urbe erat, tamen, armis inter tumultum
captis, et eruptionem tentaverunt, et, quum evadere
nequirent, pugnantes ad ultimum obcubuerunt : nec
plus quinquaginta ex his in potestatem hostium vivi
venerunt : plusque aliquanto damni hæc ala equitum
amissa Hannibali, quam Salapia, fuit : nec deinde
umquam Poenus (quo longe plurimum valuerat) equi-
tatu superior fuit.

U. C. 542.
A. C. 210.

XXXIX. Per idem tempus, quum in arce Taren-
tina vix inopia tolerabilis esset, spem omnem præ-
sidium, quod ibi erat, Romanum, præfectusque præ-
sidii atque arcis M. Livius in com meatibus ab Sicilia
missis habebant : qui ut tuto præterveherentur oram
Italiæ, classis viginti ferme navium Rhegii stabat.
Præerat classi com meatibusque D. Quinctius, ob-
scuro genere ortus, ceterum multis fortibus factis
gloria militari inlustris. Primo quinque naves, qua-
rum maximæ duæ triremes a Marcello ei traditæ
erant, habuit : postea rem inpigre sæpe gerenti tres
additæ quinqueres : postremo ipse a sociis, Rhe-
ginisque, et a Velia, et a Pæsto, debitas ex fœdere
exigendo, classem viginti navium, sicut ante dictum
est, effecit. Huic ab Rhegio profectæ classi Demo-
crates, cum pari classe navium Tarentinarum nume-
ro, quindecim millia ferme ab urbe ad Sacriportum
obvius fuit. Velis tum forte, improvidus futuri cer-
taminis, Romanus veniebat : sed circa Crotonem
Sybarimque suppleverat remigio naves, instructam-
que et armatam egregie pro magnitudine navium
classem habebat : et tum forte sub idem fere tempus

Prælium
inter Rom.
et Tarenti-
nam clas-
ses.

U. C. 542. et venti vis omnis cecidit, et hostes in conspectu
 A. C. 210. fuere, ut ad componenda armamenta, expediendum-
 que remigem ac militem ad inminens certamen satis
 temporis esset. Raro alias tantis animis justæ con-
 currerunt classes: quippe quum in majoris discrimen
 rei, quam ipsæ erant, pugnarent. Tarentini, ut, re-
 cuperata urbe ab Romanis post centesimum prope
 annum, arcem etiam liberarent; spe commeatus quo-
 que hostibus, si navali prælio possessionem maris
 ademissent, interclusuros: Romani, ut, retenta pos-
 sessione arcis, ostenderent, non vi aut virtute, sed
 proditione ac furto, Tarentum amissum. Itaque ex
 utraque parte signo dato quum rostris concurrissent,
 neque retro navem inhiherent, nec dirimi ab se hos-
 tem paterentur, quam quis indeptus navem erat, fer-
 rea injecta manu; ita conserebant ex propinquo
 pugnam, ut non missilibus tantum, sed gladiis etiam
 prope conlato pede gereretur res. Proræ inter se
 junctæ hærebant, puppes alieno remigio circumage-
 bantur: ita in arto stipatæ erant naves, ut vix ul-
 lum telum in mari vanum intercideret: frontibus
 velut pedestris acies urgebant, perviæque naves pug-
 nantibus erant. Insignis tamen inter ceteras pugna
 fuit duarum, quæ primæ agminis concurrerant inter
 se. In Romana nave ipse Quinctius erat, in Taren-
 tina Nico, cui Perconi fuit cognomen, non publico
 modo, sed privato etiam odio invisus atque infestus
 Romanis: quod ejus factionis erat, quæ Tarentum
 Hannibali prodiderat. Hic Quinctium, simul pug-
 nantem hortantemque suos, incautum hasta transfi-
 git: ille atque præceps cum armis procidit ante pro-
 ram: victor Tarentinus, in turbatam duce amisso
 navem inpigre transgressus, quum submovisset hos-

tes, et prora jam Tarentinorum esset, puppim male U. C. 542.
 conglobati tuerentur Romani; repente et alia a pup- A. C. 210.
 pi triremis hostium adparuit. Ita in medio circum-
 venta Romana navis capitur: hinc ceteris terror in-
 jectus, ut prætoriam navem captam videre; fugien-
 tesque passim, aliæ in alto mersæ, aliæ in terram
 remis abreptæ, mox prædæ fuere Thurinis Metapon-
 tinisque. Ex onerariis, quæ cum commeatu seque-
 bantur, perpaucæ in potestatem hostium venire:
 aliæ, ad incertos ventos hinc atque illinc obliqua
 transferentes vela, in altum evectæ sunt. Nequa-
 quam pari fortuna per eos dies Tarenti res gesta:
 nam ad quatuor millia hominum frumentatum egres-
 sa, quum in agris passim vagarentur; Livius, qui
 arcis præsidioque Romano præerat, intentus in om-
 nes occasiones gerendæ rei, C. Persium, inpigrum
 virum, cum duobus millibus armatorum ex arce
 emisit: qui, vage effusos per agros palatosque ador-
 tus, quum diu passim cecidisset, paucos ex multis,
 trepida fuga incidentes semiapertis portarum foribus,
 in urbem compulit, ne urbs eodem inpetu caperetur.
 Ita æquatæ res ad Tarentum; Romanis victoribus
 terra, Tarentinis mari: frumenti spes, quæ in oculis
 fuerat, utrosque frustrata pariter.

XL. Per idem tempus Lævinus consul, jam mag-
 na parte anni circumacta, in Siciliam, veteribus no- Res in Sici-
 visque sociis expectatus, quum venisset, primum ac lia gestæ.
 potissimum omnium ratus, Syracusis nova pace in-
 conditas componere res. Agrigentum inde (quod
 belli reliquum erat, tenebaturque a Karthaginien-
 sium valido præsidio) duxit legiones: et adfuit for-
 tuna incepto. Hanno erat imperator Karthaginien-
 sium, sed omnem in Mutine Numidisque spem repo-

U. C. 542. sitam habebant. Per totam Siciliam vagus prædas

A. C. 210. agebat ex sociis Romanorum · neque intercludi ab

Agrigento vi aut arte ulla, nec, quin erumperet, ubi

vellet, prohiberi poterat. Hæc ejus gloria, quia jam

imperatoris quoque famæ obficiebat, postremo in in-

vidiam vertit; ut ne bene gestæ quidem res jam

Hannoni propter auctorem satis lætæ essent: prop-

ter quæ postremo præfecturam ejus filio suo dedit,

ratus, cum imperio auctoritatem quoque ei inter

Numidas erepturum: quod longe aliter evenit. Nam

veterem favorem ejus sua insuper invidia auxit: ne-

que ille indignitatem injuriæ tulit, confestimque ad

Lævinum occultos nuncios misit de tradendo Agri-

gento. Per quos ut est facta fides, compositusque rei

gerendæ modus, portam ad mare ferentem Numidæ

quum occupassent, pulsus inde custodibus, aut cæsis,

Romanos ad id ipsum missos in urbem acceperunt.

Et quum agmine jam in media urbis ac forum magno

tumultu iretur, ratus Hanno non aliud, quam tumul-

Agrigen-
tum Ro-
manis tra-
ditum.

Sicilia de-
serta a
Pœnis.

cæsos securi percussit : ceteros prædamque vendidit : U. C. 542.
 omnem pecuniam Romam misit. Fama Agrigenti- A. C. 210.
 norum cladis Siciliam quum pervasisset, omnia repen-
 te ad Romanos inclinaverunt. Proditæ brevi sunt vi-
 ginti oppida : sex vi capta : voluntaria deditione in
 fidem venerunt ad quadraginta : quarum civitatum
 principibus quum pro cuiusque merito consul pretia
 pœnasque exsolvisset, coëgissetque Siculos, pœsitis
 tandem armis, ad agrum colendum animos conver-
 tere, ut esset non incolarum modo alimentis frugifera
 insula, sed urbis Romæ atque Italiæ (id quod multis
 sæpe tempestatibus fecerat) annonam levaret ; ab
 Agathyrna inconditam multitudinem secum in Ita-
 liam transvexit. Quatuor millia hominum erant,
 mixti ex omni conlutione exsules, obæratæ, capitalia
 ausi plerique ; et quum in civitatibus suis ac sub le-
 gibus vixerant, et postquam eos ex variis caussis for-
 tuna similis conglobaverat Agathyrnam, per latro-
 cinia ac rapinam tolerantes vitam : hos neque relin-
 quere Lævinus in insula, tum primum nova pace
 coalescente, velut materiam novandis rebus, satis
 tutum ratus est : et Rheginis usui futuri erant ad
 populandum Bruttium agrum, adsueta latrociniis
 quærentibus manum. Et, quod ad Siciliam adtinet,
 eo anno debellatum est.

XLI. In Hispania principio veris P. Scipio, navi- Hispaniæ
 bus deductis, evocatisque edicto Tarraconem socio- res.
 rum auxiliis, classem onerariasque ostium inde Iberi
 fluminis petere jubet. Eodem legiones ex hibernis
 convenire quum jussisset : ipse cum quinque millibus
 sociorum ab Tarracone profectus ad exercitum est.
 Quo quum venisset, adloquendos maxime veteres mi-
 lites, qui tantis superfuerant cladibus, ratus, con-

U. C. 542. cione advocata, ita disseruit: *Nemo ante me novus*
 A. C. 210. *imperator militibus suis prius, quam opera eorum usus*
 Scipionis *esset, gratias agere jure ac merito potuit. Me vobis*
 oratio ad *prius, quam provinciam aut castra viderem, obligavit*
 milites. *fortuna: primum, quod ea pietate erga patrem patru-*
umque meum vivos mortuosque fuistis: deinde, quod
amissam tanta clade provinciæ possessionem, integram,
et populo Romano et successori mihi, virtute vestra ob-
tinuistis. Sed quum jam benignitate Deum id paremus
atque agamus, non ut ipsi maneamus in Hispania, sed
ne Pæni maneant, nec ut pro ripa Iberi stantes arcea-
mus transitu hostes, sed ut ultro transeamus, transfera-
musque bellum; vereor, ne cui vestrum majus id auda-
ciusque consilium, quam aut pro memoria cladum nu-
per acceptarum, aut pro ætate mea, videatur. Ad-
versæ pugnæ in Hispania nullius in animo, quam meo,
minus obliterari possunt. Quippe cui pater et patruus
intra triginta dierum spatium, ut aliud super aliud cu-
mularetur familiæ nostræ funus, interfecti sunt. Sed
ut familiaris pene orbitas ac solitudo frangit animum;
ita publica quum fortuna tum virtus desperare de sum-
ma rerum prohibet. Ea fato quodam data nobis sors
est, ut magnis omnibus bellis victi vicerimus. Vetera
omitto, Porsenam, Gallos, Samnites: a Punicis bellis
incipiam. Quot classes, quot duces, quot exercitus
priore bello amissi sunt? Jam quid hoc bello memo-
rem? Omnibus aut ipse adfui cladibus: aut, quibus
afui, maxime unus omnium eas sensi. Trebia, Trasi-
menus, Cannæ, quid aliud sunt, quam monumenta oc-
cisorum exercituum consulumque Romanorum? Adde
defectionem Italiæ, Siciliæ majoris partis, Sardiniae.
Adde ultimum terrorem ac pavorem, castra Punica in-
ter Anienem et mænia Romana posita, et visum prope

in portis victorem Hannibalem. In hac ruina rerum U. C. 542.
stetit una integra atque immobilis virtus populi Romani. A. C. 210.

Hæc omnia strata humi erexit ac sustulit. Vos omnium primi, milites, post Cannensem cladem vadenti Hasdrubali ad Alpes Italiamque, qui si se cum fratre conjunxisset, nullum jam nomen esset populi Romani, ductu auspicioque patris mei obstitistis: et hæ secundæ res illas adversas sustinuerunt. Nunc, benignitate Deûm, omnia secunda, prospera, in dies lætiora ac meliora in Italia Siciliaque geruntur. In Sicilia Syracusæ, Agrigentum captum, pulsi tota insula hostes, receptaque provincia in ditione populi Romani est. In Italia Arpi recepti, Capua capta. Iter omne ab urbe Roma trepida fuga emensus Hannibal, in extremum angulum agri Bruttii compulsus, nihil jam majus precatur Deos, quam ut incolumi cedere atque abire ex hostium terra liceat. Quid igitur minus conveniat, milites, quam, quum aliæ super alias clades cumlarentur, ac Dii prope ipsi cum Hannibale starent, vos hic cum parentibus meis (æquentur enim etiam honore nominis) sustinuisse labantem fortunam populi Romani; nunc eosdem, quia illic omnia secunda lætaque sunt, animis deficere? Nuper quoque quæ acciderunt, utinam tam sine meo luctu, quam vestro, transissent! Nunc Dii immortales imperii Romani præsides, qui centuriis omnibus, ut mihi imperium juberent dari, fuere auctores, iidem auguriis auspiciisque, et per nocturnos etiam visus omnia læta ac prospera portendunt. Animus quoque meus, maximus mihi ad hoc tempus vates, præagit, nostram Hispaniam esse: brevi extorre hinc omne Punicum nomen, maria terrasque fæda fuga inpleturum. Quod mens sua sponte divinatur, idem subjicit ratio haud fallax. Vexati ab iis socii nostram fidem per legatos inplorant: tres duces

U. C. 542. *discrepantes, prope ut defecerint alii ab aliis, trifariam*
 A. C. 210. *exercitum in diversissimas regiones distraxere. Eadem*
in illos ingruit fortuna, quæ nuper nos adflixit: nam
et deseruntur ab sociis, ut prius ab Celtiberis nos: et
diduxerunt exercitus; quæ patri patruoque meo caussa
exitii fuit. Nec discordia intestina coire eos in unum
sinet, neque singuli nobis resistere poterunt. Vos mo-
do, milites, favete nomini Scipionum, soboli imperato-
rum vestrorum, velut adcisis recrescenti stirpibus. Agite,
milites veteres, novum exercitum novumque ducem tra-
ducite Iberum, traducite in terras cum multis fortibus
factis sæpe a vobis peragratas. Brevi faciam, ut, quem-
admodum nunc noscitis in me patris patruique si-
militudinem oris vultusque, et lineamenta corporis; ita
ingenii, fidei, virtutisque exemplum expressam ad effi-
giem vobis reddam, ut revixisse, aut renatum sibi quis-
que Scipionem imperatorem dicat.

XLII. Hac oratione accensis militum animis, relicto ad præsidium regionis ejus M. Silano, cum tribus millibus peditum et trecentis equitibus, ceteras omnes copias (erant autem viginti quinque millia peditum, duo millia et quingenti equites) Iberum trajecit. Ibi quibusdam suadentibus, ut, quoniam in tres tam diversas regiones discessissent Punici exercitus, proximum adgrederetur, periculum esse ratus, ne eo facto in unum omnes contraheret, nec par esset unus tot exercitibus, Karthaginem Novam interim obpugnare statuit; urbem quum ipsam opulentam suis opibus, tum hostium omni bellico adparatu plenam; (ibi arma, ibi pecunia, ibi totius Hispaniæ obsides erant) sitam præterea quum opportune ad trajiciendum in Africam, tum super portum satis amplum quantævis classi, et nescio an unum in

Karthago
 Nova ob-
 pugnata.

Hispaniæ ora, qua nostro adjacet mari. Nemo om- U. C. 542.
 nium, quo iretur, sciebat, præter C. Lælium. Is, A. C. 210.
 classe circummissus, ita moderari cursum navium
 jussus erat, ut eodem tempore exercitus ostendere-
 tur, et classis portum intraret. Septimo die ab Ibero
 Karthaginem ventum est simul terra marique: cas-
 tra ab regione urbis, qua in septentrionem versa est,
 posita: his ab tergo (nam frons natura tuta erat)
 vallum objectum. Ceterum sita Karthago sic est.
 Sinus est maris media fere Hispaniæ ora, maxime
 Africo vento obpositus, et quingentos passus intror-
 sus retractus, paullulo plus passuum in latitudinem
 patens: hujus in ostio sinus parva insula objecta ab
 alto portum ab omnibus ventis, præterquam Africo,
 tutum facit: ab intimo sinu peninsula excurrit, tu-
 mulus is ipse, in quo condita urbs est, ab ortu solis
 et a meridie cincta mari: ab occasu stagnum clau-
 dit, paullum et ad septentrionem fusum; incertæ al-
 titudinis, utcumque exæstuat aut deficit mare. Con-
 tinenti urbem jugum ducentos fere et quinquaginta
 passus patens conjungit: unde quum tam parvi ope-
 ris munitio esset, non objecit vallum imperator Ro-
 manus: seu fiduciam hosti superbe ostentans, sive
 ut subeunti sæpe ad mœnia urbis recursus pateret.

XLIII. Cetera, quæ munienda erant, quum per-
 fecisset, naves etiam in portu, velut maritimam quo-
 que ostentans obsidionem, instruxit: circumvectus-
 que classem, quum monuisset præfectos navium, ut
 vigilias nocturnas intenti servarent, omnia ubique
 primo obsessum hostem conari: regressus in castra,
 ut consilii sui rationem, quod ab urbe potissimum
 obpugnanda bellum orsus esset, militibus ostenderet,
 et spem potiundæ cohortando faceret, concione ad-

U. C. 542. vocata ita disseruit : *Ad urbem unam obpugnandum si*

A. C. 210. *quis vos adductos credit, is magis operis vestri, quam emolumentum rationem exactam, milites, habet. Obpugnabit enim vere mœnia unius urbis, sed in una urbe universam ceperitis Hispaniam. Hic sunt obsides omnium nobilium regum populorumque : qui, simul in potestate vestra erunt, extemplo omnia, quæ nunc sub Karthaginiensibus sunt, in ditionem tradent. Hic pecunia omnis hostium, sine qua neque illi gerere bellum possunt, quippe qui mercenarios exercitus alant ; et quæ nobis maximo usui ad conciliandos animos barbarorum erit. Hic tormenta, arma, armamenta, et omnis apparatus belli est, qui simul et vos instruet, et hostes nudabit. Potiemur præterea quum pulcherrima opulentissimaque urbe, tum opportunissima portu egregio, unde terra marique, quæ belli usus poscunt, subpeditentur : quæ quum magna ipsi habebimus, tum demserimus hostibus multo majora. Hæc illis arx, hoc horreum, ærarium, armamentarium, hoc omnium rerum receptaculum est. Hinc rectus in Africam cursus est : hæc una inter Pyrenæum et Gades statio : hinc omni Hispaniæ inminet Africa. Sed, quoniam vos instructos et ordinatos cognosco, ad Karthaginem novam obpugnandam totis viribus et bono animo transeamus. Quinque omnes una voce, hoc faciendum, subclamarent, eos Karthaginem duxit : tum terra marique eam obpugnari jubet.*

Cohortatur milites Scipio.

Karthago Nova expugnata.

XLIV. Contra Mago Pœnorum dux, quum terra marique instrui obpugnationem videret, et ipse copias ita disponit. Oppidanorum duo millia ab ea parte, qua castra Romana erant, obponit : quingentis militibus arcem insedit : quingentos tumulo urbis in orientem verso inponit : multitudinem aliam, quo

clamor, quo subita vocasset res, intentam ad omnia U. C. 542.
obcurrere jubet. Patefacta deinde porta, eos, quos A. C. 210.
in via ferente ad castra hostium instruxerat, mittit.
Romani, duce ipso præcipiente, parumper cessere,
ut propiores subsidiis in certamine ipso submitten-
dis essent. Et primo haud inpari stetere acie: sub-
sidia deinde, idemtidem submissa e castris, non aver-
terunt solum in fugam hostes, sed adeo effusis insti-
terunt, ut, nisi receptui cecinisset, permixti fugienti-
bus inrupturi fuisse in urbem viderentur. Trepida-
tio vero non in prælio major, quam tota urbe fuit:
multæ stationes pavore atque fuga desertæ sunt, re-
lictique muri; quum, qua cuique erat proximum,
desiluissent. Quod ubi egressus Scipio in tumulum,
quem Mercurii vocant, animadvertit, multis partibus
nudata defensoribus mœnia esse; omnes e castris
excitos ire ad obpugnandam urbem, et ferre scalas
jubet: ipse, trium præ se juvenum validorum scutis
obpositis, (ingens enim jam vis omnis generis telo-
rum e muris volabat) ad urbem succedit, hortatur,
imperat, quæ in rem sunt: quodque plurimum ad
accendendos militum animos intererat, testis spec-
tatorque virtutis atque ignaviæ cujusque adest. Ita-
que in vulnera ac tela ruunt; neque illos muri, ne-
que superstantes armati arcere queunt, quin certa-
tim adscendant. Et ab navibus eodem tempore ea,
quæ mari adluitur, pars urbis obpugnari cœpta est.
Ceterum tumultus inde major, quam vis, adhiberi
poterat: dum adplicant, dum partim exponunt sca-
las militesque, dum, qua cuique proximum est, in
terram evadere properant, ipsa festinatione et cer-
tamine alii alios inpediunt.

U. C. 542.
A. C. 210.

XLV. Inter hæc repleverat jam Pœnus armatis muros, et vis magna, ex ingenti copia congesta, telorum subpeditabat. Sed neque viri, nec tela, nec quidquam aliud æque, quam mœnia ipsa sese, defendebant: raræ enim scalæ altitudini æquari poterant: et, quo quæque altiores, eo infirmiores erant. Itaque, quum summus quisque evadere non posset, subirent tamen alii, onere ipso frangebantur: quidam, stantibus scalis, quum altitudo caliginem oculis obfudisset, ad terram delati sunt. Et quum passim homines scalæque ruerent, et ipso successu audacia atque alacritas hostium cresceret, signum receptui datum est; quod spem non præsentis modo ab tanto certamine ac labore quietis obsessis, sed etiam in posterum dedit, scalis et corona capi urbem non posse: opera et difficilia esse, et tempus datura, ad ferendam opem, imperatoribus suis. Vix prior tumultus conticnerat, quum Scipio ab defessis jam vulneratisque recentes integrosque alios accipere scalas jubet, et vi majore adgredi urbem. Ipse, ut ei nunciatum est, æstum decedere, quod per piscatores Tarraconenses, nunc levibus cymbis, nunc, ubi eæ siderent, vadis pervagatos stagnum, compertum habebat, facilem pedibus ad murum transitum dari, eo secum armatos duxit. Medium ferme diei erat: et ad id, quod sua sponte cedente in mare æstu trahebatur aqua, acer etiam Septentrio ortus inclinatum stagnum eodem, quo æstus, ferebat, et adeo nudaverat vada, ut alibi umbilico tenus aqua esset, alibi genua vix superaret. Hoc, cura ac ratione compertum, in prodigium ac Deos vertens Scipio, qui ad transitum Romanis mare verterent, et stagno aufer-

rent, viasque ante numquam initas humano vestigio U. C. 542.
aperirent, Neptunum jubebat ducem itineris sequi, A. C. 210.
ac medio stagno evadere ad mœnia.

XLVI. Ab terra ingens labor succedentibus erat : nec altitudine tantum mœnium inpediebantur, sed quod euntes ad ancipites utrimque ictus subjectos habebant Romanos ; ut latera infestiora subeuntibus, quam adversa corpora, essent. At parte in alia quingentis et per stagnum facilis transitus, et in murum adscensus inde fuit : nam neque opere emunitus erat, ut ubi ipsius loci ac stagni præsidio satis creditum foret ; nec ulla armatorum statio aut custodia obposita, intentis omnibus ad opem eo ferendam, unde periculum ostendebatur. Ubi urbem sine certamine intravere, pergunt inde, quanto maximo cursu poterant, ad eam portam, circa quam omne contractum certamen erat, in quod adeo intenti omnium non animi solum fuere, sed etiam oculi auresque pugnantium spectantiumque et adhortantium pugnautes, ut nemo ante ab tergo senserit captam urbem, quam tela in aversos inciderunt, et utrimque ancipitem hostem habebant : tunc, turbatis defensoribus metu, et mœnia capta, et porta intus forisque pariter refringi cœpta : et mox cædendo contractis, ne iter inpediretur, foribus, armati inpetum fecerunt. Magna multitudo et muros transcendebat, sed hi passim ad cædem oppidanorum versi : illa, quæ portam ingressa erat, justa acies, cum ducibus, cum ordinibus, media urbe in forum processit. Inde quum duobus itineribus fugientes videret hostes, alios ad tumulum in orientem versum, qui tenebatur quingentorum militum præsidio, alios in arcem, in quam et ipse Mago cum omnibus fere arma-

U. C. 542. tis, qui muris pulsi fuerant, refugerat; partim co-
 A. C. 210. piarum ad tumulum expugnandum mittit, partim ipse
 ad arcem ducit: et tumulus primo inpetu est captus,
 et Mago, arcem conatus defendere, quum omnia hos-
 tium plena videret, neque spem ullam esse, se ar-
 cemque et præsidium dedit. Quoad dedita arx
 est, cædes tota urbe passim factæ; nec ulli pube-
 rum, qui obuius fuit, parcebatur: tum, signo dato,
 cædibus finis factus: ad prædam victores versi, quæ
 ingens omnis generis fuit.

Præda in-
 gens.

XLVII. Liberorum capitum virile secus ad de-
 cem millia capta: inde, qui cives Novæ Karthaginis
 erant, dimisit: urbemque et sua omnia, quæ reliqua
 eis bellum fecerat, restituit. Opifices ad duo millia
 hominum erant; eos publicos fore populi Romani
 edixit, cum spe propinqua libertatis, si ad ministeria
 belli enise operam navassent. Ceteram multitudi-
 nem incolarum juvenum, ac validorum servorum, in
 classem ad supplementum remigum dedit: et aux-
 erat navibus octo captivis classem. Extra hanc mul-
 tudinem Hispanorum obsides erant: quorum per-
 inde, ac si sociorum liberi essent, cura habita. Cap-
 tus et adparatus ingens belli; catapultæ maximæ
 formæ centum viginti, minores ducentæ octoginta
 et una: ballistæ majores viginti tres, minores quin-
 quaginta duæ: scorpionum majorum minorumque,
 et armorum telorumque, ingens numerus: signa mi-
 litaria septuaginta quatuor. Et auri argentique re-
 lata ad imperatorem magna vis: pateræ aureæ fue-
 runt ducentæ septuaginta sex, libras ferme omnes
 pondo: argenti facti signatique decem et octo millia
 et trecenta pondo: vasorum argenteorum magnus
 numerus. Hæc omnia C. Flaminio quæstori ad-

pensa adnumerataque sunt : tritici quadraginta millia U. C. 542.
 modiûm, hordei ducenta septuaginta. Naves onerariæ sexaginta tres in portu expugnatae captæque :
 quædam cum suis oneribus, frumento, armis, ære
 præterea, ferroque, et linteis, et sparto, et navali alia
 materia ad classem ædificandam : ut minimum om-
 nium, inter tantas opes belli captas, Karthago ipsa
 fuerit. A. C. 210.

XLVIII. Eo die Scipio, C. Lælio cum sociis na-
 valibus urbem custodire jusso, ipse in castra legiones
 reduxit : fessosque milites omnibus uno die belli
 operibus (quippe qui et acie dimicassent, et capien-
 da urbe tantum laboris periculique adissent, et capta,
 cum iis, qui in arcem confugerant, iniquo etiam lo-
 co pugnassent) curare corpora jussit. Postero die,
 militibus navalibusque sociis convocatis, primum
 Diis immortalibus laudesque et grates egit, qui se
 non urbis solum opulentissimæ omnium in Hispania
 uno die compotem fecissent, sed ante eo conguessis-
 sent omnis pene Africæ atque Hispaniæ opes : ut
 neque hostibus quidquam relinqueretur, et sibi ac
 suis omnia superessent. Militum deinde virtutem
 conlaudavit, quod eos non eruptio hostium, non al-
 titudo mœnium, non inexplorata stagni vada, non
 castellum in alto tumultu situm, non munitissima arx
 deterruisset, quo minus transcenderent omnia per-
 rumperentque. Itaque, quamquam omnibus omnia
 deberet, præcipuum muralis coronæ decus ejus esse,
 qui primus murum adscendisset : profiteretur, qui se
 dignum eo duceret dono. Duo professi sunt : Q. Trebellius centurio legionis quartæ, et Sex. Dig-
 tius socius navalis : nec ipsi tam inter se acriter
 contendebant, quam studia excitaverant uterque sui

Certamen
de murali
corona.

U. C. 542. corporis hominum. Sociis C. Lælius præfectus clas-
 A. C. 210. sis; legionariis M. Sempronius Tuditanus aderat. Ea contentio quum prope seditionem veniret, Scipio tres recuperatores quum se daturum pronunciasset, qui, cognita caussa testibusque auditis, judicarent, uter prior in oppidum transcendisset; C. Lælio et M. Sempronio advocatis partis utriusque P. Cornelium Caudinum de medio adjecit; eosque tres recuperatores considerare, et causam cognoscere jussit. Quum res eo majore ageretur certamine, quod amoti tantæ dignitatis non tam advocati, quam moderatores studiorum fuerant; C. Lælius, relicto consilio, ad tribunal ad Scipionem accedit, eumque docet, *rem sine modo ac modestia agi: ac prope esse, ut manus inter se conserant. Ceterum, etiamsi vis absit, nihilominus detestabili exemplo rem agi; quippe ubi fraude ac perjurio decus petatur virtutis. Stare hinc legionarios milites, hinc classicos, per omnes Deos paratos jurare, magis quæ velint, quam quæ sciant, vera esse, et obstringere perjurio non se solum suumque caput, sed signa militaria, et aquilas, sacramentique religionem. Hæc se ad eum de sententia P. Cornelii et M. Sempronii deferre.* Scipio, conlaudato Lælio, ad concionem advocavit, pronunciavitque, *Se satis compertum habere, Q. Trebellium et Sex. Digitium pariter in murum escendisse: seque eos ambos, virtutis caussa, coronis muralibus donare.* Tum reliquos, prout cuique meritum virtusque erat, donavit: ante omnes C. Lælium præfectum classis et omni genere laudis sibimet ipse æquavit, et corona aurea ac triginta bubus donavit.

XLIX. Tum obsides civitatum Hispaniæ vocari jussit: quorum quantus numerus fuerit, piget scri-

bere, quippe quum alibi trecentos ferme, alibi septingentos viginti quinque fuisse inveniam. *Æque et* U. C. 342.
A. C. 210.
 alia inter auctores discrepant. Præsidium Punicum alius decem, alius septem, alius haud plus quam duum millium fuisse scribit. Capta alibi decem millia capitum, alibi supra quinque et viginti invenias. Scorpiones majores minoresque ad sexaginta captos scripserim, si auctorem Græcum sequar Silenum: si Valerium Antiatem, majorum scorpionum sex millia, minorum tredecim: adeo nullus mentiendo modus est. Ne de ducibus quidem convenit: plerique Lælium præfuisse classi; sunt, qui M. Junium Silanum dicant. Arinem præfuisse Punico præsidio, deditumque Romanis, Antias Valerius; Magonem alii scriptores tradunt. Non de numero navium captarum, non de pondere auri atque argenti, et redactæ pecuniæ, convenit. Si aliquibus adsentiri necesse est, media simillima veris sunt. Ceterum Scipio, vocatis obsidibus, primum universos bonum animum habere jussit. *Venisse eos in populi Romani potestatem, qui beneficio, quam metu, obligare homines malit; exterarum gentes fide ac societate junctas habere, quam tristi subjectas servitio.* Deinde, acceptis nominibus civitatum, recensuit captivos, quorum cujusque populi essent: et nuncios domum misit, ut ad suos quisque recipiendos veniret. Si quarum forte civitatum legati aderant, eis præsentibus suos restituit: ceterorum curam benigne tuendorum C. Flaminio quæstori adtribuit. Inter hæc e media turba obsidum mulier magno natu, Mandonii uxor, qui frater Indibilis Ilergetum reguli erat, flens ad pedes imperatoris procubuit, obtestarique cœpit, ut curam cultumque feminarum impensius custodibus

Scipionis
 in obsides
 humani-
 tas.

U. C. 542. commendaret: quum Scipio, *nihil profecto defutu*
 A. C. 210. *rum*, diceret; tum rursus mulier, *Haud magni isti*
facimus, inquit: *quid enim huic fortunæ non satis est?*
Alia me cura, ætatem harum intuentem, (nam ipsa jam
extra periculum injuriæ muliebris sum) stimulat. Ætat
et forma florentes circa erant Indibilis filiæ, aliæque
nobilitate pari, quæ omnes eam pro parente cole
bant. Tum Scipio, Meæ populique Romani disciplin
caussa facerem, inquit, *ne quid, quod sanctum usquaq*
esset, apud nos violaretur: nunc, ut id curem inper
sus, vestra quoque virtus dignitasque facit: quæ ne i
malis quidem oblita decoris matronalis estis. Specta
tæ deinde integritatis viro tradidit eas, tuerique hau
secus verecunde ac modeste, quam hospitem con
juges ac matres, jussit.

Sponsa
 Allucii
 pudice
 servata.

Oratio ad
 eum Sci-
 pionis.

L. Captiva deinde a militibus adducitur ad eur
 adulta virgo, adeo eximia forma, ut quacumque in
 cedebat, converteret omnium oculos. Scipio, per
 cunctatus patriam parentesque, inter cetera accepit
 desponsam eam principi Celtiberorum adolescenti
 Allucio nomen erat. Extemplo igitur parentibu
 sponsoque ab domo aditis, quum interim audiret
 deperire eum sponsæ amore, ubi primum venit, ad
 curatiore eum sermone, quam parentes, adloquitur
Juvenis, inquit, juvenem adpello, quo minor sit inte
nos hujus sermonis verecundia. Ego, quum sponsa tu
capta a militibus nostris ad me ducta esset, audiremque
eam tibi cordi esse, et forma faceret fidem, quia ipse
si frui liceret ludo ætatis, (præsertim recto et legitim
amore) et non respublica animum nostrum occupasset
veniam mihi dari sponsam inpensius amanti vellem
tuo, cujus possum, amori faveo. Fuit sponsa tua apud
me eadem, qua apud soceros tuos parentesque suos, ve

*recundia ; servata tibi est, ut inviolatum et dignum me teque dari tibi donum posset. Hanc mercedem unam pro eo munere paciscor : amicus populo Romano sis : et, si me virum bonum credis esse, quales patrem patruumque meum jam ante hæ gentes norant, scias multos nostri similes in civitate Romana esse ; nec ullum in terris populum hodie dici posse, quem minus tibi hostem tuisque esse velis, aut amicum malis. Adolescens, simul pudore et gaudio perfusus, dextram Scipionis tenens, Deos omnes invocare ad gratiam illi pro se referendam, quoniam sibi nequaquam satis facultatis, pro suo animo atque illius erga se merito, esset. Parentes inde cognatique virginis adpellati : qui, quoniam gratis sibi redderetur virgo, ad quam redimendam satis magnum adtulissent auri pondus, orare Scipionem, ut id ab se donum acciperet, cœperunt : haud minorem ejus rei apud se gratiam futuram esse, adfirmantes, quam redditæ inviolatæ foret virginis. Scipio, quando tanto opere peterent, accepturum se pollicitus, poni ante pedes jussit : vocatoque ad se Allucio, *Super dotem, inquit, quam accepturus a socero es, hæc tibi a me dotalia dona accedent* : aurumque tollere, ac sibi habere jussit. His lætus donis honoribusque dimissus domum, inplevit populares laudibus meritis Scipionis : *Venisse Diis simillimum juvenem, vincentem omnia, quum armis, tum benignitate ac beneficiis*. Itaque, delectu clientium habito, cum delectis mille et quadringentis equitibus intra paucos dies ad Scipionem revertit.*

LI. Scipio retentum secum Lælium, dum captivos obsidesque et prædam ex consilio ejus diserneret, satis omnibus compositis, data quinquere, captivisque Magone et quindecim fere senatoribus,

U. C. 542.

A. C. 210.

U. C. 542. qui simul cum eo capti erant, in navem inpositis,
 A. C. 210. nuncium victoriæ Romam mittit: ipse paucos dies,
 quibus morari Karthagine statuerat, exercendis na-
 valibus pedestribusque copiis absumsit. Primo die
 legiones in armis quatuor millium spatio decurre-
 runt: secundo die arma curare et tergere ante ten-
 toria jussit: tertio die rudibus inter se in modum
 justæ pugnæ concurrerunt, præpilatisque missilibus
 jaculati sunt: quarto die quies data: quinto iterum
 in armis decursum est. Hunc ordinem laboris quie-
 tisque, quoad Karthagine morati sunt, servarunt.
 Remigium classicique milites, tranquillo in altum
 evecti, agilitatem navium simulacris navalis pugnæ
 experiebantur. Hæc extra urbem terra marique cor-
 pora simul animosque ad bellum acuebant: urbs ipsa
 strepebat adparatu belli, fabris omnium generum in
 publica officina inclusis: dux cuncta pari cura obi-
 bat: nunc in classe ac navali erat; nunc cum legi-
 onibus decurrebat; nunc operibus adspiciendis tem-
 pus dabat, quæque in officinis, quæque in armamen-
 tario ac navalibus fabrorum multitudo plurima in
 singulos dies certamine ingenti faciebat. His ita
 inchoatis, reffectisque, qua quassi erant, muris, dis-
 positisque præsidiis ad custodiam urbis, Tarraconem
 est profectus, a multis legationibus protinus in via
 aditus: quas partim dato responso ex itinere dimi-
 sit, partim distulit Tarraconem, quo omnibus novis
 veteribusque sociis edixerat conventum. Et cuncti
 fere, qui cis Iberum incolunt, populi, multi etiam
 ulterioris provinciæ convenerunt. Karthaginiensium
 duces primo ex industria famam captæ Karthaginis
 compresserunt: deinde, ut clarior res erat, quam ut
 tegi ac dissimulari posset, elevabant verbis. Neco-


It Tarra-
 conem.

pinato adventu ac prope furto unius diei urbem unam U. C. 542.
Hispaniæ interceptam: cujus rei tam parvæ præmio A. C. 210.
elatum insolentem juvenem, inmodico gaudio speciem
magnæ victoriæ inposuisse. At, ubi adpropinquare tres
duces, tres victores hostium exercitus audisset, obcur-
suram ei extemplo domesticorum funerum memoriam.
Hæc in vulgus jactabant, haudquaquam ipsi ignari,
quantum sibi ad omnia virium, Karthagine amissa,
decessisset.

FINIS TOM. II.









PA
6452
A2
1800
t.2

Livius, Titus
Historiarum quae
supersunt

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

